



清代傳記叢刊·綜錄類⑦  
周 駿 富 輯

# 國朝耆獻類徵初編(二)

卷一〇三至  
卷一一三

(清)李桓輯



明文書局印行



國朝書獻類徵初編卷一百三目錄

卿貳六十三

韓封

祖之望

邵自昌

吉綸

子桂德

書銘

額勒布

初彭齡

--	--	--	--	--	--	--	--	--	--

147-004

國朝耆獻類徵初編卷一百三

通奉大夫前署江西巡撫江西布政使司布政使湘陰李桓輯  
卿貳六十三

韓封

韓封江蘇元和人乾隆四十二年拔貢 朝考一等以七品小京  
官用分刑部拔貢用京官自是科始四十八年升主事五十一年  
遷員外郎五十三年升郎中五十四年京察一等十月截取繁缺  
知府選授河南彰德府知府尋升廣東高廉兵備道五十六年兼  
攝高州府篆五十七年失察吳川縣知縣沈峻庇縱私鹽降三級  
調用旋丁母憂六十年服闋奏畱刑部以主事用嘉慶元年補主

事二年遷員外郎四年升郎中六年京察一等投湖南岳常澧道  
七年遷按察使八年八月兼署布政使十一月調福建按察使尋  
以署布政使任內違例調署湘潭縣令又遲遲綏靖兵米暨未陽  
命犯委檢遲延降四級畱任九年四月入 覲六月抵任十月署  
布政使十年洋匪蔡牽擾臺灣土盜朱瀆等同時劫掠洋面封籌  
備勦捕禁奸民接濟盜船水米火藥尋升湖南布政使十一年四  
月以署福建布政使管寶福局時未將缺銅籌備年終率行結報  
降一級畱任五月護理湖南巡撫十月授刑部右侍郎十二年正  
月轉左侍郎二月借吏部侍郎玉麟職安徽壽州獄旋 命改道  
荊州鞫將軍積拉堪交結知府等事會南河有徙河改道之議

命順道詣勘封議修築減壩仍由雲梯關入海 從之十二月署  
戶部右侍郎兼管錢法堂事以任湖南藩司時失察書吏冒領庫  
銀革職畱任十三年六月借吏部尙書鄒炳泰赴河間鞠生員夏  
允中唆訟等獄是月刑部會同宗人府審宗室敏學逞毆事奏入  
上以有心爲微學開脫 諭曰韓封雖未在京但伊前此屢經  
奏及此事察其詞意亦欲從輕完結并聞刑部事務皆伊先行駁  
定朕簡用六部尙書侍郎理宜和衷共濟遇事虚心商榷何得一  
人主持致啟專擅之漸韓封著降補廣東按察使十月護理巡撫  
十二月實授十四年正月兼署兩廣總督時朱濱盜船竄粵之長  
山尾洋面土盜張保仔等又於佛堂門洋面游奕封檄各鎮合力



兜剿殲瀆及餘黨無算二月疏陳控制事宜請自伽思蘭礮臺迤南一帶加築女牆二百餘丈並於前山寨添設專營蓮花莖加築關牖石垣新涌山口添建礮臺一座蕉門填堵海口皆得 旨允行三月密陳粵東洋面情形略言沿海村落隨處可達外洋賊匪易生窺伺必先固內而後禦外凡屬扼要礮臺宜多撥弁兵嚴固防守並令沿海地方衿耆董率丁壯互相捍護各守段落自衛身家較爲得力 上以良法美意全在有治人勸勉之五月條議華夷交易章程一外夷兵船應停泊外洋以肅邊防一澳內華夷宜分別稽查一各國夷商止准暫留司事之人經理貨帳餘飭依期歸國不許在澳逗留一夷船引水人等宜責令澳門同知給發牌

照一夷商買辦人等宜責成地方官慎選承充隨時查察一夷船起貨時責令洋行按股交易不准奸夷私自分撥下軍機大臣等議行其五又請酌量平糶倉穀以濟民食 允之十五年二月以上年廣東秋讞失出部議降調 上特寬之時張保仔率眾二萬餘人投誠六月擒巨寇烏石二等誅之餘盜東海霸等悉降海洋一律肅清奏入 賞戴花翎下部議敘並 賞煙壺及黃辮大小荷包八月會議分船巡緝洋面章程請別統巡總巡分巡會哨名目以均勞逸而專責成校閱巡洋兵丁以船之大小配兵之多寡寬給口糧以示體恤 上如所請行十六年正月復署兩廣總督三月奏粵東濱海環山產米無多請免其納稅以通商販裕民食

十月奏潮州俗好械鬪額設官役不敷緝捕而營員於民案向無  
協緝之責是以獲兇甚難請嗣後令文員會營協拏又以潮州距  
省較遠請將軍流以下罪犯就近解赴巡道覆覈皆允之十七  
年正月閩匪復竄澄海外洋封獲盜崔明等誅之飭鎮將實力巡  
緝并絕其逃入越南之路上甚是之三月疏言懲治悍俗章程  
請如四川例罪人初犯械繫之限一年改行積兩限如故卽治以  
棍徒屢次滋擾律如所請行十八年四月以內河陸路疊獲積匪  
下部議敘六月疏言粵省常平倉穀舊虧一百三十萬九千餘石  
設法彌補請以十年爲限上允所請十月入覲遷刑部尙書  
十一月翰林清等逆案上諭曰此次堂司各官晝夜研鞫不辭

勞率能將緊要逆情逐一究出韓對著賞給貂皮褂一件以示鼓勵  
十九年封父韓是升年八十 賞假三月歸爲壽並 賜御書  
扁額珍物假滿還京兼署兵部尙書二十年以刑部積壓本章革  
花翎降二品頂帶仍革職畱任二十一年三月因前任福建布政  
使濫借養廉降二級畱任九月以秋審所擬改緩改實均各允協  
賞還頭品頂帶仍戴花翎十一月丁父憂二十四年三月服闋  
命以一品銜署刑部右侍郎閏四月補刑部尙書五月以查辦  
黑龍江官犯將不應列入之門領李德潤等未經扣除降二級畱  
任八月因疎防在監官犯自縊革職畱任十一月 命紫禁城騎  
馬二十五年承審兵部遺失行在印信日久未得確供降二品頂

國朝通志卷之二十三  
帶革花翎旋訊明失於上年秋圍途次論典守不慎及含混接收  
各官罪如律復一品頂帶及花翎道光元年以德勝門城上失落  
木植查訊多日不能究出正賊降三級畱任二年三月酌改犯婦  
實發定例四條議行其二六月條議查辦煤窯鍋火章程三年籌  
議募充件作章程酌增捉人勒贖條例四年正月酌議粵省打單  
匪犯治罪專條皆從之五月以擬流言犯侯際清賄求贖罪事  
覺詞連封革職待質閏七月訊明定讞諭曰此案侯際清以擬  
流官犯在刑部呈請贖罪韓封在部最久於刑名尤爲諳練乃辦  
理奏稟時旣覈其情節較重仍以可否准贖雙請殊屬取巧含混  
據托津等訊明韓封實無聽囑受賄情事惟失察官吏舞弊及嗣

子知情親戚撞騙且案內獲咎司員恩德等皆係保列一等之人  
盛思道又係韓封於上年濫行保畱種種昏憤卽照托津等所議  
從重發往軍臺本屬咎所應得姑念韓封年近七十著從寬免其  
發遣加恩在萬年吉地工程處效力贖罪五年八月 賞三品頂  
帶署刑部右侍郎尋 賞加二品頂帶六年因病奏請回籍十四  
年卒子箴議敘道銜

右 國史館本傳

韓旭亭先生諱是升今大司寇桂齡封父也性和藹居家勤儉年  
四十卽棄儒冠游食四方余少及其門嘗語人曰天下事多矣未  
有驕盈而不敗者恆以謙抑自居雖僕夫媼婦必接之以溫顏其

子雖屢任封疆而先生純素如故也嘗寄書與司寇云余今年秋收甚佳所植菽稷頗足釀酒筆墨足以代耕儘有餘享汝所獲廉俸豐膳其養贍妻孥之餘猶有餘貲切勿貪分外之榮致使七十垂盡之翁反被汝所累也故司寇謹守先生教始終以敬謹受今上知遇屢登高位皆秉其家範也先生少貌岐嶷目炯如電喜作谿刻語使人莫能禁受嘗遇相士云公之貌如黃閣學孫懋嘗早貴恐不永年耳先生深自改易立功過格以自警凡利眾濟人事皆勉力爲之乾隆庚寅客京邸嘗大病病愈貌益溫有識之者云非復當年形狀矣老年遠遊燕粵吳越身愈輕健若三四旬人然甲戌春壽八十經 上賜扁旌之越二歲無病終實近世之罕

見也憶丙午閒師嘗設席余邸因余性卞急諄諄相戒以己身爲譬喻不啻再三然余終以暴戾致愆至今思之深有愧師教也

右錄宗室昭榘撰

桂船尙書年八歲塾師以校人烹之反命曰七字命題公戲作一破云小人之貪也以口小人之詐也亦以口師大加賞異謂封公樂餘先生曰此老吏斷獄手將來必掌刑名後以乾隆丁酉選拔觀政比部歷任封圻入爲大司寇精於律法中正和平爲秋官之最

右思補齋筆記潘世恩撰



自五三及六行未清

五

祖之望

祖之望福建浦城人乾隆四十三年進士改庶吉士四十五年散館改刑部主事四十九年升員外郎五十一年升郎中五十三年俸滿例應截取外任部臣以諳悉部務請畱五十四年京察一等五十六年總理刑部大學士公阿桂等奏請以四五品京堂補用畱部辦事五十七年京察一等閏四月擢通政司參議仍兼刑部行走十二月轉太常寺少卿尋授山西按察使五十八年廓爾喀軍務告竣之望總理臺站妥協 恩加一級准隨帶六十年授雲南布政使 上以其親老調補湖北布政使俾就近迎養嘉慶元年楚省教匪滋事總督畢沅湖北巡撫汪新赴荆襄一帶勦捕五

月孝感縣逆匪數千乘機竊發之望於檄到江西官兵內派撥五百名分水陸兩路進剿殲獲多名並添募鄉勇嚴密防堵奏入上嘉其功 賞戴花翎並大小荷包旋偵知賊首文禮成等屯聚胡家砦以剿捕防禦情形奏入 諭曰祖之望雖未帶兵打仗而在省城調撥防堵尙爲合宜該藩司務須悉心籌辦俾省城及漢口一帶俱能安堵無虞卽伊之功嗣經署廣州將軍明亮統兵將胡家砦賊匪殲捕淨盡七月奏善後事宜稱有民人習教未改悔者責成各義勇查明送官訊辦以淨根株 上以所辦失於欲速該省正當剿捕賊匪之時反側之徒未免心生疑慮且恐鄉勇等有挾嫌誣陷情事 諭之望不動聲色妥爲查察十月因前在山

西臬司任內失察汾州府知府張力行婪贓侵帑一案部議降一級調用上加恩改爲降三級畱任二年八月丁父憂巡撫汪新奏請畱辦軍務諭暫畱藩司之任素服辦公四年五月安襄鄖道胡齊崙侵餉事發命認真查辦之望因冊報轉轉辦理遲延上嚴飭之旋命解任回京八月定讞部議照徇庇例降三級調用諭曰胡齊崙一案本係特交祖之望審辦既經查有底帳有餽送軍營各員情事若於彼時卽行據實具奏方爲不負委任乃並不早行陳奏雖因人數眾多案關重大其心究不免迴護本應照部議降調惟念祖之望在湖北藩司任內於軍需總局支發各項尙無染指情弊且聞其平日居官聲名尙好祖之望係刑部

司員出身刑名素所諳悉著加恩以按察使降補十月乞假葬父  
省母 上加恩授刑部右侍郎仍給假六箇月五年二月在籍授  
湖南巡撫 諭令就近赴任四月具題辰溪縣令陳錫綺自戕出  
缺 上以案情甚重宜專摺陳奏不得以一題了事申飭之五月  
以尋常奏事連用驛遞部議降二級調用 上從寬改爲降三級  
畱任六月以湖南三廳散苗及鎮筵黑苗焚掠滋事節經殲獲懲  
辦將在事文武各員及苗弁苗目奏請升賞 從之十月履勘常  
德一帶隄圍查出私墾洲地百數十餘處除有執業確據日久相  
安者請免查辦餘俱明定章程責成各該管官造冊立案以息爭  
訟又查三廳堡卡移駐鎮筵營汛悉歸邊要撥設備弁以固藩籬

奏入俱經軍機大臣及部臣覈議得旨允行是月授刑部右侍郎六年三月之望於在任候代查出銷除旗檔遞解廣西軍犯書德沿途冒充官犯一案恩予議敘四月抵京召對時臚陳永殺一廳孤懸苗地不足以資控制請將廳署移駐花園協營移駐茶洞於沿邊安設碉卡防維其永綏舊城作爲汛地交苗弁駐劄就近管束各苗寨並繪圖貼說進呈上是之下湖廣總督吳熊光等查覆奏准施行六月京師大雨偕兵部侍郎那彥寶查勘近畿水災又偕戶部侍郎高杞監疏長新店河道九月轉刑部左侍郎十月充武會試總裁官七年六月充拔貢朝考閱卷官七月命赴山東查辦金鄉縣阜役之孫張敬禮冒考一案鞠實如律定

擬旋授山東巡撫十一月調陝西巡撫八年二月商州匪徒滋事  
馳往督辦因擬首犯張東春等罪名失出 飭之隨 諭督催鎮  
將楊芳等搜捕南山太白山等處餘匪三月偕陝甘總督惠齡會  
奏善後事宜請將西鄉平利鎮安三縣改爲繁缺及籌補通省常  
平倉穀並於山內各縣原貯倉額酌量加增又漢中興安商州鳳  
翔西安各屬添壯丁以資操防畱壩甯陝石泉等處築城堡以資  
捍衛均 從之八月調廣東巡撫入 覲時乞假省親 諭曰祖  
之望家有老母上年在籍患病伊時深懸念嗣伊於家信中得悉  
病已漸痊旋簡用山東巡撫調任陝西今秋復調廣東巡撫茲來  
京陛見其體氣因病後尙未大健廣東政務殷繁恐伊精神未能

周到兼之懸念老母辦公亦不免分心祖之望著加恩賞假回籍  
省親俟省親事竣伊宿恙悉蠲再行來京另候簡用九年正月在  
籍授刑部左侍郎聞 命來京四月偕大理寺少卿玉甯查勘山  
東運河及洪澤湖情形並鞫臨清州民王富貴冠縣包潛逸犯陳  
章誣控案又赴徐州安慶鞫陳景昌董再傳誣控各案均訊實懲  
治九月轉刑部左侍郎十年十月以母老乞養 予告回籍十四  
年恭逢 皇上五旬萬壽來京慶祝 賞如意帽緯荷包蟒服錦  
緞等件又以紬緞八端 賜其母十五年九月丁母憂十六年七  
月因前在湖北藩司任內失察書吏陳文俊等私雕假印事部議  
降二級調用 上加恩改爲降二級畱任十七年服闋十二月授



刑部尙書十八年十月 諭曰祖之望舊有痰疾見在刑部尙書  
事繁精神益形支絀召見時言語蹇澀奏對不能明晰實屬無用  
卽著開缺調養待病痊後再降諭旨十九年五月卒於京邸子瓊  
林二品廕生見任兵部主事

右 國史館本傳

刑部尙書浦城祖公以嘉慶十九年五月 十七日卒於京師邸  
第年六十踰年喪歸又明年九月將葬某原其孤瓊林以狀抵壽  
祺曰先君子葬有日將銘墓而難其人先君子之存也語文行輒  
亟稱太史太史則其人也敢以遺意請銘壽祺伏考尙書翊毗  
兩朝敷歷中外謨猷政治載在 國史非鄉儔所得而私也顧念

公服官三十載其蕃宣之勤色養之榮任恤之仁澹泊之節史有不及詳海內蓋未之或悉不揭而裸則使公始終志行不章其曷可辭乃爲之誌且銘誌曰公在西曹十二年總辦秋審持法平阿文成公尤器之累偕詔使讞獄涉江南江西廣西河南湖南北山東爲侍郎勘災畿輔鞠獄濟甯徐州安慶履運河視洪澤湖驛傳往返無虛歲按察山西也綜覈案牘條列小民易犯罪名曰三尺須知錄刊布於眾俾民無誤羅法網布政湖北也湖南苗民叛大吏皆統師出武昌省治獨公一人坐鎮並治兩府事日不暇給秉燭治官書常達旦而白蓮教蠢動起荆襄延鄖宜施南張甚譎言數作聞獲賊訶或得僞檄於通衢傳警者屢矣公靜定不驚密

令防禦要隘城鄉市鎮設十家牌互稽民心始帖賊稍侵孝感尋  
剪滅故下游五郡皆安堵 上以爲功 賜花翎巡撫湖南也察  
苗情規邊備宣威示信推賢任能以永綏廳孤懸不足控馭亟陳  
經久策請移治所以制之在陝西大兵勦餘孽公籌軍餉巡江岸  
置鄉勇卹災黎夙夜匪解如楚藩時爲尙書半歲值逆賊突入京  
城之變事定公寢不安食不甘旬日閒語言蹇澀雖蒙 恩優容  
予休養疾而公盡瘁之思未嘗一日自寬也其以勞定 國如此  
公之除太常也 高廟數召見詢家世及親年甚悉越日授按察  
使當是時公二親在京師公入對 高廟謂曰汝父母未老山西  
甚近可卽迎養及擢雲南布政使 命旣下復以公親老調湖北

後三年丁父憂軍興 上詔公舉經視事許持服內廨且 諭曰  
此爲軍務需人不得已權宜辦理非開在任守制例也後二年晉  
貳卿 予假歸葬當是時公適以事左遷不踰旬而荷矜全被優  
渥非忠盡上契 聖心何以及此自陝西移撫廣東公以太夫人  
在里請定省 許之太夫人八十之前歲公豫請侍養 上曰不  
必俟來年冬至後朝審事畢可行矣嘉慶十四年公至京師祝  
釐爲太夫人恭進如意壽佛等物 上垂問褒嘉因 命公侍宴  
賚予有加公抵家疏謝云 回賞臣母緞匹 諭令衣被恩榮  
謂汝母八十三齡適朕五旬萬壽期以入都祝嘏十載重來勉以  
歸里奉親百年長健蓋紀實也 上批荅曰卿母福壽絲長實深

忻慰日侍慈闈誠人間第一樂也其以孝事君如此公居家營祠堂增祀田輯祖氏遺編自始遷祖以下三十世各爲詩歌系小傳紀之棨祖無擇龍學文集以補譜牒訂鄉賢楊文公等遺書以存文獻凡事繫家國利民俗皇然亟修廢舉陞其以義處鄉如此公恆言先世家業僅供餽鬻少應府院試自家抵郡城二百七十里往返皆徒步故位躋九列服食車馬甘儉薄不葺園廬不騁遊翫歸里出則坐小輿隘不容肱其以約持躬如此公諱之望字載璜晚字子久號舫齋其先當宋咸平初有官建州者家於浦城上湖遂爲浦城人世多通顯曾祖伊娶葉張祖德洽再娶皆姚氏考率英娶吳氏三代皆贈榮祿大夫妣皆贈封夫人兄弟五人

公次二娠十二月始生年十五補縣學諸生乾隆四十二年選拔  
貢生舉鄉試明年成進士選庶吉士散館改刑部主事洊擢郎中  
爲通政司參議太常寺少卿各一按察使一布政使二巡撫四署  
河東河道總督一刑部侍郎三署戶部工部侍郎各一刑部尙書  
一署工部尙書一著節制紀聞洞神錄乳訓逸名錄邇言錄舫齋  
小言青鳳子皆山堂文鈔詩鈔凡若干卷元配吳夫人先公三十  
八年卒生女一字內閣中書金宗邵刑部尙書光悌之家子未嫁  
殤繼配甯夫人先公三十三年卒生子瓊林二品蔭生兵部候補  
主事武選司行走繼配陳夫人生子桂林早殤女二壻日內閣中  
書祝春熙戶部員外郎吳鼎臣之子贊孫旭孫女三公葬本邑招

賢里楓處下塢山之陽銘曰

傳巖之山上湖之水炳靈孕奇徽殺鶴起躡躡皋蘇儕良鬪為屢  
寄翰屏終登鉉耳喉舌在天云如何悝嗟茲哲人棟摧榱圯公魄  
則歸公忱未已世厥忠勤將在孫子

右墓誌銘陳壽祺撰

邵自昌

邵自昌順天大興人由舉人考取中書乾隆三十五年補內閣中書四十三年中式二甲一名進士改庶吉士四十五年散館改主事分兵部學習四十九年補武選司主事五十一年升員外郎尋擢郎中五十三年截取繁缺知府自昌呈請畱部供職經兵部堂官轉奏 諭曰各部司員大率多樂於外任今邵自昌在部有年截取知府經該部堂官保送堪勝繁缺知府該員呈請畱部效用尙爲體面謹飭之人若僅准照常畱部不足示勸邵自昌著加一級以昭鼓勵五十四年充會試同考官五十五年授江南道監察御史五十七年充廣東鄉試副考官嘉慶元年掌河南道監察御



史三年升戶科給事中五年轉吏科掌印給事中六年擢內閣侍  
讀學士尋轉太僕寺少卿七年六月升通政司副使十月升光祿  
寺卿八年七月 命偕侍郎賡晉赴湖南審辦零陵縣生員莊雲  
衢宜章縣生員吳集銘通道縣武生梁秉泰等控案均訊明定擬  
如律十二月升太常寺卿時湖廣總督吳熊光劾參湖南巡撫高  
杞違例調補縣令及遲誤兵米並耒陽縣知縣熊維培承審命案  
顛倒出入之處高杞及藩司通恩臬司韓封詳參遲延奏入 命  
賡晉邵自昌詳細確查一經查明高杞舞弊屬實卽行奏參嗣奏  
實無舞弊情事惟詳參熊維培一案辦理遲延請將高杞等分別  
查議 上以所擬過輕改爲議處時川陝楚軍功告蒞奉 命祭

告湖廣河南嶽瀆諸神九年 諭曰湖北省公安縣知縣葛桂芳捏病規避一案專交邵自昌查辦卽馳抵武昌訊究得實將葛桂芳照例革審定擬又 命赴河南審辦浙川縣民婦周鄧氏控案事竣回京 命提督福建學政十年升都察院左副都御史十一年升兵部右侍郎 諭令來京供職十二年三月署工部右侍郎兼管錢法堂事務十一月轉兵部左侍郎兼署禮部右侍郎十三年將曾任熱河道聲名平常改用京職之圖明阿保送寶源局監督部議照徇庇例降三級調用得 旨改爲降三級畱任十四年三月銀庫筆帖式王柱偷竊庫銀吏部以自昌前署禮部侍郎原保不慎議降三級調用奉 旨改爲降三級畱任十一月升都察

院左都御史十二月因署工部右侍郎任內失察書吏冒領庫銀降一級畱任十五年湖南民人塗正通四川民人王正明呈控命案都察院例應請旨自昌等未經具奏命交部察議尋擬罰俸抵銷十七年以衰病奏請開缺賞假一月尋以病久未痊原品休致十八年卒

右 國史館本傳

吉綸 子桂德

吉綸赫舍里氏滿洲鑲藍旗人由監生考取筆帖式乾隆四十三年補吏部筆帖式五十二年遷文選司主事五十四年京察一等升員外郎五十五年充坐糧廳監督五十七年京察一等五十八年調步軍統領衙門員外郎嘉慶三年遷郎中四年正月調工部屯田司郎中九月以奉安 裕陵禮成 命以應升之缺先行升補尋補內閣侍讀學士五年八月升太常寺卿十一月遷內閣學士兼禮部侍郎銜六年授鑲黃旗蒙古副都統七年正月調正紅旗滿洲副都統六年遷工部右侍郎七月署倉場侍郎十一月授漕運總督八年二月御史喬遠煥砥柱等以各省旗丁私典屯田

先後奏請清查 上命有漕省分督撫及漕運總督詳覆以聞先是乾隆閒江南湖北等省查辦屯田令典賣在民者計畝出銀津貼旗丁名爲以屯濟運吉綸疏言旗丁私典屯產本有應得之罪若將津貼銀按照原船給發不足示儆應令均散本幫各船至於屯田本有肥瘠科則亦有重輕出當有例前例後之不同典戶有民執軍執之各別又須查照本處情形詳勘妥協下部議行十一月以東河衛家樓漫口下游水勢消落借河南河道總督吳璥豫籌明年運道請挑邳州宿遷汎內各閘復於宿遷桃源交界築束水壩並挑挖淤淺使水有滯蓄 上嘉其深合機宜十二月因回空漕船夾帶私鹽請將賄縱之湖南頭幫千總王起運褫職逮問

並自請議處 上特原之十年五月奏酌議川楚採運民船行走  
交卸章程請參處脫空遲延運員並籌議補交虧溼米石至回空  
軍船無須在臨清關外守候採買船隻免繳楊村官剝油艙錢文  
皆得 旨允行十二年授山東巡撫 上以吉綸前在邳州督催  
剝淺閘河口黃流淤墊卽日酌帶剝船會同等辦甚屬急公 特  
賞花翎以示優異十三年左副都御史莫晉請申明定例嚴懲誣  
告以清訟源 諭曰清理訟源在地方官公正廉明勤於聽斷卽  
如山東省前次京控甚多自吉綸到任後審結積案七百餘件近  
日該省已控案寥寥卽其明驗十二月調江西巡撫十四年正月  
仍調山東巡撫四月巡視東漕給事中英綸焚賊狎妓事覺以吉

綸匿不陳奏復失察屬官逢迎餽送部議降調 上加恩改爲畱  
任六月以前在倉場侍郎任內失察花戶舞弊部議降二級調用  
上寬之十五年六月以違例保舉魚臺縣知縣俞士元升補東  
平州知州部議降調 上加恩改爲畱任十一月疏請展徵曹工  
幫價銀款籌辦水利 諭曰吉綸所奏實等於橫徵暴斂矣東省  
境內河道如果急需興修亦應籌辦妥議乃率請將曹工幫價展  
徵十年其所稱豫備興辦水利及一切便民公事等語試問便民  
公事何所指實不過欲豫備東巡託詞便民實則藉端加賦且朕  
此時並無東巡之舉前經降旨明諭何復意存揣測爲此取巧橫  
徵之計著傳旨申飭十一月兼署河東河道總督十六年閏三月

調理藩院右侍郎兼京營右翼總兵六月兼正黃旗蒙古副都統  
旋升工部尚書兼鑲白旗漢軍都統步軍統領八月會勘兵部主  
事程同文等呈訴吏部扣缺錯誤一案未得實情 上以吉綸唯  
諾附和下部議處尋議降一級畱任十七年九月 命稽查京通  
各倉十月 賞紫禁城內騎馬十二月調正藍旗滿洲都統十八  
年正月署經筵講官九月教匪林清滋事遣黨入 禁門謀逆吉  
綸以步軍統領毫無覺察 命褫職二十年山東省虧帑事覺  
諭曰吉綸久任山東巡撫廢弛貽誤至於此極著發往吉林效力  
贖罪二十三年釋回二十四年以主事起用道光六年卒子彝德  
理藩院員外郎崑德知縣桂德盛京刑部侍郎自有傳殷德筆帖



式

右 國史館本傳

桂德

桂德赫舍里氏滿洲鑲藍旗人道光五年由文生考補工部八品筆帖式七年充軍機章京八年正月 上以西陲奏捷軍務葳功

諭令軍機大臣將滿漢軍機章京編列等第候 旨施恩桂德

以行走資淺列三等 賞大緞一匹十三年經大學士曹振鏞等

保奏桂德當差勤慎已逾三年請作為候補主事遇有本衙門缺

出即行補用得 旨依議十四年補主事十五年升員外郎十六

年轉郎中十八年八月擢內閣侍讀學士九月充滿洲繙譯鄉試

副考官二十二年五月充國史館提調七月授鴻臚寺卿二十五  
年升太常寺卿二十六年二月充 東陵查禮大臣七月遷通政  
使司通政使十月充直省繙譯鄉試磨勘官十一月充四川駐防  
筆帖式閱卷大臣二十七年四月充滿洲繙譯會試副考官五月  
授都察院左副都御史九月充滿洲繙譯童生考試官十二月擢  
盛京刑部侍郎先是將軍禧恩等議邊內稟山樹株稀少稅額不  
足請自旺清邊門以南至綏陽邊門舊柵向東一帶量爲開展二  
十里內外地則招墾納租樹則僉商輸稅以裕 國課而益旗丁  
經前將軍奕湘以籌議展邊與產瀆山場有礙入奏 上復命桂  
德偕將軍奕興詳細會勘二十八年四月奏言履勘邊界自旺清

南界至鬯陽其邊柵以東二十里內外在山樹林間有大木均係果松例不應作爲粟山之用其餘雜木皆不成材卽令圈進亦於課稅無裨且邊外均屬崇山疊嶂並無沃壤閒荒僅有微小平坦荒甸十二處類多山坡溝崖沙磧陷甸不惟開地無多更恐日久變遷難於墾種察看三邊舊界俱相其扼要指山爲邊閒有斷缺處所拴柵至十數里而地方遼闊附近流民往往乘隙私越若經外展則偷越潛移轉增其便至邊門外向東一帶均係產糧山場於開展究多關礙況外地勢本聯絡鬯陽邊與鳳凰邊相距不過百餘里鬯江西岸接界朝鮮結舍墾田之犯屢奉諭旨嚴查未能淨盡若再於近邊招墾匪惟地少丁多不敷分撥而無業貧民

亦必聞風而至積久愈多良莠不一將流弊有不可勝言者溯自乾隆嘉慶年間屢有展邊之說總因有礙圍場難於稽察寢議不行可見慎始圖終當日自有深意既無成材大木不能作爲栗山又無沃野閒荒堪以招丁開墾與其展邊而多窒礙不若仍舊而免紛更疏入下軍機大臣會部議覆從之五月兼充牛馬稅監督七月卒子長年中書長豐臚錄官

右 國史館本傳

L. I. STOUT

11

書銘

書銘赫舍里氏滿洲鑲藍旗人乾隆四十四年舉人四十九年補盛京禮部助教五十七年擢吏部堂主事六十年升工部員外郎嘉慶四年遷翰林院侍講五年轉侍讀六年七月擢右春坊右庶子十月升翰林院侍講學士七年四月充日講起居注官五月轉侍讀學士八年三月大考繙譯二等十月遷少詹事十二年二月擢詹事四月授通政使尋兼公中佐領十七年二月遷左副都御史十一月以外省齋摺差包帶銀兩奏請飭查嚴禁諭曰各省督撫提鎮凡有應行專摺具奏事件差委弁丁齋遞長途往返原應按限進行如包帶銀兩囊橐過重不特行程積滯且易啟宵小

覬覦之心嗣後各省督撫提鎮等於齋摺弁丁俱著嚴禁私帶銀兩如陽奉陰違經沿途查出卽行報明懲處十八年擢盛京兵部侍郎十九年奏盛京站丁請照官丁例一體考試下部議駁 諭曰此項站丁與盛京工戶兩部所屬官丁不同書銘並未詳查率行陳請殊屬冒昧著交部議處二十三年 駕幸盛京書銘查驗沿途應差車輛以地方官玩誤情形入奏 命將甯遠州知州孫錫革去頂帶交部議處二十四年同將軍賽沖阿等覆訊宗室喜幅主使李康氏勒斃嫡妻一案得實仍奏請 訓示 諭曰此案覆訊供情無異自應一面具奏一面將各犯分別正法乃猶奏請訓示遵行且係差人齋奏不由驛遞設各犯內有聞風自盡者豈

不倖逃顯戮著傳旨嚴行申飭仍交部議處尋議降四級調用上加恩改爲畱任二十五年調禮部右侍郎道光元年復調盛京兵部侍郎六年以年力已衰命原品休致十五年卒

右 國史館本傳



國朝文獻通考卷之...

三

額勒布

額勒布索佳氏滿洲正江旗人父山西巡撫農起自有傳乾隆四十四年由文生員補工部筆帖式四十七年升主事五十一年升員外郎因迴避調戶部員外郎五十五年升郎中尋充坐糧廳監督嘉慶四年擢鑲藍旗漢軍副都統 命仍兼辦部務旋以清查漕務陋規 上嚴諭總漕倉場侍郎及坐糧廳糧道諸臣并舉額勒布前任坐糧廳不受陋規以爲勸五年閏四月升戶部右侍郎管理錢法堂事務七月調鑲黃旗滿洲副都統九月 命管理萬年吉地工程六年正月 命總理工程處二月兼總管內務府大臣五月單銜奏請將前在戶部行走之候補工部郎中鄧頤仍

留戶部 上以其專摺陳奏漸開專擅致涉偏私 訓飭之九月  
因修葺各工整潔 賞戴花翎七年四月偕內務府大臣豐紳濟  
倫等奏請裁減各衙門兼攝司員下部察議尋議降二級調用  
諭曰前此豐紳濟倫召見時曾奏及伊係武英殿總裁於武英殿  
御書處司員不能管轄呼應不靈彼時卽覺其又自滿矣茲據內  
務府奏請將各處兼攝司員酌擬裁減內武英殿御書處並無內  
務府大臣兼管伊卽欲將兼攝司員裁減其有內務府大臣兼管  
之御船處及咸安宮等處兼攝之員並未聲請酌減實屬偏私近  
於專擅是以降旨將該大臣等交部察議此事顯係豐紳濟倫一  
人主見眾人隨從附和部議降調均屬咎有應得但一時更換乏

人豐紳濟倫著改爲革職畱任額勒布等著加恩均改爲降三級  
畱任十二月署倉場侍郎八年五月以陝省軍需報銷遲延 命  
額勒布偕刑部侍郎初彭齡馳往清查尋奏言陝省支發軍餉本  
未定有章程俱係隨領隨發只有總數其支應細數並無月報底  
帳因調取司庫支發底冊與各員文領覈對領款數目相符又將  
各員銷冊內用數與領數覈對亦無短少及研訊經手各員僉稱  
從前軍需實多例外支款並濫用賞需等項銷冊底冊均經開載  
實無餽送侵肥情事請將巡撫秦承恩等分別罰賠降調 上允  
之八月以 萬年吉地工程堅固宏整下部議敘十二月復署倉  
場侍郎尋 賞紫禁城騎馬九年四月 命往河南辦理衡家樓

河工善後事宜七月奏籌備衡工開溝放淤情形 諭曰東園堵  
一帶倒漾之水其勢尙緩該河督等酌議挖溝建閘灌注內塘其  
事尙屬可行至將大壩迤西開放進黃溝一節究屬冒險況進黃  
溝之名實屬臆造殊不成話該處大壩費幾許工力始能堵築完  
固若在壩身開放溝渠萬一掣動大溜全向北趨豈非自潰其防  
朕揆之事理實覺不合詢之在廷諸臣亦以爲冒險難行額勒布  
係特派前往工次之員今摺內稱未諳河務又稱徐端前在曹工  
邵壩辦有成效似屬防險合宜之策馬慧裕係該省巡撫兼管河  
務僅於摺尾聲明意見相同竟似此事全憑徐端主見徐端冒險  
輕率額勒布含糊推卸均著傳旨申飭尋因奏摺輕發五百里遞

花翎下部議處是月以戶部寶泉局虧短銅斤自嘉慶四年十月以後查出各監督得受贓私 命部臣將失察之歷任管理錢法堂侍郎按照在任之久暫收銅之多寡分晰開單呈覽經部臣奏入得 旨額勒布歷任最久收銅最多況額勒布本係戶部司員於度支最爲熟悉屢經有人密保稱其諳習部務是以於兩年中超用副都統卽授爲戶部右侍郎管理錢法堂並授總管內務府大臣額勒布自當隨事黽勉實心供職而戶部事宜尤應格外剔除弊端以期仰副委任乃於寶泉局監督得受贓私短收銅斤毫無覺察任聽營私實屬溺職本應革職念伊在戶部有年著加恩降補戶部郎中所有衡工河防事務額勒布既稱未諳無庸管理

此時仍暫駐豫省專辦河神廟工俟工竣回京供職十年閏六月  
補戶部郎中尋命巡視長蘆鹽政七月升鴻臚寺卿仍留鹽政  
任九月以山東監生陳文思控李良桂等重役包漕案命額勒  
布馳往查辦訊實擬如律十二月調兩淮鹽政十一年三月偕兩  
江總督鐵保河道總督徐端奏言淮揚下游歸江河道灣頭閘壁  
虎關鳳凰橋由廖家溝出江東西灣壩由石羊溝出江金灣舊壩  
由董家溝匯入芒稻河出江金灣新壩金灣中閘北閘由人字河  
分而爲二一由仙女廟入運鹽河出江一由芒稻河出江自金灣  
閘至江口計程三十餘里形勢甚利各閘壩河道淤填厚薄不等  
並有河身淤填兩岸窄狹之處芒稻東西七孔三孔兩閘口門淤

塞以致上游之水直注不暢請展寬挑深以備宣洩 從之五月  
升太僕寺卿仍畱鹽政任八月以新挑鮑營河工程未竣水盛漲  
開放王營減壩掣溜直注由六塘河等處入海鹽運阻礙 命偕  
鐵保等會議籌運以濟民食尋議鹽船運行共有三路一由鹽場  
舟運至佃湖盤旋從正河轉運一由莞瀆河入鹽河一由新河直  
趨張家河出減壩口但見在積引尙多僅此三路運行不敷接濟  
擬由場裝運海船從內洋直達焦山試行一次 從之十二年二  
月升大理寺卿仍畱鹽政任六月 諭曰朕聞額勒布在兩淮鹽  
政任內實能力崇節儉自甘淡薄殊屬可嘉但該鹽政狷潔自矢  
而鹽務大小各官未必能同心合意從前兩淮鹽務浮費每年不



下數百萬兩近年雖節次裁禁若鹽務各官不能潔己奉公則浮費仍屬不少於商力未免有虧見因商力疲乏成本不敷與其例外加增曷若節省糜費以濟公用著額勒布將兩淮鹽務無益閒費確切查明一律禁革將每年節省銀兩卽以貼補成本豈不於商民較有神益該鹽政務須斟酌妥辦先將該處浮費情形據實具奏尋奏鹽務浮費在官者十不及一而在民者十居其九總緣江南百姓多依鹽務爲生故未敢專惜商資不顧大局除過往紳士寒儒資助周恤等費稍爲節省其餘悉仍其舊至在官者近年裁革禁止至再至三而爲數無幾實不足補苴成本臣惟有益矢冰兢不敢初終易轍儻官吏陽奉陰違私萌利念一經得實立卽

嚴參 諭曰江南百姓多依鹽務爲生此朕所素知並非始於今日但哀多益寡亦須立有限制額勒布當曉諭該商等以爾等從前貲力富厚賙給樂施原不必過爲靳惜但見在生齒旣繁物價又貴爾等本少利薄漸非當日之比若不自知撙節習尙豪華仍前揮霍無度將來生意支絀日就匱乏又將如何接濟卽如摺內所稱過往紳士寒儒皆須資助周恤等語寒儒無所仰給量力扶助尙屬情理至於過往紳士則皆係有官職之人又何藉爾等仗助此等費用卽在可減之數商人等惟當區別辦理庶隨事節省於生計不無裨益十三年五月授總管內務府大臣兼鑲白旗漢軍副都統六月以前管理 萬年吉地工程徇隱盛住侵帑誤工

職職發往熱河效力十四年正月 賞主事銜辦理熱河總管事  
務二月侍郎廣興以前往山東審案時貪婪事覺伏法 上以額  
勒布前赴山東審案其供給均發價購辦州縣亦開差費三千兩  
詔責外省官吏以辦差爲糜費開銷之地四月復 命巡視長  
蘆鹽政六月以前在倉場侍郎任內失察花戶高添鳳等侵盜米  
石下部議處尋議革職 上以其在任祇數月改爲降二級留任  
八月以目疾奏請解任調理 上允之十六年以未完賠項呈懇  
將房地入官變抵其不收銀兩請將子寶翰寶奎俸銀全數坐扣  
經部統奏入得 旨額勒布平素居官操守清廉辦事亦好其應  
繳未完銀兩本係罰賠分賠代賠之項著加恩將呈出住房仍賞

給居住其取租房及地入官變價不敷銀兩在伊子寶翰寶奎俸銀內每年扣繳一半將來額勒布病痊賞給差使其所得俸廉亦著扣交一半道光十年卒子寶翰官刑部郎中寶奎見任鑾儀衛冠軍使

右 國史館本傳

故戶部侍郎額公之卒也史館例立專傳其叔子冠軍使寶奎以狀上史臣既摭其政績入 國史矣閱三年當道光壬辰予適至都下冠軍以別傳請爲予得交於公久知公深且素爲文不妄有稱述可傳信故也夫徵信莫如史然必載筆者其事專其業世所見所聞所傳聞莫不真確又深通情勢達事理之所以然是以紀

述籌議計畫本末賅備而筆力恣肆又足以發之使讀者如見其人如聞其聲故兩漢三國之事蹟數千載猶彪炳人耳目者以其爲世業專門之私書也晉書以下大都成於後代爲時既促速又與斯役者唯論官閥罕能悉典要故英儔之士非常之謨不復涌見楮墨閒無以稱讀者之意今 國史固皆以時人紀時事者矣然以謂徧採家傳及散見他說者或多恩怨抑揚不足昭詳慎故一以紅本爲据其科鈔所不及軍機檔冊所不載雖 列聖憂勤惕厲與二三大臣從容論議於以救民間所疾苦爲天下傳誦讚嘆者檢覈科鈔軍機檔無可證驗則不得恭紀簡冊至部院題奏事件例係六堂僉畫非一人所可主名又率由胥吏具稟白可呈

堂文采不足以照耀方來若在司員舉分例無專達卽有傾畫顯  
著不登紅本唯封圻特使政得自主而決策之故多在牘外又或  
中途受事未蒞已移潮前則無源考後則缺委其是否奏績能垂  
久遠紅本無文悉從蓋闕至其人學問所就心術所存槩以傳例  
摹寫尤難宜冠軍之不能已於此請也予以嘉慶丙寅夏識公於  
揚州時公視淮鹺已三年淮鹺繁富甲天下使者驕貴簡出出則  
輿從華盛倍封圻而公常從二三騎自策蹇穿街巷嘗禱雨於甘  
泉山步烈日中往返至三數十里梅花嶺旁有書院爲使者課士  
所唯存枯槎一二公補植五百株以還舊觀公故善其山長沂州  
知府欵洪梧時時相過從攜中冷泉煮茗茗輒遣騎招子或追取

廚僕作竟日歡肴蔬不過數事又嘗訪予於逆旅談笑忘倦同舍生羣驚訝而令節纔以果餌兩器相餉曰極念吾子旅困此閒另庫歲徵且數百萬乃嗾賈結納勢要物非所以待吾子僕爲鹽政吾子爲鹽政客殆爲揚州開一生面也戊辰秋公被議入都嗾賈送至王家營環跪納會子四紙紙鏹各十萬公詰其何爲僉曰大人節官費歲數十萬又奏增鹽息至分半歲溢且二百萬計大人按臨六載眾商所受恩且累千萬區區者誠不足言報稱公笑曰我前節官費以爲今日地是搜察案所應有也請增鹽息者爲岸猾持若短長耳若等竟以作市價是哀民以益商我負疚滋重况分若肥耶必不聽者以狀上 聞矣是年秋公故當入 覲例以

珍玩爲面貢公閱寶製備僅值十六萬先期貯京第及至都部議當差熱河不得面無所用貢公瀕赴戍遣使悉送還揚州費腳價銀六千實已資也揚州士民前聞公少時奔喪至山西土人醮四萬金爲贈公一無所受事聞達聰猶疑信相半至是乃莫不嘆其廉介矣性嗜易通志堂所刻七十家易說皆能條列而縷舉之偶爲小詩栩栩有蘇陸之意己巳春予初入都公已起視長蘆漕不相值辛未再至則公已失明家居然聞予至必迎至中門握手坐絮語移晷及己丑春公年已八十餘予寓外城宣南坊去公第十里公猶數見過使短童掖下車劇譚今古事無少舛失予之所知於公者如此皆狀所未及也其世家官階本傳例不詳備者皆



按狀而次之曰

公諱額勒布字履豐號約齋姓索佳氏先世居鄂爾坤部落歸附後爲滿洲正紅旗人祖彰萊盛京副都統父農起山西巡撫管提督事任安徽布政使時以辦災能勤民有聲公雖世祿子然好讀書如寒素成童補弟子員旋食餼入試不得於有司乃棄舉子業筮仕工部歷筆帖式主事員外郎迴避改戶部擢郎中徧本部各繁要差以管部王大臣密薦廉能第一徑擢本部右侍郎管錢法堂事旗務則爲副都統者四護軍統領者一公中佐領者二兼官則爲內務府大臣者二管理三山總理工程處總理奉宸院事者各一差遣則查辦陝西軍需報銷兼祭告西鎮山川督辦河南衡

家樓大工審辦山東陳文思控案查看天津一帶河道者各一爲  
司員時一隨本部尙書查辦甘肅監糧虧空一保用坐糧廳一加  
四品服總監督 昌陵工程外任一署倉場侍郎兩爲長蘆鹽政  
一爲兩淮鹽政一以主事銜爲熱河副總管虛授未之官則爲鴻  
臚寺卿大理寺卿者各一降譴則侍郎任內失察寶泉局銅斤左  
遷本部郎中兩淮鹽政任內以前監督 昌陵工程漏參同官侵  
剋工價充熱河馬甲公去兩淮時已病日再任長蘆則益亟力請  
解組旋失明閱二十有二年以道光十年八月二十有五卒於  
私第年八十有四

右別傳包世臣撰



初彭齡

初彭齡山東萊陽人乾隆三十六年 巡幸山東 召試 欽賜  
舉人四十五年成進士改翰林院庶吉士四十六年散館授編修  
五十年大考二等五十四年授江南道監察御史五十六年四月  
劾協辦大學士吏部尚書彭元瑞於胞姪良昇爲子頂買吏員知  
情徇隱又總理國子監事徇私將其壻監生饒文震咨送武英殿  
校錄鞠實降元瑞侍郎五月遷兵科給事中五十七年充廣東鄉  
試正考官五十八年三月轉吏科掌印給事中四月遷光祿寺少  
卿五月提督湖北學政六十年差滿回京嘉慶元年四月轉通政  
司參議十一月奏參江西巡撫陳淮貪黷散法 命戶部右侍郎

台布會同兩江總督蘇凌阿按訊得實稅准職戍新疆二年二月  
遷太僕寺少卿九月轉通政司副使十月遷光祿寺卿十二月遷  
通政使司通政使三年提督福建學政四年擢兵部右侍郎仍留  
學政任三月轉左侍郎 召回京五月授雲南巡撫十月 上以  
前任總督富綱請罷官鹽改歸民運民銷 命彭齡籌議以聞十  
一月奏滇省鹽務官爲辦運日久弊生應如富綱議但原奏尙有  
未盡妥協之處宜酌加變通一原議奏銷時如有未完將井員參  
處此因各井定有歲額而言今擬不分井口聽民販運須俟試行  
二三年後再行咨部定額缺額者開參溢額者議敘一原議設立  
引紙以防偷漏查引紙例由部頒滇省距京萬里往返需時請由

鹽道刊發一原議行銷地面各就近井配發但各井衰旺不同各屬行銷多寡亦難懸擬應令商販於領照後遠近聽其所之不至控價居奇一原議酌借竈戶薪本今改令竈戶自煎自賣賣鹽之價即可爲煎鹽之資應毋庸接濟下部議行十二月以兵部侍郎江蘭前任雲南巡撫時於抱母恩耕二鹽井被水成災匿不陳奏致井口淤塞鹽課隨銷劾罷之六年三月以親老乞改京職上允其請調貴州巡撫伊桑阿代之七月途次劾伊桑阿在貴州巡撫任內驕奢乖戾苛派屬員又勦辦石峴苗匪飾詞冒功褫伊桑阿職命雲貴總督琅玕新授雲南巡撫孫曰秉勘問得實實諸法八月回京署吏部右侍郎旋署兵部右侍郎九月充順天鄉試

副考官補刑部右侍郎七年四月充殿試讀卷官六月 命偕副都統富尼善馳赴貴州查辦道員孫文煥濫用軍需究出巡撫常明拖欠鉛廠銀並私賣用贖鉛丸及任聽幕友抽匿報銷案卷依律問擬有差七月轉左侍郎九月署貴州巡撫旋調署雲南巡撫十二月劾布政使陳孝昇迤西道薩榮安辦理維西軍務冒銷帑銀 命兵部侍郎那彥寶大理寺少卿章煦往讞得實治罪如律八年正月回京五月 命偕戶部右侍郎額勒布清查陝西軍需查出浮支濫應各款自巡撫秦承恩以下罰賠降調有差六月回京調工部右侍郎十二月調戶部右侍郎署吏部右侍郎九年以誤聽前任湖北巡撫高杞言誣劾湖廣總督吳熊光受賄營私又

將 召對時面奉 諭旨向高杞傳述廷臣請照漏洩機密重事律擬斬 諭曰大學士滿漢尙書及原審大臣會議初彭齡罪名據稱初彭齡冒昧參劾已屬陳奏失實此語非是朕從不因言事罪人至面陳密諭事件私向高杞傳述卽照漏洩常事律加等罪亦不過褫職遠戍何至引近侍官員漏洩機密重事律擬以大辟況臣工遇事敢言方可祛除壅蔽凡關繫弊端及臣僚不公不法等事既有所聞本應卽行陳奏候朕密爲查察若槩諉諸尙無確據勢必事已披露始行入告何如早行發覺轉不致釀成巨案乎初彭齡風聞不實原無可罪至於洩漏一節亦當按事之大小以定罪名輕重初彭齡所漏洩者尙非重大情事若遽照前律擬斬



設遇有漏洩軍國重務者其罪何以加乎且見在與議諸大臣中皆常經召對之人試各捫心自問豈盡守口如瓶毫無漏洩設有一二傳播之言被人指摘若俱照此例辦理既於政體有乖亦甚非諸臣之福也初彭齡本應革職發往新疆姑念其見有老親著革職加恩令其在家養親閉門思過十年十一月 諭曰初彭齡前任御史時遇事直言不甘緘默迨擢任巡撫辦理地方事務亦尙認真上年參劾吳熊光操守平常係因高杞騰播浮言遂據以入告未免爲高杞所愚然其獲罪實不在此惟將朕召對時面諭之旨向高杞傳述漏洩之罪實無可辭今事已閱年餘念其平日官聲尙好本日所出右庶子一缺著加恩以初彭齡補授十二月

巡光祿寺卿充 實錄館總校官十一年二月擢內閣學士兼禮  
部侍郎銜時甘肅已革正甯縣知縣徐振鵬受賄故出人罪陝甘  
總督倭什布擬以遣戍振鵬遣弟振鶴來京翻控 命彭齡同工  
部侍郎英和往讞坐振鵬誣枷示先是倭什布以山西大同等府  
向食蒙古鹽嗣因商人馬君選獲罪經理乏人移咨阿拉善王瑪  
哈巴拉速行遵派疏 聞 諭曰向來晉省池鹽由商行運蒙古  
鹽斤入口本有例禁嗣經奏明分定地界行銷迨將東河鹽課改  
歸地丁聽民間自行販運遂無一定口岸蒙古鹽斤因此侵越內  
地此時蒙古鹽斤內地存積不多又因查拏馬君選之後並未撈  
鹽發運正是極好機會與其令阿拉善侵占何如今淮北越境暢

銷必當趁此時熟籌妥辦從前晉省鹽斤所以改由民運者皆由  
地方官於會商一事辦理不公商民畏累以致鹽課支絀是以定  
議果歸地丁聽民販運本非經久無弊之法見派英和初彭齡赴  
甘肅查辦事件路經晉省令與同興會商妥議奏明候旨施行五  
月彭齡等議奏河東鹽務仍請招商領運又蒙古吉蘭泰鹽池產  
鹽豐旺蒙古人等性拙耽逸不能空運自馬君選獲罪嚴禁內地  
民人出口鹽池漸成廢棄請一併招商運辦 上可其奏 命偕  
倭什布及山西巡撫同興陝西巡撫方維甸等議章程以聞旋奏  
馬哈巴拉請獻吉蘭泰鹽池歸公 上允之七月奏言河東鹽務  
前以賤價定爲常額故商人易致賠累嗣後請照每年收鹽豐歉

成本重輕隨時定價不立限制並准舊商再保新商口岸暢滯不一者均勻分配至吉蘭泰撈鹽坐商必須熟習地利應在甘肅就近募充其運商則於山西殷實之戶募充三省所屬各州縣或食口鹽或食潞鹽劃清地界河東鹽政仍令山西巡撫兼管添設磴口運判一吉蘭泰及磴口鹽大使各一河口鎮批驗大使一下大學士九卿議行九月回京授安徽巡撫十二年二月覆訊兩江總督鐵保審定壽州民張倫等猝中烘板蛇毒身死一案實係武舉張大有與胞弟大勳妻胡氏通姦因妬姦毒斃族姪倫及雇工李賡堂父子寘於法並究出蘇州府知府周鏗等受賄捏飾降革治罪有差 諭曰初彭齡於此案悉心推鞠秉公查辦俾冤獄平反

得成信讞實屬可嘉不負委任著加恩交部議敘五月丁父憂十四年五月授貴州巡撫以父喪未除且母老疏辭上允之八月服闋命署山西巡撫旋授刑部右侍郎九月劾前任巡撫成齡因閱邊需索屬員供應平魯縣知縣王敏樹左雲縣知縣孫耀藉口辦差那用公項及各屬倉庫錢糧均有虧空褫成齡職敏樹耀治罪如律各屬虧項仍命詳查十月臨晉縣知縣程安失察糧書舞弊將錢文甄塊假裝銀鞘解省署藩司劉清恐興大獄請刪減情節入奏彭齡疏劾之清降四品京堂安成新疆十一月實授山西巡撫尋奏參署臬司張曾巖承審要案任意延宕汾州府知府王彝象孝義縣知縣葛拱宸抽換卷宗徇情枉斷文水縣知縣

捐升知府陳廷圭失察捕役詐贓斃命復行賄和汾陽縣知縣李  
景陽延案不結致釀人命絳州知州楊映權陽曲縣知縣吳安祖  
官營平常並查明各屬虧空請勒限彌補免其參辦 諭曰州縣  
倉庫既有虧短本應究辦但山西向係完善之區彌補較易見在  
虧短者既不止一處人數較多若將伊等參革治罪公帑轉歸無  
著此時姑免參辦務卽嚴飭勒限上緊彌補毋任延玩十二月調  
陝西巡撫十五年二月山西河東道劉大觀以彭齡在巡撫任內  
任性乖張列款揭參 命戶部尙書托津刑部左侍郎穆克登額  
往按之 飭彭齡回省聽勘尋訊明彭齡審辦臨晉縣假鞫案因  
前任巡撫金應琦查看號簿怒斥其非試用知縣陶榮淦以受賂

事覺畏罪自盡彭齡並未奏明又於署知府朱錫庚辦事乖謬知情徇隱均屬不合餘坐誣 諭曰上年金應琦患病請假派令初彭齡前往署理山西巡撫伊陞辭時朕並未降旨令其密查金應琦任內有何款蹟乃伊到晉之後遇事搜求動形白簡計前後數月所參司道府縣等官爲數實屬不少其中固有實在應參者而其偏執已見任性憎惡率行糾參者亦正不免今閱托津等查奏各款其最甚者如金應琦查看號簿卽行瞋斥一款試思金應琦不過暫時患病之員並非解任去官不應妄行干預者可比伊查看號簿正係畱心公事初彭齡自應將應辦之事與之商榷方爲和衷集益何至遽加憎惡甚至向司道前指斥其非其居心實屬

褊淺至於陶榮淦之死固緣賊私敗露畏罪輕生而該員身係職官何得隱而不奏此一節亦屬疎漏且既知朱錫庚辦事不妥已向司道告知並不即時參辦亦不免曠徇初彭齡著交部嚴加議處尋議革職 命以四品京堂降補六月以盛京吉林甯古塔所進淺枝違禁攙雜秧淺 命偕戶部左侍郎英和赴盛京查辦尋訊明局員協領扎布扎那等得贓弊混及縱容奸商私種秧淺依律問擬九月回京十月補鴻臚寺卿十一月遷順天府府尹會南河高堰山盱兩廳隄壩潰決 上以近年來鉅工林立費用浩繁一遇大汛卽有墊塌淤墊之事恐承辦工員偷減浮冒 命偕戶部尙書托津馳赴工次徹底清查十六年二月奏查明銀米出入



尚無虛捏惟支領後不能如式辦理致舊工未竣新工復生歷任河督亦未能經理得宜均難辭咎請將辦理草率之廳營各官四十八員悉予褫職仍畱工效力其歷任河督分別交部察議議處從之五月 命偕刑部尚書崇祿赴福建鞠在籍知府張祥雲被控案尋訊明祥雲圖占民人李維祺墾熟沙洲主使族人保來用鐵器傷斃維祺佃戶李輝賄買頂兇依律論絞七月遷工部右侍郎九月署浙江巡撫十一月湖廣總督馬慧裕奏參湖北臬司周季堂心術不醇妄作威福 命彭齡往偕慧裕按之復經給事中喬遠瑛劾季堂袒庇屬員等款褫季堂職併交彭齡嚴訊尋鞫無貪污劣蹟惟袒庇屬員及失察代書私收呈費並因田土細故

濫票差提業經革職法無可加其餘案犯依律問擬有差是月轉  
左侍郎十二月給事中趙慎畛奏參湖南學政徐松需索陋規及  
出題割裂聖經等款 命彭齡赴湖南會同巡撫廣厚查辦鞠實  
做松職戍烏魯木齊十七年二月差旋行抵直隸會山東單縣民  
人朱燧焯來京控胞伯廣渭毒斃其父廣泗 命彭齡馳往研鞠  
坐誣治罪如律四月回京五月調戶部左侍郎十月 命偕協辦  
大學士吏部尚書松筠赴南河審已革河道總督陳鳳翔控案先  
是鳳翔據前任淮揚道黎世序稟誤啟禮智二壩減洩湖水致清  
水力弱不能敵黃且下游州縣均被淹浸經兩江總督百齡奏參  
職職枷示鳳翔遣人來京呈控以世序具稟時百齡亦曾畫諾今

祇卸責一人又百齡委用江甯鹽巡道朱爾廣額督率葦蕩營柴  
束短絀轉以節省工銀將朱爾廣額保奏彭齡等查訊得實褫百  
齡太子少保銜並雙眼花翎降二品頂帶尋 命查勘山圩隄埝  
情形奏言洪澤湖全局能令暢出敵黃則爲刷沙之利澤啟壩旁  
洩則爲泛溢之狂瀾應責成督臣河臣於冬春之際竭力疏通清  
口蓄清敵黃俾無倒灌 上是其議十二月署江南河道總督十  
八年正月奏高郵寶應等處地勢窪下爲上游水潦奔匯之區從  
前河道屢經疏濬今歲久淤塞請分別官辦民辦商辦籌款興修  
允之三月回京九月調倉場侍郎十九年三月兩廣總督蔣攸  
鎔奏參廣西巡撫成林公務廢弛婪索屬員供應挾嫌彈劾褫成

林職 命彭齡往鞫得實並究出成林恣意聲色用度侈靡籍其  
家擬以遣戍六月擢兵部尙書 命署江蘇巡撫查辦虧空八月  
疏陳清查密奏之弊略言各省虧空原應隨時懲辦乃各督撫因  
積弊已深往往密摺陳奏僅使分限完繳始則屬官藐法任意侵  
欺繼則上司市恩設法掩蓋是以清查爲續虧出路以密奏爲緩  
辦良圖應行 飭禁 上是之九月疏劾江甯藩司陳桂生江蘇  
藩司常格催徵新賦不力俱褫職旋以江蘇巡撫張師誠回任  
命彭齡以 欽差會同查辦十月彭齡及百齡張師誠先後各擬  
章程入奏 諭曰初彭齡百齡張師誠三人平日辦事俱尙公明  
是以此次江省虧空令伊三人會同查辦初彭齡等自應彼此和

衷公同商酌卽稍有意見不同之處不妨據理折衷期於同歸一  
是乃初彭齡不待商定先於本月二十日自將章程入奏百齡張  
師誠亦卽於次日另將章程具奏彼此齟齬大乖公忠體國之義  
俱著傳旨申飭十一月奏參百齡兼署巡撫時管關道員鍾琦幫  
貼摺差盤費銀一千二百兩又收受永豐壩秦壩委員餽送銀二  
萬餘兩師誠告假在籍差弁奏事及到任後遣人回家盤費俱濫  
支關稅又收受管關道員劉澧餽送銀二千兩 命大學士托津  
戶部尙書景安往按之十二月復劾奏陳桂生冊報溧水縣虧缺  
銀數先後多寡不符有心弊混逮繫之並交托津等嚴鞫尋訊明  
所參曰齡師誠各款均屬虛誣桂生先後稟報亦無含混隱匿情

弊尚將彭齡交部議處尋議革職。上諭曰：彭齡秉性褻急，素以和彈爲能，經朕屢加訓誡，以嫉惡過嚴，本屬爲公然，輕於舉發，不察虛實，久之爲人窺測，卽有造爲萋斐之辭，賺令排擊者在己方，以爲持正而不知適爲人所川楛，以快其私忿。此次所參百齡、張師誠各款，如果屬實，試思伊等當得何罪，乃率以無據浮詞飛章入奏，殊屬輕躁。部議降二級調用，因伊任內有革職兩任之案，議以革任，初彭齡尙不至廢棄，若加恩照所降之級，以內閣學士來京候補，先是彭齡赴廣西隨帶司員茅豫及署江蘇巡撫，仍請帶往任理。上以向無此例，授豫知府，在江蘇候補。至是奏豫兩耳重聽，代爲乞假。上以豫係江省候補人員，因病乞假，應由督

撫題奏彭齡侵占中樞殊屬專擅交部嚴加議處部臣如前議  
命以翰林院侍讀侍講降補二十年三月百齡奏參彭齡在江蘇  
巡撫任內沈湎於酒藥案率委茅豫畫諾並文致陳桂生罪名又  
將百齡前奏查辦虧空章程批回原摺私行拆閱見有不敢味  
以奉恩之語謂百齡等將其參斥遂臚款將百齡等糾參至茅豫  
並未耳戮拘私捏報諭曰初彭齡兩經部議革職初次朕念其  
平日尚稱敢言且歷官資格較深加恩降爲內閣學士嗣又從寬  
宥過降爲侍讀侍講茲復查出種種謬妄本應革職發往伊犁以  
示懲創姑念伊母年已九旬朕所稔知原欲於今歲伊母生辰加  
以恩賚今初彭齡自惟愆咎不能仰承恩眷實爲不孝若其母因

子遠戍晨夕思念或有意外之虞朕心殊爲不忍初彭齡著革職令在家閉門思過二十一年六月起爲工部主事充寶源局監督十一月丁母憂二十三年呈請入籍順天二十四年二月服闋十月上六旬萬壽加恩以六部員外郎用二十五年選刑部員外郎道光元年正月賞禮部侍郎銜旋署左侍郎七月補右侍郎八月擢兵部尙書十二月調工部尙書二年充殿試讀卷官賜紫禁城騎馬三年八月萬壽聖節賜十五老臣宴繪圖於萬壽山玉瀾堂彭齡與焉御製詩有宣猷昔日知耿介善善惡惡刻無違之句並賞御書壽字及蟒袍如意諸珍物四年以年老休致賞食半俸五年卒諭曰原任工部尙書初彭齡由



翰林府升卿貳嘉慶年間仰蒙 皇考仁宗睿皇帝恩眷外歷封  
圻內司部務旋因獲咎降調迨朕御極後復擢至尙書上年因其  
年老就衰降旨以原品休致並賞給半俸以養餘年茲聞溘逝殊  
堪軫惜著加恩照尙書例賜卹所有原任內一切處分悉予開復  
應得卹典該衙門察例具奏尋 賜祭葬子銘峻候選鹽大使

右 國史館本傳

國朝耆獻類徵初編卷一百四目錄

卿貳六十四

李奕疇

金光悌

保成

錢榮

秦承業

萬承風

王綬

王友亮

玉甯

潤祥

醫學考用類程不科 卷一百四十一

國朝耆獻類徵初編卷一百四

通奉大夫前署江西巡撫江西布政使司布政使湘陰李桓輯

卿貳六十四

李奕疇

李奕疇河南夏邑人乾隆四十五年進士改庶吉士四十六年散館授檢討五十年大考四等改主事五十一年補禮部主事五十二年充貴州鄉試副考官五十四年升員外郎五十六年遷郎中五十七年授山西甯武府知府五十九年調平陽府嘉慶四年擢江蘇蘇松糧道八年調江安糧道九年署江蘇按察使十年擢山東按察使十一年以濟甯州知州金湘獲盜誤援任內並無承緝

盜案例詳請送部引 見經部議駁得 旨李奕疇於屬員承緝  
逃盜未獲之案並未詳查卽非有心刪除亦屬疏率 命以道員  
降補旋發往南河差遣十二年三月王營減壩大工合龍畱於南  
河卽補十一月補江南河庫道十三年擢安徽按察使時有霍邱  
縣民范受之贅居妻母家與其妻范顧氏反目外出其父以子贅  
不歸訟之縣知縣誤信典史署傭婦言疑范顧氏與其鄰楊三通  
鍛鍊成獄遽以范顧氏與楊三通謀殺本夫其母及弟及雇工某加  
功燒屍滅迹定讞五人者皆誣服奕疇閱供詞疑之廉知受之尙  
存越兩載果歸投案事乃得釋十四年遷布政使十八年擢浙江  
巡撫奉 旨查辦傳習天罡會匪奏獲葉棧姚漢楫等訊止諷經

祈福以首犯論罪如律十九年二月遵旨查察安徽江西等省  
來浙租典山場游民仍申舊禁分別年限使逐漸退山回籍諭  
曰此事頗不易辦緣游民皆失業之人此處驅逐又至別省總不  
能回本籍祇可妥爲安插三月以紹興台州兩府同知缺分今昔  
繁簡異宜請改紹興府同知爲要缺由外揀調台州府同知復爲  
簡缺歸部銓選仍駐亭傍下部議行四月授漕運總督二十年六  
月以山東巡漕御史卓秉恬不准幫船多帶土宜臺莊句水限三  
尺二寸如逾額卽將貨物掀棄奕疇奏言本年二進江南幫船三  
進江廣各幫俱有搭運每船自百餘石至四百石不等船身較重  
喫水尺寸亦應酌加無庸於臺莊等處句水掀卸以免紛擾又奏

嘉白幫水手滋事押空千總陳經領運千總黃逢輝同日互揭未便如巡漕所奏仍令帶罪押運卽將二弁撤回一面提同丁舵並嚴拏水手研訊 上皆避之十一月以回空漕船渡黃較早得旨漕船儻行迅速實近年所未有正當趁此機會使新漕迅速北來復還舊規務符冬兌冬開定制二十二年御史熊埏條陳漕弊三款 命奕疇查議十一月奏入 諭曰運弁乘坐花船一節據該漕督查係樺船音近傳譌尙屬可信牌燈皆沿途催儻所需與糜費無涉均毋庸議其每幫頭伍承辦應領應用款項亦不能不選派一人以專責成惟在該管官秉公遴選並令眾丁公同具保如有侵吞派累查出嚴行懲辦至漕委一項原不能盡行裁革但

該委員等沿途挾制幫丁需索規禮事所難免多一人卽增一人之累該漕督當大加裁減隨時整飭十二月兩江總督孫玉庭奏准卹丁除弊章程江蘇蘇松常鎮各幫起運漕船計不敷銀每船自四百餘兩至一百餘兩不等各按米數津貼作爲定制奕疇奏稱見定津貼銀數共需八十餘萬兩之多明立規條易滋流弊恐旗丁從此指爲正款州縣益得藉口浮收請仍按舊章辦理如將來丁力日裕此項可逐漸減除 諭曰旗丁領運漕糧優給行贈原不應需索規費惟該旗丁等長途挽運不無需用相沿議給津貼乃旗丁等恣意勒索年甚一年勢將無所底止前經孫玉庭奏請統以各幫米石多寡酌給津貼禁止每船給費降旨准行作爲



限制乃禁其多索於限外非令其取盈於限內也今李奕疇奏稱旗丁指此爲正款援引從前飭駁蔣兆奎等奏請加徵津米之旨以爲事類加賦蔣兆奎費漕前奏皆請多徵米額有類加賦是以駁斥至津貼限制與加賦迥殊旗丁等何得視同正款該漕督受弁丁怨思不願遵依限制乃含混具辭請仍按舊章辦理以遂其無厭之求實屬罔於事理李奕疇著傳旨申飭該漕督旣稱此後河道通暢丁力日裕津貼一項定可逐漸減除著卽責成該漕督嚴飭各弁丁總於限制之內力加撙節愈省愈善若於限外苛求逞其僥倖勒結故習肆意刁難立即嚴拏治罪如該漕督縱容袒庇定行嚴懲二十三年倉場侍郎潤祥等以興武頭幫米色灰暗

攙雜霉變將運丁奏交刑部訊明治罪失察之領運千總孫文秀  
押運通判陳元齡交部察議奕疇奏言米色霉變雖由沿途未加  
風晾亦由水次兌交本非好米請將領運千總孫文秀革職經徵  
之無錫縣知縣韓履寵陽湖縣知縣李廷芊監兌通判陳元齡交  
部分別議處並自請議處 諭曰漕米未兌以前責在州縣既兌  
以後責在旗丁此案米色霉變攙雜業經刑部訊明係在途蒸鬱  
起剝所致事在既兌之後自應將該運丁治罪千總通判交議今  
該漕督乃以米色未乾潔請將經徵之知縣議處即使其言屬實  
當受兌盤驗時何以不早行奏參迨至事後追咎豈足服該縣等  
之心領運千總孫文秀押運通判陳元齡著仍照前議辦理知縣

韓履寵李廷芊均毋庸議處李奕疇辦理前後矛盾著交部議處二十四年二月 上聞奕疇有濫派漕委擾累幫丁情事 命兩江總督孫玉庭密查得實閏四月奏入 諭曰漕委一項前經鐵保等奏明節次刪減迨李奕疇任內逐漸加增至一百四十餘人之多該漕督曾向孫玉庭言及漕標候補人多窮苦堪憐不得不槩行差委以資調劑以致該漕委等需索旗丁大幫出銀三百餘兩小幫出銀二百餘兩旗丁費何由出悉皆取之州縣州縣費何由出悉皆取之糧戶浮收之弊日甚一日漕委之擾累實啟其端該漕督辦理不善咎無可辭李奕疇著交部嚴加議處尋議降四級調用得 旨以吏禮二部郎中用五月復以運弁縱容幫丁案

費經孫玉庭等奏參 諭曰李奕疇前在漕運總督任內滯無約束以致該弁兵等肆意索擾李奕疇不勝郎中之任著以主事降補二十五年十月 命充守護 昌陵尙書道光二年以原品休致十九年舉行己亥科鄉試李奕疇以鄉榜重逢經河南巡撫朱樹奏入 諭曰原任尙書李奕疇早年登第中外宣勤旋以尙書致仕見在年躋耄耄鄉舉再逢洵屬藝林盛事著加恩賞加太子少保銜准其重赴鹿鳴筵宴以昭茂典二十年得 旨准其重與恩榮筵宴二十四年卒子銘皖見官刑部主事

右 國史館本傳



金光悌

金光悌安徽英山人由舉人於乾隆三十四年會試取內閣中書四十五年成進士四十八年充江西鄉試副考官十二月遷宗人府主事四十九年充會試同考官五十年升刑部員外郎五十一年年升郎中五十三年俸滿截取知府仍留刑部五十四年京察一等記名復經刑部奏留是年充廣東鄉試正考官五十五年刑部奏請以四五品京堂用上允所請五十六年有江西舉人彭良鼻爲伊子頂買吏員冒領執照被人告發上命刑部審辦時光悌適因病請假御史初彭齡以光悌與良鼻係兒女媼親恐有推諉贍徇之弊奏參上命軍機大臣訊明告病在先並無贍徇部

議以未能速審完案亦有不合降一級調用五十七年仍補刑部員外郎嘉慶元年升郎中四年充會試同考官五年奉旨以四五品京堂用六年八月授光祿寺少卿因值覈辦秋審案件仍留刑部旋經御史張鵬展奏光悌辦理秋審錯誤九十餘案不應留部上命刑部堂官明白回奏尋大學士董誥等奏秋審案件並無錯誤惟廣東省黃冊有疎漏錯誤之處俱經簽改繕正諭曰金光悌在部年久該堂官懇請留部雖係爲熟手起見但平日廷臣中有在朕前論及金光悌者大率毀多譽少而朕於召見時用心察看金光悌應對未能明晰亦並非出色之員況司員升至京堂例不兼部行走光祿寺少卿金光悌著回本衙門供職不必兼

部行走十二月遷內閣侍讀學士七年十一月擢山東按察使十年十月升布政使十一月授刑部左侍郎時有魚臺縣民人李慶瀛控馬懷璧糾眾殃民一案 上命光悌於途次馳回秉公嚴審得實定擬如律十一年二月 命往天津鞠竈戶李丕基控鹽大使周利剋扣帑卹銀案又往河間鞠甯津縣民人郭洙控縣役唆賊誣扳詐贓案三月復往天津鞠革生楊廷霖誣控楊紹聞服族逆奸案均訊實定擬如律六月刑部審訊北城拏獲用藥迷拐幼孩一案究出配藥根由將首惡楊四楊楊氏及其夥黨如律治罪 上以審訊此案實屬認真 加恩刑部堂司官員光悌 恩予紀錄三次七月 命往承德府鞠豐甯縣生員楊林聲誣控書役



藉差勒折案建昌縣牌長邢世旺控縣書舞弊派差案及旗人六  
保評控孫振培萌種地畝毆斃李銀賄囑頂兇案平泉州民婦于  
董氏評控張存信浸斃伊翁于中元案均審訊得實定擬如律十  
月授江西巡撫十二年奏江西積案繁多酌議設局清釐報 聞  
十四年正月奏請借項修理建昌縣永豐蘆鎮等處圩隄以衛民  
田 上如所請行 旨擢刑部尚書十月奉 旨刑部尚書金光悌  
年逾六十行走尚屬勤慎著加恩在紫禁城內騎馬十七年十一  
月卒 諭曰刑部尚書金光悌練習律法辦事認真在尚書任內  
資格雖淺伊由刑部侍郎洊擢正卿宣力有年遽聞溘逝深堪軫  
惜著加恩照尚書例賞給卹典該部察例具奏所有任內一切處

分悉予開復

右 國史館本傳

嘉慶十有七年十一月辛亥刑部尙書金公卒於位明年正月乙亥公之訃至南昌五月壬午公之孤勇以狀來請銘先是公爲郎中時敬之弟敷試禮部以薦與弟子籍公巡撫江西敬爲縣瑞金以計吏出公門是以敬於公之事最習於公之心推測之最詳謹惟蘇子瞻氏受知於張安道爲之銘韓退之氏在袁州爲屬於王鴻中亦碑其墓於是不敢辭公諱光悌字汝恭姓金氏世爲英山縣人十世祖國寶明太常卿曾祖天爵祖紹偉父序珽進士候選知縣三世皆 贈如公官妣閻氏 贈一品夫人公年十六補縣

學生二十二鄉試中式旋官內閣中書三十四會試中式殿試  
賜進士出身歷宗人府主事刑部浙江司員外郎四川司郎中  
以事降官復起爲浙江廣東司員外郎升陝西司郎中俸滿奉  
旨以京堂官用有吏人坐贓敗妄引公 皇上命待質事白益向  
用升光祿寺少卿內閣侍讀學士外轉山東按察使升布政使卽  
升刑部侍郎巡撫江西升刑部尚書卒年六十有六 本朝刑部  
尚書用人最慎部中司官明慎者方總辦秋審其尚書多取歷總  
辦並踐中外習故事者擢之公性精敏自爲總辦時一部之事必  
關公及爲尚書益自力無所阿徇而天下讞獄者承 列祖覆育  
之後以寬厚爲福多稍稍減罪狀上之公以爲不可懸千里推鞠

苟引律當毋更議其直下刑部及法司會議者公必持律不得減  
於是部中多以公爲嚴於用法焉然成斷獄大小以千百計自同  
官至學執事無有能執公所具改從輕比者嗚呼可以觀公矣舊  
例監守自盜限內完贖者減等乾隆二十六年改重不減等公主  
榮奏復舊例後阿克蘇錢局章京盜官錢計贓五百兩以上主者  
引平人竊盜律當章京絞情實公曰盜官錢當擬斬監追不決絞  
情實則決矣不得引竊盜律奏平之 皇上覽奏曰官盜罪較私  
盜反滿耶公免冠謝曰與其有聚斂之臣甯有盜臣律意如是也  
嗚呼此可以觀公矣公爲按察布政巡撫皆如在刑部覈名實別  
功過釐市井飭軍伍多以一人智斷行之蓋公仕宦數十年計必

達乎至微力必摧乎至巨持成格以繩崎嶇數變之情援古義以  
削浮沈苟安之習自謂卑獨此心可奉 聖主故嶄然有以自見  
如此公性好士聞之如恐不見既見如恐不得當嘗一爲江西副  
考官廣東正考官兩爲會試同考官得士爲盛多才望大僚而公  
言門下士必首及故編修張惠言天下之士皆以爲然公疾惡甚  
不能忍少時遊江南總督幕府有華士負重名公語總督絕之曰  
名教外人不可使汗階前地也在江西有兵官素瀾浪而無蹟可  
劾求見公公切齒投其謁於地後公旋去官終不見嗚呼此可以  
觀公矣公娶懷甯丁夫人子三長宗邵內閣中書協辦侍讀次嘉  
國子監生宗邵嘉皆先公卒次勇舉人女一適山陰李氏孫三震

謙泰皆宗邵出公師文成公阿桂文成奇賞公公嘗語敬曰欲知  
文成之爲人乎敬起立拱而俟公久之曰心地厚復久之曰魄力  
大十八年九月乙亥勇葬公於祖塋銘曰

湛盧之鐔孰咎其銛驩驩之脊孰尤其堅如吳育剛如姚崇警淬  
沼飛雲俯鞍躡景觥觥我公文成之士宿將沈機重臣引體我公  
得之大水破沙力刷其阻氣吞其涯 殊恩特簡拔之庶僚方晉  
列卿隨昇麾旄聽天下成執憲最久東吏循文治奸斂手好無爾  
我惡不比人天性所行理無逡巡好者晨星各守一隅光不相及  
纍纍可吁惡者震霆耳之皆應山通谷合走告相證幸遇 至仁  
保全終始生安其位死歸其里茲原之山其石峩峩側行危立有

高可歌茲原之水其流泯泯湍旋瀨折有澄可詠茲原之窳鑿之  
深深我公於宅前道後林茲原之銘故吏所勒日月可移是非不  
沒

右墓誌銘惲敬撰

保成

庚子春 純皇帝南巡回鑿時駐蹕涿州有僧人某率幼童接  
駕云係履端王次子以次妃妬嫉故襁褓時將其逐出僧人憐而  
收養至今成立初履端親王諱永城 純皇帝第四子出繼履恭  
王後其側福晉王氏王素鍾愛有他側室產次子 上已命名時  
王隨 上之深陽而次子以痘殤告其邸人皆言爲王氏所害事  
祕莫能明也 上亦風聞其故故疑童子近是訊其嫡福晉伊爾  
根覺羅氏嫡妃言其子殤時余曾撫之以哭並非爲王氏所棄者  
言之鑿鑿 上乃召童子入都命軍機大臣會鞠童子相貌端莊  
頗敦重坐軍機榻上見諸相國端坐不起呼和相名曰坤來汝乃



皇祖近臣不可使天家骨肉有所湮沒也諸大臣不敢置可否保勵堂侍郎成時爲軍機司員乃傲然近前批其頰曰汝何處村童爲人所給乃敢爲此滅門計乎童子惶懼言係樹村人劉姓爲僧人所教者其識乃定時人以保有雋不疑之風事 聞斬僧人於市成童子於伊犁後又於其地冒稱皇孫招搖愚民爲松相公釣所斬然聞其郎太監楊姓者云履王次子痘時實未嘗殤王氏請以他屍易之而命王之弄童薩凌阿負出邸棄之荒野嫡妃所撫哭者非眞也然則僧人之教僞童蓋亦有所憑藉非無因而至者也

右錄宗室昭機撰

錢棨

錢棨江蘇長洲人乾隆四十四年鄉試中式第一名舉人四十六年會試中式第一名進士 殿試一甲一名授職修撰廬唱日御製詩云龍虎傳臚唱太和曉日瞰國朝經百載春榜得三元文運風雲壯清時禮樂藩載咨申四義敷奏近千言詎止求端楷所期進讜論王曾如可繼違弼我心存五十一年八月充順天鄉試同考官五十二年九月奉 旨在上書房行走五十四年三月充會試同考官是月奉 上諭朕閱內左門登載上書房阿哥等師傅入直門單自三十日至初六日所有皇子皇孫之師傅竟全行未到殊出情理之外因召見皇十七子同軍機大臣並劉鏞等面

加詢問據皇十七子奏阿哥等每日俱到書房師傅們往往有不  
到者皇子等年齒俱長學問已成或可無須按日督課至皇孫皇  
曾孫皇元孫等正在年幼勤學之時豈可稍有間斷師傅等俱由  
朕特派之人自應各矢勤慎卽或本衙門有應辦之事亦當以書  
房爲重況見在師傅內多係閣學翰林事務清簡並無不能兼顧  
者何得曠職誤公懈弛若此均著交部嚴議議上榮等奉 旨俱  
著革職畱任八年無過方准開復五十八年擢右贊善五十九年  
充廣東鄉試副考官六十年擢中允洊升侍讀充日講起居注官  
嘉慶二年擢右庶子尋轉左庶子三年三月擢侍講學士尋轉侍  
讀學士五月充雲南鄉試正考官七月 命提督雲南學政四年

三月擢內閣學士兼禮部侍郎仍留學政任尋以按試澁江臨安等府觸受瘴癘成瘧疾七月旋省猶力疾視事八月卒總督富綱奏築考試各屬拔取公平與論翕服因病身故並無親屬隨帶在署臣親往視殮妥為料理送回原籍 上憫之子喬雲見官四川候補縣丞

右 國史館本傳

本朝三元催江蘇錢榮席西陳繼昌兩人陳爲桂林相國文恭公元係故嘉慶庚辰臚唱時 仁宗尤極嘉悅 御製詩有大清百八載景運兩三元舊相兩遺澤新英進正論之句

右紀聞陳康祺撰

									111
--	--	--	--	--	--	--	--	--	-----

秦承業

秦承業江蘇江甯人乾隆四十六年二甲一名進士改翰林院庶吉士四十九年散館授編修五十年大考三等五十一年充順天鄉試同考官尋入直上書房五十四年三月以侍直各員曠班鵠級有差承業經部議降調 上加恩改爲革職畱任七月充山西鄉試正考官五十六年大考三等六十年升國子監司業嘉慶元年請假回籍三年丁母憂四年以在國子監司業任內招募供事辦理不善部議補官日降二級畱任五年服闋九年回京得 旨候補司業秦承業著在上書房行走十年以改派侍課違例具摺謝 恩措辭失當 上切責之降爲編修退出上書房十一年十

二月得旨秦承業著加恩補授右春坊右贊善十二月恭纂  
高宗純皇帝實錄分司校勘承業與焉十二年得旨秦承業著  
仍在上書房行走十三年上巡幸津淀承業呈進詩冊賜文  
綺十四年四月升右春坊右中允五月升司經局洗馬十五年二  
月京察一等四月升翰林院侍講七月侍直各員陰雨誤班鐫級  
有差上以承業時係訓課伴讀責任較輕奪俸一年十六年因  
病請假回籍二十五年八月召來京九月諭曰秦承業著補  
授翰林院侍講學士在上書房行走不必每日入直道光元年八  
月得旨上書房授讀事簡秦承業不必在上書房行走九月  
諭曰秦承業前在上書房行走學問尙優人亦爽直朕履位之初

卽宣召來京加以遷擢仍令在上書房行走冀其有所匡助及今  
半載有餘其所敷陳非迂闊難行卽執謬不通率皆市井之談昨  
據汪廷珍奏伊在上書房言語不謹及詰問汪廷珍不肖指實朕  
因降旨令秦承業不必在上書房行走嗣後召詢惇親王瑞親王初亦  
未肖直言經朕反覆開導再三詳詢二王無可如何據稱秦承業曾  
責備顧皋督責大阿哥所言甚爲荒誕狂悖因令軍機大臣等面  
詢大阿哥亦稱實有其語上書房爲養正之地爲師傅者應以孝  
弟睦友子愛時加訓迪今秦承業如此老悖若不加以懲創何以  
示誠秦承業著革職卽令回籍此係朕從寬懲辦若按名定讞則  
罪在不赦矣三年得 旨秦承業前經朕宣召來京加以遷擢令



仍在上書房行走因伊老悖言語不謹不能不治以應得之罪朕  
隨懷舊學秦承業究係上書房行走多年之人此時年近八旬著  
加恩賞選翰林院侍講學士銜不必來京謝恩以示體卹八年正  
月卒兩江督臣蔣攸銛奏入 諭曰翰林院侍講學士秦承業前  
在上書房行走多年茲據蔣攸銛奏該員在籍溘逝殊深惋惜秦  
承業著加三品卿銜並賞銀三百兩由江南藩庫支給交該家屬  
經理喪事用示朕眷念舊臣之至意十二年 上追念承業 諭  
曰朕沖齡就傅時原任翰林院侍講學士加三品卿銜秦承業在  
上書房課讀盡心講貫深資啟沃卽朕之今日尙能兢兢自守者  
皆師傅之功也眷懷舊學特沛恩施秦承業著晉贈禮部尙書銜

其子候選員外郎秦繩曾著加四品卿銜其嗣子監生秦象曾賞給舉人准其一體會試用示朕誼篤師儒有加無已之至意二十七年復奉諭旨秦承業前經贈禮部尙書銜著加恩補行追諡該衙門查例具奏用示朕篤念師儒有加無已至意議上予諡文愨子繩曾嘉慶乙丑科進士原任候補四品京堂嗣子象曾四川犍眉縣知縣

右 國史館本傳

Table with 10 empty columns and 1 header row. The header text is written vertically on the right side of the table.

Header 1	Header 2	Header 3	Header 4	Header 5	Header 6	Header 7	Header 8	Header 9	Header 10

萬承風

萬承風江西義甯州人乾隆四十六年進士改庶吉士四十九年散館授檢討五十一年充順天鄉試同考官五十三年正月命在上書房行走五十四年三月以上書房曠課部議革職得旨改爲革職留任八年無過方准開復八月充順天鄉試同考官五十五年二月丁父憂回籍五十七年服闋入都供職仍在上書房行走六十年充雲南鄉試副考官嘉慶元年十一月擢右贊善二年二月轉右中允三月遷侍講五月轉侍讀三年三月大考四等上以萬承風文理尙屬清順祇係騰寫題目次序違式著從寬降爲檢討仍罰俸四年六月充江南鄉試副考官四年正月

國朝典章考卷之四十一  
提督廣東學政十一月 諭曰萬承風前因大考試卷繕寫違式  
降爲檢討但其文字俱屬工穩不過偶錯格式其咎尙輕所有右  
贊善一缺著加恩以萬承風補授五年四月轉右中允五月奏海  
口白港外有盜船二十餘隻停泊並無營弁緝捕 上命兩廣總  
督吉慶查明具奏尋吉慶覆奏請將管轄該處洋面之總兵西密  
揚阿領兵船搜捕之遊擊魏大斌何□交部議處時有韶州府之  
仁化縣民人葉茂對赴京控粵東應考生童學書索取紅案陋規  
等款 上命吉慶查訊尋吉慶奏紅案陋規已經學政萬承風出  
示革除臣復遊 旨會同萬承風詳切出示將陋規槩行禁革報  
聞十月升侍講六年五月遷右庶子十月升侍講學士十二月

入京供職 命仍在上書房行走七年充日講起居注官八年三月轉侍讀學士十二月充文淵閣直閣事九年四月擢少詹事尋充山東鄉試正考官升詹事提督山東學政十年三月授內閣學士兼禮部侍郎仍西學政任六月授禮部右侍郎閏六月 命來京供職九月充武會試知貢舉十一年十一月因 上書房退直過早並不將散直時刻告知管門太監登記奉 旨罰俸半年十二年充浙江鄉試正考官尋提督江蘇學政十一月轉禮部左侍郎仍留江蘇學政任十四年五月奏請開缺回京祝嘏 詔 諭曰萬承風奏懇請開缺回京祝嘏一摺實屬冒昧不諳體制本年朕五旬萬壽前於直省督撫將軍副都統提督各派出數員來京隨

班慶祝並早降明諭原恐未經派出各員紛紛瀆請至學政係三年更替之差向無陳請入覲之例從前 皇考高宗純皇帝五旬六旬七旬八旬萬壽聖節其時俱未聞有學政開缺來京慶祝者萬承風所請不准行著傳旨嚴行申飭並著交部從嚴議處不准以罰俸了事部議於降四級調任本例上加等降五級調用 諭曰朕於內外臣工恩均一體從無歧視本年各省祝嘏大員經朕派定之後其餘槩不准妄行瀆請萬承風係在內廷行走之員況係阿哥師傅尤當敬謹遵循乃輒稱入直有年栽培逾分鋪敘依戀之語以見其恩遇獨厚更屬非是吏部議以降五級調用咎責應得姑念其人本糊塗著加恩改爲實降一級以內閣學士補用

仍帶降四級畱任處分改補安徽學政九月 上以萬壽慶典  
加恩內外臣工 諭曰內閣學士萬承風著開復奏請開缺來京  
降四級畱任一案十一月仍授兵部右侍郎十五年正月轉左侍  
郎二月考試鳳陽因定遠縣童生李希文被鳳陽縣役所辱生員  
張廷衛以無辜被縛呈控承風據實具奏 上命安徽巡撫廣厚  
秉公確查嚴訊定擬具奏尋經廣厚鞫實將逞兇衙役及不安分  
童生各懲治如律十月安徽學政任滿疏上 諭曰萬承風具題  
學政任滿一本朕詳加披閱其年月未經另葉書寫已照擬飭行  
矣至其所書前銜有內廷供奉字樣尤爲不合會典所載官職本  
無此等名目萬承風何得任意形諸章奏著交部察議伊原係上



書房行走本欲俟到京之日仍令在上書房行走今觀其近日情形念念不忘內廷殊屬躁妄著不必在內廷行走十六年五月署經筵講官四月 命閱庶吉士散館卷充殿試朝考讀卷官六月 諭曰萬承風本係二阿哥師傅著仍在上書房行走同二阿哥講習十二月 命充經筵講官十七年二月 命閱考試翰詹各員卷九月因病請假奉 旨俞允十一月奏請開缺 諭曰萬承風著准其開缺調養俟病痊之日另候簡用十八年十二月卒二十三年十月兩江總督孫玉庭等據呈題請入祀鄉賢祠經禮部奏准十一月 諭曰直省名宦鄉賢必其人實有嘉言懿行方可俎豆馨香使後人知所則倣若以碌碌無所表見者廁名其間則

賢否混淆轉不足以興士民景仰之思卽如近日原任侍郎萬承風內閣學士錢樾皆經禮部奏准入祀鄉賢伊二人平日居官不過循分供職並無傑出謀猷祇以官登卿貳本籍紳士私相推獎遂得崇奉鄉祠但似此濫竽凡居官通顯者身後人人得登祀典豈合古人表里旌閭之義除既往者毋庸追論外嗣後各直省督撫遇有呈請入祀名宦鄉賢者務覈其人生前居官政績確有裨於國計民生臚舉事實方准其具題禮部秉公覆覈再行具奏請旨遵行如僅以人品端方學問優長空言譽美並無實蹟者該部卽行議駁以昭慎重承風子方雍見任刑部主事

右 國史館本傳

嘉慶丁卯義甯州萬文恪公承風奉命充浙江鄉試正考官  
上於召見時諭之曰汝在書房年久操守朕所素信浙江大省故  
令汝去又諭曰試官因有關防地方事無從知悉若學差則不  
然當據實陳奏也後果於闈中拜督學江蘇之命蓋陛辭時已  
微示意旨矣

右紀聞陳康祺撰

王綬

王綬順天大興人原籍江蘇乾隆四十六年進士改庶吉士四十九年散館授編修嘉慶元年遷詹事府右春坊右贊善二年升侍講三年五月充貴州鄉試正考官十二月轉侍讀四年二月充日講起居注官尋命提督安徽學政遷左春坊左庶子四月擢侍講學士十一月轉侍讀學士五年遷少詹事六年升詹事七年命稽查右翼宗學八年擢內閣學士兼禮部侍郎銜十年三月充會試知貢舉六月升禮部右侍郎尋轉左侍郎十月充武殿試讀卷官十一年四月署工部右侍郎兼管錢法堂事務五月奏寶源局鼓鑄錢文應用白鉛僅敷五月分額鑄之用黔省應運鉛斤尙

無運到確期六月分無項可動必致有誤鼓鑄請將五月分應鑄六卯分撥三卯於六月鼓鑄其六月分短鑄六卯俟白鉛抵京後每月添鑄一卯分爲六箇月補鑄齊全以符定制又奏各省商民販買鐵斤定例由官給票近年以來外省咨報購買鐵斤爲數太多恐有偷漏等弊請飭各督撫體察地方情形比較歷年多寡酌量定額以示限制均從之十月因病奏准開缺十三年四月病痊署內閣學士尋補授先是有旨查辦大興宛平童試冒籍命見任職官應改歸原籍者限一年之內自行呈明十一月奏請改歸江蘇溧陽原籍並自請議處上加恩寬免十四年三月因禮部侍郎任內保送銀庫筆帖式玉桂案犯同竊庫銀命將

原保不慎之堂官交部議處尋議降二級調用上改爲降三級  
再任十月復充武殿試讀卷官十六年因病乞休得旨王綬著  
加恩准其原品休致十九年卒

右 國史館本傳

國朝通志卷之四十一

三

王友亮

君諱友亮字景南王氏自宋祕書少監炎居婺源其子孫皆家焉  
國初居婺源之漳溪者曰承裕生贈中憲大夫啟仁啟仁生候  
選縣丞贈中憲大夫士鏡士鏡生平陽府同知贈中憲大夫文德  
平陽之子三長順德知府廷言次工部虞衡員外郎廷亨次卽君  
君十歲能詩稍長文名大著以貢生中乾隆三十年順天鄉試舉  
人三十四年會試取爲中書舍人四十六年成進士授刑部主事  
歷員外郎擢山東道監察御史轉禮科兵科給事中嘉慶初累擢  
通政司參議太僕寺少卿通政司副使嘉慶二年五月十二日卒  
年五十六君少以孝弟稱於家及在官恪敬吏事在中書嘗直軍



機處在刑部總辦秋審皆躬任勞苦不急求人知所建議皆當理  
及居科道奏議多可稱奉 命巡視南城屢監鄉會試於事皆辦  
其暮年承 命巡視南漕尤有績善撫卹運丁寬嚴有體於是漕  
船之行倍速於往年 純皇帝甚嘉之故君未及復 命而再遷鄉  
職將遂更大用之也而君入京師居通政甫半年卒天下是以惜  
其才之不盡也君於乾隆丁未科會試癸丑科武會試皆爲同考  
官號爲得士其生平選於文章之事中年自號葑亭所著古文曰  
葑亭集六卷議論正大敘事有法近時爲古文之善者推欽編修  
程魚門而君頗似之當乾隆之季京師士大夫奉廣惠寺僧爲師  
君惡之作一篇曰正師其後僧與奉之者皆得罪而君之名益彰

其詩爲雙佩齋集六卷又金陵雜詠百餘首新警有韻皆可誦也  
余在京師時君官中書將與相知未及而君以事歸江南使程魚  
門致意於余余爲題其觀雲圖及君入而余已歸余主江甯書院  
至君家而君仕京師以至歿不得見見君文筆誦歎而已夫人潘  
氏生子三太學生行恕貢生麟生候選府通判鳳生女六側室李  
氏生女一始君考平陽公自婺源僑居江甯生君故君少爲上元  
學生以是入仕既仕乃復請改歸籍婺源及喪歸以婺源山水峻  
遠難以還柩君子乃葬君於江甯之某原而請鵬爲之銘銘曰  
君度委蛇而正妄邪著緒有嘉年近才多未竟厥爲卷有遺文悠  
哉雅馴卓出俗羣貌不識君藹焉如親山水清善秣陵之坂故鄉

國朝詩及美不制

卷一百四

三

雖遠子孫式衍式居式展

右墓誌銘姚鼐撰

玉甯

玉甯他塔喇氏正紅旗滿洲人乾隆四十七年由官學生考取中書五十五年在軍機章京上行走嘉慶三年升侍讀四年四月充實錄館提調官十二月遷戶部員外郎七年六月因軍營連次擒渠奏捷十二月三省大功戡定玉甯均因在軍機章京上行走得旨議敘旋因恭纂高宗純皇帝實錄已進至乾隆二十年命將在館出力各員開單具奏奉旨玉甯以四品京堂升用仍交部議敘八年補鴻臚寺卿九年四月擢大理寺少卿諭曰玉甯補授大理寺少卿職分較大無庸在軍機章京上行走其實錄館提調事務亦未使兼攝惟該員在館有年尙稱熟手著加

恩充補 寶錄館總纂官尋奉 命偕刑部侍郎祖之望馳赴山  
東鞫臨清州民王富貴誣控董成功挾嫌串害案冠縣包漕逸犯  
陳章誣控折收私徵案又赴江蘇鞫山東民人陳景昌誣控銅山  
縣戶書詐騙銀物兩案又赴安徽鞫宿松縣監生董再傳誣控吳  
明望毆斃伊子董成案均審訊得實懲治如律十一月擢內閣學  
士兼禮部侍郎充經筵講官十年正月擢理藩院右侍郎充 實  
錄館副總裁三月授正黃旗蒙古副都統四月 命馳赴西甯查  
辦事件旋授西甯辦事大臣 賞戴花翎九月奏查看黃河以南  
各番族不遵約束占據蒙古地界請將青海蒙古事務歸併陝甘  
總督管理 上責其非是嚴行申飭十一月奏查覆生熟番邊界

之處定爲界限禁止商民偷越內附生番地界並赴深山伐木等  
項嚴立科條分別杖徒得 旨允行旋因駐藏大臣策拔克成林  
審訊匿名夷字一案互相參訐 命玉甯赴藏辦事十一年正月  
遷理藩院左侍郎五月奏言廓爾喀國王拉特納巴都爾被戕未  
據敝關稟報不必差人往探 上是之十三年六月調正紅旗漢  
軍副都統十月奉 旨回京十四年三月調正白旗滿洲副都統  
五月授倉場侍郎七月奏請裁汰外委十二員於舍人內酌給虛  
頂六名以資催漕出力下部議行十二月條奏倉場事宜一請改  
坐糧廳爲調缺以各倉監督選補一請改中西二倉爲繁缺一請  
坐糧廳及大通橋監督新舊交代照各倉監督例出結咨部以昭

慎重部議以坐糧廳與各倉監督官職體制不符駁之餘俱議行  
十五年奏請新造剝船添蓋木柵等項以重漕運 從之十六年  
二月奏把持倉務素屬兇橫之王喜方世德永遠枷號 上以所  
擬未協改爲枷號一年滿日發黑龍江給兵丁爲奴六月方世德  
之母方王氏控告二月間玉甯之子員外郎廣春曾差人持帖囑  
託監督交派花戶方世德承辦鑲黃正黃兩旗包衣甲米並墊車  
腳錢文花戶未允復遣人傳玉甯之言令其照辦仍復未允玉甯  
家人索錢一千串代求疎枷亦未許給玉甯隨將花戶捏造緯號  
奏請永遠枷號奏入 上以玉甯縱子倚勢妄爲並挾嫌誣奏著  
解任候質其子廣春著革職拏問交軍機大臣審訊王喜之案一

併訊問嗣經審訊屬實 諭曰玉甯之子廣春聽從家人張太之言欲包領鑲黃正黃兩旗包衣甲米三千石令其持帖赴倉囑託監督交派花戶承辦見已據張大供認不諱玉甯身任倉場如果認真查弊卽當首先將伊子及家人嚴管勿任干預外事一有見聞立當斥責查辦今據玉甯供稱廣春曾將有人託領甲米之處向其告知並自稱不敢應允玉甯不將廣春訓斥轉告以出倉本應好米如再有人向伊說及只管應允差人赴倉告知等語是玉甯不但不杜絕伊子舞弊而轉令招搖顯係知情在前而爲此多方掩飾之語以云無弊其誰信之至伊將花戶方世德及王喜柳號一節見據戴均元奏玉甯先未向商道業經枷號之後始行告



知並告以方世德枷後曾託人欲送銀一千兩求爲疎枷恐該犯  
意圖挾制故商請永遠枷號等語玉甯於懲辦花戶並不會同戴  
均元辦理直至事後告知明係挾嫌專擅至方世德果有賄請疎  
枷情事玉甯亦當據此情節秉公奏辦又何必諱匿不奏轉稱其  
素有綽號在倉把持欲將伊永遠枷號又王喜更非花戶玉甯亦  
未查出弊竇輒謂其希圖串通滋事立加枷示並又有言伊素有  
綽號亦請永遠枷號玉甯任性作威種種謬妄其中另有情弊著  
革職交軍機大臣會同刑部秉公審訊旋經審擬將玉甯發往伊  
犁效力贖罪廣春發往烏魯木齊效力贖罪十七年 賞給玉甯  
藍翎侍衛烏里雅蘇臺參贊大臣十九年卒子廣春奉 旨釋回

給主事銜見辦伊犁糧餉事務廣崇見任刑部筆帖式

右 國史館本傳

國朝禮儀典卷之九十一

三

潤祥

潤祥西林覺羅氏滿洲鑲藍旗人乾隆四十八年由候補筆帖式中式舉人五十五年補工部筆帖式嘉慶三年擢贊善四年三月遷翰林院侍講十月轉侍讀五年遷右庶子尋轉左六年擢國子監祭酒七年兼公中佐領十月正紅旗漢軍官學生楊潤賄囑潤祥族叔領催雙甯代求揀選員外郎潤祥據實奏聞得旨嘉獎尋奏八旗員外郎缺出請停揀選改爲入場考取以昭慎重下部議行十年遷太僕寺卿十一年遷大理寺卿旋擢都察院左副都御史十四年五月命查閱通州倉米因奏五城每月糶賣土米報單多無領無賣總由無一定限期催查稽覈花戶吏胥等得

以串通舞弊五城正副指揮懼有賠累不敢全數領運以致各倉  
土米堆積愈多每遇八旗支取兵米花戶等攙和好米刁難需索  
甚至借土米之名目糶好米於奸商那移攙雜種種弊端請查清  
各倉歷年未領土米勒限糶賣並請嗣後漕運到倉由倉場侍郎  
將各倉所餘土米查明報部劄行五城副指揮全行領運出糶年  
清年款勿令久積在倉致滋弊混 上是其言十六年閏三月充  
繙譯會試副考官五月會同各城御史分理平糶事宜十一月稽  
查正陽門至朝陽門一帶堆撥官兵奏正藍旗兵丁服用不充  
上命八旗都統在各該旗公項內籌款撫卹十二月擢盛京戶部  
侍郎十八年量移京城宗室遷駐盛京 命潤祥經理其事時山

海關副都統額勒金布盤獲匪犯王立安供與新屯之民張姓糾約滋事經盛京將軍和甯訪獲該屯民居住年貌相倣之民人張建謨等刑備誣認十九年正月 詔潤祥覆按訊之該民人等實無謀逆情事將原審各員分別參處六月 命訊陳蘇魯克翼長阿薩爾控案先是欽差大學士松筠奏請將養息牧河牧廠丈量開墾移駐旗人未奉 諭旨續經將軍和甯等將該牧廠撥給錦義等州旗人及陳蘇魯克領認試墾至是陳蘇魯克已退翼長阿薩爾等控翼長阿沙拉等將牧廠官地私給民人耕種 敕潤祥讞其獄尋訊明松筠等查勘該牧廠時阿沙拉並未商之眾牧丁率行出結聽官查丈眾牧丁恐開墾後有妨游牧履行呈訴未爲

申理遂捏款上控論阿薩爾等罪如律潤祥因陳該處牧廠不便開墾請停止 從之七月協理 昭陵 隆恩殿工程十一月調工部右侍郎旋調倉場侍郎二十年正月查明倉場經紀自十四年後長借腳價等項銀三萬九千餘兩請著落歷任坐糧廳分賠四成後任坐糧廳養廉內坐扣三成餘在該經紀名下按年追扣其十四年以前舊欠銀十一萬八千餘兩亦照此辦理 命如所請行二十三年二月御史文溥請將旗人俸米由本旗派參領代爲領運分給各員毋庸給與米票以免揀擇包攬等弊 命潤祥同漢倉場侍郎莫晉會議尋奏米票一項各倉藉以稽查出入斷不可少至領米時均照排定版次發放從無任聽揀擇之事惟官

員品級有大小米石有多寡其領米較少者或併車裝運以圖省費亦屬事所常有果有不法之徒包攬舞弊見有稽查御史在倉監放無難立時查拏懲辦若如該御史所奏誠恐轉滋煩擾請仍照舊定章程辦理 上准其奏十一月卒

右 國史館本傳



四庫全書

三

國朝耆獻類徵初編卷一百五目錄

卿貳六十五

趙秉冲

福勒洪阿

達慶

陳萬全

周兆基

温汝适

吳芳培

張映漢

陳觀弟用光  
從子希曾

陳壽蔚

成書

費錫章

金應琦

姚祖同

--	--	--	--	--	--	--	--	--	--

147 - 154

國朝耆獻類徵初編卷一百五

通奉大夫前署江西巡撫江西布政使司布政使湘陰李桓輯  
卿貳六十五

趙秉冲

趙秉冲江蘇上海人父戶部主事文哲隨將軍温福征金川乾隆  
三十八年殉難入忠義傳四十四年奉 旨繕寫篆字監生趙秉  
冲著照從前陳孝泳楊瑞蓮之例在懋勤殿行走四十八年 諭  
曰監生趙秉冲在懋勤殿行走有年著加恩賞給中書遇缺卽補  
仍准其一體會試四十八年補內閣中書五十四年十月 諭曰  
內閣中書趙秉冲見已俸滿以主事用尙未得缺該員在懋勤殿

行走年久頗爲勤慎著加恩以戶部主事補用十二月 上以秉  
冲辦理石鼓篆文應書銜 命以戶部員外郎補用五十九年升  
兵部郎中六十年擢湖廣道御史嘉慶二年遷戶科給事中三年  
授鴻臚寺少卿四年三月授內閣侍讀學士四月 諭曰內閣侍  
讀學士趙秉冲在懋勤殿行走有年學問尙優人亦謹慎著照陳  
孝泳之例同南書房翰林一體行走五月轉太僕寺少卿五年轉  
大理寺少卿六年轉光祿寺少卿七年二月轉太常寺卿七月  
上巡幸木蘭秉冲隨圍 命射中箭五枝 賞戴花翎八年四月  
賞給兵馬司胡同官房一所十二月授通政使九年二月 上  
臨幸翰林院用唐張說東壁圖書府五律字各分一字賦詩秉冲

與馬分得醉字十年五月授兵部右侍郎十一年調戶部左侍郎  
十三年 上巡幸淀津 回鑾秉冲呈進詩冊 賞紗二端十四  
年十月 皇上五旬萬壽秉冲呈進詩冊 賞大卷八絲緞二端  
大小荷包及筆墨紙硯各件十二月書吏王書常等偽造印文冒  
領庫銀秉冲失察五次部議降一級調用 上加恩改爲降二級  
畱任十七年五月 頒賞各大臣 御製河復誌事詩墨刻內漕  
字誤寫驕字秉冲以不能敬謹校正檢舉筆誤自請議處並繳工  
價 諭曰趙秉冲於刊成頒賞之後始看出筆誤檢舉實屬疎忽  
著拔去花翎毋庸交部議處所有此次墨刻石料紙墨工價仍著  
全數賠繳是月調戶部右侍郎管理錢法堂事務十八年署 行

在兵部左侍郎十九年三月因病乞假並請開缺 上以秉冲年力正強偶感時疾自易全愈令其安心調養不必開缺四月卒諭曰侍郎趙秉冲在內廷行走三十餘年勤慎供職前因患病請假諭令安心調理茲聞溘逝深爲軫惜昨已賞給陀羅經被著再加恩賞給廣儲司庫銀三百兩經理喪事照侍郎例給予卹典所有任內一切處分悉予開復子榮覓官翰林院庶吉士林候選兵馬司指揮

右 國史館本傳

福勒洪阿

福勒洪阿乾隆四十八年由官學生襲頭等男爵五十四年授三等侍衛嘉慶四年擢二等侍衛五年命在乾清門行走八年閏二月以擊獲逆犯陳德將門禁不嚴之大臣等分別議處福勒洪阿降三等侍衛十月仍擢二等侍衛十年閏六月補公中佐領十一月大學士保甯散疾上命福勒洪阿帶同醫生往視遲誤未到降藍翎侍衛在大門上行走十二年仍在乾清門行走十三年復授三等侍衛十四年賞頭等侍衛充伊犁領隊大臣十七年十月命來京另候簡用十二月授鑲紅旗蒙古副都統十八年正月補武備院卿九月轉奉宸苑卿旋調補鑲藍旗滿洲副都統



十月 命偕阿蘭保馳赴獨石口迎提逆犯曹綸十一月押解到京得旨嘉賞十九年閏二月充諳達四月擢內閣學士兼禮部侍郎銜二十年三月授正白旗護軍統領五月充右翼監督二十一年因所管護軍假冒官職自行訪出後未能據實奏參降大門上二等待衛授葉爾羌辦事大臣二十五年 命來京道光元年九月授二等待衛仍在乾清門行走十一月擢正白旗漢軍副都統二年閏三月辦理軍政 上以福勒洪阿所保各員年力衰邁者居多交部議處尋議降二級調用 上加恩改爲降三級畱任十二月調鑲白旗滿洲副都統三年正月 諭曰上年副都統福勒洪阿等因保薦步箭平常之參領降三級畱任一案著加恩寬

免二級以示履端行慶至意尋授正藍旗護軍統領十月以禮部筵宴朝鮮國貢使福勒洪阿輪派護宴未到罰俸一年四年二月復授內閣學士兼禮部侍郎銜七月恭送 仁宗睿皇帝實錄 聖訓前赴盛京尊藏十月禮成得 旨議敘七年正月復充右翼監督七月署兵部右侍郎稽察中書科八年署兵部左侍郎九年授理藩院左侍郎三月 上看步射以福勒洪阿身軀單弱退出乾清門四月革護軍統領八月卒無子姪清慶襲男爵官雲南普洱鎮總兵

右 國史館本傳

國朝書錄彙編

卷一百五

四

達慶

達慶齡格哩斯氏正黃旗蒙古人乾隆四十八年由舉人授國子監監丞五十四年擢右春坊右贊善五十六年三月遷司經局洗馬十月擢右庶子充日講起居注官五十七年升侍講學士六十年遷侍讀學士充咸安宮總裁嘉慶元年三月擢詹事五月擢通政使十月擢副都御史二年兼公中佐領四年二月充清字經館總裁三月授倉場侍郎四月奏巡漕御史德舒翁阿因回空鎮江請船攜帶白鉛輒令將船押回通州誠恐回空遲誤飭將所押船隻放行上嘉之旋奏請內務府三倉照京通各倉之例部頒鐵斛以憑建造木斛十一月奏各倉收放米石零星米拋撒毋庸發

城糶賣仍歸入盈餘項下作正項支用五年奏停戶部派員驗袋以節糜費均得 旨允行六年二月京察屆期 諭曰達慶剔除積弊整頓漕務著交部議敘七月因海運倉二月分西四旗應領俸米遲至七月始行開放 上以達慶總司漕務毫無聞見非尋常失察可比著交部嚴加議處尋議降二級調用准抵銷九月 諭曰前此金山等四幫運船短缺漕糧達慶之意以丁船守水日久需用食米較多挂欠有因欲請將餘米抵補而又不肯遽行陳奏懇朕特降諭旨加恩當經面諭達慶於摺內夾片聲明達慶自應向鄒炳泰詳細告知聯銜具奏乃伊等同辦一事達慶並不將夾片聲明之處預行告知鄒炳泰迨宮門呈遞奏摺時始令閱看

已屬非是及至此次奏報三進南米回空時鄒炳泰欲將運船有無挂欠一併聲明達慶卽將運船回空單銜具奏於漕務虧欠細數並不陳明有何迫不及待而恩逮乃爾是其任意自專目無同寅實非和衷共事之道達慶著交部嚴加議處來京聽候部議尋議降二級調用旋授鑲紅旗蒙古副都統十月復授倉場侍郎十一月奏疏濬通惠河卽令見在護城河工作之人接挑仍得以工代賑 從之八年十月奏豫東河工需用浩繁令各直省捐納義監生按照每歲應交地丁銀四十兩以上者定爲四五十倍彙總交納免其租賦並准其鄉試 諭曰達慶條奏捐納義監生一摺是直欲數十年之賦額併徵於一時無稽之言妄行陳奏紕繆已

極達慶著交部議處尋 賞頭等侍衛赴葉爾羌幫辦事務九年  
正月授葉爾羌辦事大臣八月奏巴爾楚克一帶開渠墾地已閱  
五年請給回眾耕種毋庸另議升科 上是之十年九月調塔爾  
巴哈臺參贊大臣加副都統銜 賞戴花翎十二月授正藍旗漢  
軍副都統十一年八月奏塔爾巴哈臺向設屯兵五百名內耕種  
小麥兵四百名青稞屯兵歸於操防茲查青稞僅敷七年搭放之  
需請將所撤耕種青稞兵一百名仍歸屯所復思倉廩備貯青稞  
與小麥有經久不經久之分應將青稞屯兵一律改種小麥則倉  
儲堪以久貯得 旨允行十二年復授倉場侍郎十四年二月因  
北新倉開放霉爛稜米部議降二級調用 諭曰達慶曾三任倉

場侍郎上年由新疆辦事特行簡用來京原因其熟悉倉場事宜加以委任乃不知實心經理致多霉爛部議降二級調用尙覺過輕著降三級調用旋因舊太倉米色霉變降員外郎五月 賞給三等侍衛作爲葉爾羌幫辦大臣旋因倉場侍郎任內於通州中西二倉白米多有虧缺並積蠹高天鳳私用花押白票裝米出倉失於覺察 上責其溺職撤回葉爾羌辦事 命革職發往熱河效力贖罪十五年 賞給藍翎侍衛爲庫爾喀拉烏蘇領隊大臣十六年卒子成憲見任理藩院主事

右 國史館本傳



國朝通志卷一百五

陳萬全

陳萬全浙江石門人兄萬青乾隆四十六年一甲二名進士萬全  
以乾隆三十九年舉於鄉四十九年成進士朝考第一名改庶吉  
士五十二年散館一等授編修五十四年三月入直上書房七月  
充河南鄉試副考官嘉慶元年三月充會試同考官二年四月擢  
左贊善五月遷侍講九月轉侍讀三年三月大考二等四月充日  
講起居注官九月超擢侍講學士四年四月 命仍留上書房行  
走二月轉侍讀學士三月充文淵閣直閣事尋充會試同考官擢  
詹事府少詹事四月遷詹事府擢內閣學士兼禮部侍郎并稽察  
中書科七月署國子監祭酒又 命侍皇次子讀書五年正月擢

兵部右侍郎六月轉左尋充江南鄉試正考官六年四月充殿試  
讀卷官九月以疾請解職 上溫諭慰安之 命不必開缺十二  
月奉 上諭陳萬全患病未愈將來病痊後在本衙門供職不必  
在上書房行走七年正月病益劇 諭曰據陳萬全奏稱數月來  
趕緊調治尙未全愈見在已屆開篆曠職不安仍懇俯准開缺回  
籍就醫等語陳萬全著准其解任回籍調理四月於東昌舟次卒

右 國史館本傳

先高祖勇南公諱鏞晚居石門見近鄰二童子奇其貌招之來家  
俾與先大父共讀卽陳學士萬青侍郎萬全也故名大父曰萬森  
右庸聞齋筆記陳其元撰

周兆基

周兆基湖北江夏人祖籍江南蘇州府吳江縣乾隆四十九年進士改庶吉士五十二年散館授編修五十三年充山西鄉試正考官五十四年充順天鄉試同考官旋提督陝甘學政五十九年丁父憂嘉慶二年服闋遷國子監司業五年轉右春坊右中允六年充浙江鄉試副考官游擢翰林院侍讀八年遷右春坊右庶子旋以大考二等擢翰林院侍講學士又轉侍讀學士充日講起居注官九年提督安徽學政遷詹事府少詹事十年四月遷詹事閏六月權內閣學士兼禮部侍郎仍畱學政任十一年正月調直隸學政六月遷工部右侍郎旋轉左侍郎十二年九月還京十一月充

經筵講官尋充文穎館副總裁十二月奏明寄籍緣由請與伊子  
膺錄周誦芬族姪周蘭均改歸江蘇原籍并自請交部議處 諭  
曰周兆基之父周永錦於乾隆十五年因遊幕楚中住家江夏周  
兆基係在彼生長本與入籍定例相符其應試時呈明地方官批  
准有案自非冒籍可比茲因清釐籍貫該侍郎自虞占籍他省卽  
行據實陳明著准其改歸江蘇原籍並加恩免其議處十三年四  
月充殿試讀卷官朝考閱卷官六月充浙江鄉試正考官九月調  
刑部右侍郎十四年三月轉左侍郎復充朝考閱卷官六月御史  
陸言奏參浙江學政劉鳳誥考試不公及代辦監臨時爲生員徐  
步釐印用號戳聯號舞弊各款 命偕侍郎托津光祿寺少卿盧

蔭溥往按之尋審訊得實褫鳳誥職解部議罪以兆基提督浙江學政十二月已革武生陳秀麟來京接駕諭兆基查明斥革原案兆基擅動驛站覆奏上申飭之十六年奏浙江温州府屬之玉環廳向未設立專學所有額進文武各生俱附列温州府學嗣於嘉慶八年建玉環專學加增進額定爲文生八名武生四名添設廩生增生各八名三年一貢嚴與各州縣學體例相符惟選拔貢額尙未定有章程請照州縣學之例如有文理優長者量予選拔一名從之十八年九月任滿還京擢工部尙書充會典館副總裁十二月復充經筵講官十九年閏二月文穎館纂輯全唐文告成賞加二級三月充會試正考官六月充國史館正總裁

二十一年調禮部尙書二十二年卒子誦芬戊辰舉人揀選雲南  
知縣繼芬候選府經歷

右 國史館本傳

温汝适

温汝适廣東順德人乾隆三十五年舉人捐內閣中書四十年補官四十四年丁母憂四十六年服闋四十八年回京候補原官四十九年成進士改庶吉士五十二年散館授編修五十三年充廣西鄉試副考官五十四年充四川鄉試正考官五十七年丁父憂六十年服闋回京供職嘉慶二年命在上書房行走四年正月充實錄館纂修官退出上書房行走六月升左春坊左贊善復直上書房七月遷司經局洗馬充日講起居注官六年五月擢翰林院侍講十二月轉侍讀八年三月大考二等九年二月升右春坊右庶子六月轉左庶子十年擢國子監祭酒十一年四月退出



上書房行走八月升太僕寺卿十一月遷通政司通政使十二年  
充 實錄館詳校官十三年充山東鄉試正考官十四年正月  
命提督陝甘學政尋遷都察院左副都御史十五年以生母年老  
請回京供職 允之四月抵京 命偕刑部侍郎穆克登額往諭  
福建海船水手蘇花臉等私藏器械擾害地方訊實按律懲治旋  
有山東日照縣民馮愛控告弟婦馮厲氏糾母族多人毆斃其弟  
馮爰仍 命汝适等往按之訊係馮厲氏之弟厲廷選起意糾毆  
馮厲氏未行喊救俱問擬如律六月回京八月充順天鄉試監臨  
官偕滿監臨官佛住奏南北皿官卷人數較多請酌增中額 諭  
曰順天鄉試南北皿取中官卷久經定制本科又非加恩廣額之

年該監臨遽爲此奏顯係有意見好所奏不准行佛住温汝适俱著交部議處尋議罰俸 命實降一級調用九月仍直上書房十一月補太僕寺卿十六年復授都察院左副都御史十八年擢兵部右侍郎十九年乞終養回籍二十三年丁生母憂道光元年服闋來京卒於道 諭曰前任侍郎温汝适在上書房行走有年茲服闋來京在途溘逝殊堪憫惜伊子舉人温承悌著加恩賞給進士准其一體殿試子承悌翰林院庶吉士散館改主事

右 國史館本傳

汝适成進士改庶常授編修丁巳入直上書房擢贊善再擢洗馬侍講侍讀轉左右庶子遷國子祭酒太僕少卿通政使歷典廣西

四川山東鄉試督學陝甘尋升副都御史己巳監臨京兆試臨場  
條陳降補太僕正卿旋復副都御史癸酉擢兵部右侍郎甲戌以  
母老 予告南歸未幾居母憂哀毀成疾及痛聞 仁宗睿皇帝  
升遐急奔赴扶病就道兼程進發卒於江西吉安舟次年六十有  
七 上聞憫惜 賜其子舉人承悌進士汝适視學陝甘時以甘  
肅寫遠藏書絕少乃厚捐俸貲多購善本置書院中戊辰己巳閒  
粵洋不靖汝适卽見聞所及剴切陳奏生平無他嗜好惟多蓄書  
公餘以書史自娛著有曲江集考證曲江年譜攜雪齋詩鈔文鈔  
其未梓者有咫聞錄韻學紀聞日下紀游略藏於家

右廣東通志張維屏錄

吳芳培

吳芳培安徽涇縣人乾隆四十九年進士改翰林院庶吉士五十二年散館授編修六十年丁祖母憂嘉慶三年服闋來京供職四年六月遷詹事府右贊善八月轉左中允十月擢侍講十一月充日講起居注官旋充咸安宮總裁五年二月轉侍讀五月充四川鄉試正考官六年提督河南學政九年差滿回京十年擢右庶子十一年升侍講學士十二年轉侍讀學士十三年擢詹事十四年五月提督順天學政十一月擢內閣學士兼禮部侍郎銜十五年差滿回京十六年三月充會試知貢舉九月充武會試正考官十八年八月復任順天學政旋擢兵部右侍郎九月轉左二十年丁

本生母憂二十一年服闋補吏部右侍郎二十二年三月充國史館副總裁八月以保送截取知府戶部郎中錢學彬不勝外任部議降調 上加恩改爲留任二十三年三月擢都察院左都御史十月充武鄉試正考官十二月定次年京察以給事中色成額有疾已入六法後復改列三等給事中李振祐劾之下部嚴議尋議降一級調用 命署兵部左侍郎二十四年四月補吏部右侍郎九月充武會試正考官十二月調刑部右侍郎二十五年充會試副考官旋調兵部左侍郎道光二年正月京察以年力衰邁 命以原品休致九月卒子忭四川候補知縣檀二品廕生工部主事

右 國史館本傳

吳公芳培以侍讀典試四川時教匪蔓延秦蜀遂駐沔縣爲畫城  
守事宜賊遁乃兼程進

安徽通志

先生屢操文柄望重士林詩格典雅清新體兼唐宋七律沈雄工

麗尤所擅場宜爲海內名流所激賞

詩萃

右正雅集符葆森錄

按吳公字霽霏號雲樵著有雲樵詩集

國朝文獻通考卷一百一十五

四

張映漢

張映漢山東海豐人乾隆四十九年進士以主事用分戶部學習  
五十二年補官五十四年丁父憂五十七年服闋補原官五十八  
年升員外郎五十九年升郎中六十年京察一等嘉慶元年三月  
大學士貝子福康安奏請派員赴湖南軍營辦事 命映漢馳驛  
前往俟大功告成卽畱於該省以道府酌量補用八月補銜永郴  
桂道三年八月充鄉試提調官九月以失察附貢生傅晉賢句串  
書吏換卷中式部議降二級調用尋捐復赴部候補五年湖廣總  
督姜晟奏楚省邪匪計日卽當剿淨見在辦理團勇邊防及善後  
事宜必得精明強幹之員董率辦理請將前任道員張映漢准發



來楚以資差遣 從之七年補湖北糧儲道十一年升山西按察使十三年擢湖北布政使十五年調山西布政使十六年閏三月上巡幸五臺映漢以辦理差務妥協交部優敘四月授湖北巡撫六月戶部右侍郎錢楷條陳湖北事宜一楚省額定南北二漕州縣寫隔抵兌參差宜就近撥定一沿江洲地宜令各州縣將見納錢糧者造冊備案載明有契無契設遇坍卸卽報豁額糧不准畱糧待淤一湖北新設提督應移駐襄陽府城一楚北均食淮鹽而淮鹽之行於襄鄖宜昌等府者難於暢銷應籌議減價 命映漢會同湖廣總督馬慧裕等議奏尋奏沿江洲地一款應如錢楷所奏其餘三條均窒礙難行請仍循舊章辦理 從之十九年正

月奏州縣爲親民之官三年大計考覈過疎請於每年歲底確加甄別 諭曰三載考績之制昉自虞廷遵循已久若每年甄別一次事涉繁擾况牧令分理地方總在督撫大員認真察覈不特貪酷之員黜之唯恐不速卽疲庸不職之員亦當隨時糾劾又豈必一年之久乎見當整飭官常之日惟當秉公察吏登崇俊良黜退庸闇吏治自蒸蒸日上不在紛更成憲也十月偕馬慧裕奏請改襄陽府爲要缺請 旨簡放見任知府王樹勳於理繁治劇不甚相宜飭令離任送吏部引 見二十年五月御史石承藻奏參王樹勳先在京城廣惠寺爲僧蹤跡詭誕後經還俗捐官不安本分請 旨查辦尋經刑部鞫實禡樹勳職 諭曰馬慧裕等上年之

刑部奏狀頭致切編 卷一百五 鄭貳六十五

七

奏竟係明知王樹勳出身不正因奏補在先不肖據實舉發故託言襄陽府今昔情形不同又稱王樹勳人地不宜使之離任藉以杜絕物議如此委曲遷就豈大臣實心任事之道著馬慧裕張映漢將上年因何不行參劾緣由明白回奏尋奏風聞王樹勳從前有爲僧之說且察其才具不勝方面之任未經據實奏參請嚴加處分部議革職 上加恩改爲革職畱任降三級七月捕獲習教斂錢拜師呪匪犯孫家望等二十一年五月獲襄陽縣屬習清茶門教之張學言及聽從習教之彭兆蕙等治罪有差旋調浙江巡撫時總督馬慧裕亦調任 諭曰張映漢在湖北巡撫任內拏獲邪教案犯多名辦理地方事務尙屬認真今湖北督撫同時更

調恐情形不能熟悉張映漢著仍畱湖北巡撫之任六月奏襄陽  
地方距漢口路遙商鹽難銷一安壤潞私最易侵灌經前督臣汪志  
伊奏明責成襄樊同知查緝私梟並酌撥淮鹽由該同知運襄銷  
售近年梟徒已漸斂迹且官民交易本屬不便假手丁役尤易滋  
弊請仍歸商運商銷下部議行十二月奏湖北傳習牛八教先後  
赴官投具悔呈者三百六十四名二十二年正月奏湖北沿習天  
主教具結投悔並將經卷圖樣交官者共三十七名又交出大乘  
教經卷具結投悔各十餘名均得 旨免其治罪二十三年五月  
借總督慶保奏湖廣行銷淮鹽有淮引輓運維艱之永州寶慶二  
府請就近改食粵鹽鄖陽一府請就近改食潞鹽宜昌一府請就

近改食川鹽 諭曰淮鹽行銷地界係百餘年久定之例近日楚  
省地方官不能實力緝私以致鄰私侵灌額外缺銷乃輒議將楚  
省四府淮鹽引地改食鄰鹽不知私鹽充斥之區全賴自固藩籬  
若退讓一步必致進侵一步是何異引盜入室自撤藩籬乎所奏  
實屬紕繆慶保張映漢俱著交部議處尋降二級畱任九月查獲  
南漳縣復興白蓮教匪金文張義等二十二名分別治罪二十四  
年擊獲潛入內地傳習天主教之西洋佛郎西國人劉方濟實於  
法二十五年四月授湖廣總督十二月 召來京另候簡用道光  
元年二月授刑部右侍郎四月疏陳湖南苗疆事宜一屯丁承種  
均田應照舊定章程遇有屯丁缺出准其子弟頂補作爲世業勿

許委員屯官等以隨帶私人頂充一額徵屯租宜量爲輕減一苗疆七廳縣應積貯以備歉歲並稍寬鹽禁以資安輯一屯務應令該管之廳縣督率屯官切實經理將各屯委員槩行裁汰以杜騷擾而省濫費一苗民訟案應到官質審者卽令苗弁傳喚毋許差役拘拏以免藉端索詐一苗額舉人不應阻抑會試以示鼓舞奏入 命湖廣總督陳若霖會同湖南巡撫左輔詳議均如所請行六月署戶部右侍郎二年調倉場侍郎三年以海運倉豆石霉變花戶等有偷換攙和情弊經戶部奏參 命映漢等明白迴奏尋偕滿洲侍郎和桂奏覆海運倉所存豆石均係本年新收之豆臣等與坐糧廳親驗實係乾潔其中間有潮溼者並捐給銀二

百兩作爲挑晾之費迨署任監督吉隆阿等到任後稟稱豆石霉變正按厥查辦間准戶部並侍衛處及查倉給事中朱爲弼以豆石霉變一併咨會前來臣等以爲尙未查竣未便咨部今經戶部於臣等尙未查清具奏之前先行奏參謹將見辦情形先行奏明俟覆查完竣其霉變不堪者應令監督及花戶賠償并臣等應請議處之處另行具奏 諭曰海運倉新收之豆既有潮溼該侍郎等於查驗時卽當奏明駁回不應收貯乃不據實具奏率將潮豆貯倉並自捐銀二百兩作爲挑晾之費向來無此辦法可見該倉監督花戶等偷換攙和通同舞弊在所不免該侍郎等或明知弊混故爲彌縫實屬辦理不善和桂張映漢著交部議處會查倉給

事中朱爲弼復奏漢侍郎張映漢前此並未到倉滿洲侍郎和桂前次到倉祇係查看米色其查驗豆石係在臣行知以後該侍郎等作爲自行查出所奏殊爲失實再風聞已革監督雅隆阿於本年三月開收山東漕豆入倉後忽報潮蒸回明該侍郎須籌挑晾之費隨向坐糧廳索銀二百兩作爲經費竊思坐糧廳驗收之豆實係乾潔何肯給與挑晾銀兩該侍郎等所奏亦屬失實 命解任赴部候訊尋訊實花戶舞弊監督受賄張映漢等無串通隱飾別情惟辦理不善奏請革職 諭曰張映漢等於監督稟有受潮豆石輒令坐糧廳請給銀二百兩以爲挑晾之費已屬乖謬又於該倉花戶私放新豆至一萬五千餘石之多毫無聞見迨侍衛處



不肖承領豆石經查倉給事中查出又不速奏究辦實屬昏憤本  
應照部議革職姑念尙無通同隱飾情弊著加恩以六部主事用  
四年以前在刑部侍郎任內於官犯候際清贖罪案具奏時率行  
畫諾並未查出紅供又失察司員書吏得贓 命於補官日降四  
級調用十年卒子級二品廕生戶部員外郎

右 國史館本傳

陳觀 弟用光 從子希曾

陳觀江西新城人乾隆四十九年進士以主事用籤分工部五十五年補官五十七年升員外郎五十九年升郎中六十年京察一等得 旨由驛馳赴福建以道府用嘉慶元年補福州府知府時閩縣匪徒林孔超等在省城北關外夥開花會觀偵獲首犯及其夥多人分別定擬如律二年護理鹽法道三年閩浙總督魁倫巡撫汪志伊器其能以觀委署是任除弊卹商實爲得力奏請擢補格於例不行既而復申前請 上允之十三年臺灣逆匪蔡牽滋事浙洋盜首張阿治等赴閩投首請擒逆自贖閩浙總督阿林保飭觀提訊得其情設法安置十四年擢浙江按察使十六年干總

張雲龍以巡捕隨閩浙總督汪志伊閱伍私收辦差家丁餽儀經汪志伊劾觀訊鞫擬罪如律十七年遷江甯布政使十八年以胞姪希曾任江蘇學政循例迴避調山西布政使未抵任會勦辦河南教匪徐州府屬距豫省近駐兵防守觀捐廉協濟軍需上准其交納二十年二月調陝西布政使先是寶陝局鼓鑄錢文歲有例支工價至是日久物昂不敷辦公四月觀請借支兩年以資調劑其款勻十年扣還經巡撫朱勳奏入如所請行二十一年二月以秋審人犯失出鑄級畱任三月授太僕寺卿五月升內閣學士兼禮部侍郎銜六月授倉場侍郎十月奏言漕糧運倉經費不敷請撥部存輕齎銀兩以備支放並辦來年兌漕事宜又以大通橋

車戶承運漕糧逾額年欠米價銀兩奏請分年扣繳以紓役力均如所請十二月因病開缺 允之尋卒子希頤舉人

右 國史館本傳

陳用光

陳用光江西新城人嘉慶六年進士改翰林院庶吉士七年散館授編修十三年充河南鄉試正考官十八年升江南道監察御史時逆賊林清伏誅後 詔求直言用光奏言臣深思致患之原竊以爲大端有二一則大興宛平之選吏未得慎簡之方一則山東河南之察吏未得舉措之道大興宛平屬於順天府而選大興宛平者第由直隸總督之題升府尹雖會銜而不能專主聞升此二

縣大抵以資格深而開元無才者授之積習相沿數十年於茲彼  
既無才安能責以禁伏摘奸之治臣度向來題升者之意必以京  
師之地百司具焉刑維所布固已條教詳明爲大興宛平者但能  
不失期會簿書之責卽爲稱職非若畿輔他縣差務殷繁必須才  
吏始能無誤然則雖升其官而不求其才淺失乎鄭重牧民之意  
臣愚以爲應請 旨飭下直隸總督嗣後題升大興宛平不得徒  
循資格必擇其治行尤異者方與題升而順天府尹亦使之得兼  
保舉參劾之權則良吏必出矣山東河南之察吏未得其道者逆  
黨之謀匪伊朝夕其蹤跡如此之廣往來數年之間兩省守土之  
吏豈其地無聞見先事之疎固不得辭其責近來州縣之保舉祇

敘虛詞鮮臚實事臣愚以爲苟其有私雖循例之保舉未嘗不可  
以市恩苟其無私雖破格之超擢不必復疑其逾格方今山東已  
大就安謐河南軍務亦將次奏凱聞河以南饑民頗眾可否 特  
詔兩省大吏於所屬州縣中能撫恤饑民兼有解散盜賊之方者  
自州縣丞倅以及將弁准其保奏予以超擢則不獨激勸有方而  
亦可消患於無形矣奏入 諭曰嗣後各直省首縣要缺該督撫  
遴選賢能之員專摺保奏除該員見有私罪處分吏部仍奏明飭  
駁外其任內一切因公處分均可無庸覈計著吏部詳定章程奏  
明頒發遵行以收推賢舉能實效其大興宛平二縣應如何責成  
順天府尹遴選賢否考課最善之處著詳議具奏尋議奏嗣後大

興宛平二縣缺出請歸府尹於所屬之員詳加遴選出具考語奏請升調其外二十二州縣揀選題調均令府尹主稟總督會銜如順天府屬無可保題再咨行總督於通省揀選令總督主稟府尹會銜順天府屬佐雜各缺亦歸府尹專主辦理 從之十九年閏二月 命巡視西城三月充會試同考官八月轉掌廣東道監察御史十月奏正指揮署內黑夜有賊持刀之案 上以用光未查明原委率據稟報之詞張皇入奏交部議處尋降編修二十三年充明鑑總纂官二十四年三月充會試同考官八月充順天鄉試同考官道光二年升國子監司業三年四月遷右春坊右中允十一月升翰林院侍講四年四月遷右春坊右庶子六月升翰林院

侍講學士尋充日講起居注官十二月充咸安宮總裁五年充江南鄉試副考官七年十月授詹事府詹事十二月充文淵閣直閣事八年二月推內閣學士兼禮部侍郎銜八月提督福建學政十一年升禮部右侍郎十二年六月署戶部右侍郎兼管錢法堂事務九月充武會試正考官十三年正月提督浙江學政七月轉禮部左侍郎仍留學政任十四年奏言直省建立先賢專祠許其裔孫承襲奉祀所以發潛德之幽光示人倫之模範自非德行純粹忠節昭彰不得濫膺斯選宋臣孫觀其人本非端人查宋史所載孫觀受張邦昌僞命又查四庫全書總目內載孫觀劾李綱附和議以職罪斥提舉鴻慶宮是孫觀品行有虧從前設立奉祀似屬



過濫應請將伊奉祀生卽行裁汰以肅祀典下部議行十五年回  
京七月因病請假八月卒子蘭滋原任廣西上思州知州蘭第山  
西澤州府知府蘭豫甘肅高臺縣縣丞

右 國史館本傳

公姓陳氏諱用光字頌士江西新城人曾祖 贈資政公世爵祖  
道進士 贈光祿大夫考守詒陳州府知府 贈資政大夫配魯  
夫人生公兄弟五人公次三自陳州公以上皆以名德尊重振匱  
濟貧於州里有恩公嘉慶六年進士授編修轉御史以部議回編  
修供職歷官至禮部左侍郎公自少從魯山木好爲文章及壯師  
桐城姚郎中鼐以爲古文詞必扶植理道緣經術爲義法宗耆儒

不根而高材生又奴主同異破碎大體學不构行藝精道荒慨然  
欲以文章道術自表見薦寵後進文藝廣坐中稱心而談不顧人  
厚薄然否至達官要人慶弔事不數數也語及則曰忘之自御史  
回編修益貧甚人勸其出游公曰吾近臣矣又爲人客奈何嘗有  
貸於友人至則弈棋賦詩盡日暮忘所事而返然於師友誼至篤  
以千金五百金爲兩師祭田同年孤女幼撫嫁之前後爲編修二  
十年始轉司業司業例不與大考公語曾亮曰吾性好文而拙於  
書莫宜是官不數年驟遷至閣學 上諭曰汝非有保舉人朕知  
汝恬退進汝官嘗充日講起居注官文淵閣直閣事國史文穎館  
及明鑑總纂以編修爲甲戌己卯會試同考官己卯鄉試同考官

戊辰河南鄉試正考官以侍講學士爲乙酉江南鄉試副考官以  
閣學侍郎爲福建學政壬辰科會試覆試閱卷大臣武會試總裁  
浙江學政爲學政時以宋臣孫覿推忠助邪奏罷其專祀訓諸生  
必本古儒先警戒之道道光十五年回京以禮部左侍郎供職適  
上賜平定回疆圖公觴客敬觀樂甚未幾病夢陳州公曰求吾  
木於家以是藥汝疾其逃逋曾亮聞而傷曰疾求木兆之棺矣疾  
篤 賞假者再以八月十三日薨年六十八有衲被錄太乙舟詩  
文集若干卷春秋屬詞會義若干卷未成配魯夫人四子蘭瑞國  
學生早卒蘭滋上思州知州蘭第戶部河南司郎中蘭豫高臺縣  
縣丞孫三人曾孫一人女七人適魯適涂適祁適譚適曹其三四

所適皆王姓以某年月日葬公於新城縣某鄉某原公之孤蘭第  
來請曰知公者莫如子深敢請銘其詞曰  
公行高世 帝遂其逢人巧人趨安安而通持古律衡命觀五風  
貧賢利善惻惻斷斷年不極位孤士幽嘆山盤水交公神是愉寔  
石鏡詞以奠陰墟

右墓誌銘梅曾亮撰

公諱用光字碩士一字實思姓陳氏世居江西新城縣曾祖世爵  
候選州同知 贈資政大夫祖道乾隆戊辰科進士候選知縣  
贈光祿大夫嘗以宋儒之學故迪移進學者所稱凝齋先生也父  
守詒河南陳州府知府 贈資政大夫陳州五子公次三幼有至

性九歲喪母魯夫人家人每言及輒流涕庶母姚撫之慈甚喪其  
卒如所生少補邑弟子員翁學士方綱李侍郎璜爲學政皆器異  
之至京師尤爲朱文正彭文勤兩公所優許中嘉慶五年順天鄉  
試舉人六年成進士改庶吉士散館授編修十九年轉御史巡視  
西城以部議回原衙門仍供職編修道光二年遷司業歷中允侍  
講庶子翰林院侍講學士詹事府詹事內閣學士兼禮部侍郎禮  
部右侍郎署戶部右侍郎終禮部左侍郎嘗充日講起居注官文  
淵閣直閣事國史館纂修總纂文穎館纂修明鑑總纂兩爲會試  
同考官一爲順天鄉試同考官戊辰河南鄉試正考官乙酉江南  
鄉試副考官提督福建學政浙江學政壬辰科會試覆試閱卷大

臣武會試總裁公性和易不與人競亦不喜顯立同異達官有期之喪公固無意往也人問之乃曰吾大誤竟忘往弔由侍講學士驟遷至內閣學士 上面諭曰朕知汝能恬退故特用汝汝非有保舉人也乾隆嘉慶之際天下言文章者推桐城而江西新城亦最盛桐城姚郎中菊公本師也然公幼學於舅氏同里魯進士仕舉故爲文兼取兩家法而澤之於詩書仁義則一而已詩初學鉛山蔣編修士銓後亦以姚郎中爲法故氣稍斂抑云公俸祿所入悉費於施與同年查訥勤夫婦相繼卒無子以其三女爲子婦而子其幼女擇願侍郎阜之子嫁之爲外舅舅氏及師姚郎中置祭田費或千金或數百金無靳惜故無一日不貧然未嘗或見其有

憂貧之色公之先自凝齋先生以宋儒之學爲教陳州恪遵其說  
公幼時習聞之言動必循禮法然治經未嘗墨守宋儒門戶於禮  
記有剛改陳澹集說於四書有通義未定本於春秋則倣呂東萊  
讀詩記取諸儒先之說合於己例者順而撫之緣而成之名春秋  
屬辭會義斷手於襄公至臨歿時猶以此書未成爲憾嘗取近時  
人之嘉言懿行及關於掌故國聞者集爲衲被錄若干卷自爲詩  
文集若干卷公於爲文善上元管同宣城梅曾亮同曾亮皆嘗受  
古文法於姚郎中而同爲公典試江南所得士曾亮故年家子然  
公接之恆自降抑卽以德旋之淺陋願嘗與公安論詩古文利病  
公輒欣然聽之其能不自矜如此公爲浙江學政時奏罷宋孫觀

之出嗣承祀以黜邪佞而海濱祝嘏上洽故凝齋先生友也其爲  
學由楊國張考大以達於千朱子公訪得其詩文遺集刻之此足  
以見公之志在正人心厚風俗而非徒以文章爲報國之具矣娶  
魯夫人四子蘭瑞太學生蘭滋廣西上思州知州蘭第戶部河南  
司候補郎中蘭豫甘肅高臺縣縣丞女七人適魯應祐涂慕祁王  
輔舜士汝誠祁雋藻譚蘭祐曹啟孫三人大煥大慶大基曾孫一  
人曾璋公之卒以道光十五年八月十三日年六十八其明年某  
月日葬於某所梅郎中曾亮旣誌而銘之矣德旋爲之文其碑而  
系以銘曰

志矩爲學宗經爲文稽古必力卓然有聞久居史職三長無忝進



肅秩宗在公甞勉務旣厥實不矜其聲謙謙致美撫而非鳴多賢  
之門韞此懿德顯詩刻碑昭示無極

右神道碑銘吳德旋撰

### 陳希曾

陳希曾江西新城人乾隆五十八年一甲第三名進士授編修五  
十九年充雲南鄉試副考官六十年充貴州鄉試正考官嘉慶三  
年二月大考二等遷右贊善八月提督四川學政四年五月轉左  
贊善旋擢翰林院侍講六月轉侍讀六年差竣回京遷右庶子八  
年三月轉左庶子復大考二等遷翰林院侍讀學士九年二月充  
日講起居注官七月提督山西學政十年七月擢詹事府詹事十

二月遷內閣學士兼禮部侍郎十二年八月差旋充文穎館副總裁官九月高宗純皇帝實錄告成命予二等議敘十三年二月擢工部右侍郎兼管錢法堂事務四月充殿試讀卷官五月教習庶吉士六月充江南鄉試正考官九月轉左侍郎十四年五月仍教習庶吉士十二月以失察書吏冒領戶部三庫物料部議降調上命降二級畱任十五年八月充順天鄉試副考官十六年四月復充殿試讀卷官五月充武英殿副總裁官七月調戶部右侍郎兼管錢法堂事務九月署吏部左侍郎十七年五月武英殿呈進高宗純皇帝聖訓擡寫錯誤希曾自請治罪諭曰陳希曾係翰林出身校書原所優爲乃不加敬慎厥咎較重本應革職

姑念素行勤勞著實降三級調用十年授內閣學士兼禮部侍郎  
十八年三月復遷工部右侍郎兼管錢法堂事務八月因寶源局  
匠役辦公拮据奏請 賞借二年工食銀兩以資鼓鑄得 旨允  
行旋提督江蘇學政十九年閏二月以纂輯全唐文告成 賞加  
一級三月調刑部右侍郎 命回京供職尋充國史館副總裁官  
轉左侍郎二十年九月浙江省城外有賊匪燒竊厝棺巡撫顏檢  
先已獲犯定獄嗣經部駁御史蘇繹復以賊賊未確奏請覆訊  
上命希曾偕戶部侍郎成格往讞之訊明顏檢所獲窩犯兪瑞祥  
等係由捕役賄囑頂認並非正犯所有案內真賊尙無一名就獲  
請將顏檢交部嚴議餘革職問擬有差十一月山西雁平道福海

因不諳文理任聽幕友蒙混舞弊革治罪希曾以濫保福海部  
議降二級調用 詔畱任二十一年六月仍調工部右侍郎九月  
因病開缺十二月卒

右 國史館本傳

國朝書目考卷之五

五

陳霞蔚

陳霞蔚福建閩縣人乾隆四十九年進士由吏部主事洊升郎中嘉慶元年充戶部坐糧廳三年二月升內閣侍讀學士五月轉太常寺少卿八月 命提督安徽學政十月遷通政使司副使仍留學政任四年擢通政使 命來京供職五年奉 命祭告北嶽河濱及歷代陵寢六年六月永定河因雨漫溢畿輔被水 命霞蔚偕內閣學士台費蔭往南路悉心查勘 御製示在廷諸臣及辦賑卿尹詩有發帑盡予力任勞在眾卿之句霞蔚等奏言固安永清被災民情尙屬安帖無須急爲賑恤惟霸州文安災民情形甚屬可憫若俟查明回京後再行賑恤未免稽遲因飭照往年撫恤

章程將銀米用船運往親赴各村散放會保定縣被水亦重復與  
台費廕馳往查勘撫恤 諭曰前因京師雨水甚大永定河決口  
漫溢下注附近京城各州縣自必被水誠恐地方官查報不實特  
派台費廕等八員分往四路悉心查勘伊等自當仰體朕如傷在  
抱之意妥速查辦乃各路卿員內惟派往南路之台費廕陳霞蔚  
所辦實爲妥協伊二人本在霸州文安分路給賑聞保定縣被災  
較重卽馳往該處督飭該縣銀米兼放俾災黎得甦立時果腹台  
費廕陳霞蔚著交部議敘八月 命 督山西學政適霞蔚等奏  
查辦大城東安等處災賑俱已完竣遵 旨前赴天津查勘 上  
以該處永已消退居民漸次復業 命霞蔚來京請訓卽赴學政

任七年授都察院左副都御史九年七月擢兵部右侍郎命來京供職八月兼署吏部右侍郎十一月兵部職方司漢主事員缺霞蔚等欲以京察調部之李鼎元擬補尙書劉權之以係題缺應用候補主事盧坤咨查吏部先是嘉慶六年吏部議准達椿等條奏凡京察調部人員專用選缺一切畱部人員題選兼補及纂修時僅入此條於滿官例冊遂誤以例文係專指滿員指駁並以漢官別有專條咨覆權之欲取閱專條聲敘復令敘稟行查霞蔚等疑其有私遂偕侍郎成書等聯銜劾奏謂盧坤爲權之取中門生明知違例妄希設法變通以曲遂其瞻徇之私實爲有心弊混並劾同官縕布等附和調停上以情節甚重特命大學士董誥



等查詢旋查明權之係照例辦理吏部亦將前後歧誤緣由自行  
檢舉霞蔚等自認糊塗冒昧 諭曰參劾事件必須查有確據方  
可形之章奏若以私心疑揣遽將瞻徇弊混等詞砌列彈章試思  
此等情弊如果詢明確實被劾之人應得何罪願可取快筆端輕  
於誣捏乎又 諭曰據成書陳霞蔚同稱伊二人兼署吏部此次  
吏部咨覆兵部查覈稟遵例不應畫行例案亦未便詳查等語達  
椿等六年條奏之案經吏部議覆通行該侍郎等見署吏部本應  
畱心考覈何得諉稱例應迴避未便詳查似此意見稍有不和輒  
將同堂共事大臣填砌重詞聯銜瀆奏是又開訐告之端此風斷  
不可長成書等著分別嚴加議處尋議霞蔚降五級調用上加

恩改爲降四級調用補太常寺少卿十年升太僕寺卿十一年四月遷太常寺卿六月擢內閣學士兼禮部侍郎銜十四年奉命祭告西嶽江瀆旋丁母憂會巡漕御史英綸婪索州縣事發命查濫行保送英綸御史之兵部堂官交部議處霞蔚應補官日降二級調用上改爲補官日降三級畱任十五年卒

右 國史館本傳

國朝詩林類稿卷一百五

三

成書

成書穆爾查氏滿洲鑲白旗人乾隆四十九年進士以主事用籤分戶部五十二年補官五十六年遷翰林院侍講五十七年轉侍讀尋升侍講學士六十年九月轉侍讀學士十月稽查右翼覺羅官學嘉慶二年二月擢詹事府少詹事十月升詹事三年二月擢內閣學士兼禮部侍郎銜十月兼公中佐領充順天武鄉試正考官四年四月充殿試讀卷官五月兼正藍旗漢軍副都統九月遷盛京兵部侍郎五年調盛京戶部侍郎以蓋州鹽丁侵占民人張權等葦塘歷控三十年未結成書查照康熙年間舊案勘定地界偕欽差大臣兵部尙書傅森依律擬結六年正月 召回京授工

部右侍郎尋轉左侍郎兼鑲黃旗蒙古副都統四月調兵部右侍郎七月兼公中佐領八月總理咸安宮官學事務九月調鑲藍旗滿洲副都統七年正月充經筵講官二月 命監視五城平糶四月轉左侍郎八年三月充繙譯會試知貢舉七月管理光祿寺事務九年十一月兵部職方司漢主事員缺尙書劉權之將散館改部候補主事盧坤擬補成書與同官俱謂應補京察一等由宗人府調部主事李鼎元劾權之違例徇私 命大學士董誥等查係盧坤應補成書下部嚴議尋議革職 上加恩改爲降四級調用十二月補翰林院侍讀學士十年二月充日講起居注官三月賞給二等侍衛充哈密幫辦大臣十一年正月授哈密辦事大臣

九月擢內閣學士兼禮部侍郎銜仍留哈密辦事十一月 召回  
京復授工部右侍郎兼正藍旗滿洲副都統十二年充崇文門右  
翼監督十三年五月調兵部右侍郎兼公中佐領六月署工部右  
侍郎十四年三月充會試知貢舉十二月失察工部書吏王書常  
等私雕假印冒領庫項部議降調 上加恩改爲降三級畱任十  
五年轉左侍郎十八年三月稽查右翼宗學八月復充崇文門右  
翼監督十九年授直隸秦甯鎮總兵二十一年以失察 秦陵紅  
椿內樹株被賊竊伐降二等侍衛爲古城領隊大臣尋調烏什辦  
事大臣二十三年調葉爾羌辦事大臣二十五年正月 召回京  
以四品京堂補用十一月補太常寺少卿道光元年四月擢兵部

左侍郎五月調戶部右侍郎兼正藍旗漢軍副都統六月命赴  
山東河南審案卒於途次 諭曰成書爲人樸實耿介辦事認真  
朕方資委任遽聞溘逝深爲憫惜著加恩晉贈都統其靈柩回京  
准其入城治喪所有應得卹典該部察例具奏尋 賜祭葬子候  
補主事那丹珠 命以六部主事卽補見官戶部銀庫員外郎

右 國史館本傳

費錫章

費錫章浙江歸安人乾隆四十九年 聖駕南巡 召試一等  
賜舉人授內閣中書五十五年充軍機章京五十七年遷起居注  
主事六十年調戶部主事嘉慶三年升員外郎六年七月授河南  
道監察御史尋掌四川道御史九月以本年鄉試改期天氣驟涼  
奏請照會試之例每人散給棉布科被一件以示體恤得 旨允  
行七年四月 諭曰據熊枚面奏見在暫署直隸總督一時乏人  
襄理事務請飭令御史費錫章前往在署幫辦等語著照所請費  
錫章准其暫行隨往該御史見充內場監試茲聞務將竣著卽日  
出關一同起程俟熊枚交卸督篆仍著回京供職旋經御史砥柱



奏參 諭曰據砥柱奏署直隸總督熊枚請將御史費錫章隨往  
在署幫辦事務殊屬冒昧請嗣後嚴飭在京大臣奉命署理督撫  
者不得援以爲例等語所奏甚是御史係屬言官本非大臣可以  
隨帶之員前熊枚面奏懇將費錫章隨往朕卽覺其所奏未協因  
伊係署任暫時姑允所請嗣熊枚到任後旋據奏稱先令費錫章  
回京供職業經批諭該署督奏請帶往原屬冒昧並著費錫章卽  
行回京今砥柱適有此奏與朕批諭正相符合國家設官內外各  
有體制督撫身任封疆自司道以下皆係幫同辦事之人一切案  
牘自有幕友襄理若由部院簡放督撫者皆得各帶所屬司員前  
往辦事恐司員等揣知該堂官堪膺外任預爲趨奉一經簡放督

撫卽可帶往辦事補用道府易啟屬官營求之弊不可不防其漸嗣後在京部院大臣除有兵差審案等事仍准隨帶司員外其簡放督撫及署理督撫者不但不准請帶御史所屬官員亦均不准奏請將此通諭知之八年閏二月奏言 禁城內向來當差行走之人並無查考請添設腰牌以嚴出入 諭曰該御史所奏係專指禁城而言但朕臨莅所在皆屬禁地如駐蹕圓明園巡幸熱河木蘭等處各行在卽與宮廷無異斷無皆用腰牌之例況防盜弭奸之法亦不在此總應環衛森嚴分明堂陛其扈蹕在途之侍衛官尤當近依乘輦一切應如何酌定章程及該御史所奏是否可行之處著派御前大臣軍機大臣領侍衛內大臣前鋒統領護軍統

領內務府大臣會同悉心妥議具奏尋議行九年二月協理京畿道三月御史鄭敏行奏參此次京察都察院保送一等人員內有御史費錫章於嘉慶七年春闈監試適主考熊枚奉旨出闈署理直隸總督該御史在至公堂向熊枚懇求隨帶出差及帶往直隸後熊枚又因費錫章聲名不好欲將該御史撤回費錫章尙在逗畱卽經砥柱指名奏參今都察院將該員首列一等不特中外傳爲笑柄亦無以清羣吏而儆官邪諭曰科道職司糾劾如各部院堂官果有不公不法瞻徇情面之處自當據實陳奏況京察爲激揚大典儻各衙門所保人員實有奔競營私情弊科道等得有根據尤應直言無隱此次該御史奏參若係六部及各衙門保

送人員或該御史亦在一等之列則其言尙屬因公今鄭敏行係  
參劾本衙門保送之員而該御史又並未得列一等是其居心卽  
已涉私但既有此奏豈可不加詳察據稱費錫章在至公堂眾人  
屬目之地向熊枚懇求該御史自係在闈目睹何以不卽時彈劾  
直至今日保列一等始行舉發究竟費錫章如何向熊枚懇求其  
時至公堂眾人屬目又係何人在旁一同聞見其帶往直隸後如  
何聲名不好亦必實有劣蹟可指如該科道果係卑鄙則豈特不  
可濫廁一等且不應玷居官職何況臺諫清要之秩卽著鄭敏行  
將此指出情節一一據實回奏毋得一字稍屬含混至京察保送  
人員一二載考績自應就數年中奉職無過之員遴選薦舉費錫章

才具聲名究竟如何何以列入薦贖並著都察院堂官據實覆奏  
至熊枚在至公堂時費錫章曾否向伊懇求其在直隸時聲名如  
何不好熊枚是否因令其回京亦著熊枚據實具奏勿稍徇隱旋  
各遵 旨據實覆奏 諭曰都察院堂官稱費錫章聲名並無不  
好實未聞費錫章在至公堂有懇求熊枚帶往直隸之事因其在  
本衙門辦事勤慎是以列入一等等語該堂官保奏費錫章係因  
其辦公勤慎並未聞聲名不好之處該堂官均無不合至熊枚稱  
前年奉旨出關署理直隸總督因素知費錫章請習奏摺於開啟  
龍門時面與商酌欲其前往幫辦費錫章因向無此例力辭不允  
自知京舉湖素通阿等在關日擊可證又奏明帶往後費錫章到

彼從不預聞地方事件亦未與官員接見何從有不好聲名等語  
費錫章不但無懇求熊枚帶往直隸之事而當熊枚欲伊隨往時  
方且力辭不允卽有營私鑽競情事必有昏夜乞憐之狀豈肯於  
眾耳眾目之地率意徑行毫無避忌鄭敏行所云費錫章在至公  
堂向熊枚懇託之言本非情理且當熊枚帶同費錫章前往時未  
曾奏明該員不願隨往今鄭敏行覆奏摺內尙稱砥柱係當時同  
在闈監試之人伊出闈後卽指名奏參是費錫章向熊枚懇求出  
差憑證確鑿等語伊與熊枚所奏各執一詞情節迥異若不確切  
查明費錫章事有左證豈可任其濫膺上考儻鄭敏行所言無據  
是飭躬自愛者無端蒙奔競之名而居心如忌者轉得肆污蠱之

計不獨有關人品心術而於政體所係亦復不小既據熊枚鄭敏  
行奏稱所言皆有證據卽傳令熊枚瑚素通阿砥柱費錫章鄭敏  
行五人於本月十六日同至圓明園交軍機大臣詳悉訊問並令  
當面質證明確據實具奏再降諭旨嗣經軍機大臣訊明鄭敏行  
所指並無確據 召見熊枚瑚素通阿 諭曰朕面詢熊枚稱前  
年在闡時得聞署理直隸總督之信欲將費錫章帶往費錫章以  
御史衙門向無隨帶之例力辭不允伊曾經面奏恩准帶往任所  
僅止四五日細思未便久留仍令其回京供職費錫章實無聲名  
不好之處詢之瑚素通阿據稱伊知貢舉時在至公堂親見熊枚  
向費錫章口稱欲帶伊同赴直隸費錫章當以體制不符再三致

辭道奉旨准令隨往費錫章未敢故違不得已而隨往並據砥柱  
稱在闕監試實未見費錫章向熊枚面求帶往卽鄭敏行亦已自  
認口味陳奏無可置辨并請治罪等語可見費錫章實無營私鑽  
說情事見自熊枚勒索通阿等確證可憑卽從前砥柱奏參亦以  
熊枚違例奏帶御史並未劾及費錫章聲名是鄭敏行特因伊未  
列一等如忌同僚至加以卑鄙不堪之語實屬挾私懷詐本應革  
職治罪但念其究屬言官若將鄭敏行斥革恐科道等官因此又  
出率絀口鄭敏行以同與京察之人不得一等卽飾詞瀆奏有心  
淆亂是非其居心嫉妬豈可復膺臺諫之任著改爲員外郎補用  
御史費錫章旣查訊明確毫無不合著准其列入一等以示朕持



平發實至意十月轉吏科給事中十一月掌工科給事中十三年  
詔偕編修齊鯤冊封琉球中山王尙灝十四年三月回任五月  
擢鴻臚寺少卿十六年轉光祿寺少卿十七年遷通政司參議十  
八年二月升太常寺少卿四月擢光祿寺卿八月調補順天府府  
尹九月因逆匪林清等潛入 禁城滋事下部議處尋議革職  
上以其到任未久改爲降四級畱任二十年三月 上耕藉田順  
天府所備耕牛不馴習 上以費錫章係專轄之員下部嚴議部  
議降三級調用 上念其年餘以來督緝尙屬奮勉改爲革職畱  
任二十一年三月 諭曰朕上年躬耕藉田順天府所備牛隻教  
演不能馴習降旨將該府尹等分別降革畱任本年躬耕藉田該

府尹等所供牛隻服習馴擾禮儀告備著將費錫章革職畱任之處改爲降二級畱任二十二年三月卒 諭曰費錫章自簡任順天府府尹辦事奮勉且獲逆犯多名甚屬認真驟聞溘逝殊爲可惜著加恩賞加兵部侍郎銜卽照侍郎例給予卹典該部察例具奏尋 賜祭葬

右 國史館本傳

國朝詩林卷之五

五

金應琦

金應琦安徽歙縣人乾隆四十九年南巡召試賜舉人授內閣中書旋補軍機章京五十八年擢侍讀五十九年京察一等授山西河東道嘉慶五年署山西按察使八年九月授浙江按察使十一月調湖南按察使十年擢山西布政使十一年九月護理山西巡撫十月以河東鹽務改復商運應琦奏招認運商翻悔者多向係五十八家今覈計呈認舊商二十四家新商十六家尙短十八家容再招認配運磴口至托克托城鹽斤已委員帶同認充新商馬遵義等前往按引試辦諭曰此次河東改復商運係屬招商承辦總當視該商等情願認充方可經久無弊不容稍涉勉強

河東運商舊係五十八家並非一定額數或卽就見在認充之若  
十家減計引數通融配運亦不必拘定五十八家之數強令湊足  
致有抑勒至所稱鹽口至托克托城鹽斤已委員帶同認充之新  
商馬遵義等前往按引試辦一節此則與原議章程殊不相符吉  
爾泰鹽斤原議令河東運商一併承運蓋以計鹽獲利較贏庶可  
以彼之有餘補潞鹽之不足今據稱新商馬遵義等按引試辦乃  
係另行招商專運吉爾泰之鹽又與潞鹽分爲兩事前經戶部議  
令該撫將潞商口商詳籌調劑究竟該省情形若何使商民兩便  
而賑災亦能寬裕之處該撫惟當與藩司悉心體訪速定章程妥  
議具奏應琦等卸巡撫事據新任巡撫成甯覆奏金應琦招定新

商四十家今又招十八家已足五十八家之數均係自願具結委  
無絲毫抑勒至潞鹽口鹽實有不能兼辦之勢緣吉蘭泰鹽池在  
黃河上游比鄰甯夏河東鹽池在黃河下游地接豫秦相去三千  
餘里口鹽斷不能越險行銷原可無須潞商併辦況潞商業已一  
家承辦河東數處引地更難兼辦口鹽且河東鹽行三省歲銷引  
六十餘萬道納課五十餘萬兩課引較多獲利自厚口鹽歲以三  
萬石爲率計配引八萬七千五百道徵銀六萬三千五百餘兩納  
課有限獲利未見有餘此必須另招口商試辦之原委也下戶部  
議行十二年八月因未結詞訟案多部議降二級調用奉 旨降  
三級畱任十三年十一月因藩庫驗收銀兩被竊奉 旨降一級

留任十四年七月授山西巡撫八月因病奏請給假調理 上以  
刑部右侍郎初彭齡署山西巡撫九月奏病體漸愈俟調理就痊  
卽赴闕謝 恩 諭以安心靜養全愈後不必赴闕其病體究竟  
若何仍著初彭齡察看情形據實具奏尋據初彭齡奏金應琦本  
月初四日行動尙須扶掖忽於初七日午後差人持送銷假奏稟  
閱看 諭曰金應琦病旣未能全愈急欲銷假接印自因初彭齡  
到彼諸事認真不肖蒙庇伊是以勉強支持意在接受印篆後初  
彭齡卽可交卸起程回京伊於地方事件遂得任意彌縫著初彭  
齡傳諭金應琦令其安心靜養不必急於任事俟病體脫然再行  
奏請接篆十一月應琦奏患病日久未痊懇請開缺 命以初彭

齡爲山西巡撫應琦爲刑部右侍郎十五年正月來京 上以  
省自初彭齡到後節次參案甚多命軍機大臣傳詢應琦據稱臨  
晉縣程安祖假裝銀鞘孝義縣葛拱辰審擬親屬相姦兩案實係  
任內查出移交初彭齡辦理其藩司劉清道員張曾獻知府史積  
中在任時俱無貽誤無可參辦惟知府徐秉鈐枉法受財知州楊  
映權任意枉斷知縣陳廷圭失察私押斃命賄和知縣吳安祖派  
累諸款未能先事查出卽屬疎忽又成甯閱兵多用車馬致平魯  
縣虧空未能奏參亦屬不合奏入下部議復經河東道劉大觀奏  
參知州徐承慶朱錫庚各款 諭曰金應琦在山西藩司任內多  
年擢用巡撫於初彭齡前次參辦各員未能先行查辦而於昨日



劉大觀奏參平定州知州徐承慶虧空及試用知州朱錫庚乖謬之處又不及早參劾實有應得之咎金應璫著照部議降二級以正三品京堂補用是年三月卒

右 國史館本傳

姚祖同

姚祖同浙江人乾隆四十九年 高宗純皇帝巡幸杭州 召試一等 特賜舉人以內閣中書用五十四年補中書六十年考取軍機章京嘉慶六年八月記名外用十月得 旨姚祖同著以六部主事遇缺卽補仍在軍機章京上行走七年補兵部武選司主事八年升員外郎九年升郎中十二年京察一等以道府用十五年纂輯三省方略告成得 旨姚祖同在軍機行走有年小心奮勉茲承辦方略尙屬詳慎著加恩以四五品京堂升用十八年二月補鴻臚寺少卿旋奉 旨此次京察引見三品以下京堂各官鴻臚寺少卿姚祖同在軍機章京行走朝夕在公並無貽誤著交

部議敘五月遷通政司參議十二月擢內閣侍讀學士十九年升  
鴻臚寺卿二十年五月授河南布政使十二月調山西布政使二  
十一年六月調直隸布政使八月 仁宗睿皇帝巡幸木蘭祖同  
以本年逢閏節候較早恐哨內天寒偕直隸總督方受疇公捐棉  
衣二百件爲分賞兵丁之用 上以祖同市惠邀名有舛政體  
嚴飭之二十三年八月 上恭謁 祖陵值大澗河漲溢祖同以  
督辦橋工不辭勞瘁 賞戴花翎二十四年閏四月擢安徽巡撫  
五月 上以祖同前在各直省藩司任內查辦積欠俱能認真安  
省積欠甚多新任藩司嵩孚於錢糧款目未能熟悉 命祖同親  
加查覈以杜弊端旋以安省虧空錯誤含混稽覈需時未敢草率

懇請展限辦理 旨允之二十五年四月調補河南巡撫時沁黃  
並漲漫及馬工壩尾祖同奏稱覓在豫省應辦公事雖多以河工  
爲重學習河務以履勘爲先疏入 諭曰該撫當念河工關係通  
省全局此時暫將地方事件作爲緩圖與張文浩同心協力將防  
守事宜籌畫周妥卽日伏秋大汛務保萬全旋奏省垣濱臨黃河  
舊有護城大隄備禦黑塌等處險工上年祥符上汛六堡漫溢以  
致殘缺多處亟應繕完以資保障 上如所請六月御史劉斯崑  
奏參上年豫省馬營壩未經漫口之前蘭陽地方先有漫溢處所  
署開歸道下南河同知王仲淮係專轄之員應有疎防處分該巡  
撫及欽差大臣並未附參本年合龍後又復保奏請 旨飭查

上命祖同查奏旋奏請褫仲漑職仍責令趕辦經手工程防護大  
汛如再疎虞卽行治罪並將濫行保奏之欽差大臣吳璥那彥寶  
及漏未附參之巡撫琦善等奏請議處十二月偕吳璥那彥寶河  
道總督張文浩奏稱近年黃河底高沁水僅高於黃水一二尺當  
運黃並漲之時不但黃河隄著重卽沁河各埝亦在在堪虞沁河  
民埝向歸民修惟民力恐有不逮且瞬屆大汛應請擇要修防並  
借帑興修工完分作五年歸款並以蘭儀廳儀封上汛四堡大工  
合龍後大壩及挑水壩俱係柴工薪工日久不免蟄矮必須普律  
加鑲多歷重土俾臻堅實挑水壩迤西估添柴壩一道以免挑水  
壩著重並壩尾基幫寬加高以期久遠均得旨允行道光元年

二月奏豫省近年情形河工之做壞顯而易見民生之凋瘵隱而難知河工加價於常賦三百六十萬兩外逾額攤徵衛工未已接徵隄工隄工未已又將接徵馬工儀工此外復有各處隄工隨時攤徵之款民力之絀請槩停緩 從之時御史王家相奏革漕務積弊 命偕漕運總督成齡妥議具奏尋奏稱豫省漕運情形與南漕迥異除例給銀米外兩次奏添每船其可得銀一百一十餘兩米一百石有零該旗丁等撙節支用實屬有贏無絀本無疲累可言至各州縣交運漕糧俱有例給車價銀兩不致賠累但漕務百弊叢生不可不禁遏於未然如有需索浮收情弊卽當隨時嚴懲不稍寬貸報 聞三月因中牟縣奸民劉順義教演拳棒與同

夥李光祖等煽惑滋事立時拏獲 上以辦理迅速 嘉之十月  
以衛輝府屬考城縣舊考城集地方距縣城七十餘里遇有訟案  
傳審稽延應請添設巡檢一員嗣又遵 旨奏稱考城縣係豫省  
東北門戶地連三省壤僻一隅汛小兵單路當衝要請添設考城  
營以資防守均下部議行二年 上以祖同於儀工用項奏銷浮  
冒 命都察院左都御史王麟王鼎前往查訊尋奏祖同奏銷通  
融係照舊案辦理 諭曰姚祖同於誤列款項未能確查各員長  
支銀兩始則嚴追繼復免繳並未將購料賠累例應津貼實情奏  
明遵辦率行歸入銷數復私准提扣入子錢實屬辦理錯誤著來  
京以四品京堂候補十二月補太常寺少卿五年三月奉 命稽

察右翼覺羅官學五月補陝西按察使六年正月奉 旨來京另  
候簡用二月 命以四品京堂候補七年補廣東按察使尋 命  
偕刑部尙書陳若霖查勘湖北京山縣王家營隄工奏言京山鍾  
祥二縣均有潰口下游胡李灣等處見已刷塌乘勢挑除河塊俾  
江流去路通暢實爲因勢利導其潰口二處擬添築月隄石壩二  
道足資捍衛得 旨所奏詳明並以江西學政福申家人蕭三招  
搖舞弊鞠實擬如律八年九月 命來京以三四品京堂候補十  
月補通政使司副使十一年三月晉通政使五月擢都察院左副  
都御史旋奉 旨以原品休致二十二年卒子大成江蘇常熟縣  
縣丞澧山東萊陽縣知縣孫近寶刑部主事近韓內閣中書



國朝文獻通考卷一百五

右 國史館本傳

四

國朝耆獻類徵初編卷一百六目錄

卿貳六十六

史致光

瑚圖禮

吳烜子其彥

馬履泰

陳若霖

國朝耆獻類徵初編卷一百六目錄

一



國朝耆獻類徵初編卷一百六

通奉大夫前署江西巡撫江西布政使司布政使湘陰李桓輯  
卿貳六十六

史致光

史致光浙江山陰人由拔貢生選湯溪縣教諭乾隆五十二年一  
甲一名進士授翰林院修撰五十四年充湖北鄉試正考官五十  
七年京察一等五十八年授雲南大理府知府嘉慶元年調雲南  
府十年升鹽法道十九年五月擢按察使六月調貴州按察使十  
一月升布政使二十二年升福建巡撫初直隸天津水師總兵許  
松年奏請挑撥福建營兵中能充舵練斗旋及善泅者二百餘名

國朝三十八年十一月二日  
一  
攜眷赴天津水師營充伍事下福建督撫議奏致光借總督董教  
增提督王得祿奏言天津初設水師專營首舵繚斗旋見於金廈  
兩標水師內挑選足額俟南風司令飭令配船赴津惟閩省地處  
東南氣候與天津各異各兵急公遠涉分所宜然其眷屬生長南  
方不耐寒沍其兵眷多者每至十餘名口因用一兵之故責令全  
家俱徙非特航海爲難卽資斧亦多不給況該兵等雖無恆產而  
棄其廬墓親戚闔門遠徙瞻前顧後未免各有隱衷臣思天津濱  
臨大海善操舟者諒不乏人招募非難訓練亦易其海口一帶風  
雲沙縷生長其地者尤所諳悉請將金廈兩標所撥水兵但留津  
三年教習毋庸攜眷補伍候新募兵丁習知操駕卽將原兵等撤

回儻有願入天津營者聽 上從之二十三年偕董教增奏言福建通省鹽船向由浦下西河石碼三關驗掣自前督臣汪志伊奏裁各關驗掣大使委石碼通判福防同知南臺主簿就近兼管各員俱有地方之責勢難兼顧鹽船抵關不能隨時盤驗率多羈候之累或本官無暇親驗藉手胥差夾帶偷漏弊端叢出比來延建邵武一帶私梟充斥額引滯銷實由各關無專員稽察所致請復浦下西河石碼三關舊設實缺大使以專責成惟場員額缺繁簡例有定數如有添設之缺應行別籌裁減閩省場員十六缺產鹽衰旺今昔不同福清洪白赤杞三場相距各不越二十里統計年額僅四萬六千五百石又潯美兩洲二場相距亦祇二十五里統

計年額僅七萬九千四百石各員畫疆而理多設書役哨捕徒滋  
浮費請併洪白赤杞於福清場併泃洲於潯美場仍改福清潯美  
繁缺爲簡缺至莆田場年額僅七萬四千石有奇亦請改繁爲簡  
其新復之缺請以浦下石碼爲繁西河爲簡又奏言閩省鹽務自  
雍正七年裁商之後全歸水客辦運乾隆初復請引僉商仍係水  
客應充非盡身家殷實迄今七十餘年商傾課欠指不勝屈嘉慶  
十七八年閒前督臣汪志伊釐定鹽務章程不無過刻致官商各  
幫倍形竭蹶臣等推原其故一在裁革圍秤而又不加給耗鹽故  
虧折甚大一在折合逢擔而又飭收回代額故賠累難堪若不循  
照舊章急加調劑幫傾課誤可立而待也蓋閩省配運鹽斤本用

國秤計團秤一百斤折申祖秤一百三十斤至五六十斤報部有案初非私設卽請引僉商循用不改原因閩省水陸兩途均關阻隔鹽斤盤運耗費繁多以申出之五六十斤三十斤抵補折耗是以百餘年來官民相安又官辦各幫課額重大幫務積疲額引壅滯就中酌撥若干分飭西路商人代爲銷售卽澳幫各商無力辦運亦有勻令西商代銷而西商亦多情願者因官幫課輕西商課重商代官辦所勻之額仍照官幫課則於國課並無短絀而商人得以霑勾贏餘是團秤代額兩項官商所賴以調劑者也汪志伊旣裁國秤并奏准部咨將西商代銷官幫引額令各縣收回自辦其代縣澳引額係課輕勻入課重地方責令升課按照課則爲



折合逢擔之法以擔引折成逢引計鹽百斤僅折給四十一斤有零西商無利可圖裹足不前鹽務日壞自裁革以來不數年閒商人何秀林等五家相繼倒罷見辦各商勉力支持不能終日至官運各幫從前分商代售各縣僅辦贖額尙難全銷往往卸事之後逋課盈千今再折合逢擔責令升課商不能堪則令各縣收回自辦積今五載顆粒未銷因而有鹽缺額各官視爲畏途雖奉部咨招商接充竟無人應見據各官商紛紛稟請調劑臣等飭鹽法道確查詳覆據稱虧乏之由因閩鹽分東西南三路西北依山東南濱海西路配鹽須由海道運省儲倉轉盤調驗逆流入溪延平以上又須淺船轉剝其鹽包廠口隻眼稀疎轉動擯擡上下拋散因

而有海耗有河耗有倉耗有淋滷恤消以及溪船淺船火食諸耗計其損折每擔已有三十餘斤至最處溪末之幫經時三四月歷險三百六十餘處鹽始到幫到幫又未能卽售仍須儲倉守候消耗更鉅而近場之幫復以地當孔道爲鹽船必經之所兼以密邇場竈課輕鹽賤哨力不足則須減價敵私減價無效又須展秤招販東南路縣澳泛海候風動經數月其離場寫遠者另雇轉船山船轉折撥運山陬小埠舟楫不通或用木排竹筏鹽包爲水所浸滲漏更多或改裝小篋損挑過山拋灑彌甚道路有遠近之不同耗折亦多寡之互異此配運虧折之實情也至賠累之故因官幫收回代額勢難清銷又西商因代銷縣澳之鹽責升西路之課加之

商幫先課後鹽官幫先鹽後課商代官辦仍令先課後鹽西商本無餘力代運特因官幫引懸課曠竝有縣澳倒商欠課無著故令其彼此通融乃於先課之害則仍而不改輕課之利則奪而不予雖有急公踴躍之情不敵其本折幫傾之累商不願代官不能銷收回代額盡成懸曠然鹽雖未運課須著賠故硬派爲知縣缺銷責償課款而欠課之員扣鹽追課課仍莫措昔時未經升課課本無虧今日名爲升課課轉無著此完課賠累之實情也欲救虧折之病非仍擬加貼耗鹽不可欲救賠累之病非飭西商勻代不可而欲令西商勻代又非免其折合違擔不可臣等查近年廣西臨全等七十餘埠各就本埠額引之數分別加一二三酌兒而平樂

柳州以上水險灘高每鹽一千包於加配之外又加買耗鹽一百二十包以補沿途折耗閩鹽與粵鹽情形如出一轍請援照辦理國秤既經裁革自應遵照部議各就耗折實數除去零斤視受病之深淺定加增之多寡將三路官商各幫定爲加一至加三配兌至勻代勻銷原係率由舊章竝非後來特辦請嗣後官幫收回歷年未銷額引仍飭西商代銷其勻代官幫縣澳均免其折合邊擔如有澳幫臨奏不及或無力辦運及官幫缺銷課欠款懸令西商攤完代銷者一體避免又縣澳各幫照原額勻代之外各縣代額鹽數應照見在情形酌量改撥如此量爲變通則於國課可期無缺而官商更受其益均下部議行二十四年調雲南巡撫二十

五年七月伯協辦大學士伯麟奏言滇省安甯州新洪二井代煎四十二萬八千斤嘉慶四五年閒安甯井初年因出油短縮先後移安豐黑鹽二井代煎四十二萬八千斤嘉慶四五年閒安甯井油驟旺將代煎之數收回且可代解安豐琅井雲龍阿陋草溪只舊抱母恩耕景東等井減缺之鹽旋定新額五百一十二萬一千六百斤徵課五萬一千一百餘兩自嘉慶二十年以後滴源渙散應徵課項逐年短少若不量爲酌減必致欠課日多雖三參限滿照例著賠終成懸宕臣等擬於新額數內將代煎之安豐雲龍景東只舊四井鹽斤應徵銀一萬四千七百三十二兩有奇全數收回其原代琅井煎鹽徵銀一萬六千三百三十七兩有奇覈之琅

井見在情形僅可收回課銀二千兩而石膏等井頻歲溢銷可撥補琅井六千兩此外尚有八千三百餘兩與不能收回之代徵阿陋草溪等井課銀及黑白二井尾鹽虛課仍責安甯井煎辦捐解從之是時新改永昌府屬之騰越州爲騰越直隸廳十月致光偕雲貴總督慶保學政楊殿邦奏請增廳學文武生額各五名其額設廩增四十名視永北蒙化景東之例定爲一年一貢報可旋入都 陸見升雲貴總督道光元年正月永北廳土司所屬夷人與漢民典地構釁首逆唐貴陳添培等聚眾渡金沙江句結大姚夷匪四出焚劫 上命成都將軍呢瑪善往剿未至會調任閩浙前督臣慶保尚在滇省乃督官兵先捕大姚賊之據拉古者悉

就殲擒四月致光抵任卽馳赴永北會勦賊平 賞玉鞞大小荷包旋獲逸賊傅添貴黃騰等訊明辦理六月致光偕慶保署雲南巡撫王輅條奏善後事宜一永北大姚被難漢民分別安插體恤一大姚漢民典賣夷田皆令過戶納糧有隱匿者以漏稅論至設計盤剝夷田利浮於本者令夷人以原借之數贖產一永北廳經歷請移駐舊衙坪以理漢夷詞訟一大姚苴卻地方距縣治遼遠宜添設巡檢一永北阿喇山前後請設滇關大水井苗力五帕得四汛添撥弁兵建立塘卡以資控制一撥楚雄協所轄把總一員帶兵三十名駐劄大姚猛連渡口巡察匪徒一禁土司陋規苛派一裁革永北土司屬下行捕穴役一民夷爭控令地方官督飭土

司隨時查辦一阿喇山前後及金沙江口一帶責成各土司定期  
會哨一土司地方漢夷民人宜分編保甲土司著落火頭漢戶著  
落客長查造戶口清冊一禁客民扣留夷人牲畜一嚴禁師巫左  
道一永北大姚投誠夷人宜酌立犯事科條疏入均如所請行先  
是致光與呢瑪善慶保等會議漢民典賣夷地定初二三限令夷  
人取贖逾限者斷歸漢民執業御史張聖愉奏漢民重利盤剝折  
準夷田若如致光等議夷人限外不能取贖必又積怨成仇請將  
不能依限取贖之地或剖半均分或給還十分之三仍嚴禁漢民  
嗣後毋得典賣夷地 命下其章於致光及雲南巡撫韓克均八  
月致光偕韓克均奏言自永北夷匪滋事以來漢民被荼毒深矣



臣等前議章程咸以此次若使夷人得志不特漢人不平後患不旋踵而至且恐各土司羣起效尤更爲可慮因議分限取贖以期永斷葛藤其夷人生計臣等亦爲籌及所有山箐地上先令取贖給與勞步插種其餘猓獮人等除佃種漢民地畝又有各土司贖回之田給種不致無田可耕其或土司未能盡贖自必懇求展限彼時尙可量爲奏請至聖愉所奏意在豫杜嫌釁但漢民盤剝而折得夷地者固多平價交易者亦復不少且以夷地質銀由於土司貪利土目夷佃從而效之土司典押者十之五六土目夷佃之典押者十之二三是以原議惟責土司取贖且原議本有典押杜賣之分典押限滿秉公估價令漢民找足方准執業漢民亦不能

大得便宜也原議定章以後卽示諭漢土人等一體欽遵目下人心甫定未便朝令夕更又均分與給還十分之三亦爲數過多恐夷人以此次構釁爲得計臣等未敢遷就惟漢夷同屬編氓計及日久相安自宜詳慎今將原議略爲變通擬於限滿時查由盤剝准折而得者覈計漢民所出本息應得田若干分子執業其平價交易者除杜賣毋庸議外典押之田本應令漢民找足價值方許執業請令流土官公同覈估漢民原典價銀應得田土若干分子執業餘田各給還土司在盤剝者旣可示懲而漢民平價所給無虧本之患夷民有田可種無失業之虞嗣後有漢民典把夷地者加等治罪疏入 上聽其議是時雲南各屬辦理軍務甫竣致光

請免嘉慶二十五年分永北大姚二廳縣額徵條公耗羨銀兩夏  
稅秋糧本折米石其武定元謀等二十五廳州縣條公耗羨銀兩  
免十分之五昆明呈貢等三十四廳州縣免十分之三十二月又  
以鄧川州被災歉收復請豁免夏稅秋糧米石及條公耗羨  
銀兩其鶴慶州孝廉村等六十四村應徵銀米因災並請蠲免  
上皆從之二年七月劾奏才不勝任及老邁庸劣之雲南麗江府  
知府溫之誠晉甯州知州彭習恆陸涼州知州世永署廣西州直  
隸州知州周兼榮永善縣知縣洪其照太和縣知縣葉芳模休致  
革職改補有差永善金沙銀廠每年徵歸公銀六百八十四兩廠  
課豐旺之時向由鑪戶捐解藩庫自嘉慶十六年以來廠課緡

鑑戶僅能完納正課八月致光奏請自道光元年爲始免徵金沙  
廠歸公銀兩 上允所請旋 諭曰史致光年力就衰不勝邊疆  
總督之任著來京另候簡用三年正月授都察院左都御史七月  
因病奏請開缺 許之四年回籍八年卒 諭曰原任左都御史  
史致光由修撰洊陟封圻宣力有年旋於左都御史任內因病奏  
請開缺准其回籍調理茲聞溘逝殊堪軫惜著加恩照例賜卹任  
內處分悉予開復應得卹典該衙門察例具奏尋 賜祭葬子承  
沛舉人二品廕生候選通判

右 國史館本傳



瑚圖禮

瑚圖禮完顏氏正白旗滿洲人由舉人於乾隆四十六年考授國子監助教五十二年成進士改庶吉士五十四年散館授檢討五十六年四月升侍讀五月遷祭酒九月考試滿洲科甲出身京堂翰詹各員瑚圖禮名列第一奉 旨在南書房行走十月授公中佐領五十七年八月充順天鄉試副考官十月擢內閣學士兼禮部侍郎五十九年三月授鑲藍旗漢軍副都統是年 恩科充江南鄉試正考官十月調鑲白旗漢軍副都統六十年二月充文淵閣直閣事三月充會試副總裁官因將庸泛之卷拔置第一下部嚴議部議革職奉 旨以四品京堂補用八月提督山西學政嘉

慶三年授河南按察使四年二月授刑部右侍郎尋轉左侍郎授  
鑲白旗蒙古副都統五月調盛京兵部侍郎九月調盛京刑部侍  
郎兼管奉天府府尹及威遠堡六邊事務五年二月丁母憂回旗  
閏四月百日期滿 命署廣東巡撫八月兼署兩廣總督六年十  
月偕總督吉慶奏請粵東省公捐銀三萬兩粵西省公捐銀二萬  
兩以備川陝大兵凱旋賞賚之用 諭曰教匪滋事以來所發餉  
銀已不下萬萬兩此時大功將次告蒞凱旋賞犒需費幾何奚待  
外省捐資備用且伊等藉捐需之名勢必層層派累朕削閭閻假  
公濟私於言利之中尤爲卑鄙著傳旨嚴行申飭七年六月實授  
廣東巡撫先是 上聞博羅縣有重犯越獄知縣匿不詳報臬司

陳文及該管知府扶同徇隱復告藩司將典史調補煙瘴示罰又前任臬司吳俊借贓罰爲名收受陋規於升任起程時又派此項作路費等事 命瑚圖禮密查具奏瑚圖禮覆奏事皆屬實陳文吳俊等皆治罪如律瑚圖禮照徇庇例降四級 上特改爲革職畱任九月博羅縣會匪陳爛屐四等糾眾滋事總督吉慶帶兵往勦瑚圖禮畱省辦理軍需奏將惠州府倉及歸善縣倉所貯穀石令承辦糧餉之臬司邱庭澐就近碾支又趕造烏槍火藥鉛子等項運往惠州并調兵分往博羅交界之東莞增城龍門等縣協防一面飛咨江西閩浙督撫各於鄰近州縣飭屬會營堵緝以防賊匪他竄均得 旨允行十月署廣州將軍時總督吉慶以辦理博



羅縣會匪一案謬誤奉旨解任交欽差內閣學士那彥成會同瑚圖禮審訊卽命瑚圖禮兼署督篆十二月奏督臣言慶由惠州府回省自戕身死上以前此吉慶摺內稱伊患病月餘恐瑚圖禮作賤惟願病不能痊兼有瑚圖禮因太平關盈餘歸公深恨吉慶等語命那彥成就近訪察嗣據那彥成覆奏吉慶因辦理會匪未將首犯正法被害之家怨聲騰沸愁畏交并兼之病後糊塗遂爾自尋短見諭曰那彥成旣查明吉慶係畏罪自盡與瑚圖禮無涉其所稱作賤之處自係病中妄語毋庸再行查奏八年正月那彥成奏失察會匪滋事請將瑚圖禮交部察議諭曰瑚圖禮身任巡撫於所屬地方匪徒勾結毫無覺察以致釀成巨

案察議未免過輕著交部議處議上奉 旨瑚圖禮著降一級留  
任二月回巡撫任閏二月因率准農耐國長阮福吹貢船回國攜  
帶違例貨物得 旨交部嚴加議處議上奉 旨瑚圖禮著革職  
畱任八月以病解任回京九年正月授鑲藍旗漢軍副都統五月  
授工部右侍郎管理錢法堂事務六月充江西鄉試正考官七月  
調正黃旗滿洲副都統十月授湖北巡撫十年六月署湖廣總督  
因前在廣東任內失察南海番禺二縣私設班館押斃多命下部  
嚴議部議罰俸二年奉 旨瑚圖禮在任有年其咎較重著罰俸  
三年閏六月奏修鍾祥縣尹家廟隄潛江縣新豐隄垸請毋庸定  
限保固經部議駁 上嚴飭之並 命交部議處部議革任 諭

曰瑚圖禮於鍾祥潛江二縣又修隄垸例應保固之工並不查月  
從前議定章程率照藩司台斐音所稟奏請毋庸保固實屬錯誤  
瑚圖禮本有革職畱任處分例應革任但該撫究係轉據司稟著  
再從寬改爲革職畱任九月奏參武昌鹽法道海昌在任四年在  
聽岸商擡價病民又寶武局鼓鑄錢文亦係該道經營邇來所鑄  
卯錢缺邊漏縫字畫不清斤兩亦不足請解任查辦 上命將海  
昌革職欽差吳熊光托津審訊嗣審出鑪匠黃銘仁等在局舞弊  
按律懲辦瑚圖禮以失於覺察自請議處部議降二級畱任十一  
年十一月擢吏部尙書十三年管理戶部三庫事務十四年署翰  
林院掌院學士十五年二月調刑部尙書兼鑲紅旗滿洲都統六

月調吏部尙書十六年六月監督崇文門稅務八月御史劉奕煜  
奏參吏部銓選兵部主事員缺錯誤 上命吏部明白回奏瑚圖  
禮偕各堂官覆奏自認錯誤未經更正旋據兵部候補主事程同  
文等以吏部奏明錯誤後仍將此缺扣歸卽用班選補以致兵部  
屢次出缺不能畱補一人具呈申訴由都察院奏 聞 特派大  
學士勒保等秉公查覈嗣勒保等覆奏意存偏袒復 派令大學  
士慶桂兵部尙書劉鐸之覆查慶桂等奏弊竇之滋在於舍例言  
案請將吏部堂司各官交都察院分別議處 諭曰此次吏部任  
聽司員將久應註冊之塵案牽引枝梧而各堂官亦不詳察瑚圖  
禮係吏部尙書不能虛公定議以致曲庇混淆庸碌無能不勝尙

書之任著降爲副都統職銜補放阿克蘇辦事大臣仍交部議尋  
議降二級調用以先有革職畱任之案無級可降應行革任得  
旨瑚圖禮業經降爲副都統職銜所有此次部議應行革任之處  
著改爲革職畱任帶於新任旋調西藏辦事大臣十七年奏免死  
發遣之布魯克巴夷人策忍敦柱一犯先因患病未經監禁見在  
逃走俟拏獲時再行發遣 上以所辦失於輕縱傳旨申飭仍  
交部議處十八年三月授正白旗蒙古副都統八月授理藩院右  
侍郎九月調禮部左侍郎十九年三月調鑲黃旗滿洲副都統四  
月擢兵部尙書八月調戶部尙書九月調禮部尙書十二月卒

右 國史館本傳

吳烜子其彥

吳烜河南固始人乾隆五十二年進士改翰林院庶吉士五十四年散館授編修五十五年丁父憂五十七年丁母憂五十九年服闋六十年充貴州鄉試副考官嘉慶三年三月大考二等五月充廣東鄉試正考官四年提督江西學政六年任滿回京七年遷國子監司業八年轉右春坊右中允九年提督湖北學政十年江西彭澤縣逆犯歐陽正朗以編造逆詩伏法正朗曾於嘉慶六年童試時將所作思孝銘等文書寫試卷懇請代奏烜未究辦事覺下部嚴議尋議降二級畱任十一年遷翰林院侍講旋升右春坊右庶子十二年遷翰林院侍講學士十三年充武會試副考官十四

年擢詹事府少詹事尋遷詹事十五年八月提督順天學政十月  
轉通政使十七年擢兵部右侍郎九月轉左侍郎十月教習庶吉  
士十九年閏二月充治河方略館副總裁六月充經筵講官二十  
年署工部右侍郎兼管錢法堂事務二十一年寶源局匠役以爭  
分調劑鑪頭料錢守閉廠門備勒官長炬同右侍郎佛住奏請酌  
成分給匠役等復偪令鑪頭代還借項停鑪誤鑄御史蕭鎮劾之  
下部嚴議尋議革職 諭曰此次工局增復料錢本係賞給鑪頭  
之項該匠役等妄生覬覦將司員監督等畱於局內求索不已似  
此貪昧肆妄佛住等並不據實奏交刑部治罪輒將增復料錢蒙  
混奏請酌成分給調停了事朕屢次召見詢問工局情形佛住等

均奏稱極爲安靜希圖掩飾實屬因循疲玩已極似此庸碌具臣  
斷難姑容佛住吳烜著照部議卽行革職以爲不實心任事者戒  
二十二年以中允贊善起用二十三年補右春坊右中允二十五  
年三月遷右庶子尋轉左庶子八月遷翰林院侍講學士九月擢  
禮部右侍郎道光元年卒子其彥其濬其彥傳附後其濬自有傳  
其彥嘉慶四年進士改翰林院庶吉士六年散館授編修十二年  
充湖南鄉試副考官十六年十一月升右春坊右中允十七年二  
月大考二等四月轉左中允九月遷洗馬十一月遷翰林院侍講  
十八年四月轉侍讀七月遷右春坊右庶子十一月擢翰林院侍  
講學士十九年轉侍讀學士二十年旋擢詹事府少詹事尋遷詹



事二十一年 命管理右翼覺羅官學充江西鄉試正考官二十二年升內閣學士兼禮部侍郎銜二十四年提督順天學政遷兵部右侍郎道光元年丁父憂三年卒子集禧刑部郎中

右 國史館本傳

公吳氏諱烜字旭臨一字鑑庵河南固始人也先世籍江西南昌元季遷商城明正統中有思名者再遷是邑以輸粟二千五百石賑饑旌於朝曾孫大樸天啟二年進士知廬州府禦寇歿贈太僕寺卿事詳江南通志公會祖德昌祖夢巖考延瑞乾隆三十一年進士由戶部主事歷官廣東糧儲道權按察使嘗鞫巨案獲其私書焚之不株連一人三世皆累 贈光祿大夫曾祖妣某氏祖妣

某氏妣劉氏王氏皆累 贈一品夫人王夫人生子三仲卽公生  
三日不嘔不就乳先光祿晝假寢夢一藍衣老嫗曰我能活汝子  
覺以語夫人言終而公甦公天挺瀉至七歲讀祖母蕭太夫人行  
狀輒哽咽涕泗先光祿宦京師公昆弟布衣糲食孜孜力學年十  
八與兄邦治同舉順天鄉試五十二年成進士選翰林庶吉士散  
館 國書第一授編修先光祿時已解組公念二親春秋高急歸  
省連丁內外艱服闋還 朝六十年充貴州鄉試副考官得士費  
涵等四十八人嘉慶三年廷試翰詹列二等是歲充廣東鄉試正  
考官得士李汝謙等一百五人四年 仁宗親政特簡公督學江  
西公以詞臣膺非常特達之知位業自是始矣再遷右春坊右中

允九年督湖北學三遷侍講學士十三年充武會試副總裁明年再遷詹事府詹事明年督順天學轉補通政使十七年遷兵部右侍郎明年調吏部右侍郎左充經筵講官教習庶吉士明年署戶部倉場侍郎明年署工部右侍郎兼管錢法堂事公之莅湖北也長公子侍郎以編修主湖南試謁公於武昌使院公謂之曰汝大父少孤且貧嘗一日不再食廚無薪汝曾太母夔園中落葉鬻糜以啗之大父居約攻苦三十稔卒能以詩書起家詒子若孫然困於童子試屢矣蓋公席富貴而毋忘在莒之戒故矢精白拔單寒自累秉文衡及教子弟終其身莫不然二十一年夏以失察錢局匠役事免公積勞勩左脇生瘕日餌藥顧先帝恩眷未始衰

也明年次公子進士及第授修撰是日 特旨除公中允既臚傳  
侍郎具疏謝 召對乾清宮 先帝詢公舊疴甚悉二十五年遷  
右庶子轉左秋八月 今上御極擢侍講學士九月晉禮部右侍  
郎贊襄 大典夙夜惟寅道光元年夏奉 命覆勘 萬年吉地  
溽暑邁疾因乞假 上見侍郎 諭曰汝父病痢宜服清涼之劑  
安心調養俟復元乃銷假然公踰月竟卒七月二十一日也春秋  
六十有二公宗其鄉薛文清呂新吾孫夏峰湯潛庵諸先正之學  
耿直光明通達治體嘗輯歷代名臣言行手錄一帙類記往哲格  
言論斷以己意爲家誠其大綱有四曰治心之要曰治身之要曰  
治家之要曰居官之要平生得力具在是焉與僚友言侃侃廷辨

與門下士言導之以善而出以和易治家嚴雖嬰穉無敢有嬉笑者壽祺鄉在京師荷公誘獎重公沈毅及聆公論議貞良開豁以爲誠公輔才常見公子弟侍側躬躬如畏進止不失尺寸而公於子孫一飲食一寒煖未嘗纖悉不調護竊歎齊肅之法恭儉退讓之風誠可爲士夫則也公篤於昆弟於其不給多資助撫從子及孤甥如己子初先光祿建家廟置祭田又置義田以賙同高曾以下之貧者擴墓田以食族姓之能讀書者公旣貴乃建家塾擇族中之能爲師者授以經增先光祿所置祭田學田義田積六百餘石邑子之省試及與計偕者各贖之構西悅生堂於京師宣武門外上斜街之西偏冬以栖老病癯瘠者日給飯鹽蔬歲給絮衣人

一襲斃則棺瘞之其親睦任卹類如此獨念公遭逢三朝恩遇  
異數功業未竟而遽折棟榱魂魄猶應感戀聖朝然而公觥觥  
志節上下莫不諒之又況侍郎修撰均早以文章致身爲舟楫爲  
霖雨公所未竟之緒方於侍郎修撰乎終之公亦可以慰九泉乎  
娶許夫人生子二其彥已未翰林兵部右侍郎提督順天學政其  
濬丁丑一甲第一名進士翰林院修撰遷李孺人生口女二婿曰  
溧陽王侍郎綬之子候選通判友沂義甯尚書萬文恪公承風之  
子欽賜舉人方熙孫男三侍郎生集禧正二品蔭生修撰生元  
禧榮禧元禧從四品蔭生女孫五婿娶多高門某年月日返柩故  
里將卜葬侍郎以壽祺同年雅故能知先德自京以書來請銘銘

日  
篤於親而仁於人豐於義而明於智惟其家治光輔攸宜位與名  
峻福偕德晉伯踐卿槐仲天下魁鸞鳳杞梓爲國得士非公莠之  
孰能培之以死勤事報忠亦至寢邱之原千里歸魂順里兮孝邨  
蕭縣縣其後昆

右墓碑銘陳壽祺撰

吳其彥

本朝取士之制專重進士科進士科得人之盛莫如嘉慶四年己  
未蓋當 睿皇帝親政之初星輝雲爛景運方新而總裁官又爲  
朱文正公以神化之丹青亭毒羣品故能選驥躍龍而取之五十

年來所稱名臣循吏儒林文苑皆輻輳於此榜而吾師吳公美存先生年方二十有一爲此榜最少年入翰林習 國書文正公尤愛偉之六年散館改主事翌日奉 特旨授翰林院編修文正公之薦也公諱其彥字美存先世由江西遷固始明正統時有諱思名者輸粟賑饑以義民旌至公太高祖大樸公天啟二年進士知唐州府禦寇歿贈太僕寺卿高祖德昌曾祖夢巖俱縣諸生祖雲亭公諱延瑞乾隆三十一年進士官至廣東糧儲道自高祖以下三世皆 贈光祿大夫妣皆 贈一品夫人公父鑑庵公諱烜乾隆五十二年進士官至禮部右侍郎 誥授光祿大夫妣許太夫人 誥封一品夫人公生有至性讀書穎異年十四補縣學弟子



員十七中乾隆六十年河南鄉試舉人大爲座主襄平蔣礪堂先生所器據文章定福澤特置第十七名以寓傳衣之意蓋襄平鄉舉時名在十七也襄平後大拜門生屬吏徧天下獨於公奇賞不去口嘗語人曰凡爲國家辦大事者皆有福人也及公以四十之年官至少司馬人始服襄平有人倫鑒云公旣受 睿皇帝特達之知爲編修官又兼方略館繙書房文淵閣校理諸職踵鑑庵公後以史局爲家學詞館榮之嗣後每晉一階皆出 特旨二十年春以侍讀學士與工部侍郎顧臯內閣學士張鱗同修石渠寶笈亦 特簡也每 召對 天顏溫霽獎其謹慎二十四年秋督順天學請 訓時 上曰汝父在京以汝爲順天學政便於歸省未

一月擢兵部右侍郎 諭之曰汝父子同官二品當思爲國報效  
聖情肫篤不異家人父子矣公感 睿皇帝知遇之隆以翰林  
官專司文字無可圖報每於使旌所莅矢公矢慎務使海無遺珠  
且以文章觀人福澤預儲 國家異日之用凡同考順天鄉試者  
四典江西鄉試者一湖南鄉試者一所取之士爲中外官皆有名  
於時洵能傳朱文正蔣礪堂兩先生之教也先是公父鑑庵公爲  
順天學政性剛正人畏之如嚴師目爲吳文端公公則休休有容  
納士於春風中而薰沐之薄技片長獎借無已人樂其寬目爲吳  
文和公刻劉蕺山人譜分給各茂才以示敦行之鵠一時文風丕  
變多士鼓舞於不自知焉道光元年鑑庵公卒於京邸明年公扶

柩歸里居里門者兩載值大水漂男女無算公捐貲拯救多所全活已斃者予棺以葬復置悅生堂於東關外以惠窮民之無告者聞倡家有蘇州世族女贖之招其父來爲具奩嫁於士人蓋公之好施出於天性自其爲翰林時已時時以周急爲務不足則典衣佐之又好栽植後進選入家塾督課而獎勵之湘南卽親受業於公者也道光三年十月服闋以微疾遽卒年四十有五聞之者異聲同歎莫不謂天奪善人之速也公蘊平和篤厚之德擅承明著作之才木天起家卿雲繼武持節以導揚 皇化爲職業居鄉以扶樹善類爲事功 聖天子方以公輔待之天下人亦想望風采以爲儀廷之鳳然而回翔侍從未親簿書霖雨之施涵而不潤徒

令人致歎於經綸之未竟而已公生於乾隆四十四年十月初九日卒於道光三年十月二十八日元配周氏寶雞縣知縣諱賡公女繼配戴氏兵部尚書諱聯奎公女皆封一品夫人子集禧正二品蔭生刑部山西司主事側室郭安人出女三長適翰林院編修郭道闡次適某又次適某以某年月日葬於固始縣某山之原

銘曰

清曜秉精嶽靈育德繼體二勳庭聞是則攬轡皇衢帝心攸屬黑頭稱公蒼生錫福文章報國霖雨未施儲才備用亦惟天知天不祚年朝野同歎棟斲方滋佑啟彌健大別巍巍淮水孔長颺風不沫以惠梓桑

石墓誌銘蔣湘南撰

馬履泰

君於乾隆庚子恭逢 南巡 召試賜舉人授內閣中書丁未成  
進士改庶吉士散館改主事補刑部主事歷員外郎中轉御史給  
事中戊午充順天鄉試同考官擢光祿寺卿督陝卞學政還 朝  
升太常寺卿嘉慶某年乞假回籍屢主灤源越華敷文書院講席  
在敷文十數年家居顏其居曰特健藥齋暇日與兩子一甥拈題  
分詠家庭之歡林下之樂如是者又十數年卒年八十有四兩子  
五孫入學者三人

嘉慶閒兩江總督某聲勢烜赫君特疏參之其仇直如此視學秦  
隴有匪類將於考試日潤生童中入城滋事適雨雪嚴寒君改試

期匪謀不果遂散去甘肅某府不靖大吏奏請調索倫兵剿捕君  
奏言索倫兵未可輕率調遣 上覽奏深嘉之其遇事有識類如  
此

君性灑脫工書畫善諧謔愛花木嗜生果好誦晚唐人詩嘗謂人  
曰人不可無趣無趣則人無味矣所交皆一時名流尤與梁山舟  
學士相得學士贈以楹聯云松老自能生遠籟雲閒無復作奇峰  
論者謂浙杭品學兼優人所欽慕者山舟學士而後秋藥太常繼  
之

右太常事略張維屏錄

陳若霖

陳若霖福建閩縣人乾隆五十二年進士以主事籤分刑部五十七年丁母憂嘉慶三年服闋補官洊升郎中九年直隸東鹿縣民王洪中爲張文觀糾眾尋毆承審各員偏斷洪中自縊經刑部平反以若霖首訊得實得旨加一級十二年京察一等十三年三月授四川鹽茶道九月擢山東按察使十一月調廣東按察使十四年署布政使十五年六月因所屬擬罪失入率行審轉部議降調上以若霖於刑名熟悉實降可惜加恩改爲畱任先是若霖偕總督百齡緝捕洋匪匪徒郭婆帶率黨投誠至是又擒獲積年巨盜烏石二各犯盜首東海霸等悉數乞降海洋肅清命予優



敘 賞戴花翎十六年 北按察使十七年復因擬罪失入部  
議降調 命從寬降爲四品頂帶仍畱按察使任十九年正月調  
四川按察使三月 賞還三品頂帶十一月擢四川布政使二十  
年授雲南巡撫二十一年以越南國水尾州州目黃金珠挾嫌糾  
殺副目李文政內地民人葉四等聽糾搶掠緝犯鞠實解赴邊界  
正法傳首水尾州夷眾悅服並將不能約束之河口汛弁趙秉忠  
出邊重利盤剝之民人辭奉章懲治如律疏入奉 硃批所辦妥  
協二十二年三月 陛見回滇途次調廣東巡撫適臨安邊外夷  
匪滋事總督伯麟赴邊若霖於衡州折回彈壓有 旨馳驛趨行  
妥協經理俟新任巡撫李堯棟抵滇將要務詳悉交代再赴新任

六月抵粵旋偕兩廣總督蔣攸銛奏粵東外海舊設船艚烏舨等船駕駛不靈節經裁汰尙存二十一隻追捕巡防均屬無益日久朽壞徒滋糜費查閩省八槳船於內外淺港深洋均能行駛追捕請改造大八槳船十隻分撥南澳澄海各營以資巡緝得旨如議行九月兼署兩廣總督十一月御史蔣詩疏請州縣開放倉廩由道府委員監視命若霖覆議若霖覆奏州縣經管倉穀定例每年盤查結報啟閉隨時若均俟稟請委員前往監視各州縣遠近不齊不能計日以待一則倉廩或遇風吹雨蝕不能即時啟視難免霉爛之虞一則農民赴倉完納不能隨到隨收難免書胥阻難需索之弊一則兵丁赴倉支糧不能隨到隨領難免守候需時

且各州縣同時開倉丞雜各員亦不敷分派臣再四熟籌與其多設科條不如照舊嚴實盤查得旨循照舊章甚是但必持之以久有弊卽參二十年四月調河南巡撫十一月以特旨交審控案並未親提輒委員代訊旋復京控命交部議處部議降四級調用上加恩改爲畱任二十四年正月奏訪獲復興白蓮教要犯柯老人及其子王大川王二川得旨嘉獎三月調浙江巡撫五月以蕭山縣上新廟土隄瀕臨錢塘大江爲圍境田廬保障近江心漲沙水勢偏趨隄身傾圮須建盤頭以排潮勢并於盤頭出面禦潮之處堆砌碎石以護根基十一月奏杭州府屬之仁和錢塘等嘉興府屬之嘉興秀水等湖州府屬之歸安烏程等十七州

縣共被旱都圖區莊八百六十一處內成災田四千一百九十七頃零應蠲地漕等銀三萬五千餘兩漕南等米二萬六千餘石又歉收田八千五百五十一頃零應緩徵地漕等銀一十萬七千餘兩漕南等米九萬九百餘石該處農民春閒皆以養蠶爲業田畝專栽晚禾被旱之時設法灌溉倍費工本輸將無出請照例分別蠲緩徵收均得 旨允行二十五年正月同漕運總督成齡奏浙省漕白二十一幫軍丁向本貧疲上年賠交多累迫回空南下張秋復值黃流穿運及抵瓜洲又以徒陽運河水落湖枯截留京口八幫三百餘隻丁力益疲請照嘉慶十年成案提銀八萬兩發給一分輪息年借年還俟息銀足敷本銀統以息銀作本 諭依議

行二月奉 廷寄親赴蕭山查勘海塘旋奏新林塘在蕭山縣西  
北 國初時外沙平行海潮灌入塘內淹蕭山山陰會稽三邑田  
廬最爲險要之工迨後塘外漲沙愈寬愈遠塘之外爲完課龍地  
龍地之外爲完租牧地計新林塘至海已有六十餘里之遙而中  
間龍牧兩地分界處有馬塘一道包護新林塘外高內低無異重  
門疊障內塘遂爲可緩之工覓在石塘計埝十六丈土塘計埝六  
丈海潮久已不至龍牧兩地積水從此瀉入內河直達下游三江  
開出海甚屬通暢惟海濱埝漲靡常必須致謹於平時方免貽患  
於後日臣相度形勢馬塘以南之龍地其中溝洫本自縱橫應開  
寬濬深期於層層容納以北之牧地應就西北略低之莫家灣米

市灣等處引水下趨祇將馬塘開段補築即可堵潮汐來源竈地所空之土培護隄根於隄工尤爲有益以上各工均應歸民辦理竈地則令各竈戶開濬牧地責成牧戶相機宣洩塘工則合蕭山山陰會稽三縣民力公同修築令各該管官督率妥辦惟新林塘迤西一帶直達西興似宜量築橫塘隔斷江濤於新林更添一重外障得旨如所奏俟冬初興辦並諭修復後仍嚴行示禁如有私開卽查拏治罪六月奏會稽縣枯渇一帶塘隄上年大汛江湖將柴塘刷卸條塊石坦被衝應於塘外添建雙坦以資擁護計坦工一百一十八丈止須添石加修以節糜費惟臨水貼椿石重椿虛未能屹立馬牙排椿又不能聯絡堅實應於貼椿外拋堆塊

石一層以作重關外護估需工料銀二千六百餘兩又上虞縣呂家埠一帶柴土隄爲山水潮汐往來衝要之區本年春汛漲旺閘段坍塌應折鑲修復柴塘之外亟宜建築塊石坦水三面加釘馬牙排椿關鍵以護塘基估需工料銀二千七百餘兩懇請動項修築以資捍衛 詔從之二十五年擢湖廣總督道光元年正月又偕成齡會奏浙江省釐剔漕弊州縣收漕每石止准餘米二斗五升以充幫費廩用旗丁領運沿途陋規刪減十之三四州縣津貼旗丁幫費每石止准貼銀三四錢所有應給旗丁調劑錢米兌費加兌峯尖樣米各名目請盡行裁除 允之六月奏修荆門州沙洋隄內金公仙人兩月隄又以洞庭湖新漲附勝清發二洲廣生

蘆草百姓爭割生事且每有盜賊藏匿乘閒竊發奏移駐岳州府同知及守備於君山七月奏楚岸售鹽事宜先是揚商運鹽到楚爭銷乃定大小商封輪之法至是船鹽滯銷鄰私充斥兩江督臣孫玉庭奏請變通 命若霖查覈議奏疏言見在漢岸積鹽四百餘船計三十四萬餘引若此時卽行散售恐變法太驟諸弊叢生只可逐漸疏銷將存積最久船鹽盡數開售以次按月陸續籌銷庶舊鹽不致停積俟見在積存之鹽銷有成效續到之鹽卽易於流通奉 諭旨俟積引銷有成效再令隨到隨賣以廣疏銷若行之日久商運踴躍存積過多則隨時暫封仍不得過兩月之限時議各省裁減名糧令督撫詳察情形具奏八月若霖奏言湖北西



北兩面界連河南南川陝黃州荊州漢陽皆瀕臨大江水路爲吳蜀咽喉陸路爲數省要道原額兵一萬五千餘名乾隆四十六年裁除虛糧增添實兵二千三百餘名嘉慶八年因添設湖北提督改移鎮協增兵四千八百餘名嘉慶十九年裁兵一千六百餘名見在實設額兵二萬九百餘名湖南接壤兩粵黔滇西南均屬苗疆北面瀕臨洞庭衡永郴桂地衝汎廣原額兵二萬九百餘名後增添實兵二千五百餘名嘉慶二年核定苗疆移改營制添兵四千九百餘名十九年裁兵一千五百餘名見在實設額兵二萬六千餘名查兩省各營兵力除防守巡緝之外存營本屬無幾僻路營分或僅敷防守城垣監獄衝途營分更有人犯餉鞘銅鉛過境應

撥兵護送往往有不敷添派之處 國家經費有常固不敢畱冗兵以糜餉亦未敢於無可抽裁之中率議裁汰致兵力單弱難資控制所有兩省見設額兵請均免其裁減下部議行十一月偕兩江總督孫玉庭會奏江廣代造直隸剝船一千五百隻請改運木料以省賠累而歸實用又以辰州大油溪偪近苗疆地產金砂封禁後仍有偷窆之弊請移辰溪汛守備駐之并撥兵防守均得旨允行旋以苗疆儲積緊要奏請借款買補又奏鳳凰廳等處額設屯丁委員屯官等有以隨帶私人頂充者應令退佃永杜侵占以安屯業屯防地本磽瘠佃租原額過重請將各項浮費刪裁輕減租額并撤屯防委員又苗疆舉人赴京會試者請照本省舉人

之例給以公車銀兩二年八月又奏查明楚岸散輪後銷鹽暢旺比較封輪之年溢銷鹽二十六萬四千餘引商民兩便請無須照舊封輪 上並從之九月調四川總督三年二月奏准以南部縣富村驛縣丞移駐新興壩兼管各井鹽務移廣元縣朝天鎮巡檢爲富村巡檢時中江緝獲假神惑眾匪徒覃萬典等犍爲亦報獲傳旗糾搶道士蕭來修等皆親提審實實首惡於法十二月 命來京四年三月授工部尙書兼管順天府府尹事先是二月有旨賞撥五城平糶米六千石分給大興宛平二縣設飯廠四處四月若霖奏貧民赴廠每日五六萬人請再 賞米四千石接續煮賑又奏言文安縣形如釜底居九河下游舊有四面隄防以資保

障道光二年以後雨多河溢迭衝隄口數十道積水甚深不能耕種請將修濬工程歸欽派籌疏河道大臣急行修築並從之七月調刑部尙書十一月賞紫禁城騎馬十二月刑部審擬文元啟斃胞叔伊克唐阿辦理錯誤又以應科徒罪之鈕勒渾蘇擬流部議降一級調用上加恩改爲降三級畱任七年奉命偕姚祖同查勘湖北京山縣黃家營隄工十月奏言勘得黃家營上年潰口二處一隸京山縣見已淤成沙灘並無積水一隸鍾祥縣水勢深一丈數尺不等兩口中尙存老隄一段長二百餘丈又勘得潰口對岸楊家腦沙灘二處近灘水祇三四尺近潰口者一丈七八尺頗形側注其胡李灣沙洲緊貼京山潰口江身窄狹沙洲

已被水衝見在下游被水災民懇請築隄而上游居民又有請廢隄者以口門下游係襄河故道應聽從此順流免致與水爭地臣等查在正河經行二百餘年循流順軌久成故道舍此不由而欲別尋二百餘年以前之故道說殊謬悠見在下游潛江等處被淹不少天門係其頂衝漢川更如釜底此一帶城郭田廬何忍委之巨浸此時惟有堵合口門以順水之性至胡李灣江身祇四十餘丈以全江百餘丈之水遭此攔束下壅上潰理有固然該洲見已衝刷乘此挑除俾江流去路通暢似屬因勢利導之法惟督臣嵩孚原奏欲如黃河工程作法誠如 聖諭流弊甚多襄江黃河水勢既異辦法亦殊物料各有所宜兵夫各有所習兩處報銷價值

保固期限又迥不相同一照河工糜費何所底止見擬查照乾隆五十三年荊州塞金洲成案先挑胡李灣沙堆以暢下流去路再將京山已澗口門挽築月隄展寬水道其鍾祥口門俟攔水壩築就卽乘勢堵閉俾水歸正流並在澗口添築石壩護隄攻沙以資鞏固卽責成督臣駐工認真督辦得旨允行七年又以江西學政福申大察家人蕭三勒索州縣命若霖往讞得實擬罪如律八年上謁兩陵命留京辦事因刑部於恩緒毆斃家人審擬遲延降二級畱任九年命充散館讀卷大臣又充殿試讀卷朝考閱卷大臣十二年正月因病奏請開缺命加恩以原官休致回籍四月卒於途諭曰原任刑部尙書陳若霖由翰林改官

刑曹洊升巡撫歷任湖廣四川總督旋授刑部尚書宣力中外四十餘年恪恭厥職上年因患病懇請開缺當經賞假調理本年因刑部事務較繁恐其精神不能周到加恩准令致仕回籍今聞在途溘逝殊堪軫惜陳若霖著照尚書例賜卹任內一切處分悉予開復所有應得卹典該衙門察例具奏尋 賜祭葬子景亮二品廕生陝西督糧道景曾江西九江府知府緣事革職

右 國史館本傳

國朝耆獻類徵初編卷一百七目錄

卿貳六十七

胡長齡

劉鳳誥

那彥成

李鈞簡

榮麟

舒賟

哈豐阿

覺羅舒英

德文

恩普

蔣祥墀

張師誠

國朝耆獻類徵初編卷一百七卿貳六十七目錄





國朝耆獻類徵初編卷一百七

通奉大夫前署江西巡撫江西布政使司布政使湘陰李桓輯  
卿貳六十七

胡長齡

胡長齡江蘇通州人乾隆五十四年一甲一名進士授修撰五十六年二月大考二等超擢侍講學士六十年二月遷國子監祭酒命查左翼宗學嘉慶元年告假回籍二年十二月假滿仍任祭酒三年七月充山東鄉試正考官命提督山東學政四年十一月因德平縣知縣葉芳浮收酒糧奸民楊壇父子等羣相挾制戕官劫獄生員閻常雨黨同滋事巡撫陳大文以長齡失察生員不

法請交部議處議上 諭曰胡長齡身係學政平日不能管束生員致有戕官劫獄之事部議降二級調用著准其抵銷降一級仍降一級調用五年二月補光祿寺少卿六年七月遷順天府府丞八月調奉天府府丞七年十一月丁父憂十年服闋仍任順天府府丞 命查右翼宗學十一年十月擢光祿寺卿十二年二月轉太常寺卿九月提督廣東學政十三年六月 諭曰廣東學政胡長齡因朕誕育皇長孫翁同將軍總督副都統等具摺呈遞如意胡長齡係三品卿員本有奏事職分但使其在京亦不能呈遞如意今竟與將軍等一例呈遞實屬不合著交部察議尋議罰俸九箇月十四年擢左副都御史十五年十二月任滿回京授兵部右

侍郎十六年三月充會試副總裁七月署工部右侍郎兼管錢法  
堂事務十七年二月調禮部左侍郎十八年正月充補經筵講官  
九月擢禮部尚書十九年七月因病請假回籍 上允所請 諭  
病痊來京再行簡用十月行至德州卒

右 國史館本傳

國朝書目考

卷一百一十一

二

劉鳳誥

劉鳳誥江西萍鄉人乾隆五十四年一甲三名進士授編修五十六年大考二等超擢侍讀學士五十七年命提督廣西學政嘉慶元年丁父憂四年四月服闋時恭修高宗純皇帝實錄派充纂修官六月補侍讀學士五年充湖北鄉試正考官六年二月署國子監祭酒旋遷太常寺卿諭曰劉鳳誥前派充實錄館纂修均屬妥協見升太常寺卿官職較大著授爲總纂遇陳奏事件列名在副總裁之後七月充山東鄉試正考官旋命提督山東學政鳳誥疏謝諭曰衡文取士汝所優爲整飭士風咸歸雅正尤爲要務至於年歲豐歉大吏賢否皆應隨時密奏不可緘默亦

不必存見長之念撫拾細故諸官得中辦理勉之七年二月遷內閣學士兼禮部侍郎銜四月奏濟甯州屬金鄉縣童生張敬禮等以阜從曾孫冒考爲生員李玉燦等所訐知縣汪廷楷並未詳查率准送考及州試時知州王彬復不據控審明扣除致闕邑人心不服幾至罷考 命解汪廷楷任交巡撫和瑛秉公審辦尋給事中汪鏞奏承審官員將原告刑偏誣認武生李長清亦赴都察院具控 上以此案劉鳳誥曾奏參於前 命據實查奏鳳誥旋奏承審官有心黨庇並不追究被告人證轉將原告刑求控辱並株連械繫多人且以奉 旨解任之汪廷楷不行質審竟借捕蝗爲名令其回縣同署任提舉多人報復搜求士論沸騰眾情冤抑疏

入 上命侍郎祖之望往鞫得實鳳誥以不早陳奏傳 旨申飭  
九年六月遷兵部右侍郎七月轉左侍郎八月任滿回京 命充  
實錄館副總裁專勘彙本十一月兵部職方司漢主事員缺鳳  
誥等欲以京察調部之李鼎元擬補尙書劉權之以係題缺應用  
候補主事盧坤令咨查吏部吏部定例凡京察調部人員專補選  
缺一切兩部人員題選兼補及纂例時誤入此條於滿官例冊遂  
誤以例文係專指滿員指駁並以漢官別有專條咨覆權之欲取  
閱專條聲敘復令敘彙行查鳳誥等益疑其有私遂偕侍郎成書  
等聯銜劾奏謂盧坤爲權之中式門生明知違例妄希設法變通  
以曲遂其瞻徇之私實爲有心弊混并劾同官緝布等附和調停



上命大學士董誥等查詢旋查明權之係照例辦理吏部亦將前後歧誤緣由自行檢舉 命詢問鳳誥等自認冒昧並云見權之始終堅執不能無疑 諭曰參劾事件必須查有確據方可形之章奏若以私心疑揣遽將瞻徇弊混等詞砌列彈章試思此等情弊如果詢明確實被劾之人應得何罪顧可取快筆端輕於誣捏乎且兵部覆查之稟係將李鼎元擬補祇於彙內咨取吏部漢員專條豈得謂之堅執有心攻訐此風斷不可長劉鳳誥等著交部議處尋部議降三級調用 上加恩改爲降一級補授內閣學士充 實錄館總纂官專司纂辦十年正月署經筵講官以恭進 實錄纂本中誤刪 詞 陵儀注與歷年所載不同 上召詢

總裁知意出鳳誥交部嚴議尋議降一級畱任 從之六月 命  
借吏部侍郎恩普修輯 國朝宮史十一年五月復升兵部右侍  
郎充 寶錄館副總裁十月調吏部右侍郎十一月以 宮史續  
編內恭載 聖製文法脫誤罰俸一年十二年正月以館書告成  
期近 命鳳誥專辦館事俟盡一事竣再行辦理部務三月 高  
宗純皇帝寶錄告成以鳳誥纂辦彙本敬恭蒞事 賞加太子少  
保銜開復修書降一級處分六月充江南鄉試正考官八月 命  
提督浙江學政先是鳳誥借尚書瑚圖禮奏翰林院官告病起俸  
與各衙門迥殊 上命大學士董誥等查奏翰林官告病銷假例  
須一年會典所載各部院俱同而瑚圖禮覆奏於例文別無指實

仍執前說 上責其牽引附會率欲更易舊章並鳳誥下部議處  
尋議降三級調用 上改爲降四級畱任十四年四月巡漕御史  
英綸以贓敗鳳誥以濫行保送部議降二級調用 上改爲降三  
級畱任八月御史陸言劾鳳誥情性乖張終日酣飲每逢考試不  
冠不帶來往號舍橫肆捶撻上年鄉試該學政代辦監臨徧往各  
號與熟識士子講解試題酌改文字餽送酒食以致眾士子紛紛  
不服將生員徐姓等刊刻木榜徧揭通衢並造爲聯句書文又於  
上年將舉人章堃竹園闌入署內建造住房致附近民居人人惴  
恐 上命戶部侍郎托津刑部侍郎周兆基光祿寺少卿盧蔭溥  
往按究出鳳誥於代辦監臨時聽受請託代素識士子徐步鏊印

用聯號但訊無受賄情事其將章堃竹園圈入署內亦查勘屬實請比照官吏未接財物枉法杖一百流三千里律加重問擬請旨發往伊犁效力贖罪 上以風誥疊荷恩施極爲優渥乃敢於科場大典聽受人情印用聯號托津等擬發伊犁尙覺稍輕 命革職等問交刑部覆審定擬尋大學士慶桂等覆按無異以加罪不入於死仍照原擬具奏十月 諭曰劉鳳誥蒙 皇考高宗純皇帝特達之知優加簡擢朕親政後復由學士用至卿貳又因恭修 皇考實錄錫以官銜論其平日學問優長原可當大省校士之任乃不自檢束竟敢於代辦監臨時爲應試生員印用聯號若徐步整一經中試則夤緣賄結當得何罪今劉鳳誥尙止聽囑徇

國朝通志卷一百一十一  
情並無得贓實據擬以遣戍伊犁實屬罪所應得但伊犁路途雖遠而地方近成繁庶轉得在彼安處著改發黑龍江效力贖罪十八年釋回二十三年諭曰劉鳳誥恭纂皇考實錄曾有微勞學問亦可著加恩賞給編修來京供職道光元年因病呈請回籍調理十年卒子元齡四品廕生江蘇吳江縣知縣元恩山東冠縣知縣候補兩淮鹽運判

右 國史館本傳

那彥成

那彥成章佳氏滿洲正白旗人曾祖阿克敦協辦大學士祖阿桂武英殿大學士一等誠謀英勇公俱有傳那彥成由乾隆五十四年進士改翰林院庶吉士五十五年散館授編修五十六年升侍講五十七年閏四月轉侍讀十月入直南書房遷國子監祭酒兼公中佐領五十九年四月擢詹事府詹事充日講起居注官十二月遷內閣學士兼禮部侍郎銜嘉慶二年充崇文門副監督三年二月兼正黃旗蒙古副都統 命在軍機大臣上行走五月遷工部右侍郎八月以教匪王三槐就獲下部優敘四年正月調戶部右侍郎兼鑲白旗滿洲副都統授翰林院掌院學士管理武英殿

御書處事務尋轉右侍郎擢工部尙書兼崇文門正監督二月  
充 實錄館總裁兼鑲白旗漢軍都統充經筵講官國史館副總  
裁 賞戴花翎三月 賜紫禁城騎馬五月總理工程處事務兼  
管咸安宮教習充教習庶吉士 上以那彥成三歲而孤其母那  
拉氏撫孤守志三十餘載表其門 賜御書勵節教忠以榮之七  
月管戶部三庫授總管內務府大臣先是湖北白蓮教匪樊學明  
等叛於襄陽其黨張漢潮寇秦中 詔參贊大臣明亮討之而成  
鄂將軍應成陝西巡撫永保與明亮有隙師行不相顧八月 命  
那彥成爲欽差大臣督明亮軍視慶成永保職昇那彥成按治九  
月奏途次詢訪軍營將情兵疲自四月至七月總未與賊接仗臣

到後當力加振作若再有失誤軍機者將弁以下軍法從事 諭  
曰軍營疲玩自當整頓將弁置重典當慎重辦理本朝經略大臣  
亦從無先斬後奏之事況欽差乎那彥成實心任事諒不致任性  
苛求然人命至重萬一稍錯所關匪細此正朕愛惜那彥成處那  
彥成當倍加詳慎十月劾明亮奏報誣罔事乃逮治明亮 命那  
彥成領其軍明亮尋破賊誅張漢潮 諭曰明亮因朕特派那彥  
成督辦不敢再似從前玩寇且聞那彥成已由西安入山是以上  
緊截勦獲此兇渠是那彥成雖未經臨行陣而先聲奪人故能得  
此捷音也那彥成旋奏張漢潮謀主冉學勝餘黨在陝宜亟除  
上是之十一月敗賊於五郎疏言軍餉前費八千餘萬兩有司圖



軍需肥己將弁亦希分潤致事閱四年賊未殄滅臣欲清弊數刊刻糧單按程期赴糧臺覈給以杜冒銷又言秦中前將帥各爲一路致賊乘閒遁逸今臣等相機分合聲息相通使賊所至必有官兵追勦 諭曰所論切中從前積弊今所辦甚是尋疏請五郎設重鎮子午谷黑水峪斜峪諸隘口分置小營控制增總兵一員編鄉勇於新營更置縣丞巡檢分防 從之嗣以陳奏不及攻戰祇鋪敘終南山水且以精兵分布勢單 飭之時賊竄秦嶺老林官兵由漁碭子蹋冰入賊三路迎敵我兵分道進攻自山梁下破之 諭曰所辦甚好山險冰滑舍騎步行可謂辛苦備經那彥成旋奏賊倚老林爲巢窟叢刺阻隘槍箭難施臣五中焦灼憤不欲生

必須臣親身入林督勦方不互相觀望卽糧運不繼臣等可尋覓  
包設接濟疏入奉 硃批不忍注目又 諭憤不欲生之語實爲  
過當不獨那彥成不應冒險深入卽領兵大員亦不應令輕涉險  
地當萬分斟酌不可過於憤激十二月癸賊匿高關峪夾嶺我軍  
潛師夜擊賊奔鳳凰山中乃使將士夜緝下殲六百餘賊斃僞元  
帥黃山雄等餘匪走平利檄總兵慶溥等亟截之得 旨所辦甚  
是旋以張賊餘黨未殄致勁旅漸疲降 旨切責尋破賊於秦嶺  
嗣以賊匪偪出老林復逸入楚豫有 旨嚴飭五年正月賊匪二  
萬竄陝西略陽 上以那彥成狃於老林致賊乘間闖入復切責  
之是月破老林逸賊獲襄陽起事賊三十有奇殲逸賊百餘擒賊

百高遇春等進兵至漢中因川匪鴟張入棧追勦 上以其不拘  
畛域嘉獎之二月川匪至隴州乃出棧取勦賊屯隴山鎮三戰大  
破之分道亟追斬俘三千餘殲偽元帥魏學林偽先鋒嚴士沛閻  
性擒偽副帥余禮等 上嘉之授參贊大臣 賜玉韞金合佩褱  
下部議敘那彥成以經略額勒登保在隴應受其節制繳欽差大  
臣關防得 旨俞允是月賊避官兵南走追及於秀金山敗之又  
敗於巖家壩 諭曰所辦甚好那彥成隴州殲賊後兵威已震士  
氣奮揚是以連次克捷會額勒登保疾作 諭那彥成兼領各路  
兵賊陷文縣據卡狼寨我兵乘月夜渡河破其陣殲賊于狗兒暨  
賊匪李大旺等並殺賊千三百人餘匪南竄者近千 上責其勦

賊未淨致奔逸蔓延而保護卡狼寨功過相抵免吏議尋敗賊於龍泉溝又敗諸林江浦俘斬千餘追至毛峪山賊棄輜重遁奏入得旨褒嘉時方令西安將軍恆瑞回陝西協勦屢獲勝仗上以其適合廟算內外一心賚予獎勵未幾賊首高二馬五糾六千餘人趨松潘官兵禦之奔岷州額勒登保病已帥師夜攻賊奔踞山那彥成率眾先登殲三百六十餘賊追越四山殺百餘遲明賊列陣何家衛設伏以待那彥成帥精兵奮擊賊敗退伏賊左右起追數十里斬首千餘級執賊匪詹世貴等奏入得旨嘉許頒賜珍物四月敗賊於分水嶺尋以陝匪東趨近豫嚴飭之革花翎已而官兵嚴守禦賊不敢東乃復之川閩四月上以那

國朝通志卷一百一十一  
彥成久不葳功 召還京將 面詢陝中賊情尋以賊入川勢漸  
張乃那彥成玩縱所致又不勦賊於川轉隨額勒登保入陝致總  
兵施縉戰歿斥出軍機處南書房及紫禁城騎馬並罷所領館閣  
府庫諸職五月抵京 陛見 諭曰那彥成赴陝漫無布置致賊  
竄逸裹脅朕令回京細詢語添兵則以無用之兵添調何益語添  
餉則以虛糜不值語防堵又以爲兵疲無益昨復稱事關劫數劫  
數未盡卽健將精兵亦不得力此何語耶朕詢及額勒登保連次  
得勝那彥成復以所奏如不虛再得一二仗卽可將陝賊辦竣心  
懷妒忌欲朕猜疑且詢以川楚軍務據云恐亦不免虛誑那彥成  
游詞熒聽其心實不可問著將此旨宣示令其明白登答又 諭

曰那彥成外似有才中無把握不聽人言自以爲是雖有微勞不能掩咎著革去向書講官都統花翎用爲翰林院侍講在 實錄館效力尋襲騎都尉世職六年二月擢少詹事四月充日講起居注官九月充順天鄉試副考官升詹事七年二月遷內閣學士兼禮部侍郎銜五月充教習庶吉士六月兼正藍旗漢軍副都統八月扈 蹕木蘭射鹿獲之 賞戴花翎尋調正紅旗滿洲副都統是冬 命往江西鞠巡撫張誠基被揭事未定讞會廣東永安客籍游民結添弟會與土民構鬪博羅諸邑匪徒響應總督吉慶討平之尋悔釋囚畱擊且疑巡撫瑚圖禮密劾遂自戕 上命那彥成往鞠之得其實時永安黃亞程等遁入鐵籠嶂復嘯聚爲盜八

年二月那彥成率提督孫全謀等進攻卽日克之誅亞程及其黨數百人事平條上善後九事 上嘉其辦理妥速調度得宜署吏部侍郎仍下部議敘尋赴直隸浙江讞獄七月擢禮部尙書兼戶部三庫事總理太常寺鴻臚寺樂部十一月鞫黑龍江將軍那奇泰私易奏摺事那奇泰等黜貶有差九年六月投軍機大臣兼鑲黃旗漢軍都統鞫河南嵩縣民王雷傳習邪教事未竣以秦隴搜捕餘匪 命攝陝甘總督辦理善後事七月 硃諭那彥成曰汝誠國家柱石之臣有爲有守惟有稍恃己之聰明不求人之謀議夫一己才力有限仕途邱壑難窮務資兼聽並觀之益莫存五日京兆之見八月奏南鄭縣鄉勇鄭忠祥等舉發趙恆裕張希賢潛

結謀逆立擒之與其黨皆伏誅又奏籌遣南山游民均得 旨嘉  
獎十一月調補兩廣總督十年十一月劾前巡撫百齡苛虐營私  
諸事鞠實免百齡官十二月鄂羅斯夷船求通市監督延豐率允  
入奏那彥成以越界貿易恐商夷因緣爲奸亟請止之 諭曰此  
事與朕意相符所見甚是先是粵東土匪洋盜句結日熾盜首李  
崇玉黃正嵩依朱瀆橫行海濠那彥成初至緝獲甚眾嗣以官兵  
不得力遂行閒謀招撫降正嵩計擒崇玉檻送京師先後招降五  
千餘人悉賞銀幣率先降者予千總外委銜巡撫孫玉庭以濫賞  
劾之降藍翎侍衛充伊犁領隊大臣始崇玉正嵩歸命那彥成誘  
以四品服及守備劄事覺謫戍伊犁十二年正月授三等侍衛爲



伊犁領隊大臣三月授喀喇沙爾辦事大臣五月調西甯辦事大臣時野番侵掠內地戕害兵丁故有是命八月偕將軍興奎總督長齡攻克沙卜浪番境悉平十月條上善後五事允行其四十三年三月擢江南副河道總督是秋河水溢九月甄工合龍下部議敘十二月以荷花塘復陂降二等侍衛復爲喀喇沙爾辦事大臣十四年二月調葉爾羌辦事大臣授頭等侍衛爲喀什噶爾參贊大臣十二月以二品頂帶兼兵部侍郎補授陝甘總督十五年六月疏言前奏准六月陸見今甘肅被旱撫綏事重不敢拘泥遽行交代又請緩徵撥帑賑貧並疏陳施賑積弊硃批汝實不愧廣庭相國之孫又諭那彥成計及查勘撫綏事要不拘泥

前准陸見諭旨能知事體輕重其稱向來辦賑積弊所言俱切中  
竅要是月廣東洋盜肅清 上念其任兩廣總督時巨盜李崇玉  
究由伊緝獲 賞頭品頂帶八月奏吉蘭泰監筴請許新商得兼  
坐運兩商有所陳奏悉由山西鹽政以 聞又議西安標綠營弁  
兵改隸撫提兩標別設總兵專司訓練兼轄附近營汛裁兵四十  
名十六年五月請禁交代倉糧折色之弊以重積儲均如所請行  
七月入 覲 賞戴花翎十七年正月請改西安道仍爲滿漢兼  
用缺十二月請定護送喇嘛改由外省逐程接護免派京員以節  
糜費皆得 旨允行十八年九月河南天理會教匪李文成等謀  
逆陷滑縣犯直隸山東邊境 命那彥成爲欽差大臣加都統銜

帥師討之賊屯滑城及桃源集道口十月那彥成由衛輝進軍分擊新鎮丁變集連破之道口賊出掠中市所那彥成斷其歸路檄提督楊遇春等迎擊大破之賊造橋將渡河而西官軍截殺千餘橋毀不得遁賊蜂屯拒敵我軍痛勦飛越溝濠破道口殲賊萬焚其巢出難民八九千 上深嘉之 頒賜珍物獎勵下部議敘尋破桃源賊追道口餘賊抵滑城城中賊出應敗回城圍之桃源賊來援盡殲之堵滑城門十一月畱固集八里營等屯賊紛至遣將弁分禦絕其外援時李文成潛遁輝縣屯司寨那彥成遣副都統德英阿總兵楊芳率勁旅攻克之文成自焚死賊黨殲戮無遺 上嘉之優賚有差滑賊出斫營擊卻之擒賊首黃興罕尋於南門

掘地道密置地雷那彥成親督兵勇進攻地雷發城裂拔之殲賊一萬七千餘焚死七千餘擒二千餘出難民二萬餘捷奏入 諭曰此次掃除惡逆迅奏成功朕與天下臣民同深慶幸那彥成統領師干不辭勞瘁允宜沛恩懋獎著加太子少保銜賞三等子爵換戴雙眼花翎紫禁城騎馬並賞御用荷包一箇升伊子容照爲乾清門二等侍衛又賞黃面黑狐皮馬褂四喜玉扳指吉祥白玉牌鑲寶石帶扣黃瓣大小荷包翼日以渠魁牛亮臣徐安幘王道濼檻送入京復搜逸賊悉誅之釋脅從愚民籌議善後請將滑縣知縣改繁缺道口鎮增置縣丞把總各一員大名鎮添設官兵地遭蹂躪者復其賦卹賞死事官兵旌表義烈禁鋪戶私造刀槍清

查叛產散鄉勇收器械官兵分別凱旋畱駐悉從之是冬授直隸總督十九年正月巡歷開州條陳善後五事是月抵京復命諭曰那彥成克副委任深堪嘉獎著在阿桂墓賜祭一壇用示朕眷舊酬庸至意二月以保貪劣知縣孟祀瞻補滑縣革職畱任五月請撥宣化天津等鎮兵一千移置大名增置千把總外委九月請許因荒賤售地以原直贖十二月請移東鹿縣縣丞分防小章莊大名縣衛河縣丞移駐龍王廟元城縣主簿移駐小灘鎮長垣縣管河縣丞移駐大黃集並從之二十年二月以緝逆犯祝見等久不獲革花翎鑄三級七月駕幸木蘭秋獮以蹕路橋梁大雨衝塌後繕完甚速復花翎十月以廢員王奎聚等混請捐

復先令繳庫跡近專擅鑄四級十二月以灤州石佛口王姓世習  
白蓮教惑眾謀逆那彥成全獲誅之上以其辦理認真宥積次  
吏議 賜御書福字暨 上方珍饌畀那彥成母子度歲二十一  
年正月捐穀三千石倡勸興復義倉儲穀十萬六千石有奇二月  
以緝獲逆犯劉玉澂免鑄級三次時以新建運糧剝船二千五百  
籌議章程十條下戶工兩部倉場侍郎議行其九閏六月以前在  
陝甘與藩司陳祈商那賑銀津貼腳價等費並誣奏捐廉事褫職  
下獄論死尋以繳完賠銀改戍伊犁兩家終養九月丁母憂 上  
念其滑縣勦賊功免發遣令閉門思過二十三年二月授翰林院  
侍講四月轉侍讀二十四年正月擢侍講學士充日講起居注官

二月升詹事府詹事充會試副考官五月遷倉場侍郎二十五年  
七月以漕政著效 賞戴單眼花翎九月擢理藩院尙書十月調  
吏部尙書兼鑲黃旗蒙古都統十二月 賜紫禁城騎馬道光元  
年三月兼理樂部五月兼翰林院掌院學士七月調刑部尙書管  
宗人府銀庫兼閱兵大臣調正藍旗滿洲都統九月充順天鄉試  
副考官十一月劾司員舒通阿等散法營私不稍徇隱下部議敘  
二年正月請定竊賊情急圖脫誤傷事主者量減爲極邊煙瘴充  
軍二月請定毆死期功尊長夾被聲明與否總以有心無心爲斷  
皆如其請著爲令四月授內大臣五月議 陵寢風水重地青椿  
外盜斫官樹罪名請以官山界址爲限明定科條六月議西山煤

案鍋火章程四事皆得 旨允行是月以陝西渭南縣民柳金璧  
犯死賂免 命那彥成攝巡撫鞫得之誅貶有差十月復任陝甘  
總督時青海河北番賊犯窩卜圖卡擊走之因請移兵駐守議防  
卡條款清楚河南番族立什總百總百戶千戶領其眾初察漢諾  
們罕一旗移居河北煽野番向漢奸作賊那彥成絕其糧窮蹙投  
誠 諭曰該督不勞兵力不延歲月辦理認真可嘉之至十一月  
那彥成六十生辰 御書亮勳集祐扁額福壽字各一賜之 賜  
如意朝珠蟒袍文綺陳設是月請改西甯丹噶爾主簿爲繁缺臬  
蘭河橋主簿爲簡缺下部議行十二月奏漢奸盤踞務盡根株並  
籌巡防會哨山內保甲諸事 上是其議旋請改定沿邊營制增



省將弁兵丁又言番族萬八千盡回巢請酌移河南四旗蒙古皆  
允之三年三月以青海蒙古皆已復業下部議敘尋請定商民  
與蒙古市易章程並封閉邊外金廠四月請於循化廳增置主簿  
一員貴德廳增置照磨一員裁按察司照磨河橋主簿各一員改  
平羅縣石嘴主簿爲簡缺十月請增置青海正副盟長等官設巡  
防蒙古官兵皆得 旨允行四年劾兵部題補武職違例舞弊  
命大學士托津等按之尋以兵部疏漏那彥成指參亦有誤各下  
部議處五年正月京察 諭曰陝甘總督那彥成辦理西甯番案  
甚屬得宜著交部議敘六月請於邊要地撥添弁兵增設塘汛九  
月奏設甘肅各屬義倉皆如其請十月復調直隸總督是年江南

運河阻滯南糧改行海運十一月疏陳海運漕糧剝運事宜下部  
議行六年二月請裁天津水軍以其兵移置大名鎮又奏清查旗  
地全竣酌議善後十二事五月以直隸竊匪日多請嚴竊盜治罪  
之例皆如所請行八月以海運速蕪措理妥善下部議敘會逆回  
張格爾入卡犯喀什噶爾諸城檄東三省官兵剿之那彥成以過  
境兵丁口糧按例日給銀五分不足飲食請加五分又藥鉛火繩  
由京運解供應既難且恐雨淫請以甘肅籌備者充用並籌議兵  
行支應又以新疆遺犯積久人多夷民雜處易生事端請量地改  
遣十月奏各屬徵收租銀勸懲勤怠並議追虧五條又請駐防滿  
洲挑補綠營兵丁 允之七年二月請順天府四路廳裁減捕盜

弁兵添設捕役以收實效四月請減豁內務府月檔租銀六月酌擬賊匪拒傷未持官票之捕役及捕役擅傷罪人加減治罪專條悉從之七月以直隸挂名吏役過多包差滋擾苦累閭閻裁汰二萬三千餘人酌應留名數冊報嚴明奏入得旨所辦認真甚屬可嘉著通諭直省照那彥成所奏章程辦理十一月回疆四城克復命以欽差大臣馳往籌辦善後事宜未幾張爾格就擒仍命往治其事十二月疏陳回疆積弊略言回人素恭順此次張逆煽惑各城響應半由平日撫馭失宜參贊大臣等三年換班其才具有爲者三年中辦理未必遽善次者祇存五日京兆之見不肯認真下此竟視爲利藪搜括甚工且各長其疆無維制考覈之

分不相顧忌應請分隸考覈俾有所糾察至各官原設養廉不敷辦公懇稍議增並准各大臣一律攜眷俾得久於其事專心辦公上是其言如所請行八年正月京察諭曰直隸總督那彥成盡心職守操兵緝盜等事不遺餘力著交部議敘回疆之初平也揚威將軍長齡議暫添防兵八千那彥成至議減一千五百並議三年後酌減二千五年後再減二千以節糜費請移甘肅涼州鎮總兵涼州中營游擊移駐莊浪三月請分葉爾羌添兵一千移置烏什四月請以柯爾坪添兵五百及拜城一營歸併阿克蘇又奏普爾錢以一當五今阿克蘇銅未豐旺請改鑄當十錢相聞通行皆從之先是長齡等奏請斷絕各外夷貿易並嚴禁大黃茶葉

出卡 命那彥成實力稽查那彥成疏言嚴禁於卡倫不過絕其流查察於各城方能清其源請於阿克蘇專員查覈至是又言安集延進販內地大黃茶葉硝磺接濟外夷私於卡內置產安家竟敢相率助逆今查十年以內寄居與見販違禁物者逐出其餘暫准居住得 旨允行又奏各城相沿陋規貪黷求取苦累回民今悉行裁革勒石永禁 諭曰所奏甚是又 硃諭行同饗養殊出情理之外非公忠體國之大臣孰肯和盤托出可嘉之至五月請移建葉爾羌於罕那里克六月請於喀什噶爾增置游擊一員都司三員守備六員千總十一員外委二十六員英吉沙爾葉爾羌和闐阿克蘇烏什亦各改置增省有差又請於喀喇喇哈依外之

七里河築堡設兵六百防守並另建英吉沙爾城 流言曩者伯克缺每以賄得補而大小伯克遂誅求小回子以取償嗣後請由本城大臣先儘有功及家口被害之人次死事人子孫次出力世家視其人才保送參贊大臣驗看奏補又酌定回夷難應章程皆如所請行張格爾既誅其妻孥潛匿浩罕長齡傳檄索之浩罕使人詐投質書伺隙那彥成陳兵衛其出入不使與卡內安集延交接亦不犒賚使諭以逆屬在外無足重輕破其居奇之計並絕其貿易使不能藉 天朝徃動外夷 諭曰所辦甚得大體與朕意相同可喜之至 賜御筆畫扇一柄扇套香囊各一七月請於新建各城 頒賜嘉名 允之八月請將伊犁通烏什之徑酌議封

禁又稽察私墾地畝徵糧以供換防官兵祿糈請於明約洛建賢  
易亭以便布噶爾巴達克山等通市皆從之是月繪像紫光閣  
御製贊曰勅辦滑城會籌勦績功成定後用長是擇嘉汝忠直  
殫心籌畫勦之撫之同一敬歷九月請酌撤換防滿洲兵歸伍籌  
議操兵章程又請回疆遣囚改役章京署駐防官盡許攜眷十月  
奏酌議茶課章程請設喀什噶爾等三城銀庫又請移改軍臺道  
路增給換防滿洲兵馬餉餉添設綠營差馬從之諭曰那彥  
成辦理邊後事宜籌畫妥洽勞績卓著賞加太子太保銜賞雙  
眼花翎紫緞元狐馬褂與輝靈荷包十二月奏招致附浩罕之額  
提格納布魯特部濟安爾特依劣克達坂地上嘉之九年正月

以那彥成使人出卡搜求逆屬有意 召還京二月以妄給收撫之布魯特翎頂歲俸 嚴飭之六月入 覲回直隸總督任十年五月省南地震分別卹賞請復磁州諸邑賦 從之是冬西陲復不靖十一年二月欽差大臣長齡奏邊由驅安集延籍其家禁茶葉所致 命褫那彥成職八月授盛京禮部侍郎會長齡等復奏浩罕申訴以前此籍沒安集延禁絕市易爲言 諭曰前因那彥成辦理善後不能妥善未及二年又有逆回滋擾事將那彥成革職昨因那彥成於嘉慶年間曾在軍營出力道光年間兩任總督辦公無誤且念伊祖阿桂功仍授盛京侍郎本日據長齡等奏浩罕申訴五年以來斷絕貿易之苦累總以抄沒驅逐爲詞是逆回



滋擾實由那彥成禁貿易逐安集延所致那彥成誤國肇釁著卽革職十三年卒 諭曰那彥成服官中外宣力有年勤辦滑縣教匪尤爲出力直隸總督任內亦屬認真前因回疆辦理失宜將伊革職茲聞溘逝不忍忘其勞績著賞尙書銜照尙書例賜卹尋賜祭葬 子諡文毅子容安原任正藍旗滿洲副都統伊犁參贊大臣自有傳容照馬蘭鎮總兵官緣事革職 恩賞頭等待衛容恩兵部員外郎緣事革職會孫鄂素襲三等子爵

右 國史館本傳

李鈞簡

李鈞簡湖北黃岡人乾隆五十四年進士改庶吉士五十五年散館授編修嘉慶三年二月遷右春坊右贊善充日講起居注官三月大考二等擢右庶子五月遷侍講學士四年三月充會試同考官四月轉侍讀學士六月遷少詹事十月擢內閣學士兼禮部侍郎銜五年二月充文淵閣直閣事六月充江西鄉試正考官六年四月充殿試讀卷官八月命提督江西學政七年正月授兵部右侍郎尋轉左侍郎七月調吏部右侍郎尋轉左侍郎均留學政任九年差旋充經筵講官十年聖駕東巡盛京鈞簡纂一東全韻九言詩一章以獻上命閱選廷臣頌冊賜蟒袍十一年調

倉場侍郎十二年九月奏請開通張家灣正河以利運道並將康家溝支流堵築以免水勢直下流沙衝塞爲正河經久之計十月復請疏導溫榆河上游使石壩水有來源可免逐段停沙於漕運起卸有神並從所請十二月因倉儲役力賠累奏請調濟先是鈞簡以本應運送京倉之米四十餘萬在分貯通倉奏請京官俸米改歸通倉支放經軍機大臣議駁嗣又未能迅速轉運京倉至是冰凍不能舟運陸運又多折耗不得不奏懇調濟上以其辦理不善交部議處尋議降一級畱任十三年丁憂回籍十四年倉場書吏高添鳳串通斗級花戶舞弊盜領倉米盤查各廠虧米至十數萬石上命軍機大臣查明歷任倉場侍郎在任年月分別

懲處尋 諭曰李鈞簡在任已久黑檣盜米之弊起於伊任內其咎較重著於服闋後降補五品翰林十五年服闋來京補翰林院侍讀十六年擢順天府府尹十八年八月兵部左侍郎成書奏兵部主事姚堃由京赴熱河路經昌平州八仙莊被盜劫掠 上以地方官緝捕廢弛鈞簡未能整飭不勝府尹之任改授光祿寺卿九月賊匪林清等突入禁城謀亂匪黨多順天府所屬人 上以鈞簡在府尹任內平日漫無查察養癰貽患 命降為編修尋復諭曰見在直隸河南山東地方皆有滋事逆匪各該督撫失察之咎槩從寬免惟首逆林清近在畿甸潛蓄逆謀該管大員漫無覺察其咎尤重是以將李鈞簡降為編修李鈞簡管理順天府地

方尤爲切近不能再邀錄用著照所降品級休致道光三年卒子  
樹滋廣東佛岡同知

右 國史館本傳

榮麟

榮麟伊爾根覺羅氏滿洲正藍旗人乾隆五十四年進士分戶部  
學習五十七年補主事嘉慶三年九月升員外郎十月遷國子監  
司業五年擢翰林院侍講學士六年四月充日講起居注官五月  
充 實錄館纂修六月兼公中佐領十月轉侍讀學士七年升詹  
事府詹事八年八月遷大理寺卿十一月擢內閣學士兼禮部侍  
郎銜九年授盛京兵部侍郎十年調盛京戶部侍郎兼管奉天府  
府尹事務十二年九月以 實錄告成榮麟著賞給二等議敘十  
月奏擊獲拒捕連傷三命之重犯張八擬斬決梟示請下部覈議  
上以該犯情節重大審明時不即正法殊屬拘泥 命傳旨申

訪十四年調工部右侍郎尋授正紅旗漢軍副都統十五年正月  
命會同內務府大臣分班盤查內務府六庫旋署刑部左侍郎  
二月調吏部右侍郎時因歷年盛京有所進四五等淺斤俱係秧  
淺發回賠補榮麟以任內失察白請議處得旨榮麟惟協同富  
俊挑揀淺枝尙無專管之責改爲察議先是盛京協領札布札那  
以侍郎貴慶藉端需索列款具控上命戶部侍郎英和四品京  
堂初彭齡往按其事查出榮麟任內亦曾收受節禮家人得受門  
包下部嚴議尋議降一級調用九月補內閣學士兼禮部侍郎銜  
稽察中書科事務十六年正月偕內閣學士吳芳培充會試知貢  
舉三月以彈壓副都統策丹之孫明訢明誼應否迴避入奏諭

曰榮麟等既查明定例自應照例辦理即使另有所見亦應場後  
條陳不應於考試之際猝議更改舊章榮麟吳芳培著申飭六月  
授倉場侍郎九月以富新海運兩倉米石被竊自請議處 上以  
榮麟到任未久改察議十二月查出萬安倉有積年徽變米石藏  
廩壓底花戶等乘進米之時抵換新米奏請將花戶交刑部究審  
十七年奏太倉前幫米色灰暗請分別辦理十八年以經紀藏匿  
運糧口袋多至六千餘條劾石壩州判師藝公漫無覺察請褫藝  
公職均 從之十九年五月以北運河淤淺情形入告 上命直  
隸總督那彥成飭通永道張五緯剋期疏濬六月劾張五緯玩誤  
漕運請下部議處得 旨北運河淤淺經該侍郎奏明飭交該道



剋期疏通乃並未測量挑挖以致重運糧船節節淺阻實屬玩誤  
著派穆彰阿吳邦慶前往督率張五緯逐一挑挖務於半月內一  
律深通所有夫工之費俱罰令該道賠出儻再延誤必當從重治  
罪八月奏籌辦寄剝截留各幫糧船請自湖北頭幫起至饒州半  
幫止先在北倉截卸俟空剝轉回楊村再將餘米迎剝赴壩 諭  
日前據阮元等籌議南糧寄剝截卸章程內湖北等處六幫米石  
用楊村剝船運通其江西八幫半米石在北倉截卸俱經允行茲  
據榮麟奏請自湖北頭幫起至饒州半幫止先在北倉截卸俟空  
剝回楊村再將餘米迎剝赴壩等語所辦未爲妥善南糧轉運應  
儘先到幫船赴楊村寄剝將在後各幫截卸北倉若槩行截卸露

國堆貯將來又將餘米迎剝多此一番輾轉已度折耗復慮稽延  
善榮麟仍照原議章程勿得頻番改易尋奏稱湖北頭二三幫業  
經開斛將次起完請仍在北倉收貯即將九江後廣信南昌等三  
幫催赴楊村接續寄剝有旨北倉截卸米石先後定有章程榮  
麟奏請改自湖北頭幫至饒州半幫先在北倉截卸所辦本未妥  
善業經降旨令遵照原議辦理乃榮麟於八月二十日接奉諭旨  
後仍將湖北頭二三幫截卸其在後之九江等幫轉改寄剝復遲  
至二十三日始行補奏實屬固執偏見乖張錯誤榮麟著交部議  
處會御史孫汝奏湖北頭二三幫本不應截卸係該幫頭伍利其  
皆便向榮麟所帶書吏舍人等賄囑所致上命刑部侍郎熙昌

會同長蘆鹽政廣惠就近查訊得實 諭曰榮麟於北倉截卸漕米並不遵照奏定章程輒將在前各幫率行截卸迨經降旨飭令照原議辦理仍不凜遵蒙混具奏種種乖謬茲據熙昌等奏訊明倉場衙門書吏徐健超等因湖北頭二三幫本不在截卸之列聞榮麟欲議截卸遂向該幫頭伍撞騙銀兩該幫頭伍貪圖省便行賄屬實榮麟如果遵照原議辦理該書吏等何由藉端撞騙皆由伊固執己見擅改章程致令不法奸胥乘機舞弊榮麟膽大妄爲實屬溺職前經部議降四級調用不足示懲著降六部筆帖式二十年以工部侍郎任內濫保不諳文理之司員福海列爲一等部議褫職 上加恩改爲革職畱任二十三年有 旨榮麟以主事

卽用著充補寶泉局監督二十四年選授工部主事道光元年因病開缺十五年卒

右 國史館本傳



舒賧

舒賧西林覺羅氏鑲白旗滿洲人由舉人補授工部筆帖式乾隆五十四年升吏部主事五十六年五月擢右中允十一月授司業六十年擢翰林院侍講學士嘉慶二年二月擢詹事府詹事五月授通政司通政使四年授左副都御史八年六月奏請挑運九門外城垣積土以補護城河裏岸兩衝殘缺處所並將岸內低窪盡皆修墊從之九月奏近來各部院衙門進內奏事時堂司官員往往任意談笑毫無忌憚請派侍衛數員不時稽察卽緊要事件必須相商者亦當低聲講論諭曰朕以該副都御史所奏自必實有其人當卽召見時細加訊問舒賧毫無指證但稱此內堂司官

俱有而司員更多復訊以此種風氣始自何年則稱起於和珅在  
日所奏殊不成話朝房重地臣下理應恭謹果有高談闊論嬉笑  
誼譁自當加以懲儆但亦須確有指實方可審辦豈得籠統具奏  
舒賸於各部司員卽不能徧加識認豈堂官等亦不能認係何人  
乃一味含糊其詞若謂此種風氣起於和珅在日則舒賸彼時已  
早列卿員非無奏事之責何不立時奏參緘默多年直至今日始  
爲此奏以示風采乎朝堂爲辦事之所各衙門堂司官彼此議論  
聞聞侃侃所言公公言之原不妨明白談論若如舒賸所奏遇有  
緊要事件亦祇許低聲講論從此交頭接耳迹類營私又復成何  
體制嗣後朝房禁地如果有誼笑非議口角爭論等事科道確有

所見即可指名奏參並著領侍衛內大臣傳知該班侍衛等隨時  
畱心稽查以昭整肅九年七月 命與副都御史陳嗣龍監臨順  
天鄉試舒賧將瞭望亭臺階下牆垣開門並欲開通更道因與嗣  
龍意見不合又見科場條例有不准開通更道一條中止旋經嗣  
龍奏參 諭曰舒賧平日居官據陳嗣龍奏詢之英和成書俱言  
其前任詹事時有懷私褫革供事一事同官羅國俊成書欲行奏  
參被和珅阻止彼時舒賧自必有向和珅昏夜乞憐情弊事經既  
往姑弗深究至本年監臨入闈將瞭望亭臺階下牆垣擅行開門  
又欲開通更道此係傳遞捷徑雖事經中止然其初心難保無豫  
畱弊竇情事特尙無確據朕亦不爲已甚耳舒賧卑鄙糊塗不能



勝副都御史之任著降爲公中佐領十三年八月卒子舒綸泰見  
任吏部筆帖式

右 國史館本傳

哈豐阿

哈豐阿瓜爾佳氏滿洲鑲黃旗人一等信勇公費英東裔孫費英東自有傳乾隆五十四年由監生充太常寺學習贊禮郎五十七年補贊禮郎嘉慶二年十月升寺丞五年擢少卿均仍兼贊禮郎十年八月 諭曰近來朕凡祭祀行禮均係哈豐阿贊禮著賞戴花翎十二月補公中佐領十一年三月遷太常寺卿十月升內閣學士兼禮部侍郎銜仍兼管太常寺事務十二年二月授鑲紅旗蒙古副都統先是 上以畿輔一帶未得透雨 諭王大臣等如端節前已沛甘霖卽循例推班慶節如尙在望澤則照常辦事其非輪值奏事之部旗俱不必來園哈豐阿以違 旨呈遞膳牌奪

俸十三年間五月以失察民人於天壇神樂觀廂房開設茶館下部議處尋降一級畱任得旨哈豐阿係由本寺鳴贊游升堂官於該管事務尤應畱心乃平日因循疲玩不行查禁實有應得之咎著降二級畱任六月命稽查中書科事務旋調正紅旗滿洲副都統十四年五月署鑲白旗滿洲副都統九月上五旬萬壽沛澤臣工得旨哈豐阿齋宮疎防鑄級畱任一案著開復十五年七月充左翼監督八月遷禮部右侍郎十六年旋以得雨露足太常寺執事各員哈豐阿開復二級六月兼管鴻臚寺事務尋轉左侍郎七月充國史館清文總校八月署正黃旗護軍統領十二月充經筵講官十七年四月考驗八旗軍政充右翼監射七月

復署正黃旗護軍統領十八年正月署工部左侍郎二月 命偕  
凱音布前往 秦陵承修寶城工程尋奏言查勘 秦陵寶城週  
圍牆身露明甃塊均有酥離除原估應修較重二段尙有膨裂五  
段均膨出四五寸至二三寸不等外有裂縫五道內通身滿裂一  
道其餘四道均高一丈至七八丈不等上臺面甃塊閒有沈蟄不  
平實緣荷葉溝浸水所致若僅照原估興修其餘牆身尙有膨閃  
誠恐新舊不能黏合疏入 上復令景祿蔣子蒲蘇楞額那彥寶  
先後往查景祿蔣子蒲所奏與哈豐阿查勘情形迥異嗣蘇楞額  
那彥寶奏稱測量城身膨裂二段與原估相符應行修理並劾凱  
音布哈豐阿勘估不實張皇入奏 諭曰哈豐阿凱音布承修

陵寢工程於估報之外浮開丈尺張皇入奏而於蘇楞額此次查出實應增修之工又不符合且前日據稱到工時穆克登額先行告知寶城工段應行續勘者甚多又稱係伊二人自欲查勘穆克登額先無此言蘇楞額等傳旨詢問穆克登額亦實無言工段尙多之事哈豐阿等奏對之詞先後矛盾種種不實其咎較重著交部嚴加議處經部議褫職得旨上年冬閒永琿等奏泰陵寶城牆身應行修理隨派凱音布哈豐阿二人敬謹承修並未令伊等於應修工段外另行查勘乃伊等到工後卽率意欲上寶城查勘其罪一也查勘後遂奏稱原估工段之外另有膨裂五段裂縫五道內有通身滿裂一道且上臺面甃塊間有沈蟄不平緣荷葉

溝漫水所致言之駭聽其罪二也至率上寶城查勘冒昧已極如伊等於奉派承修之先果聞知工段情形甚重何不於陛辭時先行奏聞請旨乃先無一言迨後浮開工段張皇入奏而於寶應增修之工轉未查出其罪三也有此三罪非革職可以蔽辜哈豐阿著發往熱河充當披甲以示嚴譴七月釋回 賞補贊禮郎在太常寺效力行走仍帶革職畱任九月 命暫充贊引十月仍擢太常寺卿十九年二月升內閣學士兼禮部侍郎銜兼管太常寺事務閏二月以禮部尙書成齡擅移賢良祠超勇親王策棱牌位復議褫職 諭曰哈豐阿於成齡將賢良祠原設牌位擅自更易不行阻止及降旨傳詢復捏詞支飾迨加駁詰始據實登答殊屬欺

罔本應照部議革職姑念伊禮儀尙爲嫻熟著加恩以六品贊禮  
郎補用十月以時享 太廟應贊讀祝時遽贊飲福得 旨哈豐  
阿免其治罪著革職畱於本衙門效力仍充贊引俟經過 天壇  
三次大祀無誤禮部尙書奏明請旨二十年四月禮部奏明三次  
無誤得 旨以六品贊禮郎用六月 賞給二等侍衛仍兼太常  
寺行走十一月以前在工部侍郎任內濫保司員已革山西雁平  
道福海部議革職 上加恩改爲革職畱任二十二年五月 賞  
給頭等侍衛仍充贊引七月復任太常寺卿九月升內閣學士兼  
禮部侍郎銜兼管太常寺事務七月兼鑲藍旗漢軍副都統二十  
三年二月兼鑲藍旗護軍統領旋授禮部右侍郎四月充右翼監

督尋調正黃旗滿洲副都統五月轉左侍郎六月 上詣盛京恭  
謁 祖陵 命佩帶行在樂部印鑰九月 諭曰賈英東於我朝  
定鼎之初頗著勞績今臨幸伊墓賜奠自宜加恩後嗣哈豐阿著  
賞穿黃馬褂以示追卹功臣至意十一月以失察 天壇望鐙杆  
木蛀損又會奏原任內閣學士錢樾應否入祀鄉賢祠取巧推諉  
均鑄級畱任是月 上詣 南郊大祀進胙誤贊進爵自請治罪  
得 旨哈豐阿著革去禮部侍郎護軍統領副都統及一切差使  
賞給六品贊禮郎充當贊引二十四年七月補太常寺少卿八月  
以致祭 夕月壇未派滿員導引降爲五品頂帶十一月大祀  
南郊 諭曰本日太常寺執事人員恪恭將事不愆於儀哈豐阿



著賞還四品頂帶仍戴花翎二十五年二月仍擢內閣學士兼禮部侍郎銜兼管太常寺事務三月兼鑲紅旗滿洲副都統旋升兵部右侍郎七月署正白旗護軍統領道光元年五月轉左侍郎七月署正紅旗護軍統領十二月以大興縣民人傅大喝令武三將李大毆斃哈豐阿聽受犯父傅有爲懇求令所屬司員慶志等輾轉向刑部司員請託尋經部臣疏劾得旨哈豐阿著革職審訊旋訊明請託屬實擬罪如律諭曰哈豐阿以二品大員結交市儈囑託該司員關說刑名官司實屬卑鄙不堪哈豐阿著卽發往烏魯木齊效力贖罪三年賞藍翎侍衛充和闐幫辦大臣五年命來京十一年上閱三旗侍衛布靶得旨哈豐阿年老著

以原品休致十六年卒

右 國史館本傳

世... 卷二十一

三十一

覺羅舒英

覺羅舒英正黃旗人乾隆五十四年由覺羅官學生襲佐領嘉慶元年補印務章京四年投太常寺贊禮郎九年升寺丞十四年升刑部員外郎仍兼贊禮郎行走十五年正月充富新倉監督十月太常寺奏舒英在寺行走有年熟諳禮典請咨送吏部入於應升人員內一體引見上從之尋投太常寺少卿十八年以讀祝錯誤褫職發往盛京承應祀典差使十九年閏二月復投太常寺少卿八月以祀版書寫錯誤未能先事詳慎下部議處九月因本寺奉祀例徵草價任令拖延題銷時又未詳查銀數率以虛款具題降二級調用仍兼贊禮郎行走十二月補光祿寺少卿二十年

二月復遷太常寺少卿四月擢太常寺卿二十二年正月讀祝官  
桂芬讀祝錯誤 上以舒英平日教習疎懈下部嚴議尋議褫職  
得 旨加恩改爲降三級畱任六月擢內閣學士兼禮部侍郎銜  
仍管太常寺事務七月因清文則例擡寫錯誤降贊禮郎十月  
賞三等侍衛庫爾喀喇烏蘇領隊大臣二十四年二月復授太常  
寺卿回京供職八月祀典導引失儀太常寺在事各官俱下部嚴  
議奪職鐫級有差 上以舒英莅任未久改爲降五級畱任二十  
五年四月復擢內閣學士兼禮部侍郎銜仍兼管太常寺事務尋  
授鑲黃旗蒙古副都統七月署正黃旗護軍統領道光元年署正  
白旗護軍統領二年三月充右翼監督五月調鑲黃旗滿洲副都

統九月因善鵠射 賞戴花翎十一月遷理藩院右侍郎十二月  
調禮部右侍郎三年八月以贊禮錯誤褫花翎仍交部議處九月  
署鑲黃旗護軍統領十一月 南郊大祀瑞雪霑渥晴霽及時  
以太常寺官敬襄祀禮恪恭整肅 恩施特沛舒英在事 賞  
還花翎十二年轉左侍郎四年五月奏增修通禮祀典事宜 允  
之七月奏增輯通禮服制六條一八旗官員持服給假之期宜增  
也一漢官期功之喪給假之期宜增也一庶子之爲人後者爲本  
生生母服宜增也一養母之名宜定並養母之服宜一體更正也  
一爲人後者爲本生親屬持服及本生親屬之服宜詳也一改葬  
之服宜增也 上命廷臣覈議如所請行尋兼管光祿寺事務閏

七月稽察會同四譯館八月署正藍旗護軍統領十月署左翼總  
兵十一月疏以節婦守節十年請一例准 予旌表 上允其奏  
十二月充經筵講官調正白旗護軍統領五年以浙江監生徐晉  
鈔錄舊文中式請注銷舉人仍畱監生應試一案舒英等未行按  
冊議駁 飭之八年充崇文門副監督九年正月復署左侍郎左  
翼總兵四月因祀典失儀褫花翎革職畱任五月偕步軍統領耆  
英奏整頓十家戶章程請將兵民之家專立一冊屆月分晰造冊  
按報抽查並將該管官分別功過以示勸懲得 旨允行六月緝  
拏私帶鴉片煙各犯並起獲煙膏煙具按治如律得 旨以查拏  
認真下部議敘七月奏八旗五營竊案一年未獲正雜在十案以

上者請將該管官交部議處一年內無報竊之案交部議敘 從  
之九月 賞還花翎十一月以一子兩祧服制未備臚款具奏一  
獨子之子分承兩房宗祧者應各爲父母服斬衰三年一獨子之  
子分承兩房宗祧爲其祖父母承重者俱服斬衰三年一獨子之  
子承祧別房者其本身爲本生親屬之服俱從其正服降一等其  
子孫爲本身親屬祇論所後宗支親屬服制如所請行十年充左  
翼監督十一年十月署鑲紅旗滿洲副都統十一月 賜紫禁城  
騎馬十二年六月 上祈求雨澤甘霖立沛舒英等敬謹襄事  
賞加一級十月因病乞休十三年卒子吉揚阿官贊禮郎

右 國史館本傳



日本書紀卷之二十一

三

德文

德文瓜爾佳氏正白旗滿洲人乾隆五十五年進士改庶吉士五十八年散館授檢討六十年擢國子監司業嘉慶三年擢翰林院侍講學士四年六月遷詹事十二月擢內閣學士兼禮部侍郎五年十一月授鑲黃旗蒙古副都統六年遷盛京戶部侍郎七年七月調鑲藍旗蒙古副都統兼奉天府府尹九年七月調禮部右侍郎兼鑲藍旗蒙古副都統九月兼公中佐領十一月調兵部右侍郎兼正藍旗滿洲副都統時職方司漢主事員缺兵部以散館主事盧坤擬補經吏部咨駁尚書劉權之復令行查德文偕侍郎書成劉鳳誥陳霞蔚以盧坤係劉權之門生疑有瞻徇因稱兵部此

缺應得京察一等由宗人府調部之主事李鼎元補用劉權之堅  
欲題補盧坤實屬有心弊混聯銜劾之 上命大學士董誥等查  
訊尋查明盧坤應補 上將德文等嚴加議處德文尋降補內閣  
學士十年遷盛京禮部侍郎十一年二月調禮部右侍郎五月調  
吏部右侍郎兼正藍旗漢軍副都統九月仍調正藍旗滿洲副都  
統十二年五月署倉場侍郎九月奏張家灣爲南北水陸要途歷  
來漕運由此遶行自嘉慶六年大水河溜分出康家溝抄河而正  
河漸露淤澀至今去冬沙淺更甚難以行船當經奏請將本年漕  
船暫由康家溝行走但北運河到處流沙不能建設開座全賴河  
形灣曲蓄水濟運今康家溝水勢直注地形北高南下最易宣洩

本年暫用濟運已多坎阻請挑修張家灣正河堵築康家溝抄河以資經久 從之十三年四月充繙譯會試知貢舉六月管理咸安宮官學十四年五月倉場侍郎福慶等奏參通州倉儲虧空上命戶部侍郎托津等普行盤驗查出虧空數目並短收浮出重領偷竊等弊 飭將歷任倉場侍郎分別懲辦德文任內亦有失察黑楳重領米石之案 命以三品京堂降補並著落分賠尋補太常寺卿十五年七月擢禮部右侍郎兼鑲黃旗漢軍副都統八月轉左侍郎十六年正月調正黃旗滿洲副都統六月遷左都御史十八年九月調禮部尙書兼管太常寺鴻臚寺樂部事務是時勦除逆匪林清 上蠲吉於十月初一日祭告 天地宗

命翰林特撰祝文太常寺堂官拘泥是日爲每歲時饗之期於太廟前殿誤用時饗祝文 敕部嚴議德文照議革職十九年閏二月 諭以六部員外郎用十一月仍授盛京戶部侍郎二十一年兼管奉天府府尹二十三年正月調禮部侍郎兼鑲白旗漢軍副都統二月調工部左侍郎管理國子監事務五月充翰林院掌院學士調正紅旗滿洲副都統二十四年卒子色克圖見任兵部員外郎

右 國史館本傳

恩普

恩普蒙古鑲藍旗人把岳忒氏由乾隆五十五年進士改庶吉士五十八年授檢討嘉慶元年十二月充日講起居注官二年五月充玉牒館繙譯纂修官三年十月升侍講四年三月遷侍讀六月升侍講學士五年三月授詹事條奏奉天府旗民自首私墾餘地事宜諭令發交該將軍晉昌會同成書將所奏詳細閱議尋議准所奏首報餘地仍准作爲旗民產業遵照新例每畝徵銀三分以代納糧一款嗣後旗民人等所首紅冊地旁滋開之地仍作爲私產准其自便其另段私開及納租餘地邊旁開出之地一體首報入官仍交原佃承種如無力耕種另行招佃下部議行閏四

月授大理寺卿五月授公中佐領六年二月升副都御史 諭曰  
恩普前派充 實錄館纂修均屬妥協見升都察院副都御史未  
便仍令充纂修著授爲總纂官遇有陳奏事件列名在副總裁之  
後八月授福建學政九月升禮部右侍郎八年七月轉左侍郎十  
月補鑲黃旗滿洲副都統八月充 實錄館副總裁十二月管理  
咸安宮事務十年二月管理國子監事務三月充會試副考官六  
月與修 國朝官史閏六月調戶部右侍郎兼錢法堂事務奏滿  
漢監督請量加變通以裨局務查寶泉局收發銅斤鼓鑄卯錢責  
任綦重監督爲承上接下之員銅鉛之虛實錢文之美惡大使之  
賢否鑪頭之勤惰稽察俱關緊要請嗣後滿漢監督不致同時更

換俾新舊互用庶得細心講求利弊不受胥役之蒙蔽得旨允  
行十一月兼署刑部左侍郎十一年正月卒諭曰恩普自擢侍  
郎在京供職資格較淺今猝因病身故毋庸給予優卹惟念該侍  
郎辦事尚屬誠實著加恩賞給廣儲司銀二百兩交伊家料理喪  
事其任內降級罰俸處分均著寬免子承安見官吏部員外郎

右 國史館本傳





蔣祥墀

蔣祥墀湖北天門人乾隆五十五年進士改翰林院庶吉士五十八年散館授編修嘉慶三年充浙江鄉試副考官四年丁父憂七年服闋九年二月上幸翰林院與諸臣倣柏梁體聯句祥墀與焉禮成賞服物旋充日講起居注官十年充會試同考官十一年升國子監司業十三年遷司經局洗馬十四年二月升右春坊右庶子三月充會試同考官四月轉左庶子八月升國子監祭酒十七年七月擢詹事府少詹事九月遷奉天府府丞兼提督學政十八年調順天府府丞尋升通政使司副使十九年二月奏劾河南辦理災賑地方官悉委胥役而胥役糾合鄉保彼此侵吞多方

刁難致窮民束手待斃又地棍恃強劫奪饑民附和如新鄭禹州等處釀成搶案地方官亦不究辦疏入 諭曰方受疇督辦撫恤事宜經朕屢次降旨嚴切訓示乃節據給事中李鴻賓御史卓秉恬奏該省饑民難民流離載道本日蔣祥墀復有此奏是豫省辦理賑務種種不妥其情形昭然在人耳目方受疇著先傳旨嚴行申飭並交部議處五月 命稽查西四旗覺羅學七月升光祿寺卿十月升宗人府府丞二十年四月擢都察院左副都御史十二月山西民婦冀劉氏以墊辦運課等款日久未償赴都察院控訴復呈遞封章祥墀等未經查察遽將原封入奏得 旨以冀劉氏係一婦人有何封章呈遞且該氏見以墊辦運課日久未償申訴

該堂官等明知卽係此事或因封口不便拆閱亦當令該氏自行拆封乃率將原封入奏經朕閱看仍係申訴呈詞該堂官等遇事不加體察一味顛預實屬有心因循推諉俱著交部議處部議降二級畱任二十二年因失察御史伊蘇泰蕭鎮楚賊部議降三級調用上加恩改爲降三級畱任二十三年京察屆期以給事中色成額人本平常且屢告病假都察院堂官已填入有病嗣該員聲言精力未衰不甘填入復允劄行吏科改列三等經給事中李振祐據實劾奏下部嚴議尋議上諭曰景祿等自擢任臺長以來均旅進旅退一無建白此次辦理京察輒將公同填入六法之給事中色成額旋復改爲三等辦理實屬錯誤俱不勝臺長之任

部議降三級畱任不足示懲俱著實降一級調用蔣祥墀著以從  
三品京堂候補二十四年復補光祿寺卿旋丁母憂道光元年服  
闋四年補原官五年 命稽查東四旗覺羅學八年遷太常寺卿  
十一年七月復授都察院左副都御史十月 上御太和殿祥墀  
遲誤入班得 旨朕昨日升殿見左副都御史德厚蔣祥墀因遲  
誤恩遽入班該員等以職司糾儀之大臣先已失儀遲誤本日又  
不具摺請罪有意含混實屬膽大俱著交部嚴加議處部議降二  
級調用十三年補鴻臚寺卿十四年京察引 見 上以祥墀年  
力就衰 命以原品休致二十年卒年七十九子立鏞見官內閣  
學士兼禮部侍郎銜立銑見官河南候補知縣孫元溥見官國子

監司業

右 國史館本傳

國史館本傳

三

日本書紀卷之六十一

六十一

張師誠

張師誠浙江歸安人乾隆四十九年 上南巡召試 賜舉人授  
內閣中書五十三年補內閣中書五十四年遷吏部主事充軍機  
章京五十五年正月因紫光閣監放外藩賞件錯誤退出軍機仍  
降補中書四月中式進士改翰林院庶吉士五十八年散館授編  
修六十年京察記名嘉慶元年正月授山西蒲州府知府十一月  
升雁平道四年二月升河南按察使七月調江蘇按察使六年升  
山西布政使七年奏督辦各屬彌補倉庫逐款清釐見已陸續完  
繳得 旨此等事總防累民若有派累不如倉庫不實應知此意  
十年調江蘇布政使十一年五月擢江西巡撫十月 諭曰各省



巡撫中兼提督銜者有專制各鎮統轄營員之責前曾准令戴用花翎以資表率江西巡撫張師誠著戴用花翎是月調福建巡撫十二年六月疏言閩省積案設法清釐並陳整飭積弊各事宜諭曰張師誠奏閩省民風刁詐往往命盜之案任意誣扳且有尋常細故架詞發聽而訟棍從中播弄又復利其不結今設法清釐於接收呈詞時卽究問訟師姓名飭屬嚴拏並酌立限期令原告依限投審如避匿不到卽照例銷案所辦甚是又所稱民雖好訟如果聽斷公平逞刁挾詐之徒亦不難令其心服尤屬正本清源之論甚得要領果能實心實力辦理何慮積案不清錮習不改但督撫於到任之始往往託詞整頓嚴立章程敷陳皆娓娓可聽及

在任既久日就因循迄於吏治無補張師誠務當言與行符持之  
以久使吏治整頓獄訟衰息方爲奉行有效切不可始勤終惰徒  
託空言十三年二月海盜蔡牽往來游奕於閩粵洋面 上屢諭  
師誠等飭舟師嚴捕七月奏蔡逆竄近祥芝澳防堵官兵以礮轟  
擊中其坐船蔡逆遁去 上命師誠等嚴飭舟師窮其所向上緊  
圍捕九月奏官軍於金門洋面擊敗洋盜朱瀆殲擒甚多獲私載  
硝磺器械得 旨嘉獎十四年九月官軍殲蔡逆於南洋盡擒賊  
黨師誠入奏 諭曰蔡牽係閩省平民在洋面肆逆十餘年往來  
閩浙粵三省擾害商旅抗拒官兵不特商民受其荼毒官兵多被  
傷亡並戕及提鎮大員實屬罪大惡極該逆一日不除海洋一日

不靖節經降旨諭令該督等嚴禁接濟鼓勵舟師速擒巨憝茲已  
殲除首惡均屬可嘉阿林保張師誠年來於各海口巡防嚴密使  
一切火藥米石槩行杜絕該逆乃日益窮蹙立行殲滅辦理實屬  
認真著交部從優議敘以示嘉獎十五年二月京察屆期 特旨  
交部議敘十六年疏請給假回籍省親 允之旋假滿回任十八  
年十一月以失察匪徒詹天香等築寨製械冀圖拒捕並勒贖斃  
命搶劫各案不早嚴拏懲辦 命軍機大臣議處降一級畱任十  
九年三月調江蘇巡撫六月因親病乞假 上允所請 命侍郎  
初彭齡往署巡撫八月假滿來京九月赴江蘇巡撫任 命初彭  
齡以欽差大臣畱江蘇偕師誠查辦各屬虧空十一月初彭齡奏

參師誠乞假在籍時私用福建江蘇武弁齎摺奏事及到任後遣人回家盤費私於稅項內動支並得受管關道員劉灃餽送等款上命大學士托津戶部尚書景安往按惟私用差弁屬實餘俱初彭齡誤信人言據以入奏並無確據 諭曰張師誠於摺差等項盤費並未支用關項其在籍居住時江蘇標弁就近迎至其家張師誠卽應以尙未到任飭令回蘇乃畱供差遣亦有不合其過尙輕著交部察議二十年正月師誠疏謝 諭曰此由茅豫欲陷害陳桂生波及於汝初彭齡剛愎性成爲所驅使汝不必結怨惟返躬自責勉爲良臣朕豈能任小人肆其伎倆乎六月以弟師端寄居震澤因訟案釀命師誠失於約束 命交部議處二十一年

師誠以父病篤移印交藩司代辦遂起程回籍由驛馳奏 諭曰  
張師誠身係巡撫封疆責任綦重伊父病既危篤卽應早先陳請  
開缺朕必加恩允准乃該撫接到家信輒將巡撫印務交藩司代  
辦徑自回籍伊籍隸湖州距蘇州甚近若他省督撫大吏距家遙  
遠者亦如此效尤豈不以私廢公至驛遞原爲緊要公務而設張  
師誠奏伊父患病情形係伊家事輒由驛馳遞實屬冒昧著交部  
嚴加議處部議革職 從之六月丁父憂二十三年 諭曰張師  
誠前在江蘇巡撫任內以伊父病懇請開缺不俟諭旨自行回籍  
不能不褫職示懲但念張師誠究屬愚孝伊本係翰林院出身學  
問尙可著加恩賞給編修服闋後來京供職二十四年 上六旬

萬壽 命加恩以中允贊善用二十五年三月授詹事府右春坊  
右中允六月 賞四品頂帶 命爲江西布政使旋調安徽布政  
使道光元年五月 賞還二品頂帶六月授廣東巡撫八月調安  
徽巡撫十月丁繼母憂四年三月服闋六月補山西巡撫七月調  
江蘇巡撫閏七月 命來京請訓十二月奏江浙幫船因禦黃壩  
堵遲阻滯前經魏元煜奏明將徒陽運河挑工展限一月並請將  
未進鎮江口之幫船截留江北以便築壩興挑 從之五年二月  
奏酌籌州縣各官養廉請暫留司庫支放以清墊款因江蘇自嘉  
慶四年以後改爲留屬坐支各州縣攤捐銀款每以無關考成玩  
延不解請自道光五年爲始暫行解司按季請領隨時扣歸墊款

從之五月調安徽巡撫八月奏皖省鳳潁一帶時有奸匪出沒更有無賴之徒名爲水煙箱主誘脅良人子弟供其指使往往爲盜引線見在拏獲水煙箱主張狼等四名並各屬報獲各匪犯或係夥劫逸盜或係命案逃兇或係有名惡棍按律定擬得旨查辦甚好毋得始勤終懈六年四月命來京另候簡用九月授倉場侍郎七年因病奏請開缺允之八年奏請回籍調理十年卒

右 國史館本傳

國朝耆獻類徵初編卷一百八目錄

卿貳六十八

黃鉞

喬遠瑛

辛從益

常文

周系英

戴敦元

色克精額

國朝耆獻類徵初編卷一百八卿貳六十八目錄



日本書紀卷之四十一

--	--	--	--	--	--	--	--	--	--

國朝書獻類徵初編卷一百八

通奉大夫前署江西巡撫江西布政使司布政使湘陰李桓輯  
卿貳六十八

黃鉞

黃鉞安徽當塗人乾隆五十五年進士以部屬用籤分戶部嘉慶  
五年得旨候補主事黃鉞著照趙秉沖之例在懋勤殿行走七  
年補主事九年正月諭曰黃鉞在懋勤殿行走有年伊本係進  
士出身學問尙優著加恩改擢贊善遇缺補用並著在南書房行  
走三月諭曰向來部院各官補實缺者方准考試試差黃鉞尙  
未得缺但本係實缺主事准其一體與考七月充山東鄉試副考

官十年八月補詹事府右贊善十一月充日講起居注官十一年三月升右中允六月轉左中允十月遷翰林院侍講十二年六月充湖北鄉試正考官八月提督山西學政十三年轉侍讀十四年十一月升詹事府右庶子十二月偕山西巡撫初彭齡奏請巡幸五臺從之十五年四月轉左庶子十月差竣回京仍入直南書房十七年升翰林院侍講學士十八年二月時屆京察上以黃鉞供職勤慎予議敘七月充山東鄉試正考官八月提督山東學政九月擢內閣學士兼禮部侍郎銜十二月奏參荷澤縣訓導兼理曹州府教授宋璇失察武生馬克光學習邪教請褫職十九年二月復奏參失察武生從逆之定陶縣教諭郎謙牧訓導方運

景均請褫職又奏言上年逆匪擾及定陶曹州府屬文武生員助官剿賊學錄孔毓俊生員孔毓仲等同時陣亡均請交部議卹並以金鄉縣生員李九標首告教匪破案復設法擒獲謀逆在逃諸犯奏請獎勵俱從之三月命來京供職仍入直南書房四月授戶部右侍郎兼管錢法堂事務二十年二月接纂祕殿珠林石渠寶笈續編命錢偕吏部尙書英和兵部右侍郎姚文田專司檢閱二十一年六月寶泉局匠役訛索滋事上以黃鉞管理錢法堂未能稱職下部議處尋調禮部右侍郎閏六月祕殿珠林石渠寶笈書成賞加二級八月充順天鄉試副考官十一月纂輯全唐文告成得邀賞賚十二月充玉牒館副總裁官二十二

年三月調戶部左侍郎四月充殿試讀卷官二十三年八月署兵部左侍郎十月 賞紫禁城內騎馬二十四年授禮部尚書二十五年三月充會試副考官八月 賞加太子少保銜九月 命在軍機大臣上行走旋調戶部尚書十月御史李肄頌奏請將應追官項覈實辦理 上命軍機大臣議奏錢偕大學士曹振鏞等奏言攤扣銀兩往往經年累月追補無期應請 敕下各督撫嚴飭各屬遇有動支錢糧務令實用實銷報銷到部各該部亦卽詳慎句稽迅速覈銷應行駁減者卽於本員名下按限追補不得攤派以滋擾累其攤扣養廉之事槩行禁絕 從之又奏河工添用途人員略言河工同知通判皆知縣佐貳升階如果知縣佐貳

正途居多則將來保奏河廳不患無人查見在分發河工正途人員祇有大挑舉人一項應請將教習期滿知縣教職保舉知縣兩項內揀選發往俾令學習照大挑舉人之例補用每屆三年由該河督察看人數多寡酌定員數奏請揀發如所議行道光元年七月妻喪請假 諭曰卿已逾七旬非十分強壯可比矧天時暑熱切勿過於哀傷總之國事爲重倚畀方深加意自愛永保康強佐朕以襄上理實有厚望焉二年正月時屆京察得 旨黃錢辦理部務本屬妥協又自簡任軍機大臣以來敬共所事實力匡襄著交部議敘五月以會議倉場盤查章程措置失宜降一級畱任八月充順天鄉試正考官三年正月 諭曰朕於本年元旦御殿受

賀閩惠覃敷左右近臣允宜特加恩澤戶部尙書黃鉞前因議奏倉場以放代盤措置失宜降一級畱任著加恩寬免三月署翰林院掌院學士四月充殿試讀卷官四年正月會議保送倉監督章程略言花戶軌法總由監督約束不嚴自應慎加遴選請嗣後欽天監太常寺鴻臚寺鑿儀衛各衙門司員均毋庸保送其餘令各該堂官秉公遴選其結實可靠之員准該侍郎等奏畱三年始終奮勉隨時奏給升途至京察之年應請添保一員不得先儘坐糧廳大通橋監督以昭公允其不實心任事者隨時參處庸懦無能者咨回停升自行查出舞弊者免議至向例監督祇領半俸嗣後請給全俸以資辦公 從之二月奏言各直省奏報徵糧比較之

法未能畫一嗣後應請一律比較分數凡豐收之年以額徵之數爲準蠲緩之年以應徵之數爲準各按十分計算本年完欠分數較之上三年或溢或少或相等一一註明其舊欠帶徵亦照此另款開造統以辦理奏銷之日截數開單奏報以歸畫一如所請行五年正月京察屆期上以黃鉞管理部務均臻妥善獻替匡襄尤爲出力下部議敘五月諭曰黃鉞年逾七旬夙夜趨直未免勞勩著無庸在軍機處行走俾得專心辦理部務仍入直南書房亦無庸逐日進內十月以年老乞休諭曰黃鉞懇請致仕並自陳在京供職三十六年未能回籍省墓詞意肫切覽奏深爲惻然黃鉞雖年逾七旬精力尙健前降旨令其專心部務正當爲國宣



勤承承恩眷豈忍令其遽行解退所請著不允仍照舊供職益加  
懋勉以副朕懷六年四月充殿試讀卷官九月因病陳請開缺  
上允所請 命安心調理病愈卽行銷假十月籲懇致仕 諭曰  
戶部尙書黃鉞由主事改授贊善供職內廷仰蒙 皇考恩眷洊  
擢正卿經朕賞加宮銜在軍機大臣上行走嗣以年老令其專辦  
部務仍入直南書房上年曾以年力已衰懇請開缺不忍遽許解  
退溫諭慰留本年秋閒因腰疾乞假月餘奏請開缺降旨允准並  
令安心調理病痊銷假茲復以腰疾雖愈精力頓衰籲懇致仕回  
籍情詞肫切若仍不允所請轉非所以示體卹黃鉞准其以戶部  
尙書致仕回籍並加恩在家支食半俸俾得怡志林泉安心頤養

用示優眷老臣至意十一月奏回籍行期 上念其年近八旬嚴  
冬就道 賞給蔭枝以資調攝九年鉞八十生辰 諭曰予告尙  
書黃鉞曾直內廷宣力有年學問素優人亦謹飭本年八月爲伊  
八十生辰特頒御書福壽扁聯並賜以壽佛如意朝珠文綺等件  
用迓福祉伊子禮部小京官黃富民加恩作爲候補主事俾聞之  
益增慶慰並傳諭黃鉞不必遠道跋涉來京謝恩以示朕優禮耆  
臣錫慶引年至意十年以前在戶部任內失察假照降三品頂帶  
十一年 上五旬萬壽 賞還頂帶十二年以捐資助賑並捐建  
義倉下部議敘十九年鉞九十生辰 御書福壽字頤性延祺額  
樞廷贊治經猷在珂里承恩歲月長聯句並服物陳設 命鉞子

禮部郎中富民齋回 賜之二十一年卒年九十二遺疏入 諭  
曰致仕尙書黃鉞學問優長持躬端謹仰荷 皇考知遇由部曹  
改官贊善洊歷正卿朕御極以來簡贊樞垣密勿宣勤深資倚畀  
嗣以老疾乞休因其年近八旬曲加體卹准予致仕並賞給半俸  
特賜護枝方期永享遐齡長承恩眷茲聞溘逝悼惜殊深著加恩  
晉贈太子太保銜入祀賢良祠照尙書例賜卹所有原任內一切  
處分悉予開復應得卹典該衙門察例具奏用示朕篤念耆臣至  
意特 賜祭葬諡勤敏子富民官禮部郎中

右 國史館本傳

左田尙書工書畫人爭寶之而假署其名者一時雜出有某於廠

肆買得數幅喜爲尙書作也攜歸求尙書自定真僞尙書蒼以詩  
云浣筆書窗落筆巖零縑斷楮恣鴉塗湖田自昔無人買村酒難  
求善賈沽失笑分明作廣鼎何時變化出桓廚若教持較山陰扇  
值得羲之半字無後年九十餘雙目失明自號盲左猶能作書

右十二石山齋詩話梁九圖撰

左田先生幼孤寄生外家補縣學生時卽爲朱文正公石君所激  
賞挈遊京師自是奔走衣食殆無虛歲通籍後觀政戶部未一年  
告歸鄉里主書院者十年 睿廟特召乃出以主事擢贊善入直  
南齋十年之中官至尙書晚年乞病歸人比之董華亭云先生工  
書善畫其生平進 御畫幅久邀 睿賞與富陽相國稱董黃二

家內府所藏名蹟俱經其鑒定允爲藝苑總持

右墨林今話蔣寶齡撰

澄懷園無恙時二三儒臣倮直多暇各就園中寓廬移花種竹疊石疏泉隨意自命所居題之戶冊以誌雪泥鴻爪亦佳話也如食筍齋爲黃勤敏公鉞手關樂泉西舫則程春海侍郎恩澤所題樂泉蓋張文恪公泰開所鑿張文毅公芾自營一室曰鑿翠山房戴文節公熙舊廬名曰矩室皆見嘉道間人文詩集此外逸文瑣記甚多頗擬勒爲一書藉存掌故蓋庚申以來甘泉夕烽名園茂草談澄懷風景者亦幾如圓嶠方壺縹渺天半矣

右紀聞陳康祺撰

喬遠瑛

筆珊喬君卒京師之八月將歸葬其鄉其孤用遴囑余文其藏余於君同年中最知厚敢不諾而銘諸君初名遠煥字賁山官顯後值禱雨奉 睿皇帝御筆改遠瑛遂字筆珊湖北孝感人也世居洪二里曾祖方岳祖士偉並有令德父曰志行字訥庵乾隆乙酉舉人品學重鄉閭著有凝香書屋文彙三代皆以君貴 贈資政大夫曾祖妣張祖妣周母氏夏繼母氏胡並 贈夫人兄弟三人長遠炳庶吉士今官刑部郎中季某早卒君幼穎特有神童稱甫離乳夏太夫人教之識字口授唐詩百餘首皆能記誦六歲入塾訥庵贈公以從學者眾且家貧欲壹意督其長者令君習耕牧君

私取案頭書集及古文選本流覽試詰之歷歷能背覆私學詩文  
出語驚人同學以告贈公始決意課讀十四應童試郡守蘇公拔  
榜首學使胡文恪公取入縣庠第一旋丁外艱人言贈公聞喜大  
笑而終云超等食餼戊申雋於鄉庚戌以二甲 朝考入選用主  
事分戶部江南司兼山東司學習性敏慧鉤稽一切吏不能欺補  
陝西司嘉慶戊午升貴州司員外郎明年晉陝西司郎中壬戌擢  
山東道御史君入臺後自以職司耳目雖奉查倉巡城之任未足  
盡言責銳意建言前後條陳甚多如言濟漕務也則請清查私典  
屯田贖歸運丁言誤支軍需處分也則請各按銀數定重輕言賄  
款宜分別也則請萬兩以上量緩追限又以贓罰庫案久未成讞


請議處刑部堂司各官皆奉 旨允行甲子丁繼母憂服闋補福建道御史擢刑科給事中疏言戶部冒領庫銀要犯萬青請通緝又請 敕督撫嚴飭州縣速結訟案捕要犯並 允行劾湖北臬司周某劣款署鍾祥縣黃某相驗騷擾濫責庠衿周旋奪職遣戍黃降四級調用聞者快之其未準行者如山東運使鍾某改御史郎中他重聽年衰者請勿爲例又請以陳良從祀 聖廟皆有關政典壬申巡視西城轉掌戶科尋擢內閣侍讀學士晉太僕寺少卿值林清之亂疏請宣揚教化以正人心有 旨宣行道光壬午轉通政使司副使體素充腴食量過人以目翳過服涼劑驟消滅今歲夏初遘疾遂卒君自服官後凡三與文衡嘉慶戊午典四川



命視奉天學  
鄉試庚申戊辰分枝北閣取薦多知名士今夏奉  
病不克行識者惜之爲人謙退溫厚處事安詳間有齟齬必婉商  
人咸樂與共事尤篤於倫常少失怙恃事繼母如所生與兄遠炳  
友愛白首無間兄子用遷成進士多勛成爲文有氣魄而曲盡情  
理無微不至如長江大河滔滔千里隨科坎皆盈也詩清麗工對  
偶有奇氣惜多散佚僅存詩三卷賦一卷今古文各二卷嗚呼君  
學行著鄉里信僚友身歷三朝服官勤恪奏議裨國是益民生  
可不朽也已生乾隆辛巳月日歿道光癸未月日配張氏封夫  
人子一用遴蔭生候補州吏目以某年某月葬某銘曰  
荆山挺秀漢水鍾英橋公之胄世載賢聲篤生茂德體碩神清外

涵溫潤內鑒精明雄文冠郡穉齒騰名春官才拔農部政成效忠  
言路馳譽文衡冰霜臺肅桃李門盈宏羅國俊廣益民生京堂妙  
選 宸簡增榮三旬綸閣十載問卿怡怡兄弟奕奕簪纓天懷夷  
曠世味滌營方司龍納遽赴鶴迎新阡冬樹宿草春萌垂庥哲嗣  
永奠佳城

右墓誌銘辛從益撰



147-426

辛從益

辛從益江西萬載人乾隆五十五年進士改翰林院庶吉士五十八年散館授編修嘉慶三年充福建鄉試副考官五年授江南道監察御史以母老陳請終養十三年丁母憂十六年服闋十七年二月補河南道監察御史四月疏奏告養回籍後見聞所及請飭下禁止各事宜 諭曰辛從益臚列各款皆律有明禁應行整飭之事靡俗相沿江西一省如此恐他省似此者亦復不少如書吏結交官府差役橫擊平民惟在守令正身馭下則奸胥蠹役自畏懼不敢縱恣至保甲隱奸捕役參賊尤應法令嚴明有犯必懲其大員過境除浮費以杜逢迎長吏莅官省儉從以養廉潔家丁

但供給使勿許在外招搖胥役凜奉憲章勿許踰分僭侈從來有  
治人無治法如果大小官吏隨時查禁原可使吏治民生日臻淳  
樸無如奉行不力怠忽因循以致頽風陋習視爲故常卽學校師  
儒亦不認真訓課勵士型民該御史以所見聞形之奏牘著通諭  
直省督撫學政各率所屬體察地方情形實心整頓慎守紀綱革  
除積弊勵官方而端士習朕有厚望焉五月轉掌四川道監察御  
史十月 命巡視東城十八年六月奏請申明囤積例禁 諭曰  
定例米石不准載運出城原以防私運回漕之弊五城鋪戶所存  
米麥雜糧每種例不得過一百六十石又有流通糶賣不在定限  
之例囤積積糶兩相影射亦覺難以區別著戶部再詳加酌覈明

定規條俾得簡易遵行免滋流弊尋奏例載五城鋪戶存糧每種不得過一百六十石本處國戶居奇定以限制乃奸商巧於規避或分存數處數十處均在例額以內該管官兵無從查拏請嗣後開設通衢流通糶賣鋪戶間有賣少存多並非有心滋弊者雖在一百六十石之外亦當體察情形以昭區別如租賃廟宇民房堆存隨時糶賣卽係囤積居奇雖不及一百六十石亦當嚴行查禁從之八月調掌河南道監察御史十九年閏二月奏請釐正文體諭曰國家設科取士制藝代聖賢立言必以清真雅正爲宗六經皆載道之文其中並無奇文僻字凡天地名物之理包括靡遺近日士子罔知潛心正學獵取詭異之詞搏摻餽釘以艱深文

其淺陋敝習相沿大乖文體況言爲心聲尤足覘人器識士子進身之初先由詭遇及試以政事其於是非邪正之辨治亂得失之原皆懵然不解於心欲望其通達政體以聖賢之學坐言起行豈可得乎嗣後鄉會試考官校士衡文務各平心持鑒別裁僞體簡拔真材如有將支離怪誕之文目爲新奇妄行錄取者經磨勘官摘參必將原考官嚴加懲處至策對以覘博洽亦必貫通經史所對與所問相比附方稱通才乃剽竊鈔胥競爲懷挾以售其欺尤屬大干功令科場特派親信王大臣搜檢原以禁絕弊端近日亦頗疎懈並著申諭照定例認真搜查毋得視爲具文以正文風而端士習六月奏請嚴禁書吏需索解員銀兩 上命將勒索之戶

部書吏拏交刑部嚴審並 命從益會同審訊尋鞫實懲治如律  
九月遷兵科給事中二十年正月奏請嚴禁重利盤剝公抵私債  
以甦丁困 諭曰漕運轉輸最須顧惜丁力今奸商等巧爲盤剝  
有南帳北帳之號並串通書吏勒將公款扣抵自應嚴行查禁著  
李奕疇顏檢卽查明盤剝並串抵各情如果屬實卽分別懲辦至  
該給事中復稱運丁等那借無自亦恐不敷辦公更形竭蹶奸商  
仍得居奇不如受貸於官設法通融酌借官項仍於該幫丁每年  
應領銀內扣還或量加一分之息此事是否可行著李奕疇會同  
有漕省分督撫各酌量該省幫丁情形熟籌妥議具奏二月擢光  
祿寺少卿七月授通政使司參議二十一年七月遷內閣侍讀學



士八月提督山東學政二十四年擢光祿寺卿仍留學政任二十五年任滿回京道光元年擢太常寺卿二年三月升內閣學士兼禮部侍郎銜閏三月命偕工部尙書文孚前往甘肅鞠案先是渭南縣富民柳全璧將朱錫林毆斃知縣徐潤並不親驗得賊蒙結旋復疊釀多命至是從益等以承審各員乖謬顛倒據實入奏

上嘉其細心推鞠秉公持正三年擢禮部右侍郎四年七月偕睿親王端恩等恭送仁宗睿皇帝寶錄聖訓前往盛京尊藏禮成下部議敘十一月轉左侍郎十二月提督江蘇學政調工部左侍郎七年十月調吏部右侍郎仍留學政任十二月因病奏請開缺八年卒子桂雲候選訓導師雲戶部主事辰雲辛卯科舉人

揀選知縣鵬雲三品廕生奉天府經歷

右 國史館本傳

公諱從益字謙受又字筠谷姓辛氏萬載人自高曾以來皆有隱德公生而穎悟敦篤侍先贈公讀書贈公或以池事出公讀書之暇不事嬉遊獨覽觀史傳而已年十許能作文十三就童子試遂冠其曹中乾隆四十八年舉人五十五年進士選庶吉士充武英殿協修官散館授編修充國史館纂修官福建鄉試副考官文淵閣校理教習己未庶吉士辦理清閣堂事本衙門撰文擬進文字爲掌院南昌彭文勤公元瑞所特賞遷河南道監察御史母胥太夫人春秋高陳情歸養家居十年以承歡教讀爲務官府莫或見

其面背太夫人既終服闋入都補河南道監察御史奏言書吏貸銀結交官府差役橫拏平民保甲廢弛供應取媚衙署攜帶多人家丁挈眷外住吏胥服色不辨凡七事蓋公自告養家居時目擊地方官吏玩法蠹民之事有如是者尋轉四川道御史巡視東城兼署福建道御史是時京畿多雨米價騰貴奉 旨發麥平糶公因擇富賈屑楚剗以便民食又懼富賈與奸民交通冒取而貧民或致向隅乃實力稽覈必使小民普霑 上惠山東巡撫陳預聞是舉也善之移書云他日佐國家均平天下當如是矣轉掌河南道御史上疏請飭督撫詳慎甄別以澄吏治略曰外省甄別與京員不同京員雖由各堂官甄別而耳目甚密稍有徇私之弊難逃

聖明洞鑒督撫所居距京師數千里若公忠爲國明體達務之督撫所甄別自中正無私不然者居心未淨所識又偏權勢旣尊操縱甚易或徇私容庇或性分乖張則所謂衰庸者不果衰庸而眞衰庸者反逃吏議也且督撫之好尙各殊斯其所甄別亦異剛決者喜果銳則必視安靜之吏爲庸鈍明敏者喜圓通則必視慤直之士爲庸迂甚至以利口捷給者爲才因以厚重少文者爲庸以供應承順者爲才因以趨迎簡拙者爲庸豈知州縣有當切責之處亦有當體卹之處如案件之久懸不結錢糧之延宕不交盜賊多而不勤捕緝胥吏擾而不嚴約束保甲廢弛姦宄潛滋此宜切責者也江浙多民久而官墊爲難漳泉多械鬪而官辦不易江

南有慣鬧之漕收福建有難銷之鹽課倉庫之虧或由前任軍需之減豈無分攤此宜存體卹者也一刁民上控而本官逮訊人證牽連委員輾轉案未審而官已困矣大員過境家丁婪索託銷書籍書未到而價先付屬薦幕友幕雖劣而俸必捐若此之類不可勝舉其應命者爲能員不能者則爲庸吏矣其或自恃公正過爲刻覈接見屬員動加訶斥州縣震恐詢以分事不敢出聲儻一槩目之爲庸亦恐下情不通而所謂庸者非真庸也臣愚以爲大吏必持廉法之大綱略趨承之末節務辦事之勤能責安民之實效揣時事之難易量才分之優絀而又常存敬畏之心然後能爲生民黜庸吏能爲天下惜人才歲滿引見以繁缺知府用俄升吏

科給事中豫東賊匪方殄而三省大兵凱旋兵丁有擄掠被難子女歸營者主帥以收養無依入告公奏言被難子女因兵馬恩促致父母兄弟不能相保遂致離散若聽兵丁攜養地方事靜之後其父母生歸故里思念子女既屬悽愴卽或父母俱已不存而其祖宗廬墓僅賴此一綫之傳不能歸守亦可矜念且當倥偬之際玉石難分保無仕宦子孫離散相從者應請飭詢籍貫居址發所在官吏送歸其家報可轉兵科給事中升光祿寺少卿因入直召見奏對之下睿皇帝詢及邪教所起公奏正教昌明邪說自息近日邪教蔑人倫以利相誘小民不知教化故易爲煽惑而今日選人得一官不問風俗之消澆惟計缺分之肥瘠自陷於利

何以教民欲厚風俗宜先責成牧令也升通政司參議內閣侍讀  
學士提督山東學政銳然以正人心厚風俗爲己任以爲山東士  
風樸實不難迎機利導乃醇醇誘掖使之樂從至於良莠不齊非  
種宜去則擇其蕩檢踰閑大爲風化之害者痛繩以法使之自儆  
若安分守法陷人文網者則委曲愛護之必白乃已嘉祥縣故南  
武城也故有宗聖書院曾氏子孫微弱民有爭其地以爲己業者  
肥城令因事辱曾氏博士公皆直之士論翕然其校士也規矩整  
肅先治其內而後其外重門扃鏑日坐堂皇閱卷監視不少懈  
今上登極之元年 仁宗睿皇帝升祔禮成 請授資政大夫  
上御門擢太常寺卿山西巡撫成格奏參學政陳官俊奉 上諭

陳官俊著降爲中允贊善候缺補用念伊平日在上書房授大阿哥讀書功課尙能認真著加恩仍在上書房行走欽此公上疏曰上書房爲教道諭德之地國本所係視學政爲尤重宜慎選德行敦厚器識宏達之儒使有所觀法薰陶養其德性陳官俊在學政任顯違例禁不能遠色避嫌按臨地方私怒私責不知懲忿窒欲槩可想見似不宜仍居上書房授讀之任俄升內閣學士兼禮部侍郎上諭爾甚樸實無希冀亦無揣摩有所聞見如前奏來朕從無忌諱也猷陝西柳全獄平反之復命力陳陝西馬政之害地方官春秋二時計里買馬散與紅封若干實則民不取直而官亦並不需馬指馬索賕以爲民病耳充文淵閣直閣事升禮部



國朝通志卷之九十一  
右侍郎兼署吏部右侍郎轉禮部左侍郎提督江蘇學政其校士  
規模一如山東時江蘇巡撫陶澍奏請嚴禁衿棍包漕橫索漕規  
奉 上諭江蘇漕務疲敝已久閭閻每苦浮收而各州縣用度浩  
繁不能不藉資津貼抗玩者卽因此挾制以爲控端必應力加整  
頓務令兩得其平既不使不肖官吏婪索病民亦不容衿棍把持  
藉端訐告著該撫移咨學政查察若拖欠較多實係有心抗糧停  
其考試儻有仍前縱恣者該學政亦卽查明斥革移咨該撫審辦  
不得稍涉徇縱公上疏曰江蘇漕額本重豈堪浮收無節州縣之  
津貼自應調劑閭閻之拮据尤宜體卹久予定額尙肆苛求明語  
浮收必滋流弊撫臣之意謂控漕之人卽包漕之人臣以爲未必

盡然官之收漕必用書役書役貪狠必圖肥己官既浮收吏又朘削不特漕良小戶受害卽漕良生監亦受其累累之不堪因而上控亦有不得已者撫臣又稱因生監需索漕規地方官費無所出因取償於漕良小戶爲牽長補短之計臣伏思書役貪得無厭縱無此等生監小民之被苛徵亦斷不能爲之稍減書役倚官爲庇儼遵例浮收無人敢控獨何法以治之夫劣衿固律所不容苛政亦法所必裁矯枉勢必過正而辦法宜防流弊管見所及不敢不以上聞又致兩江總督蔣使鈔書曰吳下漕務有積重難返之勢蘇松額漕本倍他省自明以來惟聞民爲漕累不聞官爲民累今日浮收之風益熾當事者不揣其本狠因一二滋事生監遂欲

偏重官吏詩案之權在大僚原期杜絕漕規清淨收之源而在官  
吏卽以禁制膠庠恣浮收之性生監既無上控之路小民亦復何  
賴使奸吏得志善良受禍欲求無事不可得已公性廉靜寡欲胸  
懷坦白不設城府然遇非理之事則棱角峭厲不能爲當路屈意  
有不適輒形於顏色而於國家之事知無不言言無不盡蓋庶乎  
不負書責者矣年六十有九終於江蘇學政官廨其爲學務適於  
用不憚勞悴性命之書於漢取賈誼於唐取宋廣平韓文公陸宣  
公李尚公於宋取韓范富歐陽蘇氏父子於明取王文成公而不  
甚於其講學之說自經史諸子以及天文律算地理小學家言皆  
能通其說所著有詩文集奏疏彙館課偶存公孫龍子注各

若干卷藏於家

論曰公之來莅江蘇也余適主暨陽書院以後進禮見公言論風采恆有庸俗之心以爲士氣不揚則風俗難返故有屈於有司而罰非常理者則必反覆議論以平之乃或謂公一意孤行也余淺務不能測公之行事從公子求觀奏疏遺藁略綜其梗槩私述之志景仰焉

右行述李兆洛撰

嘉慶中葉文體詭異士子往往搏拏僻書字句以炫新奇而不顧理法甲戌闈後辛筠谷侍郎從益爲磨勘官遂疏稱各省鄉試取中之闕墨如隱居以求其志三句題文中用乘麟以理駕龍而游

及金策書聖銀策書賢玉策書功等語於題義殊爲廓落又如丹  
有曰旣庶矣兩節題文鈔用鬻子東門曰虛西門曰堧南門曰庇  
北門曰側又用漢書郡國志注夏禹之時民千三百五十五萬三  
千九百有二十三成周之時民千三百七十一萬四千九百有七  
十三等語雖出古書究於本題富教之義不切文體亦屬支離又  
如使天下之人齊明盛服三句題文云昔武王克殷使閔天進招  
華之桂於太廟使伯邑考進陽述之蕋於羣廟使南宮适進九江  
之蘭於祧廟按之題義似爲漫溢且此數語未見所出惟近人所  
刻典制文琳注釋中有之稱係出尙書大傳並無此語至於編造  
詞句如山佩幾宮水佩幾羽詳深衣之度按公侯佩山元玉大夫

佩水蒼玉見於玉藻皆非深衣所有且左徵角右宮羽凡佩玉皆然不分山佩水佩又有哲相滌山裳語按哲相滌裳古無此事古者山龍繪於衣並不在裳若此之類不勝枚舉此臣所見刻行闕墨也又於易經垂衣裳而天下治題文用文選東都賦盛三雍之土儀一段查三雍宮立自漢朝黃帝堯舜時無之且原賦云盛三雍之上儀修袞龍之法服鋪鴻藻信景鏤揚世廟正雅樂而原卷鈔用因文選注本釋服字下有音句二字遂誤認爲正文平寫作鋪鋪鴻藻信景鏤揚各四字爲句而將世廟正雅樂之正字截去又如禮非口豐本題鈔用多識於鳥獸草木之名題成文俱經臣拈出此臣磨勘分卷所見之文也又近來士子爭效尤侗王廣心

之文謂之尤王體查尤王文體最爲浮靡其運用故實往往換字  
縮脚幾於唐人鷓鴣虬戶之澀體費人猜想究其義實爲膚淺是  
以 欽定本朝四書文槩不收錄今乃復取而誦習摹倣之科名  
既掇效尤滋多遂成風尙見屆會試之期天下人才萃於京師應  
請預飭典試分校各官嚴裁僞體務歸清真雅正其貫穿經史書  
卷紛綸者固宜取中亦必求其文從字順於題義實有發明庶眞  
才出而文體正士習端矣奏入 上是之按侍郎時爲臺諫屢與  
磨勘之役京中呼之爲磨王然其所指摘則誠不爲過也

右記張培仁撰

常文

常文西林覺羅氏滿洲正藍旗人乾隆五十七年由貢生授戶部筆帖式嘉慶元年遷主事四年升員外郎十一年授山東道監察御史十二年調京畿道十三年轉掌京畿道奏言近年京控中浮收錢糧者不一而足請旨重申例禁並敕下各督撫將錢價覈定換銀上庫之數於開徵之日報明戶部以憑查覈如所請行十七年偕富勒禮等疏稱封章言事原屬臣下慎密之義小民果有冤抑自應露呈控訴自嘉慶四年定例凡有民間呈遞封章者准令本人開具節略一併進呈乃近有自揣情事未必仰邀入奏者轉借封章以圖傲倖此端一開紛紛效尤不惟逞刁挾詐貽害



人心抑且蔑等冒尊有傷政體請嗣後除機密重情法當首告如  
虛坐以死罪者准隨時封遞外其一切民間詞訟槩不准非分妄  
投以歸畫一 從之十八年授甘肅甯夏道二十年調鎮迪道二  
十五年調安肅道道光元年遷山西按察使二年調陝西按察使  
三年擢陝西布政使四年八月遷都察院左副都御史尋署刑部  
右侍郎十二月御史萬方雍奏劾刑部審擬文元毆死胞姪伊克  
當阿一案引律失當部議降一級調用 上加恩改爲降三級留  
任仍罰俸六箇月五年六月授盛京戶部侍郎兼管移駐宗室事  
務七月協理盛京內務府大臣事務十二月兼管奉天府府尹事  
務七年奏吉林黑龍江凱撤官兵自山海關外至吉林交卸千有

餘里所過州縣協濟車輛措辦飯食懇請量加體卹得旨蠲免  
一年地丁銀十分之四八年授兵部左侍郎兼鑲白旗漢軍副都  
統十一月諭曰滿洲蒙古人員凡遇謝恩請安皆用清語本日  
常文自盛京回京在隆宗門外道旁謝恩請安竟以漢語陳奏殊  
乖體制清語爲滿洲根本似此偶爾奏對尙且不能豈復勝管理  
旗務之任常文著革去副都統調補理藩院右侍郎仍交部議處  
十年三月授正紅旗蒙古副都統七月轉左侍郎九月署正白旗  
蒙古副都統十一月調盛京兵部侍郎十一年八月上五旬萬  
壽加惠臣工開復常文處分十二年正月調盛京刑部侍郎二月  
轉工部左侍郎九月卒

國史館本傳

右 國史館本傳

三

周系英

周系英湖南湘潭人乾隆五十八年進士改庶吉士六十年散館授編修嘉慶七年遷右贊善八年三月大考二等遷左中允十月擢洗馬九年充福建鄉試副考官十年七月遷侍講充日講起居注官十一月命提督四川學政十一年轉侍讀十二年四月遷侍講學士十月差竣回京十三年充江南鄉試副考官十四年三月轉侍讀學士五月入直南書房九月擢太常寺卿十五年正月改直上書房七月因雨誤直諭曰昨日各部院衙門仍照常奏事召見時大臣中年老者亦均未誤班上書房翰林寓居澄懷園距宮門咫尺何至不能入直明係怠惰偷安有曠職守周系英著

降一級調用再罰俸一年八月 命提督山西學政十月補光祿寺卿十八年差竣回京擢內閣學士兼禮部侍郎銜十九年二月遷兵部右侍郎仍直上書房四月充殿試讀卷官十二月充治河方略館副總裁官二十年丁母憂二十二年服闋署兵部左侍郎二十三年三月補吏部右侍郎八月充順天鄉試副考官二十四年四月復充殿試讀卷官閏四月轉左侍郎六月江西商民與湘潭土民互毆傷斃多人湖南巡撫吳邦慶奏明查辦系英聞鄉人傳述情節與所奏不符於 召對時面陳之又致書邦慶令其詳察邦慶得書以 開 諭曰直省地方事務經朕飭交該督撫查辦是非曲直一秉大公斷不任其稍有枉縱若在京大員於本省

案件輒致書竹撫思欲庇其鄉閭豈不漸同明代黨援陋習此風  
斷不可長周系英私致信兩把持公務著交都察院嚴加議處尋  
議革職 上以周系英人尙樸實學問亦可加恩以編修用先是  
系英子汝楨亦以此案傳聞有異因巡撫承差回南寄書邑人詢  
其虛實十月邦慶復將其書奏呈 諭曰周汝楨干預公事總由  
周系英前曾寄信以致伊子效尤其失於約束咎無可辭著卽革  
職勒令回籍二十五年十月 召來京以四品京堂用道光元年  
十一月補翰林院侍讀學士十二月擢內閣學士兼禮部侍郎銜  
二年正月遷工部左侍郎充 寶錄館副總裁官三月 命提督  
江西學政八月調江蘇學政四年七月調戶部左侍郎十一月卒

子汝楨改名銘恩廣東連平州長吉里司巡檢詒棫兩浙候補鹽運判詒模兩淮板浦場大使

右 國史館本傳

公諱系英字孟才號石芳湖南湘潭人曾祖新彩祖昭俊考世字皆不仕以公貴皆 贈榮祿大夫曾祖妣胡祖妣謝前妣唐皆贈一品夫人妣王累 封一品太夫人榮祿公有三子伯系蔚副榜貢生永綬應舉訓導仲系英早世公生二歲而孤稍長穎慧端重若成人甫弱冠以乾隆戊申舉於鄉庚戌登第以疾故癸丑改庶吉士乙卯授編修嘉慶戊午庚申皆充順天同考官辛酉充 實錄館纂修官壬戌充會試同考官其夏擢右贊善充

咸安宮總裁癸亥大考二等遷右中允甲子擢司經局洗馬直文淵閣事充福建副考官乙丑充日講起居注官其冬授四川學政擢翰林院侍講轉侍讀進侍講學士丁卯入都供職戊辰轉侍讀學士充江南副考官己巳以講官扈蹕東西兩陵五月入直南書房九月擢太常寺卿庚午特旨改上書房行走充三阿哥師傅三阿哥今悼邸也以大雨隴班寶鏞一級仍畱直八月扈蹕熱河左授光祿寺卿旋授山西學政辛未擢大理寺卿癸酉擢內閣學士兼禮部侍郎入都供職復入直甲戌擢兵部右侍郎充殿試讀卷官兼署工部右侍郎管錢法堂事充治河方略館副總裁乙亥四月奉太夫人諱回籍丁丑起復署兵部右侍郎戊寅補



吏部右侍郎充順天副考官己卯轉左兼署禮部右侍郎充殿試  
讀卷官兼署工部右侍郎九月降編修逾月除名勒回籍庚辰八  
月 今上登極十月 特召以四品京堂起用辛巳正月至都  
特派 實錄館總纂官其冬補翰林院侍讀學士旋擢內閣學士  
壬午正月授工部左侍郎充 實錄館副總裁二月授江西學政  
其秋改任江蘇甲申調戶部左侍郎仍畱任是年十一月三十日  
卒於江蘇學政官署時公年正六十也公金聲玉色鬢眉如畫望  
之若神人故事小翰詹任學政請 訓止一面公以洗馬使四川  
獨 召見至再知 上之眷公者深及己巳 陵差屢 召對和  
宸章尤稱 旨時南齋需人 上命掌院學士保薦考授曰朕

意中止一周系英卿等可將其名列入薦廣未幾上書房出缺例  
由掌院擇翰林之可者擬正陪而公由特簡且命公曰不但  
授讀作詩文須教阿哥爲人居心以忠厚爲要公因奏書房例課  
八韻詩臣愚以爲宜令阿哥加讀資治通鑑以知古今治亂興衰  
之故悉民間之疾苦及 惇邸年二十公製青德箴五章爲壽其  
目曰清心曰學古曰知今日游藝曰飭躬 惇邸凜焉公服闋還  
朝年才逾五十詣熱河行在上謁上見公鬢髮盡白訝曰家  
居兩載乃至此乎嗟嘆者久之公徧歷卿貳劄內廷每奏對必  
移晷然慎密甚雖子弟莫得聞之其降官編修也以是年五月湘  
潭土民與江西客民構釁讐殺者累日公見撫臣初奏與所聞殊

異遂於 召對時力陳其狀 上命軍機大臣據公言詰撫臣旋  
又調撫臣撫福建而敕督臣就鞠撫臣候代未行因摺差附書問  
起屆公以撫臣出都隨會約地方事有見聞必無相隱恐或受屬  
吏愚弄爲地方深憂因覆書告其實撫臣既疑爲公所短及得公  
覆書而公長子汝楨附摺差致書在籍之給事石承藻詢本案曲  
折并入其手因先奏陳公書事下都察院臺臣當以因事屬託私  
罪例革職 上諭閣臣曰案關地方公務非伊一家私事周系英  
不妨具摺再奏乃輒向本省巡撫私致書函本應斥罷念其人樸  
實著以編修用公既左遷而撫臣續奏陳汝楨書由是汝楨得減  
杖徒而公被 嚴譴然 上猶於飭督臣確審本案諭內 殊添

曰周系英平素鯁直故 今上承 仁宗昇遺老臣之至意 命  
公視學東南皆許以夾片言地方緊要事及人材賢否公之視學  
江蘇也適值大潦災賑事向無與於學臣公所駐之江陰縣地瀕  
江災尤劇而其文武之素得民者皆當代去公札商當路而畱之  
並假庫銀三萬採客米以平市價又倡捐以濟例賑之不足高堰  
之潰也公卧病已數月聞信驚悼病遂亟口授遺摺猶諄諄以河  
事水患爲念嗚呼哀哉公飭身至嚴肅而性和易遇人輒傾吐無  
餘體察人情至委曲專掩覆過失然嫉惡深至於舞弊散行者無  
少縱而劣員較棘庠序及奸民藉端傾陷士類公必力護持以直  
之若士林自涉訟或以爭家產鬪牆公則深悼教導之不行引咎

國朝通志卷之九十一  
自責其奏報考試情形也事無鉅細雖案已外結必詳列無隱飾而兩陽苗勢穀價以及勤心民瘼之員有實蹟或輿論所可否尙未自得確據者皆分別入牘至於分校必反覆三場主試必徧搜敗卷固亦近人所難能而不足語公之盛節也嗟乎愛憎之至變也自古嘆之豈唯君臣人之情於夙昔親近一旦聖誤心移則前所聽受悉若被愚舊有勤勞皆成罪狀當公之初被吏議迹疑涉私而仁廟褒其樸實及放逐之餘復引鯁直追念平素旣不以一眚遷怒又不以曲全致屈成憲是固大聖人無必無我度越尋常萬萬者而公之造膝輸忱其所以自結主知亦必有在矣迄於新政錯枉舉直擢用方隆遽爾奄忽相公之所以自處固

非曰侍從詞臣矣士患無所挾持有挾持患不遇遇患不久公以  
樸誠動 天鑒者前後且二十年而所就遂止是豈非命也哉夫  
人謝氏 誥封一品夫人子三長汝楨以免徒後復奉 恩旨改  
名銘恩副榜貢生江華縣學訓導次詒棫國子監生次詒樸廣東  
候補鹽庫大使孫某某銘恩等以公卒之次年某月日葬公於某  
鄉公家無一樣銘恩薄宦畱故土夫人率詒棫詒樸還都下壬辰  
四月六日夫人卒於京寓而世臣適在詒棫詒樸衰絰雪泣而言  
曰母氏又棄養不孝今當以喪歸而先大夫墓碑未立以屬吾子  
世臣自著籍門下者於茲二十有五年顛躓百出重爲公知人累  
唯不苟爲文尙足取重後世以永公德故次其狀而繫以詩曰

天篤哲人於湘之澗弱冠起家班於鵷鷺再陞列棘一枋斯文匪  
惟造士抑孔勤民誠恪 兩朝欲試以事天不愁遺周行空實位  
一 道崇澤乃未溥日營寰中志齋泉下爰伐貞石以紀名德必有  
達者善繼無極

右神道碑包世臣撰

上之是非不明則其公在天下下之是非不明上之是非不明則其公  
在上公在下則是非與黜陟出於二公在上則匪直出於一旦以  
黜陟正是非尤足昭撫萬物平槩羣品 國家承明之弊決塞去  
壅而 今上六七載各直省若涇縣之獄渭南之獄太原之獄德  
清之獄匹夫匹婦猶有不獲其情者輒煩 朝廷重臣親跋涉萬

里或內付廷尉而後平反之重蔽牢蒙咸卒破壞故幽隱畢達而  
吏不敢以民命草芥其尤甚者湖南湘潭之獄侍郎周公以手書  
爲撫臣訐奏身譴職削吏乘勢益無忌黨並雷同剷根滅迹巨奸  
逸法網良牧註劾議萬夫吞氣放臣息影惴惴蝸居灰心望絕矣  
而雷霆忽發於 新政之初起廢之 詔舊撫之譴與一二嗣治  
獄之督撫按察相繼盡投閒散而復公舊職數歷中外復爲 天  
子重臣使獄事虛實曲直出覆盆而照日月者皆出 天明天聰特  
照獨斷烏虜豈非公在上而是非出一者與方獄事之起始以江  
西客民之獷橫繼以湖民之報復大吏不善鎮撫以至閉城罷市  
械鬪兼旬人心洶惶幾激大變時值 仁廟六旬萬壽之年撫臣



國朝名臣言行錄卷之八十一  
三  
慮干不測初奏至即諱匿不以實聞而首羅織在籍石給事中爲  
鉗塞言路計識者蚤知其無意獄事矣公詢其齋奏材官盡得狀  
知虛實大懸慮釀湖南巨患旣而奏本末有 敕馳詢猶不以撫  
臣爲不可與言手書忠告撫臣方倉黃於 廷救不德反讎遂一  
意護前反噬搆陷公以是獲 嚴譴然天下亦遂曉其一樸誠一  
傾險一忠直一罔上詩曰云不可使得罪於天子亦云可使怨及  
朋友古今君臣寮友之際詎不甚難哉以公至誠無逆億若是設  
遇軍國事重且大於此者必不肯隱忍卻顧嗚嗚明矣遇友有賢  
於舊撫者其必竭誠無不盡明矣被放南歸先後尙蒙樸實之  
褒鯁直之 諭 仁廟知公不謂不深乃守制起復未幾而被議

今上再起駿轡用而遂不祿士功業偉不顯於世固自有命焉  
於人又何尤公文學在士林典型在鄉邦政績在海內有李君兆  
洛行狀及江蘇請祠名宦公狀在惟湘潭一獄本末則迄今海內  
傳聞尙有不盡其情者故敬揭 國家所以重民隱決壅蔽使孤  
立樸誠之士百擠不傾有以作百世臣子之氣者於前而後以公  
生平他行銘諸後公諱系英字孟才號石芳湖南長沙府湘潭縣  
人乾隆戊申鄉試舉人庚戌進士授翰林院編修歷官詹事府右  
春坊右贊善司經局洗馬翰林院侍講侍讀侍講學士侍讀學士  
光祿寺卿太常寺卿大理寺卿內閣學士吏戶兵工四部侍郎兼  
署禮部右侍郎充 高宗實錄纂修官 仁宗實錄總纂官副總

裁咸安宮總裁治河方略館副總裁文淵閣直閣事日講起居注  
宮南書房上書房行走嘉慶戊午庚申順天鄉試壬戌會試同考  
官福建江南順天鄉試副考官四川山西江西江蘇學政卒道光  
四年十一月晦日生乾隆三十年二月二十五日年六十歲奉

旨祀江蘇名宦祠曾祖新彩祖昭俊父世宇皆 贈如公官妣某  
以上皆 贈太夫人配謝夫人子銘恩副貢生江華縣教諭詒棫  
監生詒棧廣東鹽庫大使孫二葬某原銘曰

帝選病學人侍講帷公矢其懇匪夕伊朝受知 兩朝若雲在霄  
日汝教督於汾於蜀士宵其讀日汝司衡於南於京士春其英日  
汝貳部司空司馬朕歎且股 天鑒其衷民顯其恫公蹇其躬雖

則蹇難 仁廟斯眷溫綸載煥卒俟其定以貽 嗣聖大正厥命  
臣受於君子受於親惟命之循 實錄手綴中夜感涕曰思 先  
帝弗懲厥前益矢厥肩拯民恐遭手指口瘖大災克蘇士氣克桴  
庶公其宰以潤四海曷云不待公重如山公粹如璠萬夫之憲公  
位日崇公產不充一畝之宮顯顯令哲皤皤黃髮曷云其忽穹碑  
湘濱公配恪勤以教事君

右神道碑銘魏源撰

周系英字孟才一字石芳湘潭人乾隆戊申舉於鄉庚戌捷禮闈  
以疾歸癸丑成進士入詞垣授編修歷詹事府春坊贊善司經局  
洗馬轉翰林院侍講侍讀晉講讀學士太常光祿大理諸卿擢內

閣學士禮部侍郎轉兵部右侍郎兼署工部右侍郎兼管錢法堂  
事務內艱起復署兵部右侍郎補吏部右侍郎轉左先後兼署禮  
部工部管錢法堂無何降編修旋落職回籍初江西客商貿遷富  
盛常於萬壽宮會館演劇己卯五月其鄉新到戲班市人聚觀嘲  
笑大閩邑令毛夢蘭奪門攜十九人出門復閉合市洶洶謂其內  
燔油烹人市中益相仇殺 睿皇帝召系英問狀以所聞對當吳  
邦慶來爲巡撫屬系英有聞必告至是系英長子汝楨代父爲書  
致邦慶邦慶方苦 廷寄詰問乃以其書呈奏吏議準因事屬託  
褫職加 恩降調邦慶再以汝楨致在籍石給事書上 聞於是  
汝楨坐徒固安而系英放歸田里矣二十五年 成皇帝登極

特旨以四品京堂召用旋授翰林院侍讀學士系英至是三入翰  
林逾月擢內閣學士兼禮部侍郎轉工左出督江西學政事竣調  
江蘇學政在任調戶左病痞請假開缺遂卒於江陰提學署時甲  
申十一月晦年六十系英初以文字受 特達知而誠慤亦上契  
聖心謫官時有人尙樸實學問亦可之 諭又稱其平素鯁直  
故嚮用甚殷屢充 寶錄館纂修總纂副總裁文淵閣直閣事日  
講起居注官扈 蹕 東西陵 召對和詩疊被 褒賞己巳入  
直南書房時有 旨須保且試 上面諭戴衢亨曰朕意中止一  
周系英及 御試喜雨賦寓規於頌 欽取第一荷袍絰之 賜  
益異數也庚午入直上書房故事由掌院官擬正陪引 見及派

三阿哥師傅 上曰朕自有人遂蒙 特簡其年夏大雨寓園積水沒腰曠班一日 嚴旨降調罰仍畱扈 蹕熱河旋出督學山西 諭曰明春西巡將舉召試故特簡汝辛未三月 駕幸五臺 召試及格者幾三十人由其訓課勤也癸酉復入直南書房充 治河方略館副總裁前後充順天鄉試同考者再充會試同考者 一典試者三福建江南順天督學者四四川山西江西江南皆能 拔取異才得人最盛績學顯秩中外肩背相望然系英不欲但以 鑿衡盡職視學江西時面奉夾片言事之 旨每有陳奏避人手 書雖子弟不得見疏多 畱中嘉謨碩畫世所莫知江陰有暨陽 書院歲久頽落就學者鮮系英捐金倡葺禮宿學李兆洛主之邑

有新漲沙田數千畝報墾而未有所屬咨商疆吏取給生徒廩餼益裕是時江蘇大水濱江被災尤甚江陰令蕭瑾游擊周志林皆將去任系英飛書督撫以二人久習其地畱襄賑濟並乞破例移庫金三萬買穀平糶自捐廉奉四百以倡賑貸門下士林則徐時陳泉事與之往復籌度立法利行乃得饑而不害其心存利濟不分畛域如此其地感之呈祀名宦狀貌修偉凝重語言簡貴不爲世俗虛僞之態假借之辭人多誦其自大久而覺其真摯幕友以貧乞齋錄遺數名問每名值幾何曰數金立與金如數戒毋敗行檢鄉後進龍瑛以庶常假歸往辭謂之曰宜少受人惠瑛嘗稱其譴歸時色夷氣和無異平昔服其識度再起卽視學西江或恐未



忘前事諷使從寬曰執事有定衡嚴與寬當求其平從寬是意見也終事卒無違言所至皆刻梓試牘敘例諄諄以文體行誼垂誠乾嘉以來盡心校試文譽翕然者無出其右其自敘雪鴻軒日記曰昔司馬公言生平所爲無不可以告人趙清獻每日所爲夜必焚香告天某敢希蹤古人願行此不廢者蓋以自勵儻有蕩檢踰閑可羞可泣者必愧汗不能下筆矣生平不多爲文略見 皇清文穎文典湖南文徵諸書其起用謝表有云獲上先不信乎朋修身願莫知其子士林傳誦之子三汝楨副貢生 國史館曆錄恩準捐復改名銘恩選江華教諭改廣東長吉里司巡檢增城主簿詒棫浙江鹽運判署乍浦同知詒樸江南海州板浦場鹽大使

加五品銜自有傳樸子光輔浙江候補知縣省城再陷殉難

右傳羅汝懷撰

Handwritten text at the top right, possibly a page number or header.

Page number 147.

戴敦元

戴敦元浙江開化人乾隆五十八年進士改翰林院庶吉士嘉慶元年散館改主事分禮部二年選刑部主事三年充山西鄉試副考官六年充會試同考官八年升員外郎九年充順天鄉試同考官十年丁母憂十三年服闋補原官十四年升郎中十六年丁父憂十九年服闋補原官二十三年京察一等引 見記名以道府用二十四年五月以誤將情重官犯李德潤等列入奏請單內部議降三級調用 上以刑部司員曾經回堂酌辦錯誤尙有可原改爲降二級留任七月授廣東高廉兵備道道光元年升江西按察使二年正月升山西布政使十月調湖南布政使護理巡撫三

年二月升刑部左侍郎五月來京供職四年御史萬方雍奏參刑部辦理文元毆斃胞姪伊克唐阿一案誤引律例罪名失當奉旨查明更正敦元降三級畱任五年八月奏搶奪婦女條例議以搶奪之犯業經入室或雖未入室而事後姦污或幫同架拉或夥搶不止一次或被搶數至三人或係致釀人命案內幫同逼迫或拒捕殺人案內在場助勢或本犯自行拒捕傷人或由本犯領賣致被搶之人無下落者擬入情實其無前項情事者擬入緩決上從所請又奏火器傷人限外身死例無明文辦理河南新蔡縣民支大秋一案漏未聲敘查明更正以昭畫一並請交部議處九月奏酌定條例二則增入例冊一律載謀殺人命助勢者爲不加

功助賊者爲加功助勢助毆以是下下手爲斷未下手者爲助勢  
不得以加功論既下手者爲助毆或毆而未傷傷而未重者仍以  
不加功論則傷輕者既不得謂之助毆又不得謂之助勢援引易  
以含混辦理難期畫一自應按律一體問擬絞候以符定制而重  
人命一道光二年議定械鬥章程將令下手斃命之犯照例擬抵  
其爲從斃三命以下及手足他物傷人與未傷人者按律減等蓋  
以主謀重犯既置重典從犯似可稍寬一線惟是械鬥固始於起  
釁之謀實成於附和之輩儻下手斃命者秋審多入緩決兇徒益  
無顧忌此後除起意首犯與下手斃四命以上者擬入情實無庸  
再議外卽實有可憫及四命以下者各按情傷輕重隨時分別實

緩至隨從傷人及未傷人者亦各按例定擬其減等問擬之處無庸錄入則例 上如其議七年四月奏嚴定兵役窩賊包庇科條其窩賊分賊包庇者照捕役窩竊例擬軍窩藏強盜及包庇者發新州給官兵爲奴得 旨允行八年以侍衛恩緒毆斃家人一案刑部審辦遲延降二級畱任九年四月議奏雲南恩樂縣民李迎燦毆死胞兄一案服制攸關情傷較重據題更正并聲明夾籤定例 上以矜卹之中不廢明刑之義降 旨通行七月奏緝拏私酒章程議定販賣私酒人犯比照應納稅課私匿漏報計贓准竊盜論律問擬杖流官弁兵役知情故縱者與犯同受罪賄者以枉法論失察者交部議處實力稽查永杜流弊庶於地方稅課兩有

裨益 上從所請十年二月奏定官民藉端訛詐科條略言事不干已妄行訐控被劾人員則有立案不行之例刁民棍徒則有問發充軍之條近來內外問刑衙門因所控或涉贓私或關弊竇率多准理每致牽連羅織嗣後官民告訐之案察其顯係詐騙挾仇提案審辦無論所告虛實詐贓多寡已未入手不分首從發近邊充軍庶奸徒知所做懼而訟獄日就肅清 上允之聞四月酌改審限例文奏刑部爲刑名總匯見審事件依限完結則案犯不致久羈無干得以省釋其會審三法司者照例一月完結枷杖等罪限十日完結發遣軍流限二十日完結儻有任意因循書役嚴行治罪承審司員及會審堂官分別議處十一年六月奏酌加吸食



鴉片煙罪名職官及在官人役加等治罪直省督撫地方道府州縣等官各出署內並無買食鴉片煙甘結年終彙奏以期覈實悉照所請行八月 上五旬萬壽 加恩臣工開復敦元任內處分是月署戶部右侍郎兼管錢法堂事務十二年正月署刑部尙書二月實授奏孟六等習教一案爲首之犯不准查辦并聲明遇赦不赦其爲從之犯亦俱不准減等得 旨准行三月充會試副考官十二月 賜紫禁城騎馬十三年四月以官犯李相清越獄部議降三級調用 上加恩改爲降四級畱任十四年因病請假尋卒 諭曰刑部尙書戴敦元由刑部司員歷任藩臬內擢侍郎游升尙書清介自持克盡職守昨因病請假當經派員暫署俾得安

心調理方冀速痊益資委任茲聞溘逝殊堪軫惜著加恩贈太子太保銜照尙書例賜卹所有任內一切處分悉予開復應得卹典該部察例具奏尋 賜祭葬 予諡簡恪子樹琴候選 丞鶴齡候補兩淮鹽運司經歷

右 國史館本傳

金溪司寇姓戴氏諱敦元浙江金華人也乾隆癸卯年十五舉於鄉癸丑成進士由刑部主事歷官中外至刑部尙書以甲午十月卒年六十有七 贈太子太保 予諡簡恪凡其行業宦蹟當掌於史氏獨平生志趣有足述者非久與交處不能悉也君性一如謚內甚憇然簡而寡營凡人事居處若時當適來而適應之皆非

所必爲者然居不廢職行無異趨蓋其恪也平生惟喜見書委稟  
殊絕口成誦書可高七八寸彭文勤公視學浙江君年十歲郡縣  
以神童舉試公呼至案前問讀書幾何書一字引音義旁通者問  
之君乞筆注所出書多在所引外驗書皆實故名早稱於大人長  
者其一生綽然得自行其志趣者亦名有以先之也言動樸訥對  
人無容儀交人無問訊其坐無談論終日冥默類窮山方外遺形  
去識之士至寒渴飢渴亦似未嘗切膚然不如方外屏絕感際初  
履出職未嘗識上官及出任觀察至爲藩撫亦不知其身在羣吏  
上治官事亦如身事默默以可否遇案牘如讀書一日所見必盡  
而後已每至一官取積牘覽一過他日吏誤摘語之故吏亦無敢

欺者復居京師司僚非公不得見部事畢歸坐一室家人爲之設  
食飲暮則置燭對書坐倦而寢否則坐暗中倦亦寢雖飢甚不言  
也窺其室積塵漠漠坐臥處皆亂書無完軸者行巷塗常無車馬  
假歸武林時大憲某公宴之雨著屐往終飲羣官擁送鼓吹門啟  
呼戴大人轎馬君笑索繖自執之揚揚出門去其一生行動自由  
每如此然亦非傲兀視旁無人也目短視看書以紙磨鼻一磨則  
終一紙面時黟然晚自言善忘嘗試之猶不遺一字然寡爲詩文  
終歲或不舉管晚好天文算學亦無所論說蓋善照者光著物而  
不必凝浹於物君於讀書亦適然目之適然不忘非必欲有事焉  
耳其一生類動以天未嘗近邊際其遭遇亦適如生質時至而自

合自少至老不計得失亦竟無得失以內實勤恪之故遇人脫略無訾謗人以其簡樸信之不謀食終身得食爲士大夫處顯位則天厚之也卒之日筭無餘衣困無餘粟庀其產不及百金其廉潔亦性成者非意於廉也不知有無之切於身也

潘諮曰唐史於李泌奇不能測司寇爲人洵奇矣哉凡人知覺寓於運動聖人明純粹一故百事中矩老氏之流則落漠其外而鍵閉其內然皆有窮日不足之力以自固若司寇皆無事也天地生材固有不落規矩而自成一規矩者使遇聖人不知其所裁就終何若也

右別傳潘諮撰

戴簡恪公姿稟殊絕幼嘗過外家堂中有書八架一月盡讀之公之赴任高廉也以地方情形非素習寓蘇州之南濠凡數月地本大都會粵人貿遷者往來如織公密訪其風土人情甚悉故事之官有程限或以踰限爲疑公笑曰得失有定分何汲汲爲在江西幕無賓客延屬吏之請刑名者以自助不數月清積牘四千餘獄某縣令素與公習以獲盜當遷秩令甲獲死囚三名以上者許送部不及則否公定讞擬辟不及三人令忖然失望公婉諭之曰君子愛人以德戕人命遷己官非福也是乃所以愛君耳自江西遷擢入覲途中日以麪餅六枚供饗餐不解衣不下車五更趨夫起驅之行凡上官過境州縣例設供億具迎送禮公獨行數千里

而與夫館人莫知其爲新任藩使者抵京師始喚僕使令客至屏  
僕戶外煮茶漉酒輒躬爲之山西藩署有陋例曰釐頭銀上下皆  
取資焉公曰官有養廉僕御官所參也何贏餘之有遂革之

右事略李元度撰

戴簡恪公敦元官司寇日朝士呼爲破敗書廚以公萬卷羅胸而  
麤服敝車外觀極寒儉也康祺初入西曹聞司員中前輩言之

右紀聞陳康祺撰

色克精額

色克精額佟佳氏滿洲鑲藍旗人乾隆五十八年由繙譯生員補太常寺讀祝官嘉慶四年 賞戴藍翎五年升寺丞六年二月京察一等記名以直隸州撫民同知用四月升刑部主事 詔改禮部主事十一月 賞五品頂帶並換花翎七年四月授福建漳州府撫民同知經禮部左侍郎兼管太常寺事務扎隆阿奏請畱京供職得 旨以禮部員外郎卽補仍在太常寺讀祝官上行走九月充舊太倉監督十一月補員外郎九年充海運倉監督十年八月 賞四品頂帶十一年四月升太常寺少卿十二月補公中佐領十五年升太常寺卿十八年四月擢內閣學士兼禮部侍郎銜



尋補正紅旗蒙古副都統 命兼管太常寺事務七月因遷官稱  
賀經步軍統領吉綸劾奏 諭曰色克精額遷官稱賀已屬多事  
乃於城外戲園排日張筵斂取分金伊係二品大員罔知自愛有  
玷朝班實屬卑鄙著先行開缺仍交部嚴加議處尋議褫職得  
旨色克精額向充讀祝官儀節尙嫻著自備資斧前往教演 東  
陵 西陵贊禮郎若盡心教肄安靜無過再降諭旨十月 上以  
色克精額平日辦公尙無遺誤 命補授太常寺少卿十九年以  
尙書成齡互移賢良祠牌位色克精額未經阻止部議革職 上  
加恩以六品贊禮郎用二十年授太常寺少卿二十二年升太常  
寺卿旋因進呈清文則例擡寫錯誤降爲六品贊禮郎二十三年

賞給三等侍衛仍兼讀祝官二十四年正月升二等侍衛二月  
授太常寺卿尋升內閣學士兼禮部侍郎銜三月以讀祝敬慎  
賞戴花翎四月補正白旗滿洲副都統五月以告祭地壇贊禮  
郎清安泰導引失次色克精額以未慎重選派褫花翎八月因祭  
夕月壇各員禮儀錯誤降三品頂帶十一月賞還二品頂帶仍  
戴花翎二十五年調正黃旗滿洲副都統道光元年充左翼監督  
二年授理藩院右侍郎十一月以進呈告祭奉先殿儀注並未  
詳稽舊例又不聲明請旨妄將元年告祭作爲比照輕率錯謬  
降內閣學士褫花翎仍兼太常寺行走三年正月賞還花翎十  
二月授理藩院右侍郎四年轉左侍郎八年調禮部右侍郎十一

年八月充國史館清文總校十一月 賞紫禁城騎馬十二月授  
崇文門副監督十二年調左侍郎十五年任左翼監督十六年二  
月偕尙書奕顯等奏妥議朝鮮貢使隨帶從人貿易章程略言該  
國從人例無定額其出買食物及馬廐餵養向無稽查約束明文  
擬請設立門禁卽責成該使臣開具出館緣由酌定人數及出入  
時刻由書狀官造冊送交監督按冊給發腰牌另繕二冊分送會  
同四譯館大臣察覈並按月輪派大通官一員按冊稽查如有違  
禁滋事者該館人役由臣部分別覈辦朝鮮從人輕則交該使臣  
酌辦重則行知該國王自行辦理嗣後朝鮮到京時由臣部將加  
等嚴辦事宜出示剴切曉諭俾知做畏得 旨允行三月補經筵

講官十八年八月調鑲黃旗滿洲副都統九月升正紅旗蒙古都  
統二十年六月授綏遠城將軍八月奏劾協領濟春於委令查辦  
之事任意推諉迫經詢詰猶負氣不服實屬謬妄請褫職 從之  
二十一年四月授禮部尙書十二月充經筵講官二十二年卒

諭曰色克精額乾隆年間卽在太常寺當差禮儀嫻熟洵擢卿貳  
辦事勤慎近經朕由綏遠城將軍擢任尙書正資倚畀遽聞溘逝  
殊堪悼惜著加恩照例賜卹任內一切處分悉予開復應得卹典  
該衙門察例具奏尋 賜祭葬子達明阿見任二等待衛兼公中  
佐領達凌阿見任二等待衛達崇阿見任吏部筆帖式達嵩阿見  
任理藩院筆帖式

國史館本傳

右 國史館本傳

三

國朝耆獻類徵初編卷一百九目錄

卿貳六十九

同麟

李宗瀚

戴三錫

韓鼎晉

明山

徐斡

韓文綺

國朝耆獻類徵初編卷一百九目錄

--	--	--	--	--	--	--	--	--	--	--	--	--

國朝耆獻類徵初編卷一百九

通奉大夫前署江西巡撫江西布政使司布政使湘陰李桓輯  
卿貳六十九

同麟

同麟棟鄂氏滿洲鑲紅旗人乾隆五十八年繙譯進士嘉慶元年  
補禮科筆帖式八年以前充 寶錄館纂修得與甄敘 命以額  
外主事用籤分戶部十一年補主事十二年升禮部員外郎十三  
年十月授河南道監察御史十二月奏言各部院衙門選缺例歸  
吏部銓選其分部學習之廕生進士議敘捐納各員年滿後如供  
職勤勉該堂官保畱准其挨次以選缺奏補此定例也至寶缺司



員有在署年久熟習部務俸次將升者本堂官聲明奏請留部以資熟手亦閒有之非定例也乃近年往往不論該員俸次遽行奏留甚至一部連留數員以占選缺各部多留一員則吏部少選一缺無論在部候選者壅滯卽外缺年滿調京者每多遲延且此項人員或俸次距升尙遠一經奏留卽可得升本部又可免補外缺恐生規避營求之弊請嗣後奏請留部之員該堂官務須聲明到署年限奉 旨允行時准其照例補用然一部不得連留數員俸淺者槩不准奏留致礙銓政下部議行十四年稽查興平倉十五年疏稱倉場侍郎戴均元等奏通倉儲存稜米較多請將王公名下包衣藍白布甲並八旗佐領名下坐甲應領米石在通支領查

藍白布甲例支粳米五成稷粟二色共五成今粳米仍須京倉支  
放稷粟二色赴通支領者每人不過數石較之京倉需費不啻倍  
蓰且屢經滲漏之米食之不堪賣之則得價不抵所費此項甲米  
仍請在京支放用昭體恤下部議奏尋議令領米人等於通倉彙  
總關支分季帶扣餘米仍運京倉以示暫時變通此後不得援以  
爲例 上允之十六年正月巡視中城三月奏稱八旗子弟向係  
捐納候補人員不准食餉其考取候補貼寫中書筆帖式等員及  
議敘候補者於未得缺之前俱准挑補馬甲等差嗣經戶部奏准  
考取在館行走並各部院學習行走等員除有原餉可支者遵照  
舊例辦理外其本無原餉之人未便給與馬甲致占額缺而各旗

因有此奏將一切在旗候補原不食餉人員無論有無養贍槩不  
准其挑補各員因得缺無期往往呈請註銷功名退而就餉未免  
隳向上之心請嗣後考取議敘候補者除文職五品武職四品以  
上見任官員子弟及素封之家不准挑補外其餘仍准挑補 上  
命部臣議奏尋議該御史所奏實爲仰體 皇上樂育人才加惠  
旗僕起見應如所請惟捐納之員自係家道殷實須註銷原捐功  
名方准挑補至捐納貢監生考中舉人副榜及各項議敘候補人  
員或因匱乏不能不資餉度日者交該參佐領等確切查明出具  
保結亦准與挑得 旨允行四月轉掌陝西道御史五月遷吏科  
給事中十一月升通政司參議十八年遷內閣侍讀學士十九年

升太常寺少卿二十年正月調大理寺少卿二月館臣呈進高宗純皇帝聖訓大學士托津等以同麟充清文總校在館八年始終奮勉奏請於該員應升之處照常開列卽將此次議敘於名下註明從之二十一年三月超擢內閣學士兼禮部侍郎銜九月充繙譯鄉試副考官十一月補鑲藍旗蒙古副都統十二月充玉牒館副總裁二十二年因御門讀本錯誤罰俸一年二十三  
年三月充國史館清文總校五月授盛京工部侍郎旋奉 上諭昨有旨將同麟簡放盛京工部侍郎本日謝恩召見據奏伊母見年九十長途不能迎養朕不忍今其遠離同麟著仍在京供職是日補禮部右侍郎仍兼鑲藍旗蒙古副都統六月充考試滿洲八

旗繙譯文童考官十一月同麟偕禮部尙書穆克登額等議奏原任內閣學士錢樾入祀鄉賢祠不覈定准駁請旨辦理上以該部不置可否實屬取巧推諉下部議處尋議降二級畱任二十四年四月充繙譯會試副考官先是十四年皇上五旬萬壽以九月二十七日爲孝慈高皇后忌辰本日常服不挂珠是年十月聖壽六旬禮部未經按照十四年成案聲請上飭禮部尙書崇祿等粗率怠玩下部議處同麟以正三品京堂降補十二月補左副都御史道光元年二月充實錄館清文總纂六月授盛京刑部侍郎十月署兵部侍郎十一月兼奉天牛馬稅差監督四年三月以目疾奏請開缺調理四月卒子奎英吏部主事奎清戶

部員外郎奎凝內閣中書奎齡三品廕生孫聯興銀庫庫使聯瑞  
文舉人

右 國史館本傳

同身之... 卷一百一十一

五

李宗瀚

臨川李春湖少司空性開明而質厚重篤倫理而勤問學家席華  
臚而能澹泊以自持官登卿貳而務謙抑以取善其爲詩得松甫  
先生家法而拓之以蘇韓其於書博究唐宋以來支派而於虞歐  
爲尤近所蒐輯字畫石刻石蹟盈篋笥索書者踵相接也其鄉舉  
以壬子而癸丑遂成進士其官由編修五轉而至學士由學士四  
轉而至工部左侍郎其膺使事則典福建浙江鄉試而督湖南浙  
江學政居浙江兩年餘以道光辛卯三月初四日終於衢州舟次  
享年六十有三諱宗瀚字公博一字北溟又字春湖世爲江西臨  
川人與余從子希曾爲舉進士同年遂申之以婚媾而與余交亦



最密道光戊子五月 御試二三品官論及詩公與余同橐筆詣  
乾清宮 上書房而公招余同視席於一室六月公既奉 命  
典浙江試遂留視浙江學政而余亦視學閩中過武林謁公既別  
去至閩中數以書問相砥礪也及庚寅聞公以校士勞得嗽疾至  
失音公體素充碩及是而聞公瘠逾於常人心竊憂之辛卯春正  
月聞公丁本生父松甫先生憂及三月遂聞公卒矣嗚呼六七年  
間人事之不齊如此余自閩旋 朝旣悲不及再見公於武林而  
今且繼公視浙中學已竣事將旋 朝也公素喜余文字余自聞  
公訃後欲作文以報公顧逾二三年未能成今乃爲之誌以寄公  
之仲子鳴珂悲夫公先世居臨川之楊溪自公大父丹臣府君以

鯁業起家於粵東西僑居於桂林而樂善好施爲鄉閭交遊所推  
重公之本生父松甫先生以工爲詩善禮接文士益擴大其家聲  
五六十年閒海內稱德門者咸曰桂林臨川李氏云曾祖燕祖宜  
民世所稱丹臣封翁也嗣父秉仁本生父秉禮世所稱松甫先生  
也嘗爲刑部江蘇司郎中旣以其階 贈祖考爲中憲大夫及公  
爲侍郎三代皆晉 贈晉 封爲光祿大夫曾祖妣袁祖妣駱本  
生嫡母曹本生生母劉皆以一品夫人夫人爲晉 贈晉 封焉  
松甫先生於丹臣翁爲次子秉仁其兄年二十前卒公之嗣母駱  
太夫人撫孤兒宗誠甫七歲而殤劉太夫人娠公而駱太夫人有  
宗誠來歸之夢故公旣生而松甫先生以後其伯兄公之嗣父庶

出也其生母爲 誥封一品夫人戴太夫人公之奉劉太夫人諱也既終喪遂乞終養嗣大母戴太夫人居家幾年離業稍替松甫性恬靜年已逾七十乃退離業而讓於庶弟秉綬公實贊成之凡離業中應得之財一絲一粟無所取而自治園林日研習詩詞翰墨父子以文雅著望於桂林而顧有訐離務者謂公不能遠絕聲利公笑不與校蕭然事外有終老泉石之意而松甫謂公以文字受知於 朝廷今終養事畢矣不可以不出公乃出公未乞養時由宗丞擢副憲余與居臺中意殊洽嘗惜余之不久居諫垣也及再出補副憲居未幾遂擢少司空其當官明大體務持正而不爲矯激之行 上意方向用之而以校士勞不究其志凡知公者莫

不爲公惜也公配朱夫人翰林朱章浦紱女子四人聯璧前卒聯珂道光壬午舉人吾從子鍾溪壻也皆朱夫人出聯璣娶江南上元孫氏聯琇聘南豐趙氏孫四長珂勳娶南昌徐氏嗣聯璧次珂華皆聯珂出次珂軒珂耆聯璣出孫女七長適霸州吳曾蔭今東河總督吳邦慶孫也銘曰

承先澤之崛起擅儒雅於中朝日趨善而恐後申余契以久要愴搏搏之委化日旣暝而餘哀抗孤志以永慕距朝服而襲衰過三衢而賦些悲前塵於帶水銘幽宮於旣窆庶燹覆其孫子

右墓誌銘陳用光撰

公諱宗瀚字公博一字春湖江西撫州府臨川縣人家世有厚德

貢生公以業嵯家粵西故公生長於粵刑部公有詩名詩學唐賢  
韋左司自以韋名廬世所稱韋廬先生者也刑部有庶長兄年二  
十卒葬於梧卽贈學士公也遺一子宗誠殤其配駱夫人賢而有  
識一日夢宗誠至驚呼曰兒歸矣其日公生於桂林寓舍駱夫人  
泣請於貢生公願得公爲子故公爲贈學士所後子而刑部公爲  
本生父公幼多病駱夫人視之謹稍長病愈穎悟異常讀書有夙  
悟博極羣籍年十八學大成乾隆五十七年中式江西王子科鄉  
試舉人明年成進士 殿試二甲改庶吉士六十年散館授編修  
嘉慶二年充武英殿纂修三年大考二等擢詹事府左贊善充國  
史館協修四年充 實錄館纂修兼本衙門撰文尋擢侍讀轉左

右庶子侍講學士充日講起居注官五年充福建正考官六年丁  
駱太夫人憂服闋年入都補原官其年九月充武會試副考官  
轉侍讀學士十二月授湖南學政在任晉太僕寺卿十五年任滿  
入都授宗人府府丞十七年以本生嫡母曹太夫人憂解官十九  
年終喪補原官授都察院左副都御史九月充武會試正考官二  
十年丁本生生母劉太夫人憂服闋卽在寓籍奏請終生祖母戴  
太夫人養既奉 俞旨公遂築宅於桂林樹湖之濱日侍戴太君  
暨刑部公側有終焉之志二十四年一詣 闕與祝 睿皇帝萬  
壽次年秋 仁廟升遐公以遠阻遐荒攀髯莫及哀不自勝道光  
三年遭戴太夫人喪先是道光改元禮臣建議天下爲父後者爲

生祖母終三年喪公毀瘁之餘竊幸奉功令三年得久待刑部公左右四年部議仍改歸期服刑部有眾子四人公以出繼例不得終養以故刑部日趨公之官遂以五年秋赴闕候補既陸見皇上垂詢家世官資甚悉公奏對移晷具陳感念先帝恩眷及陳情終養始末聖顏愴動六年夏補原官八年轉授工部左侍郎故事侍郎官資由右轉左公由副憲徑轉左侍蓋上之眷待優矣是年六月奉命典試浙江八月有旨畱學政任公素患下血按試各郡積勞過甚風眩遂作繼以喘嗽然猶力疾校閱十一年正月刑部公以疾卒於桂林公南望號痛絕而復甦病遂劇迨扶病星奔就道而已不可支矣以三月初四日終於衢州府

舟次子聯珂殮殯如制以其喪歸江西省治方公初殮時以朝服進公右臂佯強不伸聯珂持衰麻泣曰吾父以毀終今茲意在禮服乎乃議易衰麻爲裏具始伸臂就殮蓋公之孝思純篤生死不易如此公清素簡約恬退謙謹與人交坦夷誠恐言恣恻恻恐傷人而沈毅內斷所守介然人不敢干以私自其少時已端重如成人刑部公多聞好善矜尙名義篤嗜風雅天下士多樂就公自幼侍刑部側及見當代巨人長德凡名公卿與夫碩儒耆彥通人才士先後至粵者爭相刮目公虛懷善下質疑問難含短集長識者卜爲公輔器通籍後益自砥礪嘗謂士大夫不幸生長富貴多財叢過晏安溺志故雖服官通顯刻苦踰寒素公善韜晦雅不欲以文



名既以文學受知 先帝爲講幄侍從之臣 朝廷有著作多出  
其手久之文采四映海內識與不識爭相嚮慕公謹避之曰盛名  
不可居也歷官十數絕無旁援所至無赫赫聲必求盡乎其職曰  
吾以求此心之安而已退食蕭然一榻權要之門終身絕迹又每  
歷一階輒以憂去服闋遲迴久之始就補最後請終生祖母養棲  
遲嶺外者十年計公自釋褐後凡五遭大喪唯貢生公喪公以庶  
長孫不承重餘皆解官奔赴故公於 中朝諸老資望最深而官  
階差後 睿皇帝知公久以養假居粵時粵大吏入 覲輒蒙  
天語詢及 今皇上鑒公忠誠柄用日隆公感 兩朝知遇之恩  
又刑部公命諄諄以力圖報效勿戀餘年爲屬不敢遽言退迨再

以憂去而公遂不起矣公內行醇篤終身孺慕當公之終養於粵也刑部公嘗以先業推讓諸弟公亟贊成之曰吾不幸有富名亦以其應得之產同讓諸父家居久不取公中一絲粟貢生公有子八人惟刑部爲嫡長餘年皆差等於公小者與公子齊年公循循執猶子禮時戴太夫人年幾百齡刑部公亦近耄刑部待公嚴公愉愉色養入侍重闈出隨諸父委宛將順人無閒言暇則端坐臨池賦詩遣興或卉衣草笠與樵夫牧豎雜坐山澤閒神致蕭閒怡然自得時復徘徊原野若有所思遇者不知其爲京朝貴官也在籍十年當途罕見其面歲時通問一報謁而已而是時公諸父兩罷觀察使家居工部尙書郎名秉綬者方繼先業主隄務工部故

豪邁散金結客座。上常滿。輿馬冠蓋相望。公杜門卻軌。工部知公畏慎。亦不强也。公無他嗜好。獨喜聚書。癖嗜金石文字。所藏多名。拓樂湖東樓度之名。其園曰拓園。又於其西。購廢圃築屋三間。名湖西莊。手植花木。春秋佳日。奉太公及同志。徜徉觴詠。其中尤好名山水。遇佳處。流連竟日。桂林山水奇秀。洞窟巖壁間。多唐宋人手蹟。公登椒窮。遂摩挲嗟玩。手自摹搨。殆徧。又嘗得元康里氏所藏唐拓廟堂碑及唐拓化度寺碑。皆親自鈎摹。上石均極神妙。公詩初守刑部家學。及高密李少鶴憲喬所論。列後稍變其格。晚年益務精進。鑿刻堅厚。必極於微妙。而後已。故所存不多。今所刻行。楷湖酬唱詩。略則皆與顯鶴倡和作也。書法尤推重。一時人得其

片紙藏弄以爲榮論者謂 本朝書家自張文敏照王吏部澍外  
得公而三百餘年來前後輝映爲他家所不及殆不誣也公春秋  
六十有三夫人新建朱氏翰林院編修掌廣西道監察御史諱紱  
之女賢明淑慎克配君子子六人長聯璧早卒次聯珂道光壬午  
舉人候補內閣中書次聯璣國子監生後公一年卒次聯琇餘先  
殤女三人一適南昌國子監生徐之瑀一適山西候補布庫大使  
新淦劉錫疇一未字孫四翊勛翊華翊軒翊耆顯鶴依公桂林周  
旋於紀羣左右閒六易寒暑竄蒙忘分與年形融神愜迨後別於  
京寓公執手嗚咽曰恐此後無復相見期矣余以刑部公方在堂  
公年又甫艾也竊訝其不祥嗚呼孰知其言之遽驗耶綜公生平

志行以樸誠爲主以清淨爲宗以奔競爲恥以盛滿爲懼讀書取  
自娛爲善不近名境豐而志約履夷而心危清望名德世所共見  
其居官政績屢秉文衡兩司風憲釐奸剔弊振興士習整飭官常  
皆中人所勉能不足爲公異至於論思密勿嘉謨造膝獻替可否  
事關軍國大計公畏慎不洩雖其家亦不與聞世固莫得而知也  
謹次公居官本末出處大節言行學識梗槩爲狀冀他日史館君  
子論撰得備採擇焉

右行狀鄧顯鶴撰

戴三錫

戴三錫順天大興人原籍江南丹徒乾隆五十八年進士以知縣用籤分雲南親老告近改掣山西五十九年補臨縣知縣嘉慶三年二月因病回籍十一月丁父憂四年丁母憂六年服闋命發往四川以知縣用八年補南充縣十年升馬邊廳通判十四年調峩邊廳撫夷通判畱省清釐積案歷署資州各直隸州知州二十一年復署邛州州民黃子賢以治病爲名倡立鴻鈞教名目三錫捕獲之事聞上以三錫於稽查保甲之時能將邪言惑眾匪徒立時訪獲究辦尙屬能事命送部引見再降恩旨三錫先於十九年題准升署茂州直隸州知州至是併案引見實授茂

州二十三年升甯遠府知府道光元年升建昌道尋擢按察使二年升江甯布政使旋以迴避本籍調四川布政使三年命以二品頂帶署四川總督五年正月實授四川總督七月署成都將軍六年正月奏整頓通省書院並添設義學諭曰國家化民成俗興學爲先經降旨令各省認真整頓書院務收實效至義學之設鄉曲愚民咸得令子弟從師教讀觀感奮興於風化大有關係據該督奏川省書院嚴飭地方官盡心督課膏火不敷者設法籌備添給並各府廳州縣按鄉集城市陸續新添義學三千餘處洵堪嘉尚二月奏四川舊有民捐義田收租積儲以備賑恤如積穀過多卽將穀變價添買良田歷年旣久增置愈多若不量爲變通

則通省膏腴將變爲公產於民食殊有關礙如將歲收之穀添置倉廩聽其增積則陳陳相因不特霉變堪虞亦難保無虧那之弊擬分別等差自三千石起至萬石止作爲定額除定額外卽將最陳之穀於次年二三月青黃不接之時照市價酌量糶賣價銀解司存庫以備歉歲賑恤之用得旨允行七年新都奸民楊守一倡立邪教妄造妖書三錫派員擒獲立正典刑上嘉之六月奏蜀中田畝惟成都近地俱平時沃野其餘則空谷巉巖多饒瘠之區每遇山水衝塞卽膏腴亦轉爲砂石惟有因地制宜多設渠堰旣資捍衛宣洩之功並收瀦蓄沈浸之利命依議行時越嶺生番劫奪商旅掠漢民婦女三錫捕狙黠者數十人置之法出被掠



男婦資給安撫七月三錫七十生辰 頒賞御書敷猷篤慶扁額  
福壽字各一方並壽佛如意各物八年六月奏擊獲粵西會匪劉  
子耀等 上嘉其不分畛域急公緝匪十月兼署成都將軍九年  
四月 召來京八月署工部左侍郎十年閏四月 諭曰戴三錫  
前在四川總督任內官聲尙好因其年逾七旬恐精神未周特召  
來京另候簡用近見其年力就衰著以原品休致七月卒 諭曰  
前署工部左侍郎戴三錫白進士歷任四川州縣經朕擢授四川  
總督嗣因年力就衰特召來京署理工部侍郎旋以原品休致俾  
得安心頤養用示體恤茲聞溘逝殊堪軫惜念其前在四川宣力  
有年辦理公務妥協官聲尙好著加恩賞加尙書銜照尙書例賜

卹所有任內一切處分悉予開復應得卹典該衙門察例具奏尋  
賜祭葬于於義吏部郎中

右 國史館本傳

公諱三錫字晉藩號羨門先世自宋咸淳閒遷江南丹徒之黃甸  
村遂世爲丹徒人曾祖京鸞祖士鵬嘉魚縣典史父紀入籍順天  
由諸生考取三禮館校錄議敘爲青浦金匱縣主簿皆以公貴累  
贈榮祿大夫曾祖妣李氏祖妣蔡氏妣張氏凌氏皆 贈一品  
夫人公少刻苦於爲學嘗爲人傭書以自給而以其隙讀書過夜  
半不輟及丙午舉京兆而其授徒勤學也如故癸丑成進士以知  
縣用初得雲南以親老告近改掣山西署潞城補臨縣以治行稱

國朝通志卷之百一十一  
丁母夫人憂歸服闋謁選發四川署營山供張征川楚軍之過境者能不以華美悅上官而優恤兵弁則能使之感又立團寨招義勇賊來薄城拒守甚力營山無險可恃而賴公卒以保其境補南充署縣州勸農桑築陂塘行保甲問疾苦懲姦宄事無不舉歲除日過境軍聚眾博州役驟拘繫之眾聞欲爲亂公薄懲其役而剴切曉諭其眾眾乃散摧馬邊廳通判改戡邊廳撫夷通判大府旋檄公來成都助鞫獄自是歷署資眉邛知州成都府通判保甯順慶夔州成都知府資陽書院有欲阻考者公懲其爲首者以法而貫其餘邛州民黃子賢等嘯聚亡命約以州試日爲亂公偵知之屆期試士如常日而密遣民壯潛赴聚謀處捕獲之案既具公請

戮首惡一人而其餘則抵擧有差大吏以事聞奉特旨褒嘉焉擢茂州知州甯遠府知府建昌兵備道在甯遠時雲南永北廳夷人爲亂距甯遠近公練鄉勇嚴壁壘而於永北難民沿江就食者公許其渡江而設法全活之其不願回滇者又捐貲以撫恤之蔣彌堂制府以入奏公之受知於今上實自此始也旋擢四川按察使江甯布政使以迴避原籍奉旨調補四川布政使旋命以二品頂帶署四川總督吏部奏請兼兵部侍郎銜旋兼署成都將軍乙酉命實授四川總督吏部奏請兼兵部尙書銜公由寒畯起家官蜀中近三十年始皆循資遷轉同列或軼出其上而公不以介意及旣擢觀察不三年遂游歷封圻特膺重寄公感

特達之知所以整飭吏治者益力又愛禮士子釐正書院規條增  
義學而敬經 欽定十六諭衍爲詩六十章刊布書院義學俾皆  
誦習焉新都民楊守一以邪教惑眾公遣人弋獲之置之法越寓  
生番結熟番爲導劫商旅掠婦女眾議以兵往公不許但飭鎮道  
捕治數十人而安撫其被掠之男婦其歷辦雷波瞻對果洛克夷  
人惟申警斥埃嚴察卡隘而約束將弁不得倖事邀功以開邊費  
雲陽鹽販拒捕守令具讞上以夥梟論公曰買由官店則非私梟  
販止十人則非大夥當以重律非法矣惟當治拒捕傷人之罪讞  
既定人咸稱明允己丑內 召既入 覲 命署理工部左侍郎  
勤於其職庚寅以原品休致具摺謝 召見 獎諭其居官並俯

詢其家世鄉里焉六月二十八日以疾卒於京第享年七十有三  
具遺摺奉 旨加尙書銜照尙書例 賜卹配張夫人子一於義  
甲戌進士由庶常散館改吏部主事累擢至文選司郎中兼驗封  
司掌印郎中娶同里馮氏繼娶吳江全氏孫一朗女一適乙酉舉  
人山西試用知縣呂兆熊銘曰

名以儒興政以敏成迴翔資格晚覲殊榮始晉終蜀案無畱牘禁  
說矜愚旣寬旣肅亂後蜀風不愿仍控旣懲獲雜旣歸鬻童貞魂  
毅魄埋齒掩骼棹楔所植以慰燐碧與士於庠萃萃講堂口授指  
畫如師之詳政所礪只 帝所遴只內府之珍七十 賜只識公  
京師恂恂其儀望崇見晚再見無期氣冲度遠瀟風倏緬銘厥幽

宮以勛儒顯

右墓誌銘陳用光撰

道光十年六月二十八日署工部左侍郎前四川總督戴公薨於京邸 旨加尙書銜照尙書例賜卹越七月二十三日禮部尙書湯公金釗奉 旨賜奠於私第戶部工部各遵 頒發祭葬銀如例其年秋公之喪至鎮江其嗣君郎中於義寓書恩澤屬撰神道碑恩澤於公有世誼且辱公知好甚久不敢以不文辭按狀公姓戴氏諱三錫字晉藩號羨門江蘇丹徒人曾祖京鸞祖士鵬湖北嘉魚縣典史父紀入籍順天補府庠生考取三禮館校錄江蘇青浦金匱主簿三世皆以公貴累 贈榮祿大夫例晉光祿大夫母

張氏凌氏累 贈一品夫人公讀書期大用不爲無益之學尤樂  
觀古名賢大君子出處施設中乾隆丙午科舉人登癸丑科進士  
以知縣用署山西潞城縣補臨縣縣彫劫公撫字有方以治行聞  
時公父光祿公母凌夫人春秋高不能就官舍養公思慕不置一  
且引疾歸而光祿公凌夫人俱馨膳不半載相繼歿人謂孝感若  
有先告云嘉慶五年服闋引 見奉 旨發往四川時蜀方治軍  
公至卽攝營山縣縣當四達之衝供張絡繹公籌備無誤補南充  
縣攝縣州知州擢峽邊廳撫夷通判公在縣有惠政去之日父老  
遮道哭請建生祠公力卻之乃已歷攝資眉邛各直隸州知州成  
都府通判保甯順慶夔州成都各府知府嘉慶二十一年公再攝



邛州時有奸民黃子賢等嘯聚亡命千人約以州試文章日乘閒發公偵知聚謀之所屆期仍扁試如恆密遣民壯數百突往捕悉擒之案具大吏欲以軍功奏公請戮首惡一餘以軍流處之得

旨獎飾時公已擢茂州知州二十三年擢甯遠府知府道光元年擢建昌兵備道時雲南永北廳夷匪啟釁與甯遠界一金沙江川民騷動公募鄉勇集數百人昕夕練習防衛永北難民沿江就食甯遠甯遠兵弁欲禁不使渡江公謂避難皆赤子悉姬撫之全活不下數萬人兵旣息難民感公德不願旋因著籍於川時制府蔣公素以人才爲己任見公略能禦彊仁足撫眾牘薦甚力自是公膺 特達之知不三載卽以布政使署總督蓋 聖主知人之明

天吏舉賢之誠我公忠實之政遂昭著於天下而天下百職事成奮勉守道益篤 朝廷遂收得人之效實自公始其年擢四川按察使二年擢江甯布政使引避原籍調四川布政使三年奉 旨以二品頂帶署四川總督後復署成都將軍五年奉 旨實授四川總督公久宦蜀知蜀民立懂好勇教不先也於是正書院規制增義學三千餘區拓考舍一千餘區使士表其民民化於士又以治兵定亂須摧其機讞獄科罪須平其衡蜀舊多事非時過乃發致患禍成卽好殺喜功不幸而激大變七年新都奸民楊守一等倡邪教造妖書公弋獲之立正典刑越嶲生番恃險遠時出沒劫商旅掠婦女僉議欲加兵公但飭吏捕狙黠者數十人治之雲陽

鹽販拒捕守令以夥臬論公謂售由官肆則非私販止十人則非夥當以重辟過矣惟當治拒捕罪耳官吏稱允其他濬渠堰水利禁販鬻子女斷鎧嬉侈靡掩埋軍興死綏之骨表彰國殤不屈之魄凡有關於世道人心者靡不修舉傳云公家之事知無不爲惟公有焉七年七月公七十壽前期卽蒙 恩賚並 賜御書數猷篤慶額時公哲嗣於義任吏部員外恭齋赴蜀時人榮之九年內召署工部侍郎奉 命恭詣 東陵 西陵查估歲修事十年奉 旨以原品休致公具疏謝 恩蒙 召對 上諭以居官甚好全始全終公免冠謝公以久宦思省邱墓入秋擬遊歸卽以是年六月得氣壅疾薨於京邸春秋七十有三公長身火色目爍爍

有紫光性清峻不受饋獻事上唯謹不阿從處同列以和不以己  
長掩人短精力適厚每當繁劇益見縝密極嗜翰墨工行楷尤工  
漢隸手錄書及簪校書盈篋喜讀薛文清呂新吾兩先生書記道  
光元年恩澤典四川試見蜀士民述公爲州縣時視民若子姓其  
班春也過一村墟則父老咸邀停車奉茶果爲壽媪攜幼稚纍纍  
環車前公類能指其姓氏與父老話農事課雨晴偶及家人瑣屑  
皆歡然應雜然請閒有以事角口者求辨於公公爲管曉卽散去  
歲斷獄甚簡於戲庶幾古循良之風復見於今矣公配張氏累  
封一品夫人子一於義甲戌科進士官吏部郎中女一適山西試  
用知縣呂兆熊孫一明女孫一以某年某月葬於某山之某原銘

曰

大善之積自微成著下位廿年曾不數載 天子有命統東西川  
天子壽公公七十齡不懈益虔文師文黨武師武鄉謀略炳然  
人震貴速民知 主聖公宜累遷所居父在所去母失咸載二天  
封圻遠民惠罕下逮獨公如前鄙赫赫名曲突火始拔毛斧先歷  
少壯老束身清勤植志貞堅 恩禮始終進退綽綽曷歸乎田不  
及省墓公心不怕奪公何遊墮淚之碑遺愛之碣過者式焉

右神道碑程恩澤撰

韓鼎晉

韓鼎晉四川長壽人乾隆六十年進士改翰林院庶吉士嘉慶元年散館授檢討二年丁父憂四年服闋六年充順天鄉試同考官八年記名以御史用九年充湖南鄉試副考官尋補河南道監察御史十年五月條奏天主教流傳川省並及各省請一體申禁

從之九月以母老乞假歸養十二年丁母憂十四年服闋十六年二月補江西道監察御史轉掌雲南道監察御史四月奏陳四川積弊六條一禁科派以安閭閻一除咽喉匪以防積漸一查卡房以全民命一禁拐騙以儆貪頑一嚴攤捐以養廉潔一覈戎政以歸實效 上以鼎晉精練四川吏治民風見聞較切所奏均屬可採

並以覈戎政一條所陳積弊各省亦然降 旨通行六月奏言京師及各直省賭博之風日熾請 旨嚴密查禁踰日京城卽獲賭博三起 上以鼎晉所奏確實嘉之下部議敘旋 命巡視南城九月 命巡視山東漕務由德州迂道查勘運河一帶水勢牯座十七年二月履勘十七州縣泉源陳奏疏濟舊泉補栽蔭樹略謂山東濟水伏流如人身血脈隨處皆通舊設泉池外上下原多有泉眼同入泉渠其泉渠內亦隨地皆有泉眼每渠不下十餘處其水亦同歸濟運惟將舊設四百八十四泉不使稍有頂阻淤塞則池渠前後左右伏流之水或分爲數泉涌出或併爲一泉涌出無不可以沛然暢達各州縣果能隨時疏濬祇須率由舊章自足以

資挹注而利運行此後似不必添設泉名反使州縣藉口於泉夫  
不足並舊泉亦有懈弛再泉池蔭柳原應久栽成樹查各州縣池  
旁舊樹尙足庇蔭池水其新插柳枝不加看守聽人偷拔故年年  
有補栽之名而並無已成之樹於泉政有名無實臣已嚴飭各州  
縣派夫看守認真稽查不得仍蹈積習虛應故事 上以事在人  
爲隨時疏濬妄議更張徒滋流弊如所請行先是山東運河挑工  
募夫係歸沿河州縣衛承辦撫臣陳大文等奏准改委河員承辦  
鼎晉以紛更滋弊是年六月請復舊制 從之七月奏報全漕尾  
幫僱出東境 上以其催僱迅速交部議敘九月署禮科掌印給  
事中十八年正月稽查通州五廂漕糧二月京察一等記名以道



國朝通志卷一百九  
三  
府用尋授工科給事中四月擢光祿寺少卿八月提督陝甘學政  
十月遷鴻臚寺卿十二月以陝省岐山毗連州縣歉收民食維艱  
令地方官董勸紳士捐資周恤並暫行平糶之法以裕民生得  
旨允行又奏整飭學校 諭以實力辦理十九年正月以南山匪  
徒滋擾官兵擊殲過半疏陳善後事宜一南山內宜行堅壁清野  
之法易於勦捕淨盡一宜嚴禁弁兵擄掠難民子女一南山毗連  
各州縣及直隸豫東三省曾經騷擾之地宜慎選賢能之員調補  
以期實力撫綏 敕疆吏如所請行八月遷通政司副使九月遷  
大理寺少卿十一月以巡視時所見情形臚陳四事一榆林綏德  
兩屬州縣倉貯空虛宜設法彌補一榆林賑恤事宜須分別辦理

一保甲必先除積弊一回民宜添設學額疏入 上命撫臣籌補  
倉穀安集流民至保甲前已頒發章程添設回民學額以窒礙  
其議二十年升太常寺卿二十二年充會試知貢舉尋稽查左翼  
覺羅學二十三年八月充順天鄉試監臨以場內黏貼違式告示  
字有譌誤檢舉請議 上特寬之十月以失察 天壇鐙竿蠱蛀  
降二級留任鐫紀錄八次十二月遷大理寺卿二十四年正月遷  
都察院左副都御史二月奉 命祭告嶽瀆陵廟七月查恤南海  
子避水災民八月督辦黃村賑務九月提督福建學政道光二年  
陳奏閩省學校事宜一生員緣事未結之案太多有積至一二十  
年者急宜勒限查銷一地方官押令生員跟拘人犯株連苦累宜

嚴禁之一生員案情無據率請斥革宜禁其輕率一各屬府試院  
試宜接續連考以免寒士跋涉之苦章下督臣會議議上皆允  
之三年充武會試副考官五年四月稽查右翼宗學八月署刑部  
右侍郎尋署禮部左侍郎六年四月充殿試讀卷官六月授倉場  
侍郎七月奏海運漕糧及上倉滯漕難以久貯請先行開放  
得旨允行又奏籌辦速運漕糧並籌收米章程上如其議尋  
以南漕軍船回空迅速下部議敘九月因病請開缺調理七年四  
月病痊署禮部右侍郎十月補工部左侍郎兼署禮部右侍郎八  
年京察諭曰韓鼎晉年逾七旬身體多病著以原品休致十一  
年卒十四年入祀鄉賢祠子溍正三品蔭生官貴州印江縣知縣

右 國史館本傳

道光十一年六月癸卯資政大夫工部左侍郎韓公以疾終於家  
其年十月丁未公子湛等奉公匱葬於長壽韓家嶺于子墳而神  
道之左禮宜銘公子澆使人礱石於巴以書暨公手輯年譜來屬  
其門下士新化鄧顯鶴文於碑先是顯鶴入都爲選人謁公於宣  
武門邸第臨別公出年譜命序且曰吾老矣身後不知誰屬將待  
子文以瞑目顯鶴斂容避席對曰 朝廷方以柱石待公願吾師  
長爲國家元老顯鶴執筆紀功德祝眉壽仰視公色黯然惘惘而  
別無何公以疾歸歸後逾年遂捐館舍顯鶴於弟子籍中受知最  
深公之喪在數千里外無由視含殮葬又不克襄凡役事澆書五

六至敦促不厭其敢以不文辭謹按譜次其略於左公諱鼎晉字  
樹屏四川長壽縣人曾祖某縣學生 貽贈資政大夫祖某縣學  
生 誥贈資政大夫父某某乾隆十五年舉人甘肅碾伯縣知縣  
累 贈資政大夫曾祖妣姚氏謝氏祖妣聶氏妣曾氏皆 贈夫  
人碾伯生三子公次二韓氏始居湖廣麻城縣明季徙蜀自碾伯  
公以上世以名德重於鄉里碾伯居官有政績未竟其用公天性  
夙成四歲隨父任八歲回蜀以碾伯罷官刻苦自勵年十一屹然  
若成人十六碾伯歸自肅州公學已成二十四補縣學生二十五  
補優廩膳生試皆第一三十充乾隆己酉拔貢生是科舉於鄉迨  
成乙卯進士改庶吉士年三十六矣嘉慶改元散館授職檢討旋

乞假歸省是時白蓮教匪起楚之當陽躡樊襄窺荆峽沿途多警公晝夜馳歸抵家而達州已告變公奉碾伯公遷涪遷渝靡有暇晷二年丁碾伯憂遺命長壽爲賊衝不可居乃全家移寓重慶而舊宅遂燬於賊四年服闋奉張太夫人入都供職充功臣館提調國史館纂修官六年充辛酉科順天鄉試同考官八年以御史記名九年充甲子科湖南鄉試副考官是年補河南道監察御史十年冬以母老乞養歸蜀十二年春丁太夫人憂服闋踰年赴都補官十六年補江西道御史掌河南道御史巡視南城巡視東漕十七年署禮科掌印給事中十八年京察一等轉工科給事中升光祿寺少卿督陝甘學政是年冬擢鴻臚寺卿十九年遷通政司副

使再遷大理少卿二十年遷太常寺卿二十三年轉大理寺卿二十四年擢都察院左副都御史祭告豫楚嶽瀆陵廟差旋督福建學政二十五年在福建學政任間 仁宗睿皇帝升遐自以邊隅寒峻受 特達知一旦攀髯莫及悲慟欲絕道光二年回京供職五年署刑部右侍郎兼署禮部右侍郎六年六月授倉場侍郎九月因病解任七年四月病愈仍署禮部右侍郎是年十月授工部左侍郎兼署禮部右侍郎公體素健中年後以勞失血在倉場任內病霍亂後時患頭目昏眩猶力疾治事 上賞假者再嗣請解任調理養痾都門至八閱月之久病起授冬官兼權儀部公趨積勞益以痰喘往往而劇屢 召對面陳衰病情形願乞骸骨 上

領之八年正月 詔以原品休致歸後二年卒公狀貌英偉言論  
慷慨少有經世之志通籍後值教匪擾蜀親見軍中勦辦事宜於  
地方利病民生休戚蒿目忧心時思建白嘗言教匪之起由莠民  
日多邪說易入其始一二奸回假大乘天主名目相蠱惑而無業  
流民椎埋博徒展轉糾結馴至大逆而不可解故欲息邪說先除  
莠民除莠民自博徒始初至諫垣卽上言天主教流傳之害請禁  
本師燬經卷以絕根株再至卽力言四川應除積弊六條首力除  
啗匪以防積漸其年復言關東三省及各直省賭博之弊由於游  
蕩閒民聚眾招引官吏書役得受陋規官爲之倡民受其誘俾有  
業之良民忽成無賴之匪類其機甚微其受害甚大又言京師首



善之地各王公大臣豈肯使左右贊御蹈此惡習臣近聞京城驕  
子房賭風漸熾內城旗人多受其累以有限之錢糧供無窮之揮  
霍當生齒日繁之時其流弊有不可言者次日復言臣昨日請禁  
賭博一摺欽奉 諭旨令臣據實指明臣實不敢稍存迴護且臣  
業將王公大臣陳奏於前更復何所避忌 先帝嘉公言確即日  
獲博徒三起一時親貴近臣莫不悚息而 睿廟之知公亦自此  
始矣當入奏時或疑博徒事小王公位尊不宜牽連陳奏不二年  
而林清之黨嘯聚畿輔震驚 宮闕大抵多流蕩失業之民附之  
然後知公之所見者大而所慮者遠也公歷官一十四任未履外  
臺而於農田水利漕務賑荒詰戎諸大政講求不遺餘力在巡漕

時履勘十七州縣泉源以爲舊泉實力疏浚足利運行不必添設  
新泉徒爲民累又奏復東省運河挑工舊制東人稱便在倉場時  
值初試行海運籌議迎卸兩運數百萬天庾視常年倍捷在陝甘  
時言榆綏各屬倉貯空虛宜設法籌補榆綏資蒙古糧接濟今腹  
裏口外俱荒宜分別安置撫恤當是時方勦辦南山賊匪而林逆  
餘孽尙有稽誅未盡獲者公首言南山偏近老林與蜀道通賊匪  
所在掠食宜行堅壁清野之法山內流民雜處最爲奸藪宜嚴行  
保甲使逆黨無所匿而賊匪亦易蹤又請嚴禁弁兵擄掠難民子  
女慎選南山附近地方及豫東三省經兵州縣牧令又以其時言  
川北荒歉與南山毗連鹽梟啗匪多出其中請先事預防設法調

濟在福建時言閩省積弊甚深由吏治久弛請不限資格用廉明幹吏調補汀漳泉望緊要缺久任以專責成漳泉營伍向有通盜參賊惡習請責成提鎮大員立予重典毋稍袒護最後乃條陳學政事宜四公方職文字所言皆軍國大計封疆要務公不以出位爲嫌上亦不以侵官爲慮奏夕入旦卽下所司議行蓋公忠誠上結兩朝聖明之知見諸施行彰彰若是其他心有所欲言與言而未盡者雖其家不與聞無由知若其著於譜者又不能悉載也公學無不窺以窮經致用爲本文不取艱澀以達爲主所上封事洞胸而出恂恂款款曲盡情事論者謂其近古名臣奏議嘗奉命恭擬陝甘平原地方教民論二篇 睿廟稱其通暢降旨刊

行西人至今能誦之著有樹屏文集年譜族譜若干卷性至孝先  
後陳請歸養終身孺慕督學陝甘時過碾伯舊治訪求先公手治  
故廬遺蹟見舊時老吏悽然涕下歸田後以私宅作家廟以祖遺  
產爲祭田兼贖養疎族之貧而無告者與人交胸無城府義之所  
在斷斷不少屈人有片長稱道不釋口屢掌文柄凡爲考官學政  
外知會試貢舉一監順天鄉試繙譯會試各一武會試總裁一會  
試覆試 朝考翰林散館閱卷大臣七稽查左右翼學二大挑直  
省舉人一拔識多知名士督學時尤兢兢以正人心端士習爲亟  
世競稱其在閩時嘗闢廟文此特公借以警愚頑之苦心無足爲  
公異獨念公抱經世才未得大展其用或以公孤立寡援爲惜嗚

呼此尤見公遭際 聖明恩禮始終之大節爲暢然無憾者矣公  
春秋七十有二配李夫人淑慎慈惠先公八年卒子四人浩早卒  
湛優貢生候選知縣滔三品蔭生通政使司經歷改補貴州印江  
縣知縣李夫人出潤側室李孺人出女四人李夫人出者一乙酉  
拔貢蕪湖知縣陳葆森其壻也餘側室出孫十人慶榮郡學廩生  
慶楷縣學附生曾孫十五人蓋公之後方昌矣公歿後鄉人以公  
行誼上於 朝奉 旨入鄉賢祠銘曰

奕奕韓公西土之光南國之紀爰自臺館游歷卿貳迄歸田里其  
氣嶽嶽其論侃侃無少挫靡公言言官以言爲職當持大體公爲  
大臣以言造福施及四海凡公所言協乎筮龜人厭 天喜百鍊

之精兼金之純以礪以砥謂宜秉軸持天下衡萬物受理孰示去  
國會不崇朝嶽頽星隄哲人之痛朝野同聲豈獨小子述德表哀  
伐石刻辭敢告來禋

右神道碑銘鄧顯鶴撰



明山

明山薩克達氏滿洲鑲藍旗人乾隆六十年由筆帖式授刑部主事嘉慶九年升員外郎十二年四月升郎中五月充山海關監督十五年京察一等記名以道府用十六年授直隸熱河道十八年赤峰縣回民張興業呈控明山酷刑判斷偏勒畫供上解明山任命戶部侍郎桂芳都統毓秀鞠之誣復明山任二十年九月升浙江按察使十二月調廣東按察使二十二年升福建布政使二十四年以年底盤庫造冊遲延又未遵例加結命傳旨申飭二十五年四月擢貴州巡撫五月以福建廢員撥發軍臺有應追未完銀兩明山於藩司任內違例詳請援贖經兵部奏駁下部議



處道光二年三月 命確查前貴陽府知府劉榮黼在任事蹟尋  
專摺由驛馳奏 上以其不曉事體嚴行申飭六月授刑部右侍  
郎尋轉左侍郎八月擢雲貴總督三年三月奏言黔省雲騎尉世  
職向例於未補缺前每屆三年甄別均歸總督考驗該省各標協  
營距滇遙遠請改由貴州巡撫就近考驗分別應畱應斥下部議  
行四月御史尹佩棻條奏滇省應辦事件奉 旨交明山體察情  
形分別妥辦尋疏言滇省安置軍遺等犯較別省爲多不免有竊  
盜窩匪等事請責成專兼各官嚴加管束又鴉片煙最爲風俗之  
害滇省有種罌粟花採英熬煙之處請嚴飭文武各官於關津隘  
口留心查緝又滇省外來流民未便驅逐應責成地方官督飭鄉

約認真編查所墾地畝已成片段者酌量升科又滇省各廠鉛斤  
惟白鉛例准行銷該處與交陞久經通商應免查禁 上可其奏  
七月永昌府屬灣甸土司族目景正興挾帶印信逃赴木邦盤踞  
抗拒劫殺夷民明山飭調兵練防捕旋將景正興殲斃收獲印信  
邊界肅清四年十一月以太和麗江等處被水成災奏請分別豁  
糧蠲賑得 旨允行十二月 召來京署鑲紅旗漢軍都統尋授  
刑部尙書五年五月授正黃旗蒙古都統八月 諭曰明山精力  
頗形衰頹刑部事務殷繁難以勝任著專理旗務十月署都察院  
左都御史十二月 賜紫禁城騎馬六年正月 命管理正黃旗  
蒙古新舊營房五月授熱河都統尋復授刑部尙書兼正黃旗漢

軍都統九月署鑲紅旗滿洲都統七年九月署兵部尙書十一月  
署直隸總督八年七月以副都統銜頭等待衛恩緒毆斃家人之  
案刑部陳奏遲延下部議處尋議降二級畱任不准抵銷 諭曰  
刑部堂官於恩緒毆斃家人一案遲至二十餘日之久並無一字  
奏及皆由該堂官不能督飭司員勤敏辦事以致於此刑部爲刑  
名總匯似此瞻顧延宕必致顛倒是非難成信讞流弊殆不可問  
是該堂官已屬辜恩溺職嗣後該堂官審辦案件務當督率司員  
認真訊辦期得實情應奏卽行趕緊具奏不許稍涉顛預儻仍有  
延宕瞻徇情事經朕查出必從重治罪決不寬貸八月署鑲白旗  
漢軍都統九月復署兵部尙書充繙譯鄉試正考官九年署理戶

部三庫事務十一年二月明山以部務殷繁奏懇免進武職六班  
報可七月充崇文門正監督十三年以刑部疎防官犯李湘清  
越獄脫逃部議降三級調用 諭曰李湘清以擬遣官犯膽敢於  
刑部重地越獄脫逃該堂官等漫不經心玩泄已極吏部請將該  
堂官俱降三級調用本屬咎所應得姑念一時簡用乏人著加恩  
改爲降四級畱任十四年因病開缺尋卒 諭曰原任刑部尙書  
明山由刑部司員外任道員洊擢巡撫朕御極後擢任侍郎總督  
雲貴晉秩尙書兼轄旗務宣力中外四十餘年敬慎清勤克盡職  
守昨因病請假旋准開缺俾得安心調理方冀速痊益資委任茲  
聞溘逝殊深軫惜著賞加太子太保銜照尙書例賜卹所有任內

國朝通志卷一百一十五  
一切處分悉予開復應得卹典該衙門查例具奏尋 賜祭葬于  
祺昌兵部員外郎孫富泰太僕寺少卿三十年十一月追 封三  
等承恩公十二月 諭曰孝德皇后之母家著擡入鑲黃旗曾孫  
德懋襲承恩公爵

右 國史館本傳

徐炘

徐炘順天大興人乾隆五十七年舉人六十年乙卯科會試上  
命大臣覆校落卷得文理優者三卷炘與焉 特賞內閣中書九  
月補官嘉慶三年丁母憂六年服闋補原官充軍機章京十一月  
丁父憂九年服闋補原官仍在軍機處行走十二月升內閣侍讀  
十一年奉 旨記名以御史用十二年三月京察一等七月扈  
蹕灤陽校射中三矢 賞戴花翎十四年正月京察一等人員復  
帶領引 見奉 旨記名以道府用二月補福建道監察御史三  
月授江南河庫道八月署江甯布政使十六年王營漫口合龍炘  
在事出力奉 旨交部優敘十七年因委查蕩柴情弊草率結案

部議降三級調用 上加恩改爲降四級畱任十八年保薦卓異  
十九年正月署江甯布政使先是直隸教匪煽亂延及豫東擾滑  
城 上從兩江總督百齡請 命駐江南邊境籌辦防堵事宜事  
平敘功 賞按察使銜二月投江西按察使四月調湖南按察使  
二十一年升陝西布政使二十二年正月護理陝西巡撫時有傳  
習邪教男婦具結首悔所奏請免罪釋放 諭曰此等入教莠民  
平日甘心邪愚迨被獲畏罪藉口改悔冀圖一時苟免釋放後仍  
將故智復萌該護撫槩予釋放殊覺漫無區別徐所著傳旨申飭  
除自首之王瑞朋等免罪釋放外其孥獲之魏景昌楊得才等仍  
照所犯之罪分別問擬不准寬免二十五年調山東布政使道光

元年正月 上以東省倉庫錢糧三次清查仍有名無實 命將歷次清查之案覆加詳覈四月署山東巡撫六月調福建布政使先是長山縣監生王鳳廷京控縣書多徵浮折 上命忻偕山東布政使琦善會鞫得實長山縣令劉宗錫褫職遣戍論王鳳廷等如律二年 上聞忻養尊處優不理公事 諭福建巡撫葉世倬訪察密奏九月 召還京三年以三四品京堂候補授內閣侍讀學士六年四月授陝西布政使七月護理陝西巡撫時逆回張格爾滋事 上命大學士長齡爲揚威將軍及提督楊遇春參贊大臣武隆阿統領大兵赴剿陝省撥解餉銀調派兵弁及照料過境弁兵諸事忻專司之八年正月 諭曰徐忻自上年回疆用兵以



來應付兵差一切妥速督辦年餘始終其事著加恩交部從優議敘二月因略陽縣城被水衝塌奏請在迤東文家坪移建新城並建文武員弁衙署倉廩監獄兵房等項籌款興修 允之五月上以軍營倖解逆酋來京自阿克蘇各城大臣及陝甘河南直隸各督撫沿途委員護送一切妥協宜量予加恩忻得下部優敘八月授山西巡撫九年四月奏晉商行銷豫省引鹽請照舊設章程辦理得 旨允行五月奏文浴河由文水縣西北發源故道久湮昔議疏挑徒勞虛費惟有順水之性暢水之流或截灘偏溜以杜其旁溢或督率疏濬以納其來源其各村所築護村隄堰不得攔河築堰以杜爭端而資捍衛 上如所議六月平定州民婦朱萬

氏京控連斃三命放出正兇兩次具呈巡撫不爲申理 上命侍郎史致儼鍾昌往按奏入奉 旨徐忻著降二級畱任十年四月奏請常平倉穀出陳易新並暫緩採買而濟民食 上從之九月調署陝西巡撫十月御史葛天柱奏參徐忻貪劣各款 上命尙書松筠侍郎保昌往按解忻任赴山西聽候傳訊十一月松筠等鞫實入奏 諭曰解任山西巡撫徐忻前經御史葛天柱奏參各款茲據松筠等奏該御史所參查閱營伍家丁勒索及題升調補委署各缺任意營私等款查明均無其事其門丁顧鴻如之服役人劉泳成已將屍棺開驗復詳訊供情實係因瘋自戕並無謀斃情弊惟徐忻當時不派臬司相驗訊辦又不專摺奏明致滋物議

殊屬錯謬其秋審過堂時徐炘家屬在堂後隔簾看視管教不嚴亦咎無可辭徐炘著交部嚴加議處卽來京聽候部議尋議降六級調用復奉 諭曰前因御史葛天柱奏參徐炘各款內有絳州直隸州知州呂士瀉在省逗遛營謀情弊當交松筠等查訊茲據奏稱嚴訊該員實因奉調在省尙非無故逗遛並無營謀劣跡呂士瀉著令回任徐炘前於劉泳成因瘋自戕一案未經奏明及管教不嚴咎有應得姑念其於呂士瀉被參營謀該撫重款訊明並無其事已另降諭旨將徐炘加恩降補湖南按察使著免其降六級調用十一年正月 召還京以四五品京堂候補十月以西安府同知衙門效力把總投充錯謬炘曾歷任陝西撫藩有失覺察

部議降調 上加恩改爲降四級畱任十二年七月授太常寺少卿閏九月以前在湖南按察使任內失察逆獠趙金隴滋事降二級畱任十三年督辦順天府清河賑務十一月署光祿寺卿十二月補光祿寺卿十四年四月因病奏請開缺奉 旨允准尋卒子祖培兵部郎中承採二品廕生光祿寺署正捐升員外郎培候選批驗所大使

右 國史館本傳

國朝書目考卷一百九

書

韓文綺

韓文綺浙江仁和人乾隆六十年進士嘉慶二年補刑部主事三年充順天鄉試同考官五年丁父憂八年服闋補原官九年升員外郎十年充會試同考官旋升郎中十一年丁母憂十四年服闋補原官十七年授直隸永平府知府十九年升清河道二十年八月上幸木蘭以蹕路未能經理妥協下部議處十二月查拏灤州教匪王殿魁等文綺首先獲犯上嘉其緝捕勤能賞戴花翎二十二年二月授廣東按察使九月調貴州按察使十一月調四川按察使二十五年三月升江西布政使六月擢刑部右侍郎十一月充武殿試讀卷官十二月轉左侍郎道光元年三月因

審辦德勝門城上失落木植未能究出實情下部議處部議降三級調用上加恩改爲畱任二年閏三月充殿試讀卷官八月充順天鄉試副考官九月授江蘇巡撫十一月偕兩江總督孫玉庭奏揚州府所轄瓜洲河道亟應疏濬深通估需工料銀二萬二千餘兩請在藩庫籌款動撥得旨果於水利民生有益何吝多金總在認真經理也勉之三年三月奏兌運蘇松等屬幫船請掣定水次輪流受兌以除積弊又審擬民人柏喬治呈控修撰洪瑩買有夫之婦爲妾一案鞠實褫洪瑩職並請將先後提審未能究出實情之甘泉縣知縣陳文述揚州府知府黃在厚交部議處均從之五月奏清理徐州駱馬湖官民灘地分別蓄草收租得旨

允行七月奏劾鹽道廖均未經更事請改補京職 上以廖均質性輕浮 命勒令休致先是淮商鄭同瑞京控總商黃灤泰侵欺庫款 詔文綺嚴密訪查弗令蒙混十一月奏黃灤泰別無罪狀但疊被散商訐控究係眾論不孚應請革退總商作爲散商隨同辦運 從之又奏清河縣水陸衝途請裁淮安府檢校另於清河澗橋置巡檢一員就近稽查如所請行四年二月奏許揚兩關恤商除弊及賠補虧短章程一委員宜慎重簡派一家丁宜按名覈實一漏罰宜遵守成例一查稅宜嚴杜羈措一漕船宜嚴禁夾帶至賠補虧短許關應照新例按各任月日接算賠繳揚關經徵月分衰旺不同應以月分之衰旺計成數之多寡於賠繳之中仍寓



體恤之意疏入 允之七月奏江蘇倉庫虧墊酌議追補及防杜  
積虧章程一墊完民欠宜分單勒限催追一本省外省官員分別  
勒限追補一本省外省追賠銀兩應酌展限期完繳一領變銀款  
應勒限追補一攤捐銀款應分別流攤追補一書役欠項應分限  
嚴追歸款一無著銀兩應仍提羨餘彌補一存倉米穀宜勒限買  
補足額下部議行閏七月以刑部侍郎任內擬流官犯侯際精呈  
請贖罪漏查紅供并失察官吏得贓降二級調用又以前任刑部  
濫保司員德恩等部議降二級調用上改爲補官日降三級畱  
任九月補山東按察使五年二月升四川布政使七月調雲南布  
政使九月授江西巡撫六年奏被水之蓮花萍鄉永新宜春安福

廬陵分宜等七廳縣應請撫恤並緩其賦悉如所請行先是御史熊遇秦奏江西南安贛州一帶鹽梟會匪肆行無忌上命文綺逐加訪查毋稍疎縱至是奏請將首惡嚴辦示懲選舉族正鄉耆查明勤惰分別獎勵斥革復於衝要處所移駐專閫大員以資彈壓得旨總要認真查辦勿蹈模稜徇庇之習戒之勉之七年奏宜黃樂安二縣陸卡請移設峽江縣龍母廟地方由贛州鎮遊委都司一員兵五十名另委佐雜一員帶役八名會同堵緝至萬安縣芙蓉門爲粵私侵入門戶馬家洲爲私販囤積之所見於芙蓉門之上游添設一卡并於馬家洲另設卡隘以期梟徒無從囤積從之八年正月以江西學政福申失察家人蕭三恣橫藐法褫

福申職文綺以近在同城不能畱心查察部議降二級畱任四月  
奏南贛等府匪徒出沒請動支閒款設巡船四十隻上下梭巡較  
爲周密得旨允行九年十月授都察院左副都御史十年以前  
在江西巡撫任內督催地丁錢糧不力部議降三級調用諭曰  
因公處分原可改爲畱任惟韓文綺前在江西巡撫任內並不力  
加整頓以致會匪日益增多地方廢弛著實降一級調用十二年  
七月以署直隸按察使任內失察清河縣民人尹老須倡立邪教  
降二級畱任十六年十月因病請假調理二十一年卒子倬章見  
官江蘇候補知縣孫泰華見官戶部員外郎

右 國史館本傳

國朝書獻類微初編卷一百十目錄

卿貳七十

莫晉

賈允升

陸以莊

鄂山

博啟圖

常起

姚文田

貨慶



國朝耆獻類徵初編卷一百十

通奉大夫前署江西巡撫江西布政使司布政使湘陰李桓輯  
卿貳七十

莫晉

莫晉浙江會稽人乾隆六十年一甲二名進士授翰林院編修嘉  
慶三年二月大考二等擢侍講五月充福建鄉試正考官八月  
命提督山西學政四年二月轉侍讀三月遷右春坊右庶子四月  
升翰林院侍講學士六年差滿回京七年充武會試副考官八年  
二月轉侍讀學士三月大考二等尋充日講起居注官四月調通  
政使司副使九年二月 上幸翰林院分韻賦詩晉與焉七月擢

太僕寺卿八月充順天鄉試副考官九月升太常寺卿十二月提督江蘇學政十年五月遷通政使司通政使十一年擢都察院左副都御史十三年正月疏言安民先在止訟獄訟所以日繁由誣告者多誣告所以日多由有司平日疎於約束臨時又畏其居心叵測雖審明所控子虛猶且曲爲開脫由是刁風愈長奸民無所顧忌於官府官府轉顧忌於奸民請 敕各省官員遇案情虛誣卽按律科斷不得藉端未減以清訟源 上嘉之六月充江西鄉試正考官十四年丁母憂十六年服闋乞終養十八年丁父憂二十一年三月服闋十一月補都察院左副都御史十二月升倉場侍郎二十五年以各幫米色乾潔驗收無滯下部議敘道光二年

偕侍郎和桂奏言部議倉儲章程內有窒礙難行之處先是御史常賡奏請以放代盤不必按期派倉經部議自本年三月起三倉輪放按期放竣後再行接派三倉其見放之倉停進新糧晉謂以放代盤係嘉慶十四年舊例但今昔情形不同請緩至七月盤起欽派三倉先行開放俟明年正二月開放竣三倉以後應否接盤奏請 聖裁並請將新漕分進十一倉另敷儲存 諭曰倉儲爲天庾重地以放代盤法歸簡易若新陳牽混仍恐易滋弊端著將京城十一倉全局通盤籌畫安定章程詳奏盤查防弊七事部議未准晉以部臣任意駁斥巧借以放代盤四字爲護身符而見定章程實已將嘉慶十四年成案紛更殆盡又劾戶部議事錯謬



蒙混幾如隔壁講話不知所云且詭譎欺飾肆意妄行無所不至  
尋經戶部逐條申辨 上以所劾名款如確有指實必當澈底查  
辦不得以無據之詞妄肆詆毀 命來京明白回奏晉奏言部議  
章程皆非舊例惟以放代盤四字爲舊例耳謂其巧藉此爲護身  
符似不爲過前常慶請盤查兩倉暫停進運戶部駁其必致囤堆  
及其自行定議轉少四倉謂非前後矛盾而何臣等議盤竣一倉  
之後接放一倉此乃一定事理乃部議駁爲窒礙難行無端生出  
三旗人等擁擠一倉等語眞乃謬以千里謂非隔壁講話而何部  
議五倉進米業經奏准迨見臣等奏駁明知五倉不敷進運翌日  
咨稱五倉不敷卽另倉收存顯係見臣等奏駁後立趕咨文以爲

覆奏時掩飾之地卽謂部臣心術不應詭譎至此而其不自行請旨擅改章程謂非肆意妄行而何奏入 上命大學士軍機大臣等會議尋議以放代盤徒有清查之名無裨實濟倉場歷次陳奏尙非無據之言惟籌議盤查之法亦未能切中竅要又不和衷商榷竟肆詆毀殊屬褊躁請交部嚴加議處 諭曰莫晉於盤查事宜所論皆屬因公惟與戶部意見不同經朕令其明白回奏猶復負氣辯論殊失敬事辦公之道朕斷不肯因其負氣辯論挑斥於語言文字之間從重治罪此非施恩於莫晉深恐後來言事者動輒避忌不實盡情於國是大有關係莫晉毋庸交部議處著降爲內閣學士三年以次乞歸六年卒子鍾琪二品廕生刑部主事

國史館本傳  
右

莫寶齋侍郎晉任倉場時因常州武弁旗丁與州縣互控牽涉多人滿侍郎潤祥議交刑部審訊公議咨交兩江總督就近鞠之潤祥持不可公不爲屈遂各執奏陳辨 上前 仁宗卒從公議今通州倉場署滿漢兩寮各榜和衷報國四字 仁宗綸音爲公立也公視學江蘇劾署藩司鄂雲布玩公護短道光二年以通場盤米事與戶部互訐連拜三疏措詞峻激至以糊塗昏憤不通文義詆部臣而以洞悉倉務無踰於臣自詡時戶部滿漢兩尙書皆軍機大臣方嚮用朝士皆爲公危 上竟不之罪 諭稱莫晉所論皆屬因公惟負氣辨論失敬事之道僅令降一級爲內閣學士公

謝疏有云 主聖則臣自直仰欽 厲世摩鈍之精心 恩深而  
命轉輕彌堅報國忘身之素志朝野誦之 康祺按戶部覆奏時右  
侍郎湯文端公獨自行  
檢舉蓋信莫公素學必不妄相糾彈故深  
自引咎也忠實如兩公足為吾越人重矣

右紀聞陳康祺撰

Table with 10 columns and 1 row. The table is mostly empty, with some faint marks in the cells. The right edge of the table contains vertical text: 日本書紀卷之五十一 武烈天皇本紀第十 一

147-580

賈允升

賈允升山東黃縣人乾隆六十年進士改翰林院庶吉士嘉慶元年散館授檢討六年充會試同考官改陝西道監察御史七年充會試同考官八年四月 命稽查祿米倉奏請除積弊一各倉米石宜更遞收放一官兵私賣米票宜設法斷絕一倉米出京宜嚴行查禁一各倉花戶宜嚴加防閑一在京諸倉宜多儲米石 上命戶部會倉場衙門議奏尋議行查禁倉米出京及防閑花戶二款時三省餘匪盪平允升奏言教匪已平休養生息是其急務臣來自田閒見外省積弊有害於民者數事請申嚴法令爲之限制一首慈惠以專考課一禁薦託以絕弊累一省官差以安農務一

除官價以靖市塵一懲胥役以遏暴橫一申禁令以挽奢僭章下  
廷臣議議上 諭曰大學士會同吏部議奏賈允升條奏各款分  
別准駁已依議行內如清查驛站一款各省驛站安設馬匹原以  
應付辦公遇有大臣官員等奉差經過若於例給馬匹不能足數  
或羸瘦不堪驅使以致耽延稽滯此係玩誤公事自當將該州縣  
參辦若應付本無不足馬匹臆壯而奉差之員例外多索甚至縱  
容跟役人等多方作踐橫索使費此又係差員有意騷擾該州縣  
卽當申報上司據實具奏朕必嚴行究辦至外省督撫司道公出  
之時責令州縣備辦夫馬需索供應書信往來亦每由驛馳遞甚  
至長隨家人私事外出亦復騎用驛馬沾站需索大爲驛站之累

此皆朕所素知嗣後當力除積習各自檢束至嚴禁官價一款各衙門需用貨物自應照市價平買安得輒立官價名目向鋪戶紛紛科取倚勢病民著永遠禁革十一月奏言聞自十月以來山海關不得出口擁擠之人盈千累百俱經守關弁兵驅逐其隻身出關傭工覓食者因領票稍有參差不得放行恐日積日多屯聚關口食用無資顛連流離無可歸著非所以仰副 皇上矜恤窮黎之至意卽商旅往來亦恐因多有阻滯不敢出口交易轉使東三省地方百貨騰貴於該處生計深爲不便奏入 上命山海關副都統來儀詳查據實覆奏旋奏稱均無其事 諭曰來儀所奏雖自稱實在情形不敢隱飾但賈允升前奏自必確有所聞關口地



方弊竇百出來儀卽不肖有心苛辦而屬下兵役人等藉端需索當屬事所必有不可不嚴行懲辦以便商民嗣後來儀當實心經理隨時訪查是月奏請恭修 高宗純皇帝本紀 上是之九年四月奏請嚴禁窆改題本蓋印之處以防流弊 上嘉其畱心國政非摭拾浮言可比旋 命巡視東城六月充湖北鄉試副考官尋遷刑科給事中十年 命巡視北城訪獲番役楊廷桂開店窩賭爲害地方又拾獲匿名揭帖係控告大興縣增長鋪戶行稅先後奏奉 諭旨下所司查辦均得實十一年轉掌刑科給事中 命巡視天津漕務十二年四月奏青縣之捷地滄州之興濟德州之哨馬營恩縣之四女寺有減水河四道哨馬營四女寺二壩石

工漸次傾圮河身高仰不足洩水請 敕下山東巡撫查勘修濬  
俾復舊規又奏天津地方自開年以來未得透雨米價昂貴當豫  
爲籌畫或不糶或借賑請 敕下直隸總督早爲酌辦均得 旨  
允行五月有雲南運銅委員署太和縣知縣謝樟呈請調劑運銅  
利弊四條允升以其言得之親身閱歷採以入告一慎防偷漏沈  
溺請責成江北廳採選堅固民船裝載一運費當於出差時全行  
發給一裁禁護木以便迅行一秤桿兌銅弊應嚴禁章下戶部議  
行八月擢鴻臚寺少卿仍畱巡視天津漕務之任十月奏糧船遲  
滯因臨清關口攔阻兩月不得啟板放行天津迤南有減水河四  
道臣四月間奏請修復舊制蒙 皇上諭令山東巡撫估挑四女

寺哨馬營二河在案果其遵奉 諭旨及時興修一律疏濬盛漲之時水有所洩何至七八月間有臨清攔阻之事無如東省於奉旨後僅將四女寺一河略加挑挖有名無實又四女寺哨馬營二河雖在山東其下游則經歷直隸之吳橋鹽山慶雲等縣仍由山東之樂陵海豐等處入海地勢犬牙相錯兩省互相推諉以致遷延廢事請 敕下直隸總督山東巡撫及時查勘督率挑挖各專責成勿再推諉更請酌定歲修章程永無廢弛 上是其言

命溫承惠吉綸會籌妥辦十三年八月遷光祿寺少卿十四年正月以前官刑科給事中時廣興奉使山東擅作威福贓私纍纍允升籍隸山東未能彈劾降一級調用三月丁母憂十六年服闋補

鴻臚寺少卿十七年三月奏東省年歲歉收糧價昂貴請將倉穀改糶爲借以拯貧民 上命山東巡撫同興速卽妥辦除減價平糶外將極貧戶口查明賞給口糧以資賑恤十二月遷光祿寺少卿十八年四月遷通政使司參議尋擢內閣侍讀學士十月遷太常寺少卿十九年八月太常寺官以祭社稷壇祝文錯誤皆獲譴 上以允升不諳清文 特加恩寬免處分九月以太常寺地租草價銀兩虛銷奏請將短交草價之奉祀及辦理錯謬之寺丞博士司庫交部訊問並自請交部議處 上以允升自行查出加恩改爲察議尋議降一級調用准其抵銷九月擢通政使司副使奏言太常寺尙有必須整頓查辦之事未敢以已經離任置身事

外敬以管窺之見酌擬數條一齋戒宜嚴一祭器宜修一制帛存  
庫宜嚴稽查一犧牲所餵養牛隻宜專責成均得 旨允行二十  
年四月 命稽查右翼覺羅學五月擢宗人府府丞二十一年提  
督安徽學政二十二年遷都察院左副都御史仍畱安徽學政任  
二十四年回京道光元年充順天武鄉試副考官三年擢兵部右  
侍郎十一年 命以原品休致十二年卒子楨吏部尙書協辦大學  
士樾原任翰林院編修

右 國史館本傳

陸以莊

陸以莊浙江蕭山人嘉慶元年進士改翰林院庶吉士四年散館授編修五年充湖南鄉試正考官六年提督貴州學政九年任滿回京十二年七月充江西鄉試正考官十月充日講起居注官十三年四月擢右春坊右中允五月轉左中允充雲南鄉試正考官閏五月升翰林院侍講十四年遷右春坊右庶子尋轉左庶子十五年正月命提督陝甘學政二月升翰林院侍講學士八月仍畱學政任十七年轉侍讀學士十八年八月遷詹事府少詹事十月任滿回京升太常寺卿十九年七月擢宗人府府丞九月遷都察院左副都御史二十一年八月充順天鄉試副考官九月升工

部右侍郎二十二年充武殿試讀卷官二十三年以工部續估東  
嶽廟工程失察司員及書吏得贓部議降三級調用上加恩改  
爲畱任二十四年四月充殿試讀卷官六月充江南鄉試正考官  
十月教習庶吉士二十五年充殿試讀卷官教習庶吉士道光元  
年轉左侍郎二年正月調戶部右侍郎兼管錢法堂事務三月以  
失察工部承辦壇廟要工司員書吏受賄弊混部議革職  
上加恩改爲降四級畱任尋調兵部右侍郎八月調刑部右侍郎  
九月轉左侍郎十月充武會試正考官三年正月因病奏請開缺  
調理四月病痊署工部左侍郎旋補禮部左侍郎七月升都察院  
左都御史九月命充國史館副總裁官十二月充經筵講官四

年七月擢工部尙書兼管順天府府尹事務十一月 賜紫禁城  
騎馬六年充會試副考官七年正月奏言順天府四路同知向例  
與各省同知一律歷俸十年以上調取引 見但四路同知分管  
二十四州縣地方審勘刑名覈轉錢穀報銷其專管考成與知府  
無異且附近京城巡防緝捕最關緊要較府屬同知繁簡懸殊請  
援照大宛兩縣正佐各官例歷俸三年送部引 見二月奏言四  
路同知管轄捕盜弁兵原設千總一員把總四員經制外委四員  
額外外委兵丁共二百八十員名馬二百三十六匹向係專司緝  
捕自乾隆三十年將順天府屬州縣刑名案件歸四路同知覈轉  
事務較繁責任又重於督緝而各弁兵分列於二十四州縣地方



該同知鞭長莫及與其虛糜餉銀不得實濟莫若量爲裁改請將四路同知原設捕盜弁兵各存留把總一員馬二匹經制外委四員額外委一員各官馬一匹兵二十名馬二十匹並留戰兵十名共馬步兵三十名合之四路同知各額設馬快十二名步快八名統計緝捕官各三員兵役各五十名均責令該同知督率巡緝京營交界地方以佐五城捕務所不及奏入均下部議行五月因病奏請開缺調理七月卒 諭曰原任工部尙書陸以莊前於嘉慶年間由翰林洊升卿貳朕御極後擢任左都御史旋授工部尙書兼管順天府府尹事務清慎認真克盡職守本年因患病賞假一月嗣假滿未愈陳請開缺降旨允准諭令安心調理方冀日漸

就痊藉資委任茲聞溘逝殊堪軫惜著加恩照尙書例賜卹伊次  
子二品廕生候選通判陸恩紱著俟服闋後遇缺卽補尋 賜祭  
葬 予謚文恭子恩燾直隸大名府通判恩紱候補通判

右 國史館本傳

同治元年庚午正月十一日

二

鄂山

鄂山博爾濟吉特氏滿洲正藍旗人嘉慶元年進士以知縣用選授廣東保昌縣知縣引見改補山西浮山縣知縣三年丁母憂七年服闋補甘肅會甯縣知縣八年調皋蘭縣十年升安西直隸州知州十五年調邠州直隸州道光元年擢陝西同州府知府二年三月調西安府九月升糧儲道三年授河南按察使四年遷陝西布政使五年四月署陝西巡撫五月實授九月署陝甘總督先是青海口外插帳野番偷渡河北搶掠經前任督臣那彥成檄調將弁剿捕十二月奏河北番城殲除殆盡見飭剿捕竄匿餘匪請將防河官兵添派四百名設卡駐劄以防代守並移會四川總督

檄果洛克千戶等一體緝捕又疏言前任總督那彥成奏定將陝甘提鎮馬兵改爲守兵以節經費查烏魯木齊巴里坤兵丁繁劇全賴糧餉養贍若遽改裁於兵丁生計有礙且新疆地方窩遠馬兵之用所賴實多請量爲變通於該二處摘缺緩補無馬之馬兵以馬改步每處改裁一百四十六名以多裁馬兵之糧餉抵少裁馬匹之草乾覈與奏定節省銀數既有盈無絀而於兵額亦無減少疏入均從之六年五月奏陝西新設佛坪廳請添建城垣得旨允行七月復署陝甘總督時逆裔張格爾入卡滋擾上命鄂山安速籌備糧餉會同前任陝西巡撫盧坤總理軍需事務旋奏言肅州距阿克蘇道里遙遠僅於哈密派員督辦尙恐鞭長莫

及請於吐魯番庫車兩處設立糧臺專派大員分駐並多設腰站  
委員催前提後遞相接運如所請行十月偕盧坤奏籌解備用軍  
餉並調撥四川西安官兵進剿情形得 旨汝二人係朕特簡之  
人深知公誠可靠是以投此重任務當和衷共濟成此大勳一切  
出納實心經理斷不可存避嫌遠謗之心勉之十一月奏皋蘭等  
廳縣秋收款薄暨供辦兵差各地方請緩其賦並請借給皋蘭等  
十四州縣災民口糧 允之十二月奏請籌解馬匹得 旨見在  
軍營所需馬匹著派員迅速解往大營毋稍遲誤該署督前奏調  
馬二萬有餘誤將上年喀什噶爾調用之馬一併計算並未撥除  
鄂山著交部察議七年二月以署安西直隸州知州王世焯玩延

軍需奏請礮賊又奏托克遜爲烏魯木齊糧臺之首雖有鎮迪道湯帥在彼往來查催不能在臺常駐仍恐照料難周請以前任甘肅臬司方載豫移駐會同經理均如所請先是偕盧坤條奏籌辦軍需章程臚陳十一事一多儲大營糧餉一量加兵丁口糧一駝馬出口官給草料以資飽騰一營馬缺額亟爲買補以供續調一監造軍火器械以備折衝一撥解陝省制錢以平市價一添設臺站大馬以速軍報一價雇商民車輛以供轉運一雇募護臺民夫以資防守一出口兵丁加賞皮衣皮帽以禦嚴寒一後路糧臺酌駐官兵防護以資慎重疏入議行其三仍命體察情形妥酌辦理至是歲貨價矣上以此次回疆用兵遠在口外一切軍行馱

載供支等事原與腹地不同悉如所議行四月疏劾署威遠營都司魏吉貴藉病避差請褫職五月奏青海口外野番偷渡河北搶劫牲隻檄西甯河州二鎮總兵官榮玉材等率領兵勇分投勦捕斬馘無算並生擒番賊十九名均置之法七月以回疆漸次蕩平奏陳撤兵節費籌議善後事宜略言首逆張格爾脫逃未獲竄往阿賴拉克沙木吉等處潛蹤無定若仍久駐大兵無論出卡路徑紛歧裹糧追捕後路轉運不及縱帑庫充盈亦不值以中國有用之金錢施之於荒服無用之夷地且時交冬令塞外早寒率師深入日去日遠似非所宜請早將大兵撤回一面酌留或一萬或八千之數分布四城籌辦善後並嚴禁往來貿易外夷及隸入版圖



各回民均不准輕放一人出入卡倫使內奸外逆聲息不通竊料  
浩罕安集延及布魯特等處回眾既不得內地大黃茶葉等物接  
濟又不得銷售皮張貨物資生乏策卽足制其命不出二三年必  
有以張逆爲奇貨或生擒或函首來獻願懇弛禁者此必然之事  
不勞師旅而罪人斯得矣疏入 上聽其言又奏請將幫辦幕務  
之陝西舉人楊浚以知縣銓用格於例 嚴飭之仍交部議處尋  
以克復四城鄂山轉餉有功 賞戴花翎並加太子少保銜八年  
正月首逆張格爾俘擒凱撤敘功 諭曰署陝甘總督鄂山自軍  
興以來督辦糧臺轉運不遺餘力及凱撤官兵過境辦理善後事  
宜悉臻妥協且喀什噶爾軍營尙有畱防官兵一萬八千名均已

豫備經費無誤接濟實屬始終勤奮見在逆首就擒大功告成鄂  
山著賞給頭品頂帶三月奏請回任 詔暫留甘肅督辦報銷十  
年九月安集延回匪入卡滋事鄂山復署陝甘總督辦理軍需糧  
餉十一年正月計典屆期有 旨陝西巡撫鄂山兩次總辦軍需  
誠實精詳毫無貽誤著交部議敘三月奏各城均就肅清未到弁  
兵撤回原營領過俸賞請分別扣免以紓兵力 允之尋擢四川  
總督十月酌議嚴禁鴉片煙章程略言查禁鴉片必須先查官吏  
俾免包縱徇隱當飭藩臬兩司密查各屬官員如有吸食卽行揭  
參並嚴查各衙門官親幕友家丁胥役有吸食者加等治罪至各  
關隘口凡遇客商私帶煙土卽卽究辦備書役受賄故縱卽將該

管官一併參辦如此則官員自顧考成管束必嚴丁胥知所儆畏  
查拏必力疏入得 旨鄂山奏查禁鴉片章程所見至當正百官  
以正萬民要在認真懲辦俱照所定章程辦理十二年疏劾不職  
州縣周鑿等四人降黜有差十三年四月兼署成都將軍十二月  
奏甯遠府屬之越嶲廳有曲曲烏窩石等支生夷出巢在西羊場  
等處與漢奸勾結焚搶擾及清溪峽邊等廳提督桂涵新任提督  
楊芳勦平之請暫留官兵四百餘名分布要隘以資防守並在省  
設局清查軍需如所請行十四年七月奏峽邊廳十三支赤夷內  
雅札等以竊漢民竹筍起釁藉稱報復勾結馬邊廳支夷糾眾  
焚掠劾參將樊豐等辦理延玩降革有差八月奏勦辦情形 諭

曰楊芳上年奏報三廳地方一律肅清何以未及半年卽有焚掠之案此次趕緊辦理調兵派將已閱數月之久若能杜絕萌芽不致再肇釁端方爲辦理妥善如辦理草率爲時未久復有夷匪滋事該將軍等不能當此重咎也九月奏雅札石畢等支夷出巢滋事經提督楊芳痛加勦辦全就肅清據十三支赤夷各出具木刻自行檢束娃子於各支公舉頭目二十六名歲給犒賞在文武衙門聽差藉以鞫縻而通聲息並請於地方要隘設立汛防弁兵以資巡緝 諭曰該將軍等當隨時防範杜絕萌芽庶不致重煩兵力儻敢仍前怠玩閱時未久該夷等再有搶劫情事惟該將軍等是問先是廷臣有以鄂山署內門丁楊姓並幕友楊姓二人朋比

爲奸內署服役僕婦馬氏交通作弊招搖誑騙受賄營私該省有  
三楊開泰一馬騰空之謠又馬邊廳同知趙岳蘭以銀萬兩浼從  
九品段崇善串通督署家人謀署瀘州知州缺等詞入奏 上以  
鄂山身任總督大員家人幕友自應嚴行約束不許干預公事如  
所奏門丁幕友僕婦朋比爲奸實出情理之外 命鄂山明白回  
奏並自行確查據實究辦不准稍有諱飾至是奏言上年訪聞趙  
岳蘭之弟趙岳蕙被民人鄭瑞起意誑騙商同杜興等假造銀票  
寫立契約營謀署缺並跟役高五聽從屬探信息已經從嚴懲辦  
照例擬徒至楊升馬氏遵 旨交新任藩司提案嚴鞫仍自行確  
查究辦疏 聞 諭曰案關職官營謀署缺屬託探信既有廝役

人等招搖生事無論事情大小總當奏明辦理鄂山見不及此將就了事以致人言遠播此事該督罪止失察含糊結案反中一私字朕爲該督惜之著瑚松額督同藩司李義文秉公嚴審務得確情按律定擬十月瑚松額奏審明督署幕友家丁委無交通作弊原審誑騙未成一案並無不實不盡鄂山尙無徇私迴護惟案內干連已逐廝役不行奏明辦理僅照例咨部不自引嫌請交部嚴加議處部議降三級調用上加恩改爲降五級畱任十二月峩邊雅札等支夷匪復至雙溪卡白沙河搶擄劫楊芳前次辦理不善並自請議處上以鄂山雖未親往查辦惟率行會奏未能控制合宜下部議處部議降二級畱任得旨改爲降一級畱任仍

命鄂山瑚松額督飭所屬認真查辦務使附近各支夷與漢民均可相安以靖邊圉而杜後患十五年正月兼署成都將軍三月奏進剿峽邊雅札等支夷匪各路截平得旨嘉獎四月復奏進剿夷匪全境肅清賞加太子太保銜並賞戴雙眼花翎七月以邛州直隸州知州宣煥違例請升夔州府知府下部察議十二月以原保之建昌鎮總兵萬榮父子同營有心蒙蔽下部議處十六年十月入覲十一月賞紫禁城騎馬十七年五月以保送推升都司安定邦箭射無准下部察議七月奏馬邊夷匪復糾眾來擾劫遊擊王殿元署守備趙映從巡緝不力請褫職同知祥善不能先事防範請摘去頂帶從之十一月馬邊雷波夷匪滋事

齊同梁山野夷勾結附和檄總兵張必祿進攻老林提督余步雲等進攻千萬貫迭有斬獲生擒夷目燒燬寨柵救出被擄民人二千七百餘奪獲器械無算兩路官兵仍由天喜地方會合相機進剿奏入 諭曰該夷匪前此膽敢猖獗必當實力奮剿方足以儆兇頑此次尙有吉薩大木干西普庚扎易呼等支及起釁之烏拉並乞黑等支亦應一併懲創俾該夷等有所震懾不致甫散復聚著鄂山嚴飭將弁迅速蒞功不可任其窮蹙逃竄致有滋蔓十二月奏夷匪以梁山爲逋逃藪其中阿合等支地險族繁素多依附官兵大加剿洗各支夷紛紛投誠復乘勝移師至干落三溪等處盡力搜捕 上以該夷匪兇頑性成見當痛剿自必震懾逃竄命



鄂山等一律殲除毋畱餘孽十八年正月奏官兵自青岡普落移  
赴攔馬椿六阿那南地等處追至皎米其閒夷寨繁多哦雷呷多  
二支最爲兇悍大木支等支互相依附我兵併力抄襲干落三溪  
等支夷率眾投誠懇求免剿其餘一律搜緝撫恤兼施官兵於天  
喜地方會合直進梁山表延二千里剿辦完竣邊圉綏靖撤兵歸  
伍得 旨勛勉閏四月擢刑部尙書補正藍旗漢軍都統六月卒  
年六十九遺疏入 諭曰刑部尙書鄂山久膺外任克盡厥職朕  
御極後屢加擢用簡畀封疆在四川總督任內辦理一切聿著勤  
勞昨經擢用刑部尙書方資倚任茲聞溘逝殊堪軫惜著加恩晉  
贈太子太師銜照尙書例賜卹准其入城治喪所有任內一切處

分悉予開復應得卹典該衙門察例具奏尋 賜祭葬十一月成  
都將軍凱音布等復以夷匪滋擾入奏請厚集兵力多籌糧餉以  
張撻伐 諭曰四川夷匪連年出擾屢經降旨令該將軍總督認  
眞妥辦乃因循數載邊陲未靖若使鄂山尚在必當重治其罪凱  
音布隨同鄂山將就了事著交部嚴加議處子葆瀄已革員外郎  
葆符候補筆帖式

右 國史館本傳

世尊の御説法

一

147-610

博啟圖

博啟圖富察氏滿洲鑲黃旗人父惠倫襲一等誠嘉毅勇公鑲藍旗護軍統領征湖北教匪陣亡自有傳博啟圖嘉慶二年由五品廕生襲一等誠嘉毅勇公乾清門行走三年擢頭等侍衛四年補尙茶正兼公中佐領五年擢御前侍衛七年五月授鑾儀使十二月充崇文門副監督八年閏二月駕幸南苑校尉疾行失儀降頭等侍衛仍在乾清門行走十月失察值事太監干犯門禁降二等侍衛九年賞頭等侍衛十年閏六月因清淨地失火不往撲救仍降二等侍衛八月復頭等侍衛十三年賞穿黃馬褂十四年復鑾儀使授正黃旗漢軍副都統十五年九月調正紅旗漢軍副

都統十二月以管轄旗戶不嚴革副都統十七年正月因進班曠  
誤革鑿儀使復爲頭等侍衛十月出爲伊犁領隊大臣十八年授  
鑲白旗漢軍副都統二十年遷內閣學士兼禮部侍郎銜仍留領  
隊大臣之任二十一年七月回京仍在乾清門行走九月管嚮導  
處事授鑲紅旗護軍統領二十二年署左翼監督遷理藩院右侍  
郎二十三年調正藍旗滿洲副都統二十四年轉左侍郎二十五  
年七月復授 御前侍衛九月充 實錄館蒙古副總裁道光元  
年八月充崇文門副監督十月充滿洲繙譯副考官二年六月調  
禮部右侍郎十二月轉左侍郎三年十一月充國史館清文總校  
十二月調倉場侍郎四年疏請令各倉監督值宿巡查以嚴防範

從之是年 聖訓 實錄告成博啟圖監修總裁在館三年 賞  
戴花翎五年十二月以糧運遲滯籌議剝船轉運章程謂明年河  
凍初開宜先儘北倉囤積滯漕趕緊運通隨到隨卸計平斛六十  
餘萬石二月底可以運完其餘存倉未運之十萬餘石卽令東豫  
卸空之船趕回北倉剝運約用三百餘隻卽可竣事並請將粳米  
稜米粟米分別先後轉運以免牽混 上從其議是月調工部左  
侍郎兼正藍旗滿洲副都統仍在 御前侍衛上行走六年二月  
調戶部左侍郎五月兼正黃旗蒙古都統九月外遷察哈爾都統  
七年調吉林將軍八年四月奏雙城堡公倉應糶歸款穀石請照  
時價出糶 從之五月請添設圍場卡倫增置弁兵嚴定章程以

防奸民潛入偷牲斫木諸弊報 可十一月奏吉林各站內過往  
馳驛各項差務請給廩糧得 旨照來京首站新定之例一體給  
與廩糧以歸畫一 是月以甯古塔水災疏請蠲賑 允之九年三  
月 命籌辦雙城堡屯田事宜時雙城堡移駐京旗願往者少因  
東省霜早氣寒歲惟一熟又有幫助耕耘之人博啟圖奏擬減原  
定京旗戶數酌爲添給地畝始可漸形充裕至京旗閒散未習農  
事請准其買僕代耕又原定京旗住房寬闊難居請改修草房三  
間周圍加塗草土禦寒均在中屯建蓋准於黃泥河一帶伐木取  
材較爲近便如此量爲變通將來可以循行久遠 上從之尋  
命來京在 御前大臣上學習行走署鑲紅旗漢軍都統四月授

正白旗蒙古都統五月授內大臣旋擢禮部尙書八月充崇文門  
正監督九月扈 蹕至馬爾墩嶺有民人由 御馬後經過降兵  
部右侍郎復鑄三級十一月轉左侍郎兼正白旗漢軍副都統十  
二月 賜紫禁城騎馬十年三月授正黃旗蒙古都統十一月實  
授 御前大臣十一年二月充國史館清文總校調戶部右侍郎兼  
錢法堂事旋授左翼總兵八月擢理藩院尙書充閱兵大臣管雍  
和宮事九月充繙譯鄉試正考官補總管內務府大臣兼管清漪  
園等處事十二年正月授經筵講官九月復充繙譯鄉試正考官  
十月充順天武鄉試監射大臣十一月授正白旗領侍衛內大臣  
管中正殿事十三年四月調正藍旗滿洲都統五月調工部尙書



十四年二月管理行營事七月在海淀病卒遺疏入 諭曰博啟  
圖宣力中外歷有年所敬慎清勤克盡職守前因病請假曾派員  
前往看視方冀速痊益資委任茲聞溘逝深爲軫惜著賞給陀羅  
經被派御前侍衛都統哈郎阿帶同侍衛十員前往奠醊並加恩  
賞加太子太保銜照尙書例賜卹賞銀五百兩經理喪事准其入  
城治喪任內處分悉予開復尋 賜祭葬 予謚敬僖子景慶承  
襲公爵官內閣學士兼禮部侍郎銜緣事革職景壽固倫額駙見  
充崇文門副監督

右 國史館本傳

常起

常起赫舍里氏滿洲鑲白旗人由文生員考取筆帖式嘉慶三年補吏部筆帖式十七年二月升主事六月升員外郎二十一年四月升郎中六月擢通政使司副使七月御史卿祖培奏參常起偕通政使司副使溫啟鵬等聚飲酒肆途遇侍衛于貫甲以爭道啟鵬肆行鞭辱縱僕欺壓等情 命解常起任歸案質訊讞定得旨溫啟鵬等因常起升官設宴作賀散席後各乘車歸適侍衛于貫甲便服乘坐驢車彼此爭道常起家人龐泰將于貫甲毆傷于貫甲未戴翎頂口稱侍衛旁人焉能憑信龐泰照尋常鬪毆成傷本律發落常起失察家人毆傷于貫甲著交吏部照例議處二十

二年遷太僕寺卿二十三年三月升通政使司通政使九月遷盛  
京工部侍郎尋以恭謁 祖陵禮成隨從人員 賞加一級常起  
與焉二十四年正月調吏部右侍郎授正紅旗漢軍副都統六月  
稽察右翼宗學十月充武殿試讀卷官二十五年三月充國史館  
清文總校四月充滿洲繙譯會試副考官五月會議各省題銷事  
件遲延處分請由戶工二部覈明月日遲延至三年以上者分別  
罰俸六年以上者分別降調九年以上者革職如係藩司承辦遲  
延卽比照此例議處至題銷時未踰三年之限因部駁查以致遲  
延應扣去程限統計先後遲延月日照本例遞減議處奏入得  
旨允行七月以進呈爵秩全覽繕寫錯誤奪俸三月道光元年六

月奏纂修則例請增服制一條略言會典服制圖載庶出之子所  
生母故父令別妾撫養者謂之慈母持服如所生母吏部舊例未  
經載入凡報丁慈母憂者槩予駁斥揆諸情理既有未盡且與會  
典所載不符請增載舊例以廣孝思 從之十月調鑲白旗蒙古  
副都統十一月署刑部左侍郎十二月御史阿穆爾布彥奏考取  
滿洲蒙古助教定例兩歧下部覈議常起偕尙書英和等奏言向  
例蒙古助教員缺由理藩院筆帖式國子監閒散教習擬定正陪  
引 見補授並無由進士舉人除授之例若照滿洲一體考試是  
以部院統用之進士舉人令其考取專用理藩院之蒙古助教覈  
其見在出身與將來升用前後歧異均與定例不符阿穆爾布彥

國朝文獻通考卷一百一十一

所奏應毋庸議疏入 從之二年正月轉吏部左侍郎二月署正  
白旗護軍統領四年正月充左翼監督六月因病陳請開缺七月  
卒子慧誠刑部主事英誠工部筆帖式

右 國史館本傳

姚文田

姚文田浙江歸安人乾隆五十九年 上幸淀津文田由舉人  
召試一等一名授內閣中書尋充軍機章京嘉慶四年一甲一名  
進士授修撰五年充廣東鄉試正考官六年六月充福建鄉試正  
考官八月 命提督廣東學政九年任滿回京十一年充日講起  
居注官十二年七月充山東鄉試正考官十月丁父憂十五年正  
月服闋五月遷右春坊右中允復充日講起居注官八月 命提  
督河南學政十六年五月遷侍講九月轉侍讀十二月以豫省生  
員有詭充領催甲長者藉以交通官吏欺壓閭里奏請 敕下撫  
臣通飭所屬嚴行禁止 上如所請行十七年擢右庶子十八年

二月遷國子監祭酒 召回京十月入直南書房十一月疏言臣竊惟堯舜三代之所以爲治本非有他道也無過教養二端而已蓋爲斯民廣衣食之源則各保其身家而自不致有爲惡之意爲斯民正趨向之路則各知有長上而自不敢干左道之誅臣竊見近日州縣苟有案牘不廢催科數多者卽大吏皆稱其賢又其次者惟取應對便捷行走輕利至於教養一事則上下官吏從未聞有措意者也南方之民患在賦重北方之民患在徭多一遇差徭至前卽里正胥徒僉派四出假如官需車馬過十輛卽使備有損換亦不過再加數輛然胥吏藉此浮拏得錢買放常不至數十輛不止及其旣派之後當官非不例給口糧然皆百十年來舊定章

程食物價值今昔懸殊本已不給於用又經家人胥吏層層剋扣則其入手更少不得不自備芻糧逐日祇候或遇乘用之人不加矜恤且並其車輛馬騾而困敝之夫此馬騾車輛皆小民所持以爲養生之具也一困敝則其具坐失矣故官吏之斂怨於民未有如差徭之甚者也然在州縣亦有不得不然者何也督撫遇應辦事件不過下行兩司兩司又轉行府州府州又各行其所屬之州縣而已至於州縣無可更諉事事必須措辦其自一遞送一履勘下至薪芻油燭之細無一不需錢應用所入廉俸卽盡支領亦不敷延請幕友況又多方減扣則每日經費更何所出故錢糧不能不額外加增差徭不能不民間攤派如遇款收之歲該員循例報



荒則徵收必須停止日費無出而公事亦皆束手故非至民力殫竭無可再徵之時必不肖輕言歲款彼非皆殘忍性成實勢有所不得已也然小民偶有偏災卽加撫恤則根本未傷而元氣易復乃至十室九空之日始爲議及災荒雖復蠲賑疊施其何及乎此又因官貪以致民困之大槩情形也臣嘗再四熟思求一善術而不可得得其策之下者則惟有省事一法卽如各省大吏無非皇上歷試信任之人其平日之才具優絀與素行賢否無不久在聖明洞鑒之中旣已畀以一省事權苟非舉措有乖似可無輕言更調臣竊見嘉慶四年以後皇上澄敘官方勸懲並至近日督撫藩臬實無不人知自愛然於迎新送舊之時如衙署之整理

館舍之儲待無論其本管上司卽例以賓主情誼亦必不能盡廢  
及其既履任後通省官員紛紛晉謁事又必不可已在該太吏一  
無誅求自以爲秋毫不擾而不知其耗費固已多矣且此於吏治  
固亦無裨也蓋大吏當抵任之初諸務尙未周悉所聽者屬吏之  
稟白書役之指搗而已迨其莅事稍久然後人才之賢否以明風  
俗之澆淳以辨方將稍有設施而瓜代者已至則一無展布而去  
耳亦有更事未深之人纔一莅事動議更張以此博振作之名不  
知地方情形多未諳悉見爲極利而他弊已隨其後後雖自知悔  
亦無及故不如久於其任次第圖之之爲得計也其他苟無害於  
變通者隨事詳思可省則省務俾官有餘力然後可責以養民之

政至所謂養民者不外孟子省刑薄斂深耕易耨數語於其田疇  
之當闢者闢之陂堰之當復者復之使災祲不至屢告卽閭閻漸  
有蓋藏由是廉恥可興而教化可行矣抑臣更有念者自古圖治  
之要惟以任人爲本故有官階屢遷而不改其職任者近日科條  
頗似過於繁密假如某縣得一循吏民情愛戴方殷忽有四參被  
議之案不能不立時罷斥其接替者或又不得人則善政旋廢矣  
又如地稱難理非得其人不能勝任然其才之優者或皆各有處  
分所合例者人僅中下亦不能不俾之受事是爲例議所格而吏  
治皆不得人似亦宜稍爲變計也奏入報 聞尋遷詹事充文淵  
閣直閣事十九年正月疏言臣竊見 皇上自御極以來躬理萬

幾旣宵靡間凡庶政庶獄無一不審慎周詳務求至當惟恐一夫  
不得其所孜孜求治之心雖堯舜復生必無以加於此然自嘉慶  
四年以至去冬十餘年中無歲不有災祲之書無歲不下蠲賑之  
詔去歲畿南秦豫數省薦饑致有奸民乘機俶擾 皇上引咎  
責躬疊頒 諭旨愛民之誠流於肺腑實爲天下臣民所共頂戴  
者乃愆陽猶積雪澤未霑東南河流迄今爲患以勤恤民隱如  
皇上而人事尙如此者何也蓋天以德爲生以刑爲殺其在周易  
坎爲水爲律歲之不入水之告災以類言之皆刑獄太繁之象茲  
屆 皇上恩祺普錫民物更新正宜式迓休和以光 盛治臣伏  
思承平旣久戶口日滋天地所生不足以贍其用於是不能之心

生而奸詐之事起將欲禁其奸詐而徒恃刑法以齊之其源不清其流必不能制也書言德惟善政政在養民唐虞之世未嘗廢刑然又曰與其殺不辜甯失不經何以聽其輕縱如是大抵下之於上不患其不畏而患其不愛任刑之世無過使民畏而已老子有言民不畏死奈何以死懼之夫民至於不畏死則又何法以理之乎漢文帝時網漏吞舟之魚而吏治蒸蒸不至於奸者民愛故也秦人專尚法律其勤至於衡石程書而一夫夜呼亂者四起由於但使民畏故也奸邪之人詐僞無所不至彼見獄詞可以聳聽則多牽引其所不快者以陷害之胥吏惟利是圖明知所牽引之人未必皆有連也而藉勢婪索可以肥其奸橐則又多方株連以困

阨之假如衣食粗足之家一經官訟連染雖立見昭雪而資產已蕩然矣 國家設官大小相維各有專司親民之職在於州縣大吏惟聽其成而已自數年來開上控之端於是刁民得逞其奸督撫兩司又畏其有內控之舉不得不遇案親提彼所訐控不過一人而牽涉者常至十數農氓廢耕商賈廢業中道奔波受吏胥之折辱甚至瘐死而道斃者殆不可一言罄也彼雖處原告之人以極刑於被誣者抑又何補推 國家慎刑之意亦曰恐有冤抑耳然一案未結而事外之被累者相繼如從前馬譚氏一案至今正兇未定指名而無辜致斃者已數十人矣是一冤未雪而含冤者且數十人也周禮有宥過之條王制有疑獄之議今一案至而立

國朝通志卷之六十一  
求定讞則其承問之官必刑撻橫加以期得實愚民不勝其苦且  
誣服以緩須臾之死其中冤抑正復多人如此而欲其感召天和  
豈可得乎頃者林清構逆渠魁悉擒然搜捕四出至今未已小人  
或意圖見長或因以爲利必不能無殃及無辜之事昨奉 明旨  
嚴禁妄擊仰見 皇上如天之仁無不覆被臣愚以爲事案愈多  
則紛擾愈眾莠民易逞其機謀而良善惟增其苦累應令合省大  
小官吏凡遇案牘可以早結者酌其便宜卽時速結無多株引以  
擾閭閻庶官民上下相愛暴亂不作而休和可致矣所謂養民之  
政不能有外於農桑本務臣請以大江以南言之田畝丈尺之窄  
隘旣不如中原之廣歲輸賦稅之繁重又不如北地之輕然每歲

漕儲正供以東南一方之民力而京畿億萬生靈皆於是仰給者無他人盡力也兗州以北古稱沃衍之地河南一省皆昔殷周畿內燕趙之間亦夙稱富國今則小民自翻犁播種之後一無設施惟束手以待雨澤之至水至則田畝皆淹水去又乾涸立見地成曠土人盡惰民安得不窮困而爲盜賊哉不知久長之計者輒曰此事爲迂闊不思歲一歉收則必先以緩徵稍甚則加以蠲貸又其甚者不得不截漕發粟以賑恤之誠令合數十年而總計其所以耗國家之帑藏者何可算也且比年運河屢淤東南之漕實亦未可深恃若非早爲之圖脫有意外之虞又將何以處此臣見歷來州縣之保薦必首列勸課農桑其實盡屬虛談從無過問又



大吏奏報糧價有市價每石昂至四五千而僅報二兩內外者其於收成則又虛加分數相習成風常不以實似宜飭令痛蠲積習亟圖裕民但使董勸有方行之一方而收利獨饒則不俟號令自然爭起而相效數年之後田野皆闢水旱有資豈必盡資官帑然後善政爲可行哉總之民之犯刑由於不知率教其不率教則又由於衣食缺乏而廉恥不興其次第實如此故養民爲首務也奏入 諭曰姚文田奏請急農桑緩刑獄國家政在養民農桑者天下之大本朕親耕后親蠶躬行爲天下先誠以民生所亟一日不再食則飢終歲不製衣則寒布帛菽粟其事至恆而所關至鉅定例考覈吏治首列勸課農桑所以責望牧令者莫要於此古者

物土之宜耕九餘三歲有豐歉民無凍餒近者膏腴之產多以蒔  
菸倉廩所儲兼以釀酒地利未盡禁令復弛地方偶值偏災雖蠲  
賑頻施民猶不免飢寒本務不修無怪乎閭閻之貧且病也著通  
諭直省各督撫各飭所屬府州縣官務知朝廷重農貴粟之意以  
勸課農桑爲亟境內沃壤悉令樹植嘉穀有勤於南畝者勞之相  
之其糜穀病農者抑之懲之地產日豐蓋藏饒裕衣食足而廉恥  
興富教之政其庶幾乎至除莠可以安良刑者不得已而用之若  
訟獄繁興株累者眾其妨農者甚大著問刑官員遇有應訊案牘  
務速爲剖判曲直嚴懲誣枉不得拖累無辜以恤民生而厚民俗  
其各實力奉行勿怠閏二月遷內閣學士兼禮部侍郎銜五月教

習庶吉士二十年擢兵部右侍郎二十一年四月調禮部右侍郎  
六月調戶部右侍郎二十二年三月充會試副考官尋轉左侍郎  
兼管錢法堂事務七月以違例保送不勝外任之郎中錢學彬下  
部議處議降二級畱任二十三年三月偕定親王縣恩等恭送  
玉牒尊藏盛京禮成下部議敘九月以前在禮部侍郎任內頒發  
科場條例恭載 高宗純皇帝廟號刊刻有誤下部議處部議降  
四級調用 上以文田在內廷行走勤慎且不能常川到署加恩  
改爲畱任二十四年四月充殿試讀卷官九月 命提督江蘇學  
政道光元年大臣有陳漕務欲禁浮收不如明予八折於民便者  
文田疏言竊惟東南之大務有二曰河曰漕比年海口深通南河

目前光景甚安穩惟漕務法久弊生雖經督撫大臣數年以來悉心調劑總未臻實效小民仰沐我 聖祖 神宗生成豢養屆今百八十年愚賤具有天良豈有不樂輸將之理誠以東南之財賦甲於天下而賦額如江蘇之蘇州松江浙江之嘉興湖州其糧重尤甲於天下竟有一縣額徵多於他處一省者乾隆三十年以前並無所謂浮收之事是時無物不賤官民皆裕其後生齒愈繁而用度日絀於是諸弊漸生然猶不過就斛面浮取而已未幾有折扣之舉始於每石不過折耗數升繼乃至五折六折不等小民終歲勤動自納賦外竟至不敷養贍勢不能不與官吏相抗官吏所以制民之術其道有三一曰抗糧一曰包完一曰捏交醜米賦額

既極繁重民間拖欠亦勢所必有大約只係零星小戶及貧苦之家其墳墓住居皆須照例輸納又有因災緩徵新舊並積因而拖欠者是誠有之至如其家或有數十百畝之產既自食其田之所入而竟置官賦於不問實爲事之所絕無今之所謂抗糧者如業戶應完百石彼既如數運倉並外多齎一二十石不等以備折收書吏等先以淋尖踢腳灑散多方糜耗是其數已不敷再以折扣計算如准作七折便須再加三四十石業戶心既不甘必至爭執不肯再交亦有因書吏刁賴仍將原米運回者州縣卽以前二項指爲抗欠此其由也包完之名謂寡弱之戶其力不能與官抗則轉交強有力者代爲輸納可以不至喫虧然官吏果甚公平此等

業戶又何庸託人代納可不煩言而自破者民間終歲作苦皆以完糧爲一年要事如運米石進倉其一家男婦老幼無不進城守待一遇陰雨溼露猶將百計保護恐致米色受傷如官吏刻期斛收卽歸家酬神祭先以爲今歲可以安樂過去故謂其特以醜米掙交殆非人情惟年歲有不齊則米色不能畫一亦閒有之耳然官吏非執此三者則不能制人故生監則詳請暫革齊民則輒先拘禁待有補交然後以悔悟請釋已竟成一定不移之辦法臣自去歲至蘇所聞金壇吳江等縣則已釀成事端其他將就了結者殆尙不乏不知踊躍輸將者實皆良民而非莠民此小民不能上達之實情也然在州縣亦有不能不如此者近年諸物昂貴所得

廉俸公項卽能支領亦不敷用州縣自開倉至兌運日止其修整倉廩蘆席竹木板片繩索油燭百需及幕友家人書役出納巡防一應脩飯工食費已不貲加以運丁需索津貼日甚一日至其署中公用自延請幕友而外無論大小公事一到卽須出錢料理又如辦一徒罪之犯自初詳至結案約須費至百數十金案愈大則費愈多復有遞解人犯運送餉鞘事事皆須費用若將借用民力槩行禁止謹厚者奉身而退其貪戀者非向詞訟事案生發不可而吏治更不可問矣伊等熟思他弊一破勢必獲咎愈重不如淨收尙爲上下皆知故甘受民怨而不惜雖地方有瘠沃才具有能否其借此以肥身家者亦不能謂其必無要之不得已而爲此蓋

亦不少臣見近日言事者動稱不肖州縣竊思州縣亦人耳何至一行作吏便至行同苟賤此又州縣不能上達之實情也州縣受培克之名而運丁陰受其益故每言及運丁無不切齒然其中亦有不能不然者運船終歲行走日用必較家居倍增從前運道深通督漕諸臣只求重運如期到通一切並不苛察各丁於開運時多帶南物至通售賣復易北貨沿途銷售卽水手人等攜帶梨棗蔬菜之類亦爲歸幫時餽口之需乾隆五十年後黃河屢經倒灌未免運道受害於是漕臣等慮其船重難行不能不嚴禁多帶貨物又如從前商力充裕運船於回空過淮時往往私帶鹽斤眾意以每年只不過一次不甚窮搜近因商力亦絀未免算及瑣屑而



各丁之出息盡矣丁力既已日困加以運道之淺反增添夫撥淺各費且所過緊要開壩牽挽動需數百人使用小有節省幫船卽慮受傷道路旣長期限復迫此項鉅費非出之州縣更無所出此又運丁不能上達之實情也數年前因津貼日增於是定例每船只准給銀三百兩然運丁實不濟用則重船斷不能開重船遲久不開則州縣必獲重戾故仍不免私自增給是所謂三百兩者乃虛名耳頃又以浮收過甚嚴禁收漕不得過八折然州縣入不敷出則強者不敢與較弱者仍肆朘削是所謂八折者亦虛名耳然民間執詞抗官官必設法鉗制而事端因以滋生皆出於民心之所不服若將此不靖之民盡法懲處則旣困浮收復陷法網人心

恐愈不平若一味姑宥隱忍則小民開犯上之風將致不必收漕而亦自無官長其於紀綱法度所關實爲匪細奏入 上命軍機大臣會同戶部議奏議上 諭曰前據姚文田奏漕務法久弊生小民苦州縣之浮收州縣患旗丁之勒索而旗丁又因沿途需費浩繁勢必多索津貼恐前所定津貼旗丁每船銀三百兩及見在嚴禁州縣收漕不得過八折之法亦屬虛名請籌議兼全善術等語當降旨命軍機大臣會同戶部議奏今據奏運丁之疲乏屢經籌議津貼毋庸再議惟州縣浮收積習難返致累閭閻必任法而兼任人方能遵行無弊著各該督撫及漕運總督倉場侍郎通飭所屬杜絕浮收勒折以清其源裁革陋規以遏其流儻有不肖州

縣陽奉陰違立即參辦或運丁勒索州縣沿途衙門勒索旗丁一併從嚴究治務使官民旗丁均免擾累以肅漕政二年任滿回京上以戶部堂官在內廷行走者較多命文田回署辦事不必在南書房行走三年充經筵講官四年七月擢左都御史十二月賜紫禁城騎馬五年充順天鄉試副考官六年署工部尙書七年七月擢禮部尙書十一月卒諭曰姚文田於嘉慶年間由修撰洊陟卿班入直南書房晉階卿貳朕御極後擢任左都御史本年復授禮部尙書久直內廷歷司部務清勤敬慎克盡職守方期益資委任乃遭疾數日卽爾奄逝聞之殊堪軫惜著照尙書例賜卹任內所有處分悉予開復應得卹典該部察例具奏尋賜祭

葬 子諡文僖子晏二品廕生見任刑部主事

右 國史館本傳

道光七年十一月十一日酉時 誥授光祿大夫秋農姚公卒於京寓距生於乾隆二十三年七月二十六日寅時壽享七十歲遺摺入 天子震悼諭內閣禮部尙書姚文田嘉慶閒由修撰洊陞卿班入直南書房晉階卿貳朕御極後擢任左都御史本年復授禮部尙書久直內廷歷司部務清勤敬慎克盡職守方期益資委任乃遘疾數日卽爾奄逝聞之殊堪軫惜著照尙書例賜卹任內所有處分悉予開復應得卹典該部察例具奏欽此越五日禮部請諡奉 旨子諡二十七日内閣上諡勤學好問曰文恭慎無過

曰僖 賜諡文僖 諭祭葬八年春公子晏等扶公柩歸里卜於某月某日葬公於蘆泉圩以朝列公門牆二十餘年知公最深以狀乞銘於是朝泣而言曰 天子之惜公可謂至矣按狀姚氏系出吳興自元以後爲湖州府歸安縣人隸浙江世居府東北鄉姚家埭明萬歷中徙居府城東後徙居月河是謂月河姚氏公少居貧父贈光祿公客遊四方母沈太夫人口授經日或不再舉火對居有舊房廢地親戚勸鬻以餬口太夫人曰吾子會有官達時畱此地建一品坊耳乾隆己酉公以拔貢生領鄉薦甲寅 高宗幸浣津 召試授內閣中書嘉慶四年己未成進士 殿試一甲一名及第授修撰官階右春坊庶子國子監祭酒詹事府詹事內閣

學士兼禮部侍郎署吏部工部侍郎任戶部禮部兵部侍郎晉都  
察院左都御史署禮部工部尙書終禮部尙書內差文淵閣校理  
國史館總纂 實錄館纂修日講起居注文淵閣直閣事稽查中  
書科教習庶吉士管理工部戶部錢法堂事務南書房行走經筵  
講官總裁才丑會試正副考官庚申廣東辛酉福建丁卯山東乙  
酉順天鄉試學政廣東河南江蘇文武殿試讀卷者三朝考讀卷  
者一學正學錄教習拔貢閱卷者各一由通籍至正卿多 賞賚  
尙方珍物 仁宗時伊犁進馬 恩賞凡二年在江南 頒福至  
官廨嘉慶閒惟公一人爲異數 今上四年 賞紫禁城騎馬公  
生平以文章經術結 主知嘗謂士或泥於古而戾於今是迂儒

之爲也故孔子曰誦詩三百授之以政不達雖多亦奚以爲公使  
粵時奉 旨密查地方事公奏廣東遼闊人犯審解重費宜由巡  
道勘定又奏大吏因沽民譽汰舊規致官吏掣肘又奏大吏輕受  
下控致民不畏上又奏提督玩視洋寇致海氛不靖皆報 可嘉  
慶十八年林逆不靖擾及 宮廷是時 仁廟引咎責躬詔求直  
言公上疏謂唐虞三代無過教養南方之民患在賦重北方之民  
患在徭多久督撫之任則州縣之供費省寬州縣之考則人材之  
顧忌寡 仁廟用公言諭吏兵二部刪減則例復陳急農桑緩刑  
獄疏曰下之於上不患其不畏而患其不愛任刑之世無過使民  
畏老子言民不畏死奈何以死懼之漢文帝時法漏吞舟之魚而

吏治蒸蒸不至於奸者民愛故也秦人專尚法律其勤至於衡石  
程書而一夫夜呼亂者四起由於但使民畏故也衣食者百姓養  
命之原飢寒切身雖慈父不能保其子而君安得有其民故孟子  
言民事不可緩也 仁廟用公言論天下貴農重粟尚德緩刑公  
使江南時復進崇正論一篇 仁廟褒獎 今上繼理大臣有陳  
漕務欲禁浮收不如明與八折與民便者公復論東南之大勢小  
民州縣旗丁各有不能上達之情奏入折收之議遂寢湖南耦庚  
賀方伯擇入 皇朝經世文編讀之者以爲如良醫之診脈癥結  
畢見雖久任封疆未有能如此之詳且盡者制義之興七百年莫  
盛於明之正嘉 國朝熊劉諸家各自開生面惟安溪李公東臬



寶公及公力追取正始公學問無所不貫不僅制義爲學者宗而天下稱公之制義知與不知曰此今之安溪東臯也安溪李公在聖祖時東臯寶公在高宗時皆以釐正天下文風爲己任公當嘉慶丁卯官起居注禮部先一日題請山東鄉試正副考官山東爲附畿大省向用大僚典正仁宗已簡用公因召見語軍機大臣朕明日用一極有名人爲山東考官汝等當非意度次日宣旨公名下眾咸服仁宗重公制義故雖經術如公條奏地方利弊如公籌畫國計民生如公終不用公作督撫以公司天下文衡幾三十年蓋以李安溪寶東臯待公然東臯寶公中間不無蹉跌恩遇不如公安溪李公進位大學士過於公使天再假公

數年亦必陟綸扉參贊密勿方期益資委任遽爾奄逝誠如 今  
天子明詔之所惜公既貴曾祖諱德升 誥贈光祿大夫妣沈氏  
誥贈一品夫人本生曾祖諱德謙 誥贈光祿大夫妣沈氏生  
妣許氏皆 誥贈一品夫人祖諱世孝 敕贈承德郎晉光祿大  
夫妣沈氏 敕贈安人晉一品夫人配周氏 封一品夫人先公  
七年卒子三人長晏二品廕生刑部候補主事次衡國學生候補  
布政司大使出嗣皆周夫人出次倍勤側室王出孫男四經輔生  
員經炳經旬經第公初字經田後欲易名夢神以今名示疑所出  
神言不記見龍在田天下文明乎號秋農及營墓田號梅漪莊因  
稱梅漪老人性恭儉平生行必踐言衣服未嘗鮮好待人常無所

忤人亦不敢干以非義於書無所不讀學宗程朱嘗言五代後人道不至陵夷者宋儒之力著制義外著易原一卷春秋日月表五卷說文聲系三十卷說文考異三十卷古音譜八卷四聲易知錄四卷後漢郡國志校補一卷廣陵事略七卷寔雅堂集四卷詩二卷賦一卷進御集二卷四子義一卷旁及天文五行雜占醫經著內經脈法一卷疑龍撼龍經注二卷相宅一卷皆藏於家夫文章之遇合難矣遇而得供奉內廷從容侍天子翰墨之娛外而育秀掄才舉一世之文復之於古可不謂儒者不世之遺與公少困曠場屋多年卒以天下第一人受三朝厚恩上封祖父下廕子孫蓋太夫人所謂畱地建一品坊者以公卜也公於斯文可

以無憾銘曰

會稽之嵯峨兮錢塘之澎湃兮實生公兮公之著作與江山以俱  
永兮

右墓誌銘劉鴻翱撰

公年十八入湖州府學乾隆五十四年己酉鄉試中式舉人五十  
九年淀津獻賦 召試一等一名授內閣中書嘉慶四年己未入  
軍機處行走是科成進士 殿試一甲一名及第官至禮部尙書  
道光七年十月以疾卒年七十公屢司文柄游陟崇班生平持己  
端方居官清慎百數十年來學人盛談考據多尊漢儒詆宋儒公  
獨持議謂三代以上其道皆本堯舜得孔孟氏而明三代以下其

道皆本孔孟得宋諸儒而傳五代以後人道不至陵夷者宋諸儒  
 之力至其所著之書豈得無一誤然文字小差漢唐先儒亦多有  
 之未足以為詬病詳見集中公宗法宋儒然於漢學亦未嘗不究  
 心也公所著有易原春秋日月表說文聲系說文考異諸書公夙  
 留意天文占驗之學嘉慶十八年林清事未起彗橫入紫微垣近  
 歲彗見南斗下主外夷兵事公皆先言之

右聽松廬文鈔張維屏坤

貴慶

貴慶富察氏滿洲鑲白旗人父觀成官陝西西安副都統自有傳  
嘉慶四年進士改翰林院庶吉士六年散館以部屬用尋改授檢  
討八月升侍講八年大考三等降詹事府左贊善向例滿洲翰林  
不升轉中允贊善遇缺專由外班揀選至是奉 旨嗣後中贊缺  
出先儘編檢升用其讀講缺出應用內班者先儘內班之中贊缺  
用貴慶卽著歸入內班升轉旋復升侍講充功臣館提調九年充  
日講起居注官京察一等轉侍讀十年升侍講學士十一年轉侍  
讀學士 命分校 高宗純皇帝實錄十二年正月稽查西四旗  
覺羅學五月升詹事十月授內閣學士兼禮部侍郎銜十三年補

公中佐領充文淵閣直閣事十四年二月署稽查中書科三月充  
會試副考官五月教習庶吉士六月授正紅旗漢軍副都統十五  
年二月授盛京戶部侍郎五月畿南歉收給事中趙佩湘奏請採  
買奉天官莊糧石運至通州籌備京倉以裕民食 命盛京將軍  
富俊會同貴慶查明奉省貯米若干可以酌撥並如何動項糶運  
以及直隸如何接收妥議具奏尋奏奉省各倉見存米五十八萬  
餘石覈計留備來年額支尙爲充裕請於就近海口處各倉酌撥  
二十萬石由海船運往天津兌交直隸委員接收轉撥又議兌交  
接收一切事宜略言運糧之弊在船不在倉在河不在海防弊不  
厭其細責成惟求其專請此次奉省米石由海船運至天津令該

管道縣按船盤驗備有潮溼虧短責成奉天委員及地方官分賠  
由天津起剝至通州直隸委員接收仍令奉天委員一同照料交  
倉如有前項情弊責成直隸委員地方官及奉天委員分賠如此  
各有專責互相稽察庶於積貯有裨如所議行六月 命協辦盛  
京漕務疏陳章程四條一辦理官漕宜申明舊制嚴禁走漏一挑  
漕時宜責成局員出具無弊甘結如有殃漕攪雜加倍罰賠仍治  
以應得之罪一禁秧漕應先搜窩頓地方查創夫自四月出邊設  
立漕營開採將先創者用原土包裹送交漕營加意培養以俟秋  
令蒸製土人名爲營子原所不禁其所種秧漕則於腴美之地挖  
畦布子三十六箇月出土環以柵欄培養一二年卽能肥大土人



名爲欄子應飭將軍等認真稽查一商獲應暫緩入關俟官獲交內務府全收商獲方准起票守候不過月餘於商人並無拖累而於獲務似更周密另片奏協領等素有把持惡習近經內務府奏參該局員紛紛請辭爲挾制之計膜視公事情弊顯然誠恐冬季交獲時或不足額或仍有秧獲或甚至投意鋪戶刨夫抗不領票均未可定請飭將軍認真督辦 上以貴慶所奏各情甚爲切當嘉納之八月盛京將軍富俊奏協領札布札那自盡懷有字帖訐告貴慶需索等款 命戶部侍郎英和四品卿銜初彭齡往按之尋奏貴慶並無需索之事惟到任後收受內倉監督圖亮餽遺水禮失察家人得受門包屬實下部嚴議鑄二級以三品京堂候補

九月補授大理寺卿奏言舊例在京各衙門永遠枷號人犯大理寺僅於年終彙奏並不隨時稽查殊屬有名無實請嗣後派堂官二員司官四員五日一次輪查並於三箇月後將查看情形奏聞又枷號例有定式其查對時或輕或重勢難一一較量應令各該處將各枷犯所帶枷號尺寸斤兩知照以憑覈對其外省永遠枷號人犯請飭各督撫將軍都統等派員嚴查仍於年終咨報彙奏以符定例 從之十六年十月充武殿試讀卷官十二月授盛京刑部侍郎十七年奏審擬廣甯縣蔑倫重犯呂得新一案 諭曰呂得新係子毆父母致死例應凌遲處死儻該犯畏罪自盡則應剉屍示眾貴慶摺內前引子毆父母致死如因傷身死將該犯剉

屍示眾例文復敘稱呂得新蔑倫重犯未便久稽顯戮派員押赴  
市曹正法是逆犯並未身死何得引剗屍之例實屬謬誤著交部  
議處十八年奏獲要犯王士青等究出逆情 賞戴花翎十九年  
二月管理牛馬稅差時查辦上年天理教匪餘黨刑部奏山海關  
所獲之犯王立安供出奉天新民屯張姓請 旨飭拏委員誤拏  
民人張觀瀾等貴慶派人嚴訊觀瀾等畏刑誣認復謊供五臺子  
道士張明遠糾約謀逆各情及飭提道士到案訊係張學盛非張  
明遠並不與張觀瀾認識貴慶等因前次業經訊供具奏速將張  
觀瀾等解送刑部嗣經刑部審明張觀瀾實無謀逆情事 上命  
吉林副都統松甯馳往奉省將原拏原審各員提集查辦旋據松

甯奏稱實係誤擊承審各員刑求偏認應請革職貴慶亦自請治罪 上以貴慶知案情未確並不據實平反下部議處降二級調用 詔改爲降三級畱任會刑部又審明王士青等僅止習教傳徒並無謀逆等情 諭曰貴慶前奏誣輕爲重亦有不實原賞花翎著卽行拔去十一月管理威遠堡六關口事務偕盛京將軍晉昌等會奏坐卡章京烏爾圖色布正額稟稱海凝阿失察偷斫木植海凝阿忽患病迷失又訊出烏爾圖私帶賊犯黃幡有出邊等情請革職究辦 諭曰黃幡有偷斫木植烏爾圖旣係知情其所報海凝阿因病外出不知下落安知非卡員等夥同作弊海凝阿獨不染指致遭謀害該將軍等務查海凝阿實在下落勿任稍有

枉縱二十年三月訊實烏爾圖收受黃輜有人獲鹿茸私帶出邊  
因海凝阿欲行稟揭起意謀害商同色布正額棄屍捏稟請實請  
法復 諭曰此案與王仲漢謀害李毓昌情節相似果不出朕所  
料可見聽訟必須細心設竟如晉昌等初奏顛預率結使正兇漏  
網奇冤莫雪成何政體五月奏報移居第三起宗室護送起程並  
到藩後安置事宜報 聞先是十八年宗人府奏定移居宗室到  
藩請 欽派宗室二員前往駐劄彈壓嗣奉 諭旨此次移居宗  
室事當勘始自應派員彈壓迨住居日久卽與舊居宗室無異所  
有派出司員三年回京毋庸另行更換一切稽查約束事宜該將  
軍妥爲管理至是貴慶奏言前二起宗室移住已歷年餘而三起

宗室則甫經移住請於移住宗室內選其老成明幹者設立正副族長各一員正副學長各一員以資約束又言宗室三起俱已到齊人數漸多賢愚不等請嗣後該宗室所犯罪名在軍流以上者照例奏明辦理若尋常過失卽交該管宗室章京等分別圈禁責處以示懲儆 從之八月因病請開缺回旗調理十一月病痊署理藩院左侍郎兼鑲黃旗滿洲副都統十二月授禮部右侍郎兼署刑部右侍郎授鑲紅旗漢軍副都統以會奏摺內具名誤寫慶貴自請議處得 旨貴慶一到刑部卽不用心自己名字顛倒亦看不明白著降補奉天府府尹卽日起程不准具摺謝 恩以示懲戒二十一年二月直隸總督那彥成請 飭奉天省開羅通商

命會同盛京將軍晉昌察看情形擬定章程具奏尋奏奉省糧石充足濱海地方見有屯積高粱粟米請暫開運以通商販如所議行四月以前署刑部侍郎任內保舉郎中保齡京察一等嗣因刑部承審楊四毆傷富定一案訊出保齡聽囑得贓部議保舉不實降二級調用上寬之改爲畱任六月復因病懇請回京 諭曰廉善貴慶二人均由科甲出身其資格才具亦屬相等本年廉善母病奏請來京看視朕允其所請其時適有禮部侍郎缺出將伊補授上年貴慶自稱染患痰疾因聞母病增劇動履需人奏懇解任回旗調理到京後旋即銷假授爲刑部侍郎嗣查出貴慶前病係屬假託希冀畱京補用是以將伊降補奉天府府尹此二人

真偽不同故黜陟亦異朕辦理庶務一秉大公並非意存軒輊也將此諭內外臣工知之二十三年以擅行御道毆打防禦經盛京將軍富俊奏參 諭曰貴慶擅行御道被修道防禦海昌攔阻輒親自毆縛拴於馬項牽行二十里已降 旨將貴慶革職重責仍令富俊等嚴審定擬具奏尋發往黑龍江效力贖罪二十五年九月 恩詔釋回 賞給主事道光二年充 實錄館提調四年四月 仁宗睿皇帝聖訓告成大學士曹振鏞保奏在館出力各員得 旨貴慶以四五品京堂候補六月補通政司參議五年五月擢內閣學士兼禮部侍郎銜七月署文淵閣直閣事九月授兵部右侍郎十月調吏部右侍郎六年三月充會試知貢舉六月授正



白旗蒙古副都統七年署正藍旗滿洲副都統 命盤查戶部三  
庫授正黃旗護軍統領八年四月調正藍旗滿洲副都統九月署  
正紅旗護軍統領十一月轉吏部左侍郎九年二月署左翼前鋒  
統領八月署鑲白旗漢軍都統十年正月 命往 東陵敬謹查  
勘 隆恩殿工程三月署理咸安宮官學四月署兵部右侍郎八  
月充國史館清文總校十一年正月調刑部左侍郎三月署吏部  
左侍郎八月署戶部右侍郎兼管錢法堂事務九月復調兵部左  
侍郎以揀選甘肅木壘營守備蘇勒芳阿帶領引 見箭枝脫扣  
奪俸十月補授秦甯鎮總兵兼管內務府大臣時兵部籌辦回疆  
事宜行令各營詳察差務繁簡裁扣兵缺貴慶請將秦甯鎮所屬

各外營裁兵三十六名咨覆嗣直隸總督琦善奏鎮屬各外營與各標營情形不同若遽議裁恐致不敷差撥 上命貴慶安議十二年正月奏見值 龍泉峪恭辦大工正須輪派弁兵敬謹看守所有鎮屬應裁兵三十六名請暫免裁扣 允之閏九月授倉場侍郎十月奏定巡倉章程嗣後城內巡倉旗分及城外巡倉汛務僉派委員督率該班兵丁實力巡邏如有倉米被竊之案將被竊月日訊明傳問該班弁兵治以疎防之罪其失察之監督按照次數遞加議處並著查倉御史倉場侍郎一體稽查十三年二月戶部左侍郎申啟賢奏上年畿輔歉收請 飭倉場侍郎收買各幫漕船旗丁等應得餘米以裕倉儲 上命貴慶議奏嗣奏各幫旗

丁例准隨帶行月食米應有羨餘惟各幫領運正米閒有盤剝篩揚折耗准其以餘米賠補此次正米不足亦准其收買別幫餘米賠補至各幫交足之後則前幫早已回空勢難查其餘米數目若一幫正米收足卽收買一幫餘米則後到之幫備正米不足卽無別幫餘米可買必致紛紛挂欠實於倉儲無益且通州沿河貧民全賴幫丁餘米接濟如一槩收買亦於民食有妨應毋庸議四月投漕運總督九月投熱河都統先是貴慶疏陳近年添設漕弁搜查私鹽以致回空軍船沿途耽擱未能速歸水次請撤弁兵以利漕行復以漕務疲敝旗丁苦累籌議江廣回空軍船請於例帶食鹽外的擬加增由天津溝帶至揚州交課以資調劑 上命戶部

議奏部議以長蘆兩淮各分引地例不准越界銷售復命兩江總督陶澍妥議嗣據陶澍力陳此議誤鹽且致誤漕若使准帶鹽斤裁撤漕弁則幫丁舵手等必致放膽買鹽其停泊上載必不止如委員搜查之片刻而楚西等省之冬春銷市必盡爲糧私所占所銷盡長蘆之私鹽所缺盡兩淮之官課明縱偷漏既有害於漕綱欲速反遲尤有礙於漕運上以陶澍議較明晰諭直隸總督等仍照成案添設漕弁查緝糧私會御史許球奏聞江西回空軍船有夾帶私鹽之事署漕運總督恩銘亦遵旨查明貴慶於奏裁漕弁具摺後未候命下卽鈔錄摺彙咨行各督撫鹽政等令其查照辦理上責貴慶冒昧下部議處十一月因病陳請

開缺十四年五月病痊授盛京刑部侍郎七月署理盛京工部侍郎偕盛京將軍奕經會議查禁鳥槍並防範圍場章程六條一鳥槍宜嚴禁私造一民間私藏鳥槍宜勒限呈繳一嚴拏供給奸匪口米一圍場宜添派委員嚴查一山犯宜嚴治其罪一疎防賊犯解差兵丁等應得本罪外加枷號一箇月均如所議行八月復派協辦盛京濩務管理移居宗室事務十五年閏六月復管理牛馬稅差九月授刑部右侍郎十六年二月授正紅旗蒙古副都統五月轉刑部左侍郎充崇文門副監督七月授鑲紅旗漢軍都統禮部尚書兼管太常寺鴻臚寺事務復充崇文門副監督十一月賜紫禁城騎馬十七年三月 諭曰朕本日閱視祝版禮部尚書

貴慶包裹祝版顛倒錯誤著交部嚴加議處尋議革職得旨加恩降爲二品頂帶仍帶革職畱任五月復因病陳請開缺二十五  
年二月病痊奏請變通庫項監追章程上命擲還原摺所有應  
交庫項銀兩監追之處仍照原議辦理三月戶部奏貴慶前充查  
庫大臣應賠銀兩業予展限未能如期全完奉旨革職監追二  
十七年故子瑞秀見任吏部主事

右 國史館本傳



國朝書獻類徵初編卷百十一目錄

卿貳七十一

鮑桂星

史致儼

張鱗

覺羅桂芳

廉善

康紹鏞

熙昌

史積容



皇清宣統元年...

--	--	--	--	--	--	--	--	--

國朝耆獻類徵初編卷百十一

通奉大夫前署江西巡撫江西布政使司布政使湘陰李桓輯

卿貳七十一

鮑桂星

鮑桂星安徽歙縣人嘉慶四年進士改翰林院庶吉士六年散館授編修八年三月大考二等擢右中允八月轉左中允九年二月上幸翰林院分韻賦詩桂星與焉進雅十篇 賜文綺七月充河南鄉試正考官十年九月 上幸盛京進頌十篇 賞荷包大緞十月提督河南學政十一年正月授司經局洗馬九月遷侍講十二年轉侍讀十三年正月充文穎館總校七月充山西鄉試正

國朝通志卷一百一十一  
考官十一月署日講起居注官十五年二月京察一等記名以道  
府用四月授侍講學士八月提督湖北學政十七年轉侍讀學士  
九月擢詹事府少詹事十八年四月授詹事九月遷內閣學士兼  
禮部侍郎銜十二月充文淵閣直閣事十九年閏二月 命稽察  
中書科三月擢工部右侍郎七月署武英殿總裁九月充武會試  
正考官十一月 命往通州查驗倉儲十二月條奏武英殿刊刻  
校勘及收存版片各事宜得 旨交軍機大臣議奏又奏參提調  
劉榮黼聲名平常居心險詐副管祝麟聲名亦復不好難以姑容  
命武英殿總理事務王大臣及總裁會同秉公查奏尋將所詢  
情節奏入 諭曰朕召見常福據奏伊等在武英殿查詢時提調

劉榮黼對眾指稱鮑桂星因熙昌校勘修改恐致遲延曾言熙總裁所校不過偏旁點畫可以將就並言近日有旨旗人多靠不住此時督撫多用漢人等語當交軍機大臣傳詢鮑桂星卽據認有此語係本年秋閒聞自周兆基並稱在部與滿員共事見多有徇私背公者適是日周兆基自盛京差回遂著傳詢周兆基兼令鮑桂星將徇私背公係何人何事據實指出隨據周兆基登覆伊於召見時並未奉有此旨亦未與鮑桂星言及見在已據鮑桂星自認彷彿記憶是日赴園太早假寐初醒周兆基所言聽聞不真其鮑桂星所指熙昌囑託武英殿供事又託將吉林開採煤窯議准及慶溥託伊工程委員等款據熙昌登覆實無請託供事之事卽

鮑桂星亦不能指出所託供事姓名其囑託吉林煤案一節據熙  
昌覆稱但言吉林請開煤案係屬好事並非託其議准慶溥登覆  
祇認曾在朝房間過鮑桂星所奏何事鮑桂星答以具奏董率工  
程亦未囑託委員以上各情節如果鮑桂星存心公正則周兆基  
以召對時諭旨失口向人宣露鮑桂星應立時奏參朕必將伊加  
以褒獎乃以彷彿無稽之言輒向劉榮黼轉述其誕妄之罪尙何  
所辭卽慶溥熙昌等果有囑託情弊鮑桂星亦應將所託何人何  
事原交名條據實奏參乃因口舌爭競牽連率指一經研究全無  
證據豈能以此坐周兆基等之罪鮑桂星任性乖張妄言亂政著  
交部嚴加議處尋議革職得旨鮑桂星指訐慶溥熙昌等囑託

公事一無證據其咎猶小至其所述朕輕滿洲重漢人之語此則  
妄言亂政之大者朕統御寰區滿洲漢人一視同仁從無偏愛偏  
憎於其間國家設官定制如東三省及新疆各城並各省駐防文  
武大員皆專用滿洲此因地制宜之道有漢人所必不能勝任者  
若直省督撫滿漢閒用因才器使惟視其人之賢否何嘗有畸輕  
畸重之見乎鮑桂星以私意揣度爲此無稽之言謬妄已極卽著  
照部議革職不准回籍令其在京閉門思過仍責成五城御史不  
時稽察如私著詩文有怨望誹謗之詞卽行嚴參從重治罪二十  
四年九月 上六旬萬壽 命軍機大臣將獲咎各員開單具奏  
桂星 特賞編修道光二年七月授侍講八月署日講起居注官

十二月授侍講學士三年補通政使司副使兼稽察左翼宗學四年二月擢詹事府詹事十二月充文淵閣直閣事五年因病乞假尋卒

右 國史館本傳

道光六年三月十九日詹事鮑覺生先生以疾卒於京師之寓齋公邃於文學質厚性直敢任事有明斷才皆爲 兩朝所深知故中嘗躓而終顯使公不乞病卿貳旦晚可復乃不能畱其身以慰 今天子之眷注朝之士大夫莫不重公學行爲 朝廷惜而余與公遊從至久且熟其以文字相質證蓋誼在師友閒一旦失所瞻侍其爲悲尤深矣今執筆銘公之墓言之安得不痛也公諱桂

星字雙五一字覺生欽之殿鎮人也曾祖善基祖倚樓父嘉命三世皆以公所歷官得封贈如例公兄弟四次居長少有異稟八歲能誦詩本生祖嘗奇其才十五補縣學生居貧授徒爲養丙午中江南鄉試副榜壬子舉京兆試己未成進士由庶吉士授職編修癸亥廷試翰詹列高第擢中允自是進奉文字輒拜文綺之賜甲子典河南試乙丑督河南學丙寅擢洗馬旋擢侍講侍讀戊辰典山西試庚午擢侍講學士督湖北學轉侍讀學士擢少詹事癸酉擢詹事旋擢內閣學士兼禮部侍郎當受代聞林清之變上書陳十事疾馳至京仁宗亟稱之曰己次第見之施行矣顧以未經明發諭旨遂削其橐雖余習於公而未嘗以示余也



甲戌擢工部右侍郎充武英殿總裁條奏武英殿事劾提調及副  
管不職狀提調撫公平日語中公遂落職使居京師閉門思過逾  
五年而復之編修及今上卽位以編修召對上語之曰汝  
所劾者今朕褫其職矣既由侍講擢至通政司副使上召見復  
謂曰欲汝習練諸事也甲申擢詹事召對詢年齒甚悉公感  
兩朝之湔濯益自奮勵思見之事以爲報而以得暑疾患胸膈痛  
醫逾數月終至不起大漸時余省之至榻前執手與語伊唔不可  
辨蓋公自痛未能酬國恩以余習於公欲爲明其志而以墓銘  
相屬也公少從吳澹泉定學詩古文因以溯劉海峰中年後師事  
姚姬傳先生於爲詩力守師說及乙亥落職居京師縱心於唐人

詩益進嘗輯唐詩品八十五卷以司空表聖二十四品排次之其所爲詩姬傳先生嘗稱之曰是能合唐宋之體而自成一家者也著有進奉文鈔二卷詩八卷詠史懷人詩各一卷余爲庶常時公以姬傳先生語先來視余自是遂質以詩賦學及晚年過從益密嘗申之以婚姻會其子殤遂不果然公所以待余者乃獨至公叔弟珊今爲乾州知州以書來敦余曰葬有期矣先兄所自爲年譜存君所其無忘銘幽之請嗚呼余安忍以不文辭公娶同里柳恭人有婦德先公卒生子二長唐嘉慶丙子舉人少爲文有奇氣公愛之甚願得狂易之疾雖旋愈而復發公喪時乃不能執喪旣歸逾年而遂卒矣次承輝以後其從兄聰聽女一適同年朱意園太

守祿第三子側室汪氏生子二慶殤虞聘白小山侍郎鎔女孫幾  
人公得年六十有三某月葬於某公叔弟珊迎其庶嫂及虞至乾  
州撫教之爲之銘者新城陳用光也銘曰

文足以繼燕許兮而才足以追姚宋也文旣顯而才終闕兮何命  
之嗇而疾之縱也意皎皎以特立兮情落落而獨厚余痛虎賁之  
無人兮溯典型於遺書

右墓誌銘陳用光撰

鮑雙五侍郎桂星雖以妄言失職然其人性伉爽未第時爲涑水  
方氏主計臣出入百萬計無遺策方氏賴之以富爲中州學政督  
課士子最勤五更時卽朝服坐堂皇校閱文字以河南士風多舛

陋故命題多以典故考詰以誘士子勉於學問誦讀其敘中州試  
牘有云士子奔陋不已必至有懷挾代倩之弊而國法隨之矣  
語雖激烈亦見其苦心也癸酉秋任湖北學政時聞林清亂慷慨  
就道數日急驅至京時滑縣道梗公主僕數人直摩賊壘而過嘗  
曰吾既以身許國豈可畏禍紆行以干名義也途中上疏調劑  
兵食語多裨益上採行之故滑縣之成功較速公之策居多公  
爲余之畏友丁卯冬余邸既遭回祿公每勸宜急修葺以存國  
體至丙夜修書洋洋數千語以責之又余挾優過其寓公拒不納  
其嚴厲也若此

右錄宗室昭棟撰

--	--	--	--	--	--	--	--	--	--	--

147-684

史致儼

史致儼江蘇江都人嘉慶四年進士改翰林院庶吉士六年散館授編修九年充順天鄉試同考官十二年提督四川學政十五年差竣回京十六年充文淵閣校理十八年充日講起居注官十九年正月京察一等九月覆帶領引 見記名以道府用十一月擢國子監司業二十年三月遷翰林院侍講六月轉侍讀七月升詹事府右春坊右庶子二十一年提督河南學政先是河南教匪煽亂民有從逆者 上命學臣撰論說以化之致儼著敦俗篇進御奉 命刊布尋轉左庶子二十二年升翰林院侍講學士仍留學政任二十四年任滿回京二十五年轉侍讀學士道光元年正

月充 實錄館總纂官七月充湖北鄉試正考官十月遷詹事府少詹事十二月充文淵閣直閣事二年三月擢詹事 命稽察西四旗覺羅學九月擢內閣學士兼禮部侍郎銜充武殿試讀卷官三年正月遷刑部右侍郎四月充殿試讀卷官四年四月 仁宗睿皇帝實錄告成交部議敘十二月因刑部審擬文元毆斃胞姪伊克唐阿一案辦理錯誤部議降一級調用 上加恩改爲降三級畱任五年八月提督福建學政六年正月調禮部右侍郎仍畱學政任三月奏言臺灣民無土著皆閩粵之人寄居學校向有閩籍粵籍之分閩籍生員另編字號每科鄉試取中文舉人三名粵籍生員則散入福建通省卷內憑文取中今臺灣人文日盛請將

粵籍生員另編字號每科取中一名又臺灣府屬臺灣鳳山嘉義  
彰化四縣各額進文章十三名近年應試者倍多於昔請各增廣  
二名又澎湖廳應試童生向附入臺灣縣學並未明著進額請設  
爲定額歲科兩試各進二名 從之九年正月任滿回京三月充  
會試知貢舉四月轉左侍郎五月因山西平定州民婦朱葛氏以  
伊夫朱照實被朱惠吉毆傷氣忿投井斃命知州故出正兇來京  
控訴 上命致儼偕刑部侍郎鍾昌往治其獄鞫實將朱惠吉論  
罪如例以知州恆杰坐錯擬罪名褫職十一月 賞紫禁城騎馬  
十年二月以派署主事誤寫在該司章京上學習行走字樣下部  
議處四月署兵部左侍郎七月授倉場侍郎先是倉場衙門奏准



添設候補監督四員主稟辦事嗣各該員因別有差委遂未於稟  
內列銜畫押 上以倉場衙門事務殷繁未便止憑書吏辦理稟  
件應如何責成委員專辦 命致儼安議章程具奏尋覆奏倉場  
衙門辦稟委員向以記名監督名次在前者充補此項人員不過  
數月半年卽補實缺甫經接手旋又更換於公事終無裨益應請  
將名次最後者咨取委用庶辦理稍久可期得力如所請行十一月  
查明北新倉白麥不堪備用委員督飭篩颺閒有紅蛀估計成色  
七八成不等據實奏參將經手花戶懲辦歷任監督交部議處十  
一年因失察車夫得受陋規下部議處十二年二月調刑部左侍  
郎八月充順天鄉試副考官十三年四月充殿試讀卷官旋因刑

部疎防官犯李相清越獄脫逃部議降三級調用 上加恩改爲  
降四級畱任十月升都察院左都御史十二月充經筵講官十四  
年二月擢禮部尙書四月 上御門辦事因入班錯誤交部議處  
八月充順天鄉試副考官十一月調工部尙書尋調刑部尙書十  
五年四月充殿試讀卷官八月兼署吏部尙書十六年正月刑部  
堂印被竊部議革職畱任旋因人印並獲 上加恩改爲降三級  
畱任四月充殿試讀卷官十七年正月京察屆期 上以致儆刑  
名詳慎交部議敘十八年二月因病陳請開缺七月卒遺疏入  
諭曰原任刑部尙書史致儆品行端醇學問優裕由翰林游躋卿  
貳擢任尙書辦理刑名事務明允精詳克盡厥職方冀病痊益資

委任遠聞溢逝殊堪憫惜著加恩賞太子太保銜照例賜卹任內一切處分悉予開復應得卹典該衙門察例具奏尋 賜祭葬如例二十年入祀鄉賢祠子丙榮道光十八年進士安徽卽用知縣愆長廣西候補直隸州知州瓊河南試用知縣

右 國史館本傳

宮保諱致儼字容莊號望之又號問山年七十後自號榕莊老人又自號栲翁先世出漢溧陽史崇後傳至諱必相者於明洪武四年遷揚州之江都縣曾祖道義祖積學父元善皆名諸生有隱德以宮保貴累 贈光祿大夫刑部尚書曾祖母董祖母魯母蔣皆累 贈一品太夫人元善公生四子宮保其仲也八歲讀書卽考

訂周禮人民物產室恆不舉火太夫人以鍼術易油父子一席讀  
年十六入江都學學使謝金圃先生埔歎爲奇才詢知家貧給膏  
火以助讀焉家無書詣學宮讀所頒書於尊經閣二十七補廩生  
乾隆甲辰 純皇帝南巡以學使薦赴 召試時與試者車馬僕  
從甚都宮保囊餘十餘錢薄暮無所投宿露坐田家石磨上後屢  
述之謂彼時心無所慕臥觀星斗頗覺自適蓋富貴貧賤恬然有  
中自少已然矣王子舉於鄉嘉慶己未會試元副朱文正公珪爲  
總裁宮保中式第一名 仁宗問元日會元是汝揚州人元對以  
寒士有品學及居尊經閣讀書狀殿試 賜進士出身改庶吉士  
是科得人最盛績學如武進張惠言高郵王引之歙縣鮑桂星全

椒吳鼎福州陳壽祺德清許宗彥棲霞郝懿行武威張澍其通顯  
揚歷中外者則自湯相國金釗盧敏肅坤以下又數十人而宮保  
爲之冠是年太史奏五星聚奎文正因作五緯聯珠圖議者謂  
國家科目斯最盛也辛酉散館一等授職翰林院編修甲子充順  
天鄉試同考官累充國史館協修纂修本衙門撰文丁卯視學四  
川捐廉修成都考棚刻詩韻辨字略明音訓之學所拔皆知名士  
有曾爲宮保戒飭者十餘年忽來謁曰吾非師幾爲名教所不容  
也辛未充文淵閣校理教習庶吉士癸酉充日講起居注官咸安  
宮總裁京察列一等覆帶領引 見記名以道府用尋升國子監  
司業乙亥三月進翰林院侍講轉侍讀七月進右春坊右庶子入

月命爲河南學政河南承十八年逆賊李文成之變羽黨未盡有紅鬍賊劫掠燔燒爲民害仁宗諭宮保知汝品學兼優操守自好又諭宮保察視地方盜賊及官屬捕緝事宜復諭宮保滑縣之亂總由積習釀成凡地方吏治河工小事言之有司大不便者入告無隱廉知彰德衛輝府屬吏民習教者眾因將實在情形入奏兼陳州縣官編察保甲有名無實狀商邱廩生陳忠錦以不濫保爲童生張某毒毆知府暨經歷某受賕誣陳加斥責陳忿縊死其弟勉旃訟冤宮保列知府經歷罪於朝分別鐫革由是上下畏法兩河肅清每疏入仁宗嘉歎稱爲實心化導者再累遷左春坊左庶子翰林院侍講學士仍留學政任回京轉侍讀學

士 今上御極之元年奉 特旨充 實錄館漢文總纂官秋七月典試湖北累升詹事府少詹事文淵閣直閣事稽察西四覺羅學壬午升內閣學士充武鄉試副考官乙酉以刑部右侍郎視學福建尋調禮部右侍郎福州試院有地溝運竹筒傳遞宮保捐廉修號積弊始清漳泉諸州尙械關上杭生員何某者強宗也以爭墳地械關上控宮保飭學扣考何訴之撫軍撫軍咨送考試宮保不可治益急由是械關之風頓減臨行生員獻詩送者幾千人己丑充會試知貢舉轉禮部左侍郎 命偕侍郎鍾昌馳驛審山西平定州朱葛氏一案究出知州錯擬罪名並門丁受賄狀人稱明尤是歲 賞紫禁城騎馬署兵部左侍郎改倉場侍郎壬辰調刑

部右侍郎 命爲順天鄉試副考官癸巳進都察院左都御史充  
經筵講官甲午春仲經筵充直講進禮部尙書 命爲順天鄉試  
副考官調工部尙書戴公敦元卒 上以刑部事繁重調宮保爲  
刑部尙書宮保謂人命至重侵晨進署書吏司員未至恆一人坐  
堂上閱視案件如老諸生日暮未畢則攜歸燒雙燭審定遇疑獄  
與同官論難再三或格於例則於 聖前直陳其情一事未安思  
之終夜積三年以爲常體素健自是苦不能寐會丁酉京察屆期  
制書褒美謂宮保刑名詳慎精力如常與湯相國金釗同列一  
等議敘宮保益不敢自安然用是體益瘁矣是年夏至後病下利  
夜數十起旬餘稍瘥 上召見溫諭力疾視事冬至前更苦煩躁



履請致仕 上諭以安心調理不許次年二月復固請 上不得已許之尤諄諭以病痊後具摺請安蓋是時 上倚宮保方殷每召對廷臣 詢宮保疾狀至於再三宮保亦欲以餘生報 國臨終尙書祁公墳來視疾與談國事亶亶如平時午後嘔吐作旋端坐逝面目如生壽七十有九時道光戊戌七月之十日也遺疏奏 聞 上悼歎久之贈太子太保降 制賜卹有品行端醇學問優裕明允精詳克盡厥職之語嗣於七月三十日 命禮部尙書吳公椿率太常寺司員爲文致祭可謂知遇之隆而哀榮之備也矣宮保性情誠摯讀書實事求是終身不爲門戶見嘗謂刑以弼教近世吏治不如古者以分刑教爲二也故爲學政時抑豪猾

仲冤滯勤於有司官及官刑部戒飭屬員如子弟於浙江汪宗炎一案論大宗小宗引律據經作說帖數十紙曰倫常者弼教之本也前後主試三爲學政三閱會試覆試 殿試 朝考卷四累遷五部所歷官雖一日必勤所事性尤介爲諸生時富賈某持百金求製壽文鄙其人弗許其視學福建也囊空至不能還京立 朝四十年自 兩朝恩賞書籍珍玩數十種外物後家無餘財其呈請開缺摺有云卅年京宦參養 恩深倚寓京師家無半畝非虛語也配蔣夫人先宮保卒子三丙榮道光乙酉舉人戊戌進士安徽卽用知縣悠辰廕生廣西試用知縣以芳林渡勦殺猺匪軍功升直隸州知州廣河南試用知縣女一許字秀水汪氏未嫁守貞

係三久開久恩久齡孫女三以十九年己亥十二月之十日葬宮  
保於甘泉縣廟山旁團山之南闕家莊蔣夫人耐焉丙榮等來乞  
爲神道碑銘元老矣謹按狀序而銘之曰

五星聚奎爲文之祥人文大啟爲邦家光尙德緩刑舉陶拜颺帝  
用刑官空冬居陽故所褒者學行爲長一曰明允再曰純良以此  
銘碑佳城後出

右神道碑銘徐肅代阮元撰

張鱗

張鱗浙江長興人嘉慶四年進士改庶吉士尋派習國書六年散館授檢討九年上幸翰林院鱗獻詩冊賜御製味餘書室全集九家註杜詩及端硯等物十一年上以高宗純皇帝實錄聖訓將告成卷帙繁多進呈黃綾本外尙有未呈覽之尊藏本四分詔鱗等分司校勘十二年八月充順天鄉試同考官九月丁父憂十四年服闋復任十七年大考二等遷右贊善尋轉左贊善十九年二月升侍講旋充日講起居注官五月轉侍讀八月升右庶子二十年二月上命內廷翰林英和等纂輯祕殿珠林石渠寶笈續編詔鱗與學士吳其彥等八人入直懋勤殿隨襄繕

錄書成下部議敘並賜書籍畫卷暨紗裘等物五月轉左庶子  
六月升侍講學士二十一年遷國子監祭酒稽察左翼覺羅學二  
十四年六月充江西鄉試正考官十二月以齋戒到遲降一級調  
用二十五年補光祿寺少卿道光元年擢通政司副使二年二月  
升太僕寺卿八月稽察右翼宗學九月命偕太常寺少卿明安  
秦赴楊村驗挑剝船時直隸東光縣民秦本善被營弁刃傷其母  
馬氏以知縣包敬堂威逼致死入控命偕明安秦往鞫得實論  
如律又赴盧龍訊旗人張兆鳳通租事知縣姚景樞濫行監禁承  
審官灤州知州陳晉擅用非刑通永道任銜蕙徇庇屬員秦禔景  
樞晉職銜蕙休致餘論如律三年九月遷太常寺卿十月提督安

徽學政四年升內閣學士兼禮部侍郎銜六年充會試知貢舉十一月充 玉牒館副總裁官十二月充文淵閣直閣事七年三月署禮部右侍郎四月丁繼母憂九年服闋十年八月補原官九月署兵部左侍郎十月補兵部右侍郎十一年正月轉左侍郎六月署工部右侍郎兼管錢法堂事務八月提督福建學政十三年調戶部右侍郎兼管錢法堂事務十四年二月轉左侍郎因已革福建候補縣丞秦師韓控總督程祖洛恃權袒酷任性欺蒙 上命脩刑部侍郎趙盛奎往按辨其誣師韓戍邊十一月調吏部右侍郎十五年二月署戶部右侍郎兼管錢法堂事務三月充會試副考官事竣出闈卒二十一年奉 旨入祀福建名宦祠

右 國史館本傳

小軒少宰名鱗浙江長興人善歸安姚職方子居西山時少宰爲  
司成未識也予與職方論人性剛柔偏毗之病職方曰宋人稱蔡  
文忠臨事無所牽畏而恭敬謙退未嘗自伐今吾見其人因叩之  
則曰待君自識勿失也後日客數輩至無甚異越四日少宰至既  
去予告職方曰得之矣必是客也是學在敬其精神常充固筋骸  
閒譬如良玉緝密故堅栗其外之溫澤者亦堅緻爲之也職方曰  
敬則內實無浮慕惟事所當事則所畏不避而美名不居君得之  
也自是予交少宰如職方其所至無赫赫名亦不以豐功謀略自  
任自己未成進士爲翰林歷國子祭酒轉卿寺閣學晉歷禮兵工

戶吏五部侍郎典試江西又視學安徽福建迄爲今歲會試副總裁官大約處常事極詳慎處疑難極嚴毅處成事極謙遜尤嚴私謁在部理案顏色如介冑成均課士嫻舊家皆懷慄曰吾不薄其父兄何私待其子弟嘗從祀事齋宿同列或不至御史至並劾之引咎弗勝人無知其實至者故數事尤傳於士口凡此皆足以見君平生雖亦士君子所宜爲者然未易觀也其接後進常使人易爲善丙戌歲職方歿予慟甚門人治喪予每抑其禮之壹於文者少宰曰正之而勿以言否則各執一善以相拒也庚寅秋病不近藥予強之或晨坐至暮見其遇家人皆溫溫然必正色而後言事無大小惴惴恐失墜其謹畏時有過常度者卽其所過不易效也



爲試差學使既開試衣冠坐堂上夜隱几寐日食於堂之門後事竣乃復乙未會試榜未發已病猶力支日夜門啟之日卒嗚呼此終身在戒謹恐懼中而無一日敢自暇逸者也斂之日家無餘貲士大夫奔集其喪湯冢宰哭之曰人誰不死是人難得吾爲天下惜也因爲予言少宰父西箴公教子孫嘗書誠敬二字付之此其平生百事所由出者嗚呼誠之至不易言然人人可勉之其功自居敬始繼職方而知少宰者必自此言矣少宰年五十有九無子嗣以姪某天以其兄天津府丞洽之孫某爲之孫

右別傳潘諮撰

覺羅桂芳

覺羅桂芳鑲藍旗人祖湖廣總督圖思德自有傳桂芳嘉慶四年進士改庶吉士六年散館授檢討六月擢侍講七月充日講起居注官七年六月轉侍讀十二月承襲其祖隴錫軍功所得雲騎尉九年京察一等十月充順天武鄉試副考官升右庶子十年四月擢侍讀學士八月遷詹事十一年正月升內閣學士四月命在上書房行走九月轉禮部右侍郎十二月補鑲藍旗蒙古副都統十二年正月轉左侍郎充國史館總校官三月調正黃旗漢軍副都統尋以上書房退直太早奉 旨罰俸半年五月署吏部右侍郎七月因翰林院誤開編修湯金釗俸次未經查明開列帶領經

都察院議降三級調用得 旨改爲降四級從寬畱任八月充順  
天鄉試副考官九月 命教習庶吉士時恭逢 高宗純皇帝實  
錄告成 恩予二等議敘十三年正月調鑲黃旗滿洲副都統充  
經筵講官三月 上巡幸天津桂芳進呈詩冊工雅 賞紗二匹  
十四年三月兼署戶部右侍郎以前任禮部左侍郎任內保送戶  
部銀庫筆帖式玉柱不慎部議降二級調用得 旨改爲降三級  
畱任六月調吏部右侍郎兼署戶部左侍郎九月 上以本年五  
旬萬壽臣工等祝嘏臚歡內外一二品文武大臣降革畱任之案  
交軍機大臣查奏得 旨桂芳著開復誤開編修俸次降四級畱  
任一案十二月授總管內務府大臣旋因工部書吏王書常僞造

印文冒領戶部庫款失察一案部議降一級畱任十五年二月授翰林院掌院學士調戶部右侍郎兼理錢法堂事務四月因上年派辦萬壽典禮經理妥協賞加一級六月因失察膳房太監于進忠之姪德林擅入禁門投井身死部議罰俸一年及命查審又不卽時具奏部議再降二級畱任得旨從寬改爲降一級畱任是月充江南鄉試正考官十一月命暫管奉宸苑事務十六年六月內務府所遞月摺於應行迴避字樣率行繕寫內務府堂官諭吏部議處桂芳降四級畱任得旨允行尋以大學士祿康轎夫聚賭命偕侍郎英和查拏旋將開局之轎夫徐四訪實又拏獲看門三人上以其不避嫌怨不辱君命甚屬可嘉昨

所得內務府處分著改爲降三級畱任是月充國史館副總裁九月署吏部左侍郎是月 命在南書房行走充對引大臣十一月因失察吏部書吏配籤舞弊自請議處得 旨桂芳在內廷行走不能常川進署著加恩改爲察議又以秀清村及 萬壽山園亭內先後竊案日久未得正賊交部議處罰俸六箇月十七年正月賞戴花翎五月充武英殿總裁文淵閣提舉閣事並管理新舊營房事務六月因三廳東院有賊犯偷竊衣物 上以桂芳係派令管理二阿哥家務大員東廳內有失竊之事難辭失察之咎交都察院議處尋議降一級調用 詔改降二級畱任七月署理暢春園事務十八年正月兼管上駟院事務三月因前 命勘 泰

陵寶城工程查報疎略交部議處尋議降二級留任九月 上以  
本月十五日賊匪擅入禁城經在京王大臣等率官兵立時殲捕  
連日搜拏淨盡辦理甚爲妥協總管內務府大臣桂芳晝夜宣勞  
著賞加二級十月 命督辦清字 聖訓復 命暫在軍機大臣  
上學習行走十二月 諭曰自九月十二日以後直隸豫東等省  
軍報絡繹并有突入紫禁門內逆匪軍機大臣晝夜宣勞桂芳自  
托津出差派令入直奉職克勤卽著在軍機大臣上行走仍交部  
議敘又 命在紫禁城內騎馬十九年二月管理武英殿 御書  
處事務 上以上年九月逆匪林清聚眾謀逆剿辦已竣其陝省  
南山匪徒見已一律肅清軍務全行報蒞軍機大臣贊襄樞務夙

夜宣勞宜沛恩施以昭優獎桂芳之子炳奎著賞給七品小京官  
閏二月 命赴廣西查辦事件旋以本年正月清漪園失去陳設  
玉器日久未經究出賊賊罰俸半年尋總管內務府大臣英和等  
奏請議處奉 諭桂芳此次著加恩寬免伊見在出差竣回京  
時毋庸在軍機大臣上行走其管理御園稽查頗能周密仍著管  
理園明園事務是月授漕運總督四月於湖北差次卒經巡撫張  
映漢入奏 諭曰桂芳由嘉慶四年翰林洊擢侍郎雖資格未深  
然在內廷行走有年南書房上書房軍機大臣內務府大臣俱曾  
供職辦事明白細心人亦直爽本年春間令前往廣西審辦事件  
旋擢任漕運總督伊行抵湖北省城染患時疫令其安心調理方

冀不日就痊茲聞溘逝良才難得深爲悼惜著加恩晉贈太子少保加尙書銜應得卹典該部查例具奏任內一切處分悉予開復伊曾授三阿哥讀書俟伊柩入城次日派三阿哥前往奠酒上賦詩誌悼詩曰應運生明哲仕朝僅十年才華學有本直爽性無偏樞府新參政書齋久侍筵何因遽痼疾難得是英賢酌酒酬師誼輓詩述已捐楚疆隕三世定數總榮華蓋桂芳祖圖思德前任湖廣總督父恆慶曾任湖北糧道先後皆歿楚中也尋賜祭葬予諡文敏子炳奎恩賜七品小京官承襲雲騎尉見任工部司庫炳綱候補筆帖式

右 國史館本傳



覺羅香東侍郎桂芳 興祖直皇帝裔也爲兩湖制府圖公思德  
孫性豪宕中嘉慶己未進士 上召見曰奇才也因日見信任不  
數年卽登九列家素貧窶然不名一錢門生有饋納者公以束脩  
贄先生其誼甚古然某任司農尙可充用不敢拜受其惠因封還  
之時相有以苟且爲政者公深惡其人至面責之曰不意宗臣中  
有如公之行者眞污蟻帶聞物矣某公恨之次骨然亦無如公何  
也癸酉秋林清之變公擬奏彙數條預以示董蔗林董曰公言雖  
是恐不能迎合 上意公曰此何等時尚以迎合爲言耶董公爲  
之拜謝乃已奏上 上皆嘉納之甲戌春 欽命往粵西審辦成  
林案病寓於武昌未數日暴卒 上悼惜之獎以忠鯁有古大臣

風焉先是公祖制府公公父觀察公恆廣及公身三世皆歿於楚  
中亦一異也

右錄宗室昭榘撰



廉善

廉善格吉勒氏滿洲正黃旗人嘉慶四年進士以主事用分禮部  
九年補官十二月遷翰林院侍講十四年三月轉侍讀九月遷國  
子監祭酒十五年遷詹事府詹事十六年遷內閣學士兼禮部侍  
郎銜十七年兼鑲藍旗蒙古副都統十八年遷盛京工部侍郎二  
十年九月 命管理移居盛京宗室事十二月兼盛京副都統二  
十一年調禮部左侍郎兼正黃旗漢軍副都統充經筵講官二十  
二年調刑部右侍郎二十三年二月調鑲黃旗滿洲副都統五月  
轉左侍郎 命教習庶吉士管理成安宮官學二十四年正月兼  
翰林院掌院學士十一月充國史館清文總校官十二月山東民

人武泳清控曹縣知縣張正勳劣跡十款 命偕刑部左侍郎帥承瀛往按之惟浮收勒折及派買倉穀私抽行稅數款事屬有因餘坐誣均治罪如律二十五年充 實錄館副總裁官尋調戶部右侍郎管理錢法堂事務道光二年五月調吏部左侍郎管理國子監事務七月調刑部左侍郎二年五月擢熱河都統七月以母病奏請開缺 諭曰廉善奏伊母患病請開缺回京就醫著加恩准其開缺回京俟伊母病痊之日另行賞給差使此係朕以孝治天下之意格外施恩爲臣子者不可因有此旨輒以私情率請致啟規避捏飾之漸八月 諭曰前據廉善奏伊母患病懇請開缺侍親回京就醫當經加恩允准將成德補授熱河都統成德由京

前赴熱河不過四五日即可到任廉善自應於成德抵任交卸後再行起程何至迫不及待率將印信等件存貯庫內自帶印鑰沿途迎交成德任意自爲設使前後任交代各員紛紛效尤成何政體廉善因母病奏准回京就醫原係朕格外施恩俾得遂人子侍奉私情乃不候交代遽行離任來京全不以公事爲重實屬膽大廉善著降爲二品頂帶仍交部議處尋議降調 上加恩改爲畱任十二月署兵部右侍郎三年正月補刑部左侍郎復充國史館清文總校官四月兼正白旗漢軍副都統九月調正藍旗滿洲副都統四年卒 諭曰刑部侍郎廉善前經簡放熱河都統伊因年老奏懇來京仍令補授侍郎今遽聞溘逝殊堪軫惜著加恩賞還

國朝典章考卷一百一十一  
都統銜卽照都統例賜卹所有任內處分悉予開復應得卹典該  
部察例具奏尋 賜祭葬于成順見官兵部筆帖式成琦都察院  
筆帖式成鎮候選筆帖式

右 國史館本傳

康紹鏞

康紹鏞山西興縣人嘉慶四年進士分發兵部候補主事十年充軍機章京十五年補主事十六年升員外郎上巡幸五臺紹鏞進詩冊賞文綺十八年五月升郎中十二月擢鴻臚寺少卿會教匪林清等煽亂直隸奸民響應大名民司敬武馬泳幅等避赴錦州過山海關官兵執之指爲逆黨欲藉以邀功刑偪誣服副都統額勒金布輕聽入奏上命紹鏞偕內閣學士文孚往鞫之得其狀乃劾額勒金布等並論弁兵如律十九年二月遷通政司參議閏二月命偕通政司副使琦善詣江蘇鞫睢甯監生王璽京控命案將毆殺王塾之史嘉言依律處罪七月遷大理寺少卿尋



外遷安徽布政使疏言皖省各屬倉穀虧短逐款查覈酌議章程  
 諭確實查明分別追補二十一年四月擢安徽巡撫十一月以  
 安慶等六府水災請賑恤並緩其賦 允之二十二年四月請以  
 全椒縣知縣楊國榮調宣城縣 上以國榮曾屢望吏議申飭之  
 九月以臬司獄囚逸下部議處十二月請鼓勵清查倉庫局員時  
 虧帑尙未補完傳 旨申飭二十三年以太湖等縣被水請緩徵  
 從之二十四年二月以宿松縣民王金秀被盜劫案懸三載下  
 部議處四月調廣東巡撫十一月奏歸善等縣水災請賑恤緩徵  
 允之道光元年六月 召還京八月署禮部左侍郎 命偕吏  
 部尙書松筠往浙江讞獄旋丁母憂四年服闋二月署禮部左侍

郎三月授廣西巡撫九月因審那馬司土民黃添保等京控案請  
禁革土司科派擾累並懲土民土目之逞刁捏控者尋有匪徒許  
光勳等聚眾拜會誅之又奏粵西盜風未息皆由舊案逸匪潛匿  
句結所致隨派文武員弁嚴緝獲逸犯二百餘名請鼓勵承緝之  
州縣佐雜 上俱從之五年調湖南巡撫先是御史賀熙齡奏洞  
庭湖面請復舊規委員巡緝 敕督撫查奏紹鏞偕總督嵩孚查  
勘湖面遼闊委員實難周徧且恐地方官恃有委員稽查轉致觀  
望懈弛請按照界址責成濱湖州縣營汛各於所轄段內督率兵  
役遇有賊匪互相堵拏並隨時遴員往察勤惰責成既專巡防日  
密可期匪徒盡除湖面肅清於六年十月奏入 上從其議十一

月奏醴陵等縣被水衝坍衙署倉庫籌款修建應賠倉穀銀兩酌議分限賠補 允之十二月以起病知縣奏請調署苗疆要缺於例不符 飭之七年奏辰沅永靖道轄苗疆距省較遠請將尋常遣犯交巡道勘明轉詳 上以辰州府距省尙近 命照舊辦理餘許由道審轉八年十月以醴陵等縣被水請緩徵又屯田被旱請緩徵並借支儲穀濟困皆得 旨允行十二月奏桂陽州屬石家巖長富坪二處鉛廠嘉慶年間定解鉛二十五萬斤近來產砂短少祇可採辦五萬三千斤請減額辦解得 旨姑允所請嗣後仍照部議定額不得短絀十年正月奏屯田被水丁力不繼請將應運糧船暫停遣運 從之六月 召來京九月授光祿寺卿十

一年京察 諭曰康紹鏞前在湖南巡撫任內諸事廢弛不能整頓著降四品頂帶休致十四年卒子兆奎正二品廕生刑部郎中  
右 國史館本傳

道光十有四年四月二十五日前湖南巡撫康公薨越明年其孤兆奎以武進李兆洛所爲行狀乞余銘神道之碑余故知公者故剗其大要以顯焯之按狀公諱紹鏞字錡南別字蘭皋其先自陝遷山西清源數傳至登有又自清源徙興縣今爲興縣人曾祖萬方祖惇俱縣學生 贈資政大夫江南河道總督晉 贈振威將軍生基田官南河總督次基淵卽公考也與兄皆以進士縣令起家歷官江西廣信府 馳贈中憲大夫晉 贈振威將軍兼提督

曾祖妣郭氏祖妣王氏妣孫氏王氏生妣顧氏皆 贈封一品夫人公兄弟七人於次居五生而資性過人年十二廣信公歿於任執喪如成人乾隆壬子科舉山西鄉試嘉慶己未科成進士引見用兵部主事補軍機章京充會典館總纂修官歷兵部郎中鴻臚寺少卿通政司參議大理寺少卿鴻臚寺正卿公之官大理也當嘉慶十八年林清首亂畿南山東河南教匪響應公方扈 蹕塞外作小冊備書三省阨塞險要及將弁能否兵數之多寡適會 上問當軸卽以其冊進 仁廟由是知公才可大用擢安徽布政使 陛辭 上命之曰爾有老母皖江一水可通毋慮迎養時安徽四十餘縣皆旱災公諭勸富室捐資各振其鄉凡輸銀九十

萬兩米麥七十餘萬石益以帑項數十萬兩荒賴以濟然院省數  
災而藩庫止存三十餘萬兩其借支款項有出無入公嚴杜借支  
常奏銷時卽於州縣應領項盡抵正供省一領一解之費庫貯增  
多二年之內實積帑三百二十九萬八千餘兩某年擢安徽巡撫  
公自少負文武才機神開張不主故常鱗雜粟錯消以瓊篋喜跡  
弛異量之士務立名義功業有可成就及任封疆益以艱鉅事爲  
己任不恤常談浮議安徽巡撫銜故兼提督而廬鳳潁民俗悍輕  
備宗瞞氏之族村里相望又洪澤湖大江及阜陽亳州水陸奔轍  
爲私梟捻匪所出沒公相其扼要繕營房立巡船先後擒治李才  
楊七等五十餘人奏置之法盜乃戢又擇標下伉健者每日五十

人入內射堂角藝其精技擊者教習而時賞罰之公自幼喜習騎射所至完器械簡卒伍後在湖南造擡槍數十桿以教撫標二營至徭人稱亂猶賴其用二十四年調任廣東時總督祝 嘏入京兼署其任明年三月入 覲奉 命於回任時赴豫察視馬營壩及儀封漫口 今上元年有 旨查辦陋規公奏數千言大意以陋規入奏似非政體若奏減其數則不減者官吏皆明目張膽視如廉俸而已減者且額必私增若盡裁之官不能堪反益病民議遂寢在粵二年先後緝獲劇盜會匪數十案行旅以安是年六月入京署禮部左侍郎奉 命偕相國松筠赴浙查辦事件丁 顧太夫人憂服闋以禮部侍郎出爲廣西巡撫旋調湖南巡撫苗疆自

故按察使傅公爾經理之畏帖者二十餘年公視事後卽修葺傅公所築礮臺二十餘處禁民人毋得入苗疆射利以兆巖端洞庭湖多盜環湖州縣以水上道里遠近不明相誘避盜不時得公定其界址爲圖常置左右嚴檄巡令無文武無敢不用命編查漁舟如保甲法盜無所容而公猶以苗疆自初平時官其桀驁者羈縻之今日久倚官作威致凌犯自相殺不治則損威治之則法重如戕官例難盡行多設苗官未爲有益反益生事惟詳考其所轄道里近遠可歸併者缺出不補以次漸裁庶無後患欲陳奏之未發也而適值六年水災其醴陵茶陵數縣城郭皆敗壞民田廬無貧富皆盡捐輸不可行而費用廣視安徽旱災事尤劇督率司道分



行撫恤拯民於高阜而棲之行糜粥及藥物棺槨乞 恩展振及  
修屋宇費皆得 俞旨公伯父河督公善言水利公又習之撫安  
徽時修隄堰於濉河北股河以遏黃水由減水滾水諸壩軼入靈  
壁宿州者又築捍江隄千二百丈於無爲州之黃絲灘及湖南水  
災後復澧州田侵入夕陽湖萬四千五百畝排水去污皆可耕其  
不可耕者萬一千八百畝豁免起科分別奏行至道光九年入  
覲陳苗疆事宜 上命與督臣熟籌之議未定而公入爲光祿寺  
卿旋致仕道光十四年四月二十五日卒於河內里第年六十五  
公直軍機十年受 特達知巡撫四省 賜天府圖書稠疊優渥  
所建立多灼灼可指白而公常慊然未盡與僚友言每深慕孫文

定陳文恭之爲人也事太夫人竭情承歡不計費多寡深友疏客  
莫不意滿配封一品夫人趙氏子二兆奎正二品廕生刑部直  
隸司郎中記名以道府用兆臺國學生孫錫齡縣學生與齡成齡  
椿齡億齡俱幼以道光某年月日葬於某縣某鄉某原銘曰  
謹出納以裕封椿不積而贏是師研桑日肄金版補苴泰平要隘  
允猶可治川治兵莞數大事雄略偉斷憑陵談笑懦者悚懃事君  
事親有古名臣我稔知之於洞庭之濱流丸歐史公稔知之我銘  
幽宮實無媿辭

石神道碑銘程恩澤撰

公諱紹鏞字傅南號蘭阜其先自陝遷山西清源又自清源徙居

興縣故今爲興縣人也高祖曾祖皆績學不仕祖英偉闊達不治  
生產業貧苦購書籍教子弟悉口授無所遺嘗曰吾以墳籍遺子  
孫其爲田宅也多矣邑有張成者負人千金憂且死見而憫之許  
爲代償旣而成死竟立詣債家曰吾與張有成言不可食遂易張  
券爲己券畢償之其行義如此廣信公兄弟始舉進士兄基田官  
至南河總督廣信公歷河南嵩縣甘肅臯蘭知縣肅州知州江西  
廣信府知府所至勸農桑修水利興學校禁溺女皆有成效爲一  
時循吏生七子次綸鈞嗣河督 地贈其父母者也公次第五生  
而岐疑資性過人是時功令分經取士廣信命公兄弟各背一經  
而公得禮口講指畫悉能通解動止必循禮法其立身端直蓋本

諸庭訓爲多年十二廣信歿於任執喪毀瘠如成人隨願太夫人  
扶櫬回山西陸行至河南懷慶府將度太行山行陡峻處於重大  
而河督方爲河北道公請命焉遂葬廣信公於濟源公奉母願太  
夫人僑寓河內縣中道村益自刻苦於學河督有知人之鑑嘗願  
公曰此子氣宇不凡他日必出人頭地也乾隆壬子舉山西鄉試  
嘉慶己未會試中式引見以部屬用籤分兵部補軍機章京在  
直十年歷本部主事員外郎充會典館纂修官本部郎中鴻臚寺  
少卿通政司參議大理寺少卿駕幸遼陽木蘭五臺皆扈從自  
以備官禁近得窺政要勤於趨職不事結納專心掌故以周知當  
世之務爲急而董文恭公戴文端公盧相國蔭溥皆倚如左右手

所識大獄數十以平允爲主衷矜勿喜十八年直隸奸民林清倡亂畿南山東河南句結響應公方隨扈卽以各省應行防堵之處及將弁姓名曾否經歷行陣所轄兵數多寡作一小冊以自隨會上詢問各要隘將弁當軸卽以其冊進 上由是知其才可大用有鴻臚之擢焉遂奉 命偕文協揆孚馳赴山海關審大名民人司敬武之獄司敬武者同夥十餘人向傭於熱河及關外之錦州是秋聞亂馳歸及關司關者誣以預知道逆謀赴關外糾約其長馳奏械送刑部 上以其無左驗疑之特命公率犯集訊盡得其教供誣陷狀乃劾其長論弁兵如律而出司敬武等罪復 命稱旨受特達之知實自此始出爲安徽布政使陸辭曰 上命之

日爾有老母皖江一水可通無慮迎養 天語溫洽至此真不啻  
家人父子矣蓋公事母願太夫人自服髮以後僑居異地持家課  
子備極劬勞自公釋褐卽迎養京寓體氣甚憊忽於十七年秋微  
感寒暑而次日吐下惡物無數宿疾盡去自是飲食漸加目昏復  
明齒落重生髮白還黑詢者謂其吐下天然倒倉之法非公孝思  
所感不能致此擢臚卿時謝 恩 召對蒙詢家世甚悉故 上  
知之也抵安徽當歲大稔被旱者四十餘州縣饑民徧野待哺孔  
急公嚴各州縣倉穀積貯既乏司庫錢糧又不足用鄰省皆災無  
可挹注不得已先屬各牧令勸紳商士庶出資各恤其鄉眾輸銀  
至九十萬兩米麥至七十餘萬石益以帑銀數十萬兩分別被災

輕重戶口多寡分撥銀數揭示遠近俾眾咸知而官吏扣減侵冒之弊除然皖省最爲災區靡歲不歉卽靡歲不賑故尤重積貯而是時藩庫存款僅三十餘萬兩其借支款項實有出而無入於是釐剔弊竇嚴杜借支催提上下兩忙屬庫存款奏銷時遇有州縣應領之款卽爲畫抵正供以省一領一解之費各州縣旣受實惠而庫貯增多三年之內實存正項錢糧三百二十九萬八千餘兩較異時已十倍矣升安徽巡撫兼提督宿靈璧二州縣民稱淮河北股河隄堰埝壞連年被水皆由江蘇峯山天然各牐減水下注二河所致而峯山牐引河又逐漸淤平不能容納加以新建虎山腰滾壩分洩黃水其勢更大一當開放黃水四溢民田廬舍盡被

淹沒遂有積歉之區急宜修築公親往相視舊存民堰果皆殘缺不完奏請興復以資保衛潁州鳳陽泗州界連河南江蘇甯小易於竄匿而洪澤湖大江阜陽亳州水陸奔轆向爲私梟捻匪出沒之所因其阨要繕完卡房設立巡船多撥兵弁分番緝捕先後擒治李才楊七等五十餘名奏置之法奉有除莠安良化邪反正之諭而梟匪斂迹水陸肅清商賈便之又築無爲州黃絲灘臨江隄千二百餘丈以衛民田奏豁堰廢田畝正耗銀九十餘兩米七十餘石飭各屬買補倉儲穀麥四十七萬餘石以備緩急之用整飭營伍責成鎮將實力訓練務使糧不虛糜卒成勁旅更於暇時擇撫標中年力精壯者每日五十名入內射堂輪番校藝再購募



精於技勇之人爲之教習而時賞罰之蓋以 國家二百年來文武並用無偏重之見故雖有奸民屢次煽亂皆不久殄滅勢如拉朽者職是之效也故自幼卽習騎射而歷官所至必繕完器械料簡卒伍躬親訓練增防要隘爲慎守封疆之重非止詰盜而已其在湖南尤爲用武之地則捐廉製造擡槍數十桿分給撫標二營演習施放務令嫻熟以備不虞及 今上十二年獠人滋事猶賴其用焉其智略如此調廣東巡撫督臣赴京祝 嘏兼署其任巡緝洋面稽察夷船隨事整頓無不盡力斥浮華以敦風俗崇節儉以養廉恥官方民俗咸知兢惕時嘉慶二十四年也明年三月 陛見時河南馬營壩大工方合龍而南岸儀封又成漫口 上疑

之命於回任時赴豫將見在漫缺口門是否無工處所挑挖引河  
有無不如式之處察訪情形據實具奏蓋知公不欺也 今上元  
年會同督臣遵 旨覆奏查辦陋規其略曰粵東負山濱海盜會  
諸匪甲於他省公用以緝匪爲大宗捐攤賠補次之辦公雜項又  
次之粵東州縣歲入所藉專在兵米折價歷久相沿舊規官民相  
安緣粵東產穀稀少全賴粵西湖南兩省接濟故民間皆願折納  
地方官代爲買穀碾支百數十年循照已久若槩收本色事涉更  
張轉滋擾累其餘雜稅及舟車行戶鹽當規禮或有或無不能一  
律此粵東陋規與州縣辦公之大槩情形今欲明定章程立以限  
制其中有窒礙難辦勢不能徑情直行者卽如兵米折價一項

國朝取民歲有定制抑且應徵本色折取卽爲違令今以例徵本色例嚴淨收之正供忽明著甲令許其折價許其多取無論國家輕徭薄稅斷不值因辦公費用誤蒙加賦之名且卽以折價而論在馴謹花戶雖照舊規完納而刁生劣監頑抗百姓多不能照數有於正數之外絲毫無餘者更有正賦之內收不足數者州縣以浮折事屬違例往往將贏補絀自行賠補今若定以折收額數則所浮之似卽爲應納之數設有短少似難辦理又粵東兵米零尾挂欠頗多須州縣先爲墊解是照正項尙不能年清年款設經明定浮數其挂欠代墊恐較前尤甚況貪官污吏視所加者爲分內應得之數以所未加者爲設法巧取之數聞雍正年間議將地

丁火耗酌給養廉當時議者謂今日正賦之外又加正賦將來恐耗羨之外又加耗羨八九十年以來錢糧火耗視昔有加不出前人所慮前項折價與從前增收火耗事實相近卽能明查暗訪堅持於數年之間亦斷難周防遠慮遙制於數十年之後夫兵米正額各州縣有定數折收之價粵省有通例其不能行尙如此況雜稅等項名目不一或此地有而彼地無或此地多而彼地寡惑者減其數以求悅黠者浮其數以取贏究之浮者已浮數已定而難改減者非減事甫過而復加是此時毫髮未盡之遺卽將來積重難返之漸其中更有特蠻行戶刁滑商人向不完納平餘致送規禮今以案經奏定數已申明在官視爲宜然在民視爲非舊兩相

督制互爲稟呈上司既不能指爲官吏分外婪索予以糾參又不能因民間不繳陋規懲以官法爾時辦理更形掣肘是雜稅等項之難辦較兵米折價尤甚也再四思維實無萬全良策且各項所入既有陋規名目今逐款臚列上瀆 聖聰於 國家體制似亦未協夫弊去其太甚事不外舊章臣等受 恩深重於查辦此事萬不敢畏難推諉而事有窒礙不敢不將情形據實密陳應請照常辦理并隨時稽察如有於常額之外多取絲毫一經訪聞輕則撤參重則治罪並督率司道等官訓諭府廳州縣力行節儉屏除浮費并將攤捐款項查明可以裁汰者加以裁汰可以勾減者加以勾減庶幾以儉佐廉量入爲出省一分之費用卽以紓一分之

民力入奏時惟兩江總督孫玉庭疏爲能知大體如此在粵二年  
先後緝獲劇盜劉老晚徐亞六劉康佐會匪黃竈朗薛亞昌陸文  
進等無慮數十起凡久逋巨盜皆獲而商旅安枕矣是年六月奉  
旨來京另候簡用署禮部左侍郎旋奉命偕松相國筠馳赴  
浙江查辦事件途中丁願太夫人憂服闋仍署禮部左侍郎俄授  
廣西巡撫廣西地處邊陲土苗犛獠雜處盜賊會匪滋甚粵東公  
至嚴禁土司科派擾累其應徵錢糧有不循舊章格外加多於土  
民黃添保京控案奏明禁革土民土目之逞刁捏控者亦懲治如  
律寬嚴互用撫馭得宜劫盜稍戢旋調湖南巡撫湖南界連黔粵  
控制苗犛山谿險隘夙稱難治而苗疆自傅按察肅經理以後民

得安枕而臥二十餘年矣然其輕心易變惟不激不苛以馭之耳  
公上事後卽循照傅公所築礮卡二十餘處一律繕完并禁民人  
潛入苗峒盤剝射利以起釁端飭地方各官鎮靜撫馭不得繳繞  
內修武備增製火器勤心操練以爲思患豫防之計而洞庭湖爲  
眾水之匯巴陵安鄉華容龍陽沅江湘陰諸縣環其四面夏秋水  
漲周圍八百餘里納沅漸澗辰澍酉澧資湘九水故又謂之九江  
支流汊港演漾四溢爲重險奸民往往竄居湖中爲行旅患而盜  
藪所在沿湖州縣輒以地界不明彼此不任致不能究詰公以輿  
圖所載道里探測水程分限界址爲圖置諸座右以時省覽檄地  
方文武並水師營汛依限巡徼毋少縱弛其湖中漁船停泊所在

檄令做保甲例某處漁船若干漁戶若干編審籍記而盜賊無所容跡矣澧州夕陽湖上承泐水下洩洞庭兩岸皆垸田上下夕陽二垸在湖之南魏家木浪熊家烏衣夜鶴大池六垸錯列其東北地低下洩水不暢上下夕陽魏家三垸積水不能耕種前撫臣奏准豁除額糧而近年以來木浪等五垸亦連年被水其錢糧蒙恩展緩已久公至以爲上虧國課下匱民生不有疏刷何以克復舊貫遂檄道府督率州縣官計畝履勘知上下夕陽垸近來設法疏消湖水平緩泥沙逐漸淤高可以耕種惟魏家垸仍未涸出不能復業至木浪等五垸當湖水直衝無從宣洩丈得夕陽二垸可耕之田萬一千一百餘畝濱湖淤田三千八十餘畝其木浪等



堦實在不能耕種之田亦萬一千八十餘畝奏明可以復業者分別起科完糧積水難疏不能耕種者並予豁免以紓民力 詔從之先是道光六年六月醴陵攸縣茶陵三州縣連日淫雨如注而江西萍鄉陡發大水從醴陵橫流而下一夜水高丈餘城池廬舍盡遭淹浸同寮驚駭莫可措手公卽日率司道分途撫恤先於高阜處所架蓋席棚援渡棲止製散饅餅設廠煮粥資其口食其房竈雖遭水淹尙可棲止者量予銀米而漂流淹斃之人予棺掩埋並檄附近州縣碾運倉穀以備散放卽日馳奏懇 恩將三州縣實在貧民先賞一月口糧其無力下戶坍塌草瓦房屋照例給與修費又奏三州縣猝被水災房廬蓋藏衝刷一空向來可以支持

之家亦成極貧之戶隆冬飢寒情殊可憫懇 恩加賞一月口糧  
而來春青黃不接之際米必騰踊口食維艱請預於附近州縣中  
酌畱倉穀以備平糶其被淹田畝分別輕重蠲緩俱蒙 允准九  
年陛見奏言苗疆設立苗弁員數過多當日平定之初擇其有才  
而桀驁者予以名器原寓羈縻於撫馭之中迄今年久生齒日繁  
苗弁閒有凌虐苗人設或激成事端雖以苗人自殺苗人然不能  
不以戕官論辦理殊費周章而一時又驟難裁革擬詳考其所轄  
道里遠近可以歸併者遇有事故缺出懸缺不補徐圖歸併則無  
裁革之名而苗弁自可減少似亦防微杜漸之道 上諭回楚後  
與督臣熟計行之督臣以爲事近更張將來或致生事沮不行明

年奉 旨來京另候簡用補授光祿寺卿又明年京察吏部帶領  
三品以下京堂官引 見奉 旨降四品頂帶休致於道光十四  
年四月二十五日歿於河內縣里第年六十有五公體貌恢闔持  
躬彊直忠孝之性出於自然自以部員三年洊階京卿 簡任旬  
宣遂荷封疆重寄感激奮發審官詰戎知無不爲朝夕孜孜不敢  
暇逸言語議論稱心而出無所隱曲寮屬不肖不輒舉劾先教誠  
之教誡之而有不可然後劾之事母至孝所在迎養而顧太夫人  
春秋八十有餘長日無事飯後或致優伶演劇三四以盡其歡而  
自奉儉約其在湖南廣西膳饈日不過千泉在安徽其長女出閣  
或有以珠進者公嚴卻之曰以是污我豈尙有不信者於是操守

益勵其節廉亦天性也未嘗一顧生產舊有薄田數百畝竹園數十畝在大行山下才足自給而莅官所至故舊親戚以貧乏來者無不分俸周之各得其意尤重師誼業師黃東井大令罷官家居既爲刻其詩文歲時饋問不絕又爲其子桐孫孝廉報捐鹽場大使其於鄉黨則助成三晉會館助成興縣崑山書院倡家塾勸宗祠購置書籍以爲宗族子弟習讀之用其於學博涉經史究心經世之務長於奏牘當務達情不爲飾說區處公事無瞻徇顧慮之念或不爲巨室所喜其於 本朝名臣嘗慕孫文定陳文恭二公之爲人也歷四省巡撫蒙 恩賜 高宗純皇帝聖訓 仁宗睿皇帝聖訓 御定書籍 御製墨刻 御製詩文集及歲時頒賞

御書福字鹿肉野雞藥錠之類不可勝紀配夫人趙氏 覃恩誥  
封一品夫人子二兆奎正二品廕生刑部直隸司郎中記名以道  
府用兆臺國學生孫錫齡縣學生與齡成齡椿齡億齡俱幼兆洛  
前官安徽鳳臺於公爲屬縣及爲公子兆奎師從公於廣東知公  
爲詳故錄其行事爲狀以備史官採擇焉

右行狀李兆洛撰

興縣康光祿紹鏞值軍機時勤於趨職專心掌故以周知當世之  
務爲急嘉慶十八年林清倡亂公方隨扈熱河適會 上問當軸  
卽以公隨時籍記之要隘將材兵數進 上由是知其才可大用  
遂擢鴻臚卿敷歷封疆於此兆矣按此舉頗足爲士大夫法我輩

既讀書筮仕卽官非樞密時非軍務凡海內人才中邊地勢及水陸兵額多寡疆弱之數孰不當隨處畱心歟

右紀聞陳康祺撰

廣東省立第一師範學校

附錄

--	--	--	--	--	--	--	--	--	--

熙昌

熙昌嘉慶四年由廕生授理藩院員外郎十二年記名以道府用十五年擢郎中十七年松筠協辦大學士管理理藩院事熙昌例應迴避調刑部尋命巡察察哈爾遊牧十八年三月張家口蒙古婦蘊濟特控協領圖滿受賊賊誣其子圖克濟爲盜上命就近提訊圖克濟通盜行劫屬實圖滿無受賄誣盜事坐圖克濟罪如律十二月奏查太僕寺左右兩翼牧廠屢因被災缺馬六千餘匹應籌款買補其分賠銀由右翼官兵俸餉內分十年扣還清款下軍機大臣議行十九年閏二月擢內閣學士兼禮部侍郎銜三月授鑲白旗漢軍副都統四月充繙譯會試副考官直隸平泉州



民章有寬控敖漢旗蒙古台吉察克達爾扎布以爭地毆斃其弟  
章有良等復賄買頂兇 命往訊奏言蒙古地界實爲民人侵占  
以致互毆有良之死雖由蒙古杜大理等毆斃實未賄買頂兇問  
擬如律五月遷理藩院右侍郎七月調鑲黃旗滿洲副都統旋調  
工部右侍郎兼管錢法堂事充崇文門副監督八月調刑部右侍  
郎二十年山東武生曾興烜以父曾衍東任湖北知縣爲上官迫  
認婪贓訴都察院 命偕協辦大學士章煦往讞之坐誣置興烜  
於法二十一年正月廣東已革雷州府經歷李棠許兩廣總督蔣  
攸銛專擅徇私復偕章煦往鞫李棠以誣許遣戍又已革萬州知  
州李仁峻許雷瓊道胡大成科派屬員已革舉人劉華東等控已

故洋商盧觀恆不應入祀鄉賢祠已革貴縣知縣吳遇坤刻書詆毀上官均 命詳讞得實革大成職罷觀恆從祀戍遇坤新疆五月江蘇已革知縣王保澄訐上官諱匿邪書仍 命偕章煦往鞫保澄所控虛誣遣戍黑龍江六月往鞫直隸安平縣李光太首監生蘇老小等習教謀逆坐誣治罪如律閏六月回京轉左侍郎十一月調吏部左侍郎二十二年二月 命偕副都御史王引之赴福建鞫布政使李賡芸自縊獄先是賡芸任汀漳龍道時以署龍溪縣知縣朱履中衰庸改教職履中訐賡芸曾受陋規總督汪志伊偕巡撫王紹蘭奏請解任委司道會勘履中所訐各款皆虛惟賡芸失察家人私借履中洋銀三百圓屬實志伊迴護前奏復駁

令再訊署道涂以鞫阿志伊意於供內添入履中代借修船費洋銀一千六百餘圓迫賈芸誣認賈芸憤而自縊至是熙昌等鞫實奏聞奪志伊職永不敘用紹蘭亦奪職履中以鞫俱遣戍黑龍江長汀縣民鄒讓觀控堂兄嵩觀等糾眾搶劫永定縣民賴乃鵠控監生黃恆求毆斃其父賴存汝往訊得實並定讞如律七月回京八月兼署刑部右侍郎九月會審巡視西城御史伊縣泰等封禁米鋪得贓將起意之吏目朱學斐擬罪輕縱部議降調上改爲降一級畱任十一月朝陽縣民王子亮控蒙古台吉莊奴王士元等霸地將伊父王學文毆死命往鞫士元論抵餘問擬有差十二月署熱河都統二十三年正月諭曰熙昌署理熱河都統

未久卽能督飭員弁拏獲盜犯並將赦漢地方賊犯三十餘名上  
緊勒緝辦理公事甚屬認真著加恩賞戴花翎三月授鑲白旗護  
軍統領四月授右翼總兵七月湖南臨湘縣已革巡檢蔡觀以拏  
賭被毆延案不結桃源縣民婦以夫陳廷榜被羅幘經戳死官不  
究辦先後赴都察院具控御史唐鑑復奏參武陵縣知縣顧烺圻  
營私婪贓各款 命熙昌馳往按鞫行抵長沙病卒 諭曰吏部  
侍郎熙昌心地明白辦事認真屢經派令外省查辦事件寬嚴俱  
能得中操守亦好朕因其才堪造就年力方強正資委任不意積  
勞成疾遽於湖南差次病歿甚屬可惜朕不禁爲之墮淚著加恩  
晉贈都統卽照都統例賜卹並賞給廣儲司銀五百兩經理喪事

其靈柩回籍准其入城治喪所有降革處分悉予開復尋 賜祭葬 子諡敬慎

右 國史館本傳

按照昌公姓瑪拉特氏蒙古正藍旗人武英殿大學士文清公松筠之子

## 史積容

史積容宛平人嘉慶四年任衡永郴桂道衡俗端午競渡互角勝負多至死積容至訪知其聚會之所有楊靈廟者淫祠也毀之按驗江岸小舟編次爲號令地方保長約束俗遂息衡郡饒米粟常患鄰邑販運或奸商囤積米至則賤價以糶販至則貴價以糶積容以法平之永郡境接廣西民多食私鹽江華縣有私販數十人懼官役邏獲黨結以相救援巡檢往捕旋散旋聚遽以反狀報積容以所結數十人又無器械非反託他故赴永廉其實未至而夥犯已獲惟首犯在逃是時布政使某護巡撫事飛章入告謂結盟飲酒已具反狀而積容緩事致賊魁得逸督兵親往必欲竟其事

會總督吳熊光以反狀未實奏奉 旨切責護撫擢積容湖南按察使旋署布政使條奏重銓衡勤操練恤犯婦保城垣四事其二事著爲令卽實授布政使尋以縣缺補人爲巡撫所劾 上命總督汪志伊查辦事得白內授光祿寺卿

右傳李元度撰

國朝書獻類徵初編卷百十二目錄

卿貳七十二

顧皋

朱方增

常英

李振祐

百春

宗室奕顛

松廷

宗室惠端

顧蕘

卿祖培

吳椿

王楚堂

邱樹棠

趙盛奎





國朝耆獻類徵初編卷百十二

通奉大夫前署江西巡撫江西布政使司布政使湘陰李桓輯  
卿貳七十二

顧臯

歿齋顧公以戶部侍郎致仕歸逾二年以道光壬辰四月八日卒於家享年七十其同年友陳用光於癸巳春過無錫以詩哭奠於帷堂其孤子詒綬以銘幽之文請嗚呼余與公相知自未爲同年時及同官翰林居京師益相契合數十年如一日今乃過里第而哭公其安能不爲銘按狀公姓顧氏名臯字絨石一字歿齋明端文公之兄性成是爲公七世祖四傳爲翰林院侍講學士仔公之

曾祖也祖維錦父洵三世皆以公貴晉 贈光祿大夫如公官曾  
祖妣薛祖妣華王薛妣吳皆晉 贈一品夫人公自幼穎異十歲  
能爲學寔字願年廿四始補金匱縣學生而冠其曹乾隆乙卯中  
順天鄉試嘉慶辛酉會試成進士殿試以第一甲第一人授修撰  
充 高宗純皇帝實錄館纂修國史館協修甲子督學貴州激濁  
揚清弊祛士懷其奏改永從黎平開泰學額至今人以為便也任  
滿旋京充文淵閣校理文穎館總校擢國子監司業晉翰林院侍  
讀充國史館總纂日講起居注官丁父艱歸服闋補侍讀教習庶  
吉士乙亥與編輯祕殿珠林石渠寶笈於懋勤殿擢右春坊右庶  
子轉左庶子丙子典陝甘試還擢侍講學士丁丑轉侍讀學士戊

寅奉 命直上書房蓋 仁宗夙知公當擢司業時兼有贊善缺  
公名第九 仁宗以司業職任學校視贊善爲重乃越次用公至  
是而 眷顧逾篤矣及七月扈 蹕熱河廿五日 仁宗龍馭上  
賓而是日辰刻 御筆已擗公詹事 今上卽位次日 召見公  
與同直上書房學士徐頌 上親執公手而大慟也道光元年擢  
內閣學士兼禮部侍郎是年辛巳 恩科 命充順天鄉試副考  
官授工部右侍郎兼管錢法堂事務壬午典浙江試癸未充會試  
知貢舉調戶部右侍郎兼管錢法堂事務乙酉署兵部左侍郎充  
順天鄉試副考官丁亥補戶部左侍郎管理國子監事務 命紫  
禁城騎馬充經筵講官戊子署禮部左侍郎己丑以疾乞假請之

再始 俞允而具摺謝 恩時 召見慰問有加焉公之在戶部  
也不爲激亢之行而攷覈利病慎稽出納凜乎其不可干以怯嘗  
與余言學期見諸實用而迴翔於文學侍從之職久及任經世理  
物之責復未能壹志向專思慮以求稱職爲足愧耳嗚呼公之自  
言如此則其中之所存者何如哉公於詩文詩餘字畫皆澤古得  
其自然之趣見之者如見其性情之易良慎密也自直懋勤殿得  
見內府珍藏畫益進 上數以扇紙命作畫以進焉公篤於倫理  
友愛仲弟督之學而任其婚娶事必加厚公少從吳雲峯某學雲  
峯器公字以孫女公歸田後旣出資修端文祠宇贖學士墓前田  
一區栽樹編籬以垂久遠又爲雲峯置祭田十五畝以報其教養

之恩其在官時祿食常不給而敦恤親族常若不及也公之爲文武殿試讀卷者二新進士及拔貢朝考閱卷者三庶吉士散館翰詹大考閱卷者四蒙 兩朝錫賚書籍墨刻人漉貂皮等物者歲以爲常及既歸以戶部失察假照案降四品頂帶辛卯 上推五旬萬壽恩復公侍郎銜公之乞假歸也余方視學閩中及使還見公於里第公約余遊惠山願時已歲暮辭不往公猶視余於舟中語移時別去嗚呼孰意今再過無錫而遽哭公於帷堂也公配吳夫人雲峯女孫也 誥封一品夫人先公三年卒於京師子三人詒綬以增生得三品廕爲中書科中書娶王氏繼娶虞氏次恩綬以國史館臚錄議敘候選通判娶孫氏次元綬國子監生娶楊氏

繼娶查氏辛酉同年陝西糧道查簡庵納勤之女也簡庵夫婦歿而查氏幼養於余家公為元綬擇繼室娶焉元綬勤苦於學戊子應順天鄉試不遇避疾卒未幾吳夫人卒查氏所舉遺腹子復不育余在閩中數以書慰公及過公里第公掩泣命元綬之嗣子曾煦出見余也公孫五人曾祺縣學生娶毛氏次曾煦曾澍曾蕃曾獻曾孫家康家吉銘曰

端文之裔文學為上第既擢星使聯綱綱寅畏心彌虔受知入直登三天邪蒿斥饌 帝曰賢試之吏事規所研度支名實期無愆樸誠自矢心惓惓乞疾歸去對惠泉課孫日持手一編少歷艱苦學則專責而澹泊性弗遷儒素不替涇里傳琢詞紀實垂新阡

蕭履後世德其縣

右墓誌銘陳用光撰



--	--	--	--	--	--	--	--	--	--

147-768

朱方增

朱方增浙江海鹽人嘉慶六年進士改庶吉士七年散館授編修十五年充雲南鄉試副考官十六年升國子監司業十八年九月教匪林清謀逆方增劾直隸總督溫承惠貽誤地方尋有旨褫承惠職降五品職銜時詔令諸王大臣及各言官如能洞見致患之原官常吏治有亟須整飭修明者各據所知剴切直陳方增疏言我朝百數十年來聖聖相承修明政教於一切治天下之法大綱小紀已爲極備然猶有未戢奸萌以致上煩宵旰皇上至誠至明臨御十有八年之間凡中外臣工賢愚功過悉邀聖明洞燭近復特諭甄汰衰庸並命各督撫於屬員

中破格保舉此誠 聖主求賢若渴之盛心而爲天下人才效用之嘉會也臣愚以爲大臣之賢否自蒙 睿照而庶臣之賢否則在大臣能鑒而別之孔子論政則曰舉賢才又曰舉爾所知古人事君之忠首重進賢蓋天下之大羣士之眾雖有堯舜之智豈能博聞而徧識其由近及遠自崇而卑亦賴集眾人之知所以能明目達聰者此也近今大臣中罕有以進賢爲務者蓋薦舉之事易於徇私黨援交結不能不防而大臣亦遂引嫌而自避夫大臣避徇私之名而忘進賢之責所謂因噎廢食非公忠體國者所宜有也茲當 曠典大開中外大臣自宜各舉所知或密行陳奏或明列薦章至於任用之方則無過詢事考言之法昔宋司馬光定薦

章四條一曰仁惠二曰公直三曰明敏四曰廉謹其法最爲詳備  
蓋仁惠足以牧民興教養公直足以備諫諍擊豪強不避嫌怨明  
敏足以詢掌故達利弊治繁應變謹廉足以資靜鎮矯貪競化侈  
靡人之才德出眾大槩不越此四者苟有其一皆堪致用今或令  
諸大臣做照是法確指所長無以空言妄相援引則其人之品誼  
各不相假 皇上再加博訪周諮徐爲印證並乞於 召對時卽  
各就其長 諭令面陳果能原委洞悉又當試之以事以觀其能  
踐與否天下但有能言而不能行者未有言之謬戾而其行事能  
合宜者如或敷奏並無條理則其人固不足用而該大臣之識見  
優絀心地公私亦於此大槩可見矣臣思各官居職苟非闡葺離

觀之流豈不稍思自效況蒙 皇上訓飭至再至三然猶故習相  
仍驟難振作者良有數端條例過繁文案瑣屑雖有強敏之吏而  
精神疲於具文其實關於政治民生者轉致不能詳覈一也差務  
絡繹公私賠累身家之恤不遑民物之懷漸愒二也許告之風近  
今益甚常有以田土闕毆細故亦慕越赴京具控者地方官往往  
畏其挾制甚有匿名揭帖雖以急公自好之員其平日尋常瑣細  
之事豈皆一一可達 聖聰乃既無控告主名則滑吏蠹胥奸民  
惡僕但求謀不遂懲治太嚴皆可以造爲飛語訐及陰私尤足使  
任事之心不寒而慄其隱忍姑息以致姦宄橫行者大率由此三  
也今蒙 皇上整飭各臣因循苟且之習臣愚以爲必當先除三

者之弊庶廓然無所牽畏俾得專精實政而治化蒸蒸日上矣臣  
又伏思經國之方理財尤要古者以三十年之通制國用斟酌盈  
虛量入爲出用能經常不匱見今戶部歲入歲出年例當彙奏一  
次俱開列比較清單惟在京與各省用款並未併合爲一其間頭  
緒紛繁最難釐晰且凡撥解卽謂之出又不實計所用歷年牽涉  
轉轉不清其歲入歲出內又因有無定之款多寡參差以故一歲  
之中所出若干覈之所入贏餘若干不能得其實數請 旨敕下  
戶部嗣後歲入歲出奏單除照常分繕外宜再合京外爲一覈計  
贏餘總數仍取前一二年所贏餘者確實比較然後察其輕重緩  
急將一切例內例外各用款有可以裁省停緩者酌加撙節庶合

於古人通年制用之法度支常臻充裕矣臣又查新疆南北兩路自乾隆年間開闢以來人民繁聚久成樂土而每歲新疆經費銀未能酌減自因兵防驛遞控制所需未便輕議更張惟聞該處幅員甚廣屯田之利著有成效自當加意開墾卽以該地所生給該地之用俾內地撥運日減一日所謂因民之所利而利之正當及時籌定者也十九年閏二月轉右春坊右中允三月充會試同考官九月遷司經局洗馬十一月充日講起居注官二十年二月入直懋勤殿編纂石渠寶笈祕殿珠林旋遷翰林院侍講六月命提督廣西學政七月轉侍讀二十一年遷右春坊右庶子二十五年轉左庶子道光二年二月擢翰林院侍講學士五月轉侍讀學

上八月充順天鄉試同考官四年八月大考一等一名擢內閣學士兼禮部侍郎銜旋充文淵閣直閣事五年充山東鄉試正考官六年充拔貢朝考閱卷官七年五月充 玉牒館副總裁官十二年 命提督江蘇學政九年充殿試讀卷官十年卒

右 國史館本傳





常英

常英烏朗罕吉勒默特氏蒙古鑲黃旗人嘉慶六年進士改庶吉士七年散館授檢討八年擢國子監司業十一年三月升侍講學士四月充日講起居注官十二年二月轉侍讀學士十月充順天武鄉試正考官十一月擢詹事府詹事十四年擢內閣學士兼禮部侍郎銜十六年 上御門辦事以常英讀本錯誤降二級調用十七年補太僕寺卿十八年三月轉大理寺卿九月稽察東四旗覺羅學詩充滿洲繙譯副考官時教匪林清謀逆 上命諸王大臣及各言官如能洞見致患之原官常吏治有亟須整飭修明者各據所知剴切直陳常英應 詔言事其略曰一諸臣責任宜專

也兼人之才自古爲難今之人才未必古若而管攝常至數事雖有長才力難兼顧見在部院大臣兼攝旗務猶曰旗務事簡也此外如各營有訓練之責各館有纂修之責提督總兵有稽查巡捕之責內務府七司六庫事務尤繁今或兼攝兩部兼攝兩旗一人之心思才力焉能兼顧奏事該班常無虛日往往不能進署卽偶一進署亦不過虛應故事畫彙而已夫畫彙卽云辦事乎部中日行彙件繁者百餘件卽簡者亦不下數十件片刻之中安能細心講求平時既無沈潛例案之功司官稟事之頃不過恣恣數語以不解解之模稜了事所兼旗營各務又以部務繁重不能分身勤加訓練各部院廢弛常至積壓錯謬各旗營廢弛不能振作整頓

未必不由於此在 皇上得人爲難遇有可用之人卽加委任而諸臣爲才力所限反致廢弛臣愚昧之見與其兼任之反致不得其力不如專任之得以各殫其心一部或可兼攝一旗其於各營專責之諳練兵旅者各館專責之通知文學者內務府專責之耐繁劇嚴甄覈者提督總兵尤必取明幹嚴厲者專責以稽查巡捕之任如此曲爲造就量加器使則長才不難展布中才亦可學習再有怠惰因循不能整飭者則責有攸歸不難立加罷斥專其職任嚴其責成或亦振興廢弛之一端也一諸臣莅任宜久也世官之法三代後已不行然久於其任畢竟易於責效今人大半仕而後學初到一處未免茫然經歷旣多利弊自熟 皇上擇人而任

當簡用之初權衡已當既任之後自當需之歲月以觀其效不宜數行更調如護軍統領及健銳火器等營俱有訓練之責管理既久兵將相習無事則約束易遵有事則指臂易使若數行更調則苟安無志之輩未免視同傳舍漠不經心閒有一二實心任事之人當積弛之後力加整頓不免多所紛更紛更既定仍必久於其任始可見功若再一更調則仍前廢弛整頓者反獲多事之名因循者反博安靜之譽或者成效難期職此之故推之外而封疆大吏內而部院諸臣亦各宜使之久居厥職責有成效如此則寬以期之卽所以嚴以責之臣工之賢者既可從容以盡其所長不慮徒招嫌怨其不肖者亦必不敢旅進旅退豫存置身事外之心而

相與容隱偷情矣十九年十月復擢內閣學士兼禮部侍郎銜仍兼署大理寺卿十二月兼鑲紅旗漢軍副都統二十一年四月署理藩院左侍郎八月充順天鄉試監臨官二十二年授理藩院左侍郎二十三年署兵部右侍郎二十四年三月充會試知貢舉七月調兵部右侍郎兼署理藩院左侍郎十一月充國史館清文總校尋命考試蒙古繙譯中書常英以試卷向無定式每致書寫兩歧奏請飭交吏部明定規條如鄉會試例下部議行二十五年二月管理健銳營事務三月因兵部遺失行在印信摘去頂帶交部嚴加議處嗣審明行印係二十四年八月在巴克什行營遺失與常英無涉惟失察當月司員不行開驗印匣咎有應得命

以四品京堂用四月以任兵部侍郎時失察阜役於庫後圍牆私  
開門徑部議革職 上加恩畱任六月補太常寺少卿十一月擢  
理藩院右侍郎道光元年調兵部右侍郎六月稽察會同四譯館  
七月充繙譯鄉試考官尋兼正藍旗漢軍副都統二年署戶部右  
侍郎兼管錢法堂事務三年轉兵部左侍郎四年擬流官犯侯際  
清賄求贖罪事覺詞及常英鞫實下部嚴議尋議革職 諭曰常  
英以二品大員與市井匪人交結以致董椿囑託公事又不卽時  
舉發於董椿投案前先至伊家並不奏明送案有玷官箴著照部  
議革職六年授通政使司參議九年轉右春坊右庶子十年卒

右 國史館本傳

李振祐

李振祐安徽太湖人嘉慶六年進士授內閣中書旋因高宗純  
皇帝寶錄告成振祐以充校對官議敘儘先補用十二年充廣西  
鄉試副考官十三年充雲南鄉試副考官十五年升宗人府主事  
十八年三月京察一等四月調兵部主事十九年升員外郎二十  
一年二月記名以御史用六月充陝甘鄉試副考官二十二年六  
月授山東道監察御史七月以八旗考試騎射步箭尙能演射馬  
箭率多倩替各營大臣及其父兄等平時失於教導臨事任其蒙  
混奏請嚴行飭禁上是之諭曰八旗以騎射爲根本是以考  
試進士舉人生員及考試繙譯均先閱看騎射若其人素不練習



臨場倩人代替卽與文場槍替無異嗣後凡遇此項考試著各旗都統等先行考驗能騎射者始准送名派出監試之王大臣於考試時令各旗章京等逐排識認射畢步箭卽射馬箭仍令本人至階前報名如查有倩替弊端將雇倩與代替之人一併治罪儻王大臣市惠徇縱一併懲處先是戶部郎中錢學彬於泉州府知府任內自揣才不勝任請改京職經吏部遵旨以有意規避嚴議奪職嗣捐復員外郎推升郎中戶部以俸滿截取復保送繁缺知府吏部亦未查扣振祜據實奏劾諭曰所奏甚是著賞給紀錄二次錢學彬及吏部戶部堂官並命交都察院議處九月升吏科給事中命巡視淮安漕務二十三年四月奏請飭漕運總

督於各幫到通後隨卸隨開江浙軍船責成各糧道押尾催趨毋  
得半途漫越前行江廣軍船漕臣押至黃林莊卽派參遊大員緊  
催出江年內一律回次以速漕運而復舊規 從之十月轉戶科  
掌印給事中時給事中色成額經都察院以有疾列入計典旋赴  
公堂辯論演習起跪都察院復劄行吏科改列三等振祐以前後  
反覆奏劾 諭曰京察爲激揚大典舉劾皆應慎重況都察院職  
司風憲尤不應稍涉游移此案所定冊籍雖未過部但業經公同  
詳考乃輒將六法之員劄行吏科改列供職實屬輕率色成額仍  
著列入有疾公同議改之堂官俱著交部嚴加議處二十四年四  
月升光祿寺少卿六月升通政使司參議九月提督山東學政十

二月遷內閣侍讀學士仍留學政任二十五年以先於奏報到任  
摺內奉 硃批吏治民風據實密奏至是約舉積弊四條奏言一  
治理叢脞莫甚於官民不相安也昔之官吏咎在不辦事今又變  
而爲不敢辦事欲結一案輒慮翻控欲用一刑輒慮反噬鞠案時  
有倚老逞刁者有恃婦女肆潑者有當堂憤起者有抗不畫供者  
總由各官吏恩信不結於平時明決不著於臨事以畏憚之才識  
治刁悍之民風殆如鑿柄不相入矣一案牘壅滯半由外府不辦  
事也東省獄訟滋多各府州案件動輒提省委交首府有不得不  
提者有不必提而輕提者有各府州畏難而稟請提省者查濟南  
府統轄十六州縣自治不暇而舍己芸人勢必兩廢各府州遇難

辦事件輒以一稟提省卸責轉得遂其取巧偷安之計且疑難案件本地聞見較真遠提至省則茫無頭緒甚至譎言惑聽疑竇轉深訟師盤踞省城遇事挑唆以延宕不結爲利一事株連數十人一案壓擱一二載是欲辦案而轉以延案欲弭訟而適以滋訟矣一緝捕無策則盜賊充斥也東省盜賊結黨剽掠曹單一帶爲尤甚護賊行強雖小竊而情同大盜分肥藐法雖士類亦甘作窩家更可駭者劫取馬牛定價勒贖所轄捕役悉與勾連平日分贓臨時送信甚至失事者以訴懇官捕爲累以備價私贖爲便州縣既吝養捕之資又不講練捕之法既無獲盜之賞又不嚴通盜之誅兼以自顧處分動思諱飾化大爲小咸所不免緝捕之弊如此一

錢糧不清則虧空難杜也東省州縣正雜錢糧新舊那掩習爲故常其弊由於交代不清自三四任以至十餘任轉轉含混比比皆是甚至官虧而外更有書虧查書虧情弊或串通幕丁蒙混本官或私雕假印偽造串票有滿其私橐而遠颺無蹤者有挾制本官而自供不諱者各州縣迴護處分隱忍代認不敢稟發而奸書遂益以侵蝕爲得計錢糧之弊如此以上四條見成積弊惟在地方大吏公正明察以化理責諸州縣以督率委諸知府卽民情之向背案牘之多寡緝捕之勤惰倉庫之虛實以定優劣登廉明劾貪汙獎敏斷汰庸懦行之以齊持之以久固非易一法令改一章程所能旦夕圖功也疏入 上嘉之道光二年遷太僕寺少卿

丁父憂五年服闋來京候補十二年補順天府府丞十三年二月  
遷通政使司副使五月升光祿寺卿 命稽察東四旗覺羅學十  
月升太常寺卿兼署大理寺卿十五年二月署順天府府尹尋遷  
宗人府府丞七月以五城捕務廢弛坊官規避蒙詳亟宜整頓入  
奏 諭曰京師爲輦轂重地理宜一律肅清近來各城地面盜賊  
頗多有報無獲甚至案情稍重關繫處分者輒指爲裝點捏報舍  
賊盜而專究事主無怪盜風日熾肆行無忌尙復成何事體著通  
飭五城御史各宜勤明奉職所屬司坊官務須認真緝捕儻有規  
避處分蒙混具詳專向事主根求竟置正賊於不問著都察院堂  
官據實嚴參以儆怠玩而肅捕務九月復署順天府府尹十六年

升都察院左副都御史十七年十月兼署光祿寺卿十二月升內閣學士兼禮部侍郎銜十八年三月署刑部右侍郎充考試漢教習閱卷大臣六月升工部右侍郎兼管錢法堂事務充拔貢朝考覆試閱卷官九月充武會試正考官十九年三月調吏部右侍郎尋署倉場侍郎七月以御史孫日萱奏各倉監督關防應存公所偕侍郎德興遵 旨議覆奏言向來各倉監督關防有歸滿監督掌管者有滿漢監督輪流經管者殊不畫一嗣後請存公所令滿漢監督於值班更替時將印鑰面交接管尋常照例文彙卽由值班之員鈐用若遇緊要事件滿漢監督赴倉公同商定方准鈐用庶杜事前專擅之漸並免事後諉卸之端如所議行九月實授二

十一年二月署刑部尙書七月實授十一月 賜紫禁城騎馬二  
十六年五月七十生辰 御書慎典凝禧額福壽字及文綺珍玩  
賜之十二月 上御門吏部堂官全行誤班各部堂官亦未全到  
命交都察院吏部嚴議尋議振祐罰俸二年二十八年正月  
諭曰本年元旦淑氣清明和風翔洽見值諸務靜謐民物阜安從  
此仰荷 天庥咸登壽宇因念在廷王大臣有年屆八旬贊襄盡  
職或歲逾七旬亦皆精神彊固供職克勤故得以 恩召休徵作熙  
朝之人瑞允宜恩施特沛以昭優眷而迓祥和李振祐著賞給太  
子太保銜十一月以安徽本省水災捐銀四千兩備賑下部議敘  
二十九年十月疊次因病請假至十二月奏請開缺 允之三十



年卒 諭曰前任刑部尙書李振祐由中書游升科道蒙 皇考  
擢至正卿在刑部多年恪恭盡職前因病開缺在京調理猶冀就  
痊更資倚畀遽聞溘逝軫惜殊深著照尙書例賜卹任內一切處  
分悉予開復應得卹典該部察例具奏伊子候選鹽課司提舉李  
世侃著俟服闋後帶領引見尋 賜祭葬 予諡莊肅子世侃候  
補郎中

右 國史館本傳

百春

百春原名百順舒舒覺羅氏滿洲鑲黃旗人由官學生補吏部筆帖式嘉慶六年記名以理事同知通判用尋授陝西延安府理事同知十五年遷盛京禮部員外郎十九年調吏部員外郎二十年升郎中道光二年充坐糧廳監督三年九月擢鑲白旗漢軍副都統十二月因海運倉花戶開放黑豆舞弊百春曾任坐糧廳有旨解任歸案審訊尋訊明收運豆米實係乾潔惟聽從倉場侍郎出銀挑晾究有不合部議降一級調用四年五月命管理圓明園八旗及內務府三旗官兵處進班七月署吏部右侍郎五年五月實授十二月調倉場侍郎先是戶部奏來歲海運米石到津起

卸請豫定章程 上命直隸總督倉場侍郎妥議會奏至是偕漢  
侍郎申啟賢覆議十一款具奏一沙船到津如有米色微變由該  
商於准給耗米內賠補其未至徵變若干石到壩再受潮溼責令  
經紀船戶分賠一該商領運應給經紀等箇兒錢飯米折色及津  
貼等銀均係官爲經理儻有藉端需索情事嚴加問擬一戶部奏  
定添置口袋五萬條木斛一百隻請於通濟庫給發置辦一需用  
剝船每以損壞者充數應令地方官認真查看如有滲漏卽將承  
辦之員嚴參一漕糧於石壩起卸後由裏河轉運大通橋如有短  
少潮溼米石惟經紀是問不得牽涉外河剝船以杜抵賴一漕糧  
由朝陽門進城所有城外四倉並通倉拉運俸米車輛請由東直

門崇文門分行以免擁擠一明年海運南糧及北倉滯漕爲數較多車輛不敷挽運添置車袋公項又致多糜請於城外四倉空廠及號房暫行囤貯騰袋運送以節糜費而速轉運一剝船腳價飯米折色及津貼等銀請畱三成交押運員弁領帶到壩後有潮溼短少等弊卽將三成扣抵一北倉截卸漕糧抗腳芴符等項應令直隸藩司天津道豫先籌款辦理一經紀在津起卸並沿途照料其飯米折色應量予加增海運漕米對船起卸囤貯過解折耗較多請酌添耗米以示體卹至例給經紀津貼等項需銀九萬三千餘兩除應領簞羨銀兩作抵外仍不敷銀七萬五千餘兩請於天津運道兩庫墊發仍由兩江解還歸款一白米糧質鮮嫩請照向

國朝通志卷一百一十一  
例備用麻袋裝運到津另行起卸專用民船裝載運通起卸後經  
紀自行運倉以昭慎重疏 聞部議如所請六年八月以海運沙  
船到齊米石全數起卸奉 旨優敘十一月勅本裕倉監督續蘭  
出外遊蕩被毆與人互控請先行撤任奏入 命褫續蘭職七年  
因病陳請開缺尋卒

右 國史館本傳

宗室奕顯

宗室奕顯鑲藍旗人固山貝子縣溥之長子嘉慶六年襲鎮國公爵在散秩大臣上行走十年以誤班革去散秩大臣十一年復授散秩大臣十八年命在乾清門行走十九年二月補鑲黃旗蒙古副都統九月調正藍旗滿洲副都統十二月授左翼前鋒統領二十一年授宗人府右宗人尋擢鑲紅旗滿洲都統二十三年調鑲藍旗蒙古都統二十四年六月授內大臣九月調鑲白旗漢軍都統十二月復調鑲紅旗滿洲都統二十五年授黑龍江將軍道光二年調烏里雅蘇臺將軍尋奏烏里雅蘇臺徵收房租銀兩不敷支放請將四部院柴薪等七款歸入正項開銷如所請七年閏

五月調盛京將軍九月奏拏獲越邊偷打鹿茸要犯得旨姑容  
廢弛至於此極汝能切實查辦朕甚嘉悅先是兵丁巡卡遇越邊  
賊偷打鹿茸獲之訊有發陽邊門臺丁施泳富爲首躡緝無獲奕  
顛抵任選派佐領塔爾什布易服往緝擒施泳富及其黨數十人  
得官兵受賄縱令出卡并邊門章京德銀索賂釋放情事並以實  
聞按治其罪十一月奏墾田畝以資養贍從之奏查明圍場  
偷挖鹿窠人犯並定私入圍場濫山罪本年圍場以南偷挖二百  
餘處嵌石嶺以北偷挖九百餘處計獲犯一百一十餘起奏入  
上命刑部妥議詳定私入圍場濫山罪纂入則例又奏興京鳳凰  
城所屬邊門外奸匪偷斫官山樹木拏獲入官任其在山存放不

准招商變價庶奸商覬覦之心不禁自絕而匪徒偷竊之風亦可  
漸息均得 旨嘉獎八年六月奏詳查邊外各卡情形分析駐守  
更換章程如所議行十一月奏籌備馬匹得 旨允行十二月劾  
兵部侍郎惠端點驗各城軍器隨帶家丁書吏騷擾地方並請停  
止兵部點驗之例 上如其奏 命將惠端騷擾情形查實下部  
嚴議十年三月 諭曰朕聞盛京將軍奕顯有演戲宴會之事特  
命富俊等前往詳查茲據奏稱將軍都統等有其事盛京爲根本  
重地風俗素稱淳樸將軍都統表率一方乃竟時常宴樂自蹈繁  
華豈能勝將軍都統之任著交部嚴加議處議上 命褫職並革  
去鎮國公爵賞給頭等侍衛在大門上行走六月授烏里雅蘇臺



參贊大臣十月 賞副都統銜作爲庫倫辦事大臣十一年正月  
補鑲白旗蒙古副都統十二月調正藍旗滿洲副都統十三年授  
正白旗護軍統領十四年四月擢鑲紅旗滿洲都統七月署工部  
尙書調署禮部尙書九月兼署都察院左都御史十一月升左都  
御史仍署禮部尙書尋補禮部尙書兼署左都御史十一月調兵  
部尙書十二月充經筵講官十五年八月復兼署左都御史十二  
月兼署禮部尙書十六年六月署戶部尙書七月 命管理戶部  
三庫事務調戶部尙書九月署盛京將軍十七年九月以邊內變  
賣木植已收價銀先行發商生息均勻分散八旗津貼閒散學習  
烏槍公費以資操演而歸實用得 旨如所議行十月署正白旗

領侍衛內大臣十八年閏四月仍授兵部尚書九月奉 旨奕顛之子載寬所遺奉恩輔國公爵著加恩賞還奕顛十一月充崇文門正監督旋因正白旗揀送佐領奕顛以伊子教習前鋒校吉慶弓馬可觀囑託功普爾圖列入揀送事發自行檢舉奏入 諭曰奕顛身係一品大員乃爲其子教習輾轉囑託實屬辜恩病狂以公濟私奕顛所有職任及各項差使著全行革去交軍機大臣會同宗人府刑部一併審訊定擬具奏十二月讞定 諭曰此案見據敬敏等會同定擬具奏奕顛毋庸交宗人府議處其公爵卽行革去著往盛京效力贖罪以爲大員徇私請託者戒二十年二月得 旨加恩釋回十二月授理藩院右侍郎尋 諭曰本日召見

理藩院右侍郎奕顛兩耳重聽不勝侍郎之任著以原品休致二十三年十二月卒子四人長載□授頭等輔國將軍三等侍衛次載耀三等侍衛次載宜舉人次載篤三等侍衛

右 國史館本傳

松廷

松廷鄭佳氏滿洲正藍旗人由監生授戶部筆帖式嘉慶六年升主事十年升員外郎十六年升郎中十八年京察一等充坐糧廳監督二十二年升內閣侍讀學士二十三年五月轉太僕寺少卿十一月升大理寺少卿十二月升太僕寺卿道光元年十月賞副都統銜授西甯辦事大臣時循化貴德所屬野番插帳河北居住盤踞滋抗上命松廷偕陝甘總督長齡設法驅逐押令移徙尋以野番抗拒不遷調兵捕剿屢獲勝仗二年五月殲除淨盡青海一帶悉就肅清捷入上嘉其迅速成功下部議敘十二月丁母憂三年四月授內閣學士兼禮部侍郎銜五月復授西甯辦事

大臣七月授正白旗蒙古副都統調駐藏大臣七年正月授兵部右侍郎十二月調倉場侍郎 上以近來經紀掣欠米石過多因命松廷等妥議章程尋奏請掣欠在額內者仍照收買餘米石例其掣欠逾額者援照歷次成案比照市價議增五成令其折價交銀每年於全漕完竣後由大通橋監督覈明額內額外數目報部自漕糧進倉完竣之日起至次年二三月止統限六箇月將應交銀兩一律完結 從之十年七月御史范承祖劾奏倉場衙門舉錯不公 上命侍郎祁墳副都統福泰前往查辦尋以松廷等保畱本裕倉監督高學治曾於道光三年八月以該員辦事甚輒兩次咨部至本年五月又以該員熟悉倉務奏請再畱三年雖無情

弊惟於原奏內不行據實聲敘又於富新倉監督恆齡患病不堪  
任事未能隨時甄別部議降三級調用 諭曰松廷等保送監督  
高學治原奏並未將兩次咨部之處據實聲敘又於監督恆齡染  
患病證並不隨時甄別實屬有意徇庇著以三品京堂候補八月  
賞頭等侍衛充哈密辦事大臣十一年因病開缺十二年卒子  
英麟刑部筆帖式孫承業三品廕生

右 國史館本傳



宗室惠端

宗室惠端鑲藍旗人嘉慶七年進士改翰林院庶吉士十三年散館以主事用籤分吏部時有宗室儀續祿崇阿等狎遊滋事先後案發惠端以充學長坐不能教導下部嚴加議處降三級調用尋捐復原官十五年補宗人府主事十六年復因失察宗室安祿冒領口票私往奉天部議降一級畱任革去學長十八年升副理事官十九年升理事官二十一年調戶部郎中二十三年二月遷左春坊左庶子三月升翰林院侍講學士充日講起居注官二十四年轉侍讀學士二十五年升詹事府少詹事道光四年升詹事府詹事五年升都察院左副都御史六年二月授盛京兵部侍郎以



錦州府屬被災草價昂貴各驛應領馬乾銀兩不敷收養奏請援  
案借支銀八千餘兩分六年扣還得 旨允行十一月以牛莊等  
處被水歉收借將軍晉昌等奏請蠲緩官地租稅 允之十二月  
命管理移居宗室事務七月以廣甯所屬地方站丁承種官地  
被水歉收借將軍奕顯等奏請緩徵額賦並給兩月口糧如所請  
行八年七月以京員奉差馳驛經過盛京首站僅付車馬不給廩  
糧與所轄各路驛站辦理兩歧奏請嗣後一律給予廩糧以歸畫  
一十月奏請續借馬乾銀兩並前借未完之項統作十年歸款俱  
允之十二月以前往遼陽等八城點驗軍器沿途騷擾經奕顯  
密疏以 聞復遵 旨詳查確實以惠端沿途逗畱遊玩致各處

供應煩費隨帶家丁書吏均有勒索情事據實覆奏得 旨惠端  
著交部嚴加議處卽來京聽候部議九年回京 命以三四品京  
堂候補十五年卒子海樸頭等侍衛阿克蘇辦事大臣海枚原任  
二等待衛駐藏辦事大臣

右 國史館本傳

國史館本傳

中華書局影印

卷之二

二

三

--	--	--	--	--	--	--	--	--	--

147-810

顧純

公諱純字希翰一字吳夔號南雅其先世自江甯遷吳縣有貞孝先生名國本者載吳縣祀典爲公五世祖曾祖漸考授州同知祖階升國學生考應昌國學生俱 贈中議大夫妣汪氏 贈太淑人公中嘉慶七年進士官編修十三年充會試同考官十七年御試翰詹公名列一等擢翰林院侍讀是年放雲南學政二十五年授日講官秋九月擢侍講學士十一月上疏不稱 旨降編修道光九年擢右中允擢侍讀十年擢侍講學士十一年擢通政司副使十二年五月卒春秋六十有八公爲詞臣儒官凡三十餘年文學動天下而結 主知崇物望實以奏疏顯其督學滇南也道

河南以風聞墨吏奸民入告嘉慶十八年聞逆匪林清變疏稱  
中禁嚴密若輩敢闌入肆猖獗則圓明園距都城遠尤宜備其擢  
學士也適值 仁宗升遐後疏稱方今時勢所急惟崇君德正人  
心飭官方三者爲尤要 今上召見凡稱所言都是者三其復遷  
學士也疏稱西域逆回滋擾不難鋤慝於目前而難弭禍於日後  
請於喀什噶爾添重兵控制安集延俾回人不敢窺伺且其地密  
邇英吉沙爾葉爾羌又東南爲和闐皆有水草可耕牧宜募民屯  
田以備戰守更請 慎簡大僚無分滿漢務得讀書識大體者任  
之以廉靜寡欲通達事理者佐之其遷通政司副使也適湖南北  
江南江西浙江皆大水疏稱饑民與鹽梟糾合易生事鹽梟不盡

去終爲巨患緩治之則養禍不急治之則召禍速故欲禁其妄行必先謀其生路復請變通鹽法聽民挾貨趨產鹽地收買隨時納課收課之後卽不必問其所往俟鹽產盛丁力紆卽令課歸丁不限疆域二疏俱畱中公課士駭而思簾閣據儿口講手畫懇懇忘倦必其人領悟乃已漢士翹穎者多出其門來京輦者多就公問業或就公廬止舍凡四方士經指授者皆砥躬礪行有文學能自立而公文壇老尊宿之譽日益四馳知與不知皆欲乞書畫以自飾爲詩文師大蘇賦駢體俱師唐宋書由歐陽率更入晚乃倣褚登善間亦作墨蹟嗚呼卽所造就已必傳無疑而公所學深醇實能通政教之源以生平所讀書反諸身驗諸事爲當世拯溺拯焚

之具加以忠愛惓摯急公忘己有所見聞必獻之於 當宁或冀  
一行卒也屢荷 褒擢駸駸乎且大用而公衰病不能待矣史稱  
陸宣公言本仁義炳炳如丹如公其庶幾乎配汪氏 贈淑人以  
其妹爲繼室 封淑人子剛曾殤以猶子條曾爲嗣女二長適吳  
慶華次幼以某年某月某日葬公於某縣某山之原銘曰  
其名者鳴其利私其實也絢名者鳴其名沽其直也惓懷於君國  
近不啗遠不噬不叩而必鳴其言夷且貞請以觀先生

右墓誌銘程思澤撰

卿祖培

公諱祖培字錫祚號滋圃姓卿氏廣西灌陽人系出戰國虞卿之後明洪武中有曰閩山者自楚從軍粵西著籍灌陽代有隱德曾祖慕唐始爲邑增廣生祖化鵬附學生考彬歲貢生三世知名而考尤以純德稱少孤事母至孝居喪廬墓三年哭踊之地成坳經學深邃著有周易貫義洪範參解律呂參解楚辭會真等書道光元年春 敕祀鄉賢兄弟三人長祖一舉乾隆戊申鄉試第一官廣東海豐知縣以廉善稱歿於官海豐之民不遠數千里送其柩歸葬次祖蔭廩膳生公其季也幼而穎異下筆驚其長老年十六補諸生充嘉慶辛酉拔貢以是年舉於鄉明年壬戌會試成進士



改翰林院庶吉士連丁外內艱辛未散館授編修充武英殿纂修  
官旋兼國史館纂修官乙亥引見記名以御史用丙子補湖廣  
道監察御史丁丑充會試同考官奉命稽察南新倉戊寅擢工  
科給事中充順天鄉試內監試官巡視西城己卯九月轉兵科掌  
印給事中今上卽位之元年辛巳十一月特擢內閣侍讀學  
士距爲給事時甫半歲遽班九列壬午四月擢太常寺少卿九月  
奉硃批幫辦批本甫七日奉御批稽察右翼覺羅學又命  
磨勘各省鄉試卷主眷方殷駸駸大用而公竟以是年十一月  
初九日卯時疾卒年四十有七公起秀才爲翰林以聖賢自律氣  
度閎然粥粥若無能而畱心當世之務及官御史侃侃不阿甫拜

命卽劾奏吏部郎溫某恃勢要橫行縱僕毆職官於途有旨  
逮問都下肅然南新倉夙弊深胥吏每以氣頭殿底攬朽米其中  
務領米者索放費斛面因之爲贏縮公奏請釐剔吏無所容其奸  
又念近世學者僥倖弋獲束宋儒之書不觀恐其陷溺深而生心  
害政也因上疏請明教法以端士習而備人才其略曰國家以經  
藝取士欲其講求經書大義以體驗於身心則發之爲文可以驗  
其心之所得施之於事卽以行其心之所安也今士之亟於進取  
者但知掇科名習揣摩形似之言點綴工巧之語按之實義鮮能  
發明清切司衡者偶一錄取無知者轉相倣效其弊將置書理於  
不問而本心之理日以錮蔽應物處事任其氣質之偏習俗之染

而不能得讀書明理之益則有才而適以滋弊若使聰明特出之才皆範圍於聖賢經術之中研求義理之精微而本心之理益明化其氣質之偏克其己私之累循天理之自然不爲人欲所陷溺庶才足以致用不負乎經義取士之意矣伏讀 御纂朱子全書

御製序文冠諸篇首頒發海內誠以宋儒闡發前人之祕而朱子集其成觀其所論爲學之方並推闡持敬主一無適之說委曲詳盡令人曉然於天理之必當循性分之不容虧而向來學臣按試未有以其書直切指示鄉曲之士終身或不得一見乞 敕下各省學政將此書化導諸生舉其要義往復申論或時至書院與院長其相懋勉或督令各學教官廣爲訓迪不必明設科條以飾

觀聽務使大公之理眾著於人心饜飫優游有所自得由是上溯  
經書之闡奧必能代聖賢立言發揮精義在學臣取士平日既以  
身範自端嚴義利之辨而與多士講之有素及臨試又能因其文  
以取其才趨向既正隨所造就必不至於誤用聰明而可以爲國  
家培養元氣一鄉一邑之中得一二讀書明理之士以薰德而善  
良則淳樸成風宇宙之內莫非太和之所翔洽矣疏入得 旨通  
飭遵行德水盧公讀之歎曰久不聞此論可謂朝陽鳴鳳也吾不  
識卿給諫有以知其爲今之古人矣其他若請禁賭博以清盜源  
請嚴考試教習以杜冒濫請 聖駕所經除道毋虛設多員以省  
擾累皆見諸施行無摭拾陳言以應故事者天性純篤承鄉賢公

義方之訓一言一行必自檢攝居親喪前後廬墓六年在翰林茂  
用仰給祿米數十斛出惟一僕從入則夫人執炊在御史班聯承  
直費寢多處之如在翰林時其清苦刻厲有中人所不能堪安之  
泰然無幾微困竭狀和平樂易修於身而見於行不言而人自化  
忘其爲道德之士也尤嚴於取予之際嘗寢疾同年生三四人往  
省見其裘敝幾見鞞恐其爲寒氣所中醲製一新者遺之再三卻  
許以他日還而後受張公鵬展者公鄉之賢人也自山東學政回  
京知公貧餽百金不受強而暫畱後卒還之其介也如此祖及考  
贈如公官祖妣王妣王皆 贈淑人夫人莫氏先卒時未有子以  
長兄子先佑爲之後繼娶黃氏妾王氏癸未三月舉遺腹子先奕

甲申三月公仲兄祖蔭葬公於西山坪逾六年己丑七月祖蔭率先佑來乞表其墓澍知公最深謹摘敘生平揭之於碑石以示後之有志於世道人心者

右墓表陶澍撰

灌陽卿先生諱祖培字滋圃至性純孝讀書力追古人入翰林閉戶鑽研堅苦自守朝暮三餐鹽豉而已不設盤饌一家數口以每年所得俸了之無不足一介不取於人轉侍御論劾無所避忌嘗言朱子全書應頒學宮請 敕諭各省學政責令士子人人熟讀以端學術而植人材洊擢內閣侍讀學士封奏無虛日大抵皆振官常培士風除民害關係朝廷之紀綱閭閻之疾苦者言雖未能

盡行而先生之素抱亦槩可見矣

右學案唐鑑輯

吳椿

吳椿安徽歙縣人嘉慶七年進士改翰林院庶吉士十年散館授編修充實錄館纂修官十二年三月高宗純皇帝實錄告成下部議敘八月充順天鄉試同考官十四年擢浙江道監察御史十五年四月奏言州縣攤捐原爲辦公之用但必須先清正款始可彌補攤捐至民欠一項總宜實力清查是否實欠在民不得因正項未完藉詞掩飾以爲侵挪地步得戶部諭各省督撫查辦五月巡視北城十六年奏歙縣民人張良璧用藥採生斃命者十四人病廢者三人查律載採生折割罪應凌遲乃知縣延未辨結知府以病故具結完案請飭嚴辦諭曰張良璧窮凶極惡爲



從來未有之異事該府縣不行確究或竟有受賄故縱情事著錢  
楷親提嚴訊毋稍姑息十八年二月升戶科給事中七月轉刑科  
給事中二十年升光祿寺少卿二十一年八月 命提督福建學  
政九月投通政司參議二十四年二月升鴻臚寺卿閏四月轉通  
政使司副使均畱學政任二十五年乞假回籍道光三年丁母憂  
五年服闋六年補原官八年升光祿寺卿稽察左翼宗學九年三  
月充會試副考官七月遷大理寺卿十年七月升都察院左副都  
御史九月 命提督江蘇學政椿以寄居揚州奏請迴避 允之  
十一年正月擢兵部右侍郎 命提督浙江學政尋調工部左侍  
郎九月 召回京十一月兼署工部右侍郎管錢法堂事務十二

年四月充殿試讀卷官七月因京城內外河道淤淺命椿偕工部尙書穆彰阿覈實估計奏言京師九門護城河周圍湊長七千一百三十一丈河身寬五六丈至十餘丈城內河道由積水潭至御河橋出水閘其湊長二千三百三十五丈河身寬三四丈至七八丈又釣魚臺之三里河至阜成門迤南護城河共湊長一千一百二十七丈河面寬三丈至六丈除積水較深之處無庸挑挖外其餘各按淺深寬狹覈實估計共需工料銀十一萬一千六百四十一兩請派員辦理從之十四年二月調戶部右侍郎署經筵講官充武英殿總教官六月充浙江鄉試正考官先是撫臣富呢揚阿以浙江海塘漸多坍塌奏請興修先後簡派刑部右侍

郎趙盛奎原任河東河道總督嚴烺盛京工部侍郎烏爾恭額等  
查辦意見互異九月 命借左都御史敬徵前往履勘悉心講求  
折衷一是旋 召敬徵來京 命椿仍畱浙江借新任巡撫烏爾  
恭額督辦塘工十一月升都察院左都御史十五年六月借烏爾  
恭額奏西塘烏龍廟東范公塘一帶埽工富呢揚阿以地近省垣  
議增建條塊石塘八百七十八丈以爲後靠嗣經趙盛奎等查勘  
以該工捍衛省城塊石難於經久請改築條石鱗塘以昭慎重並  
援照乾隆年間成案由江蘇採辦條石四萬丈協濟工需查修築  
鱗塘並韓家池條塊石塘各工應用條石十八萬餘丈積字等號  
竹蔴塊石仍改坦水又增添條石八萬餘丈除江蘇協濟四萬丈

外浙省應採辦二十二萬餘丈條石之料須長至四五尺六面見方者爲合式非隨處皆有之塊石可比杭州湖州各屬之山可採條石者無幾必須取給於紹興見在開石巖戶止有六十餘家以紹屬一隅之山取二十萬丈之石物產本有不敷以數十家之匠責取刻期應用二十萬丈之石人力更有不及誠恐停工待料有不能應手之勢查章家庵條塊石塘係乾隆年間修築已歷五十餘年尙屬完整該工與范公塘相近潮勢相同請將范公塘埽工仍改爲條塊石塘以節經費而速成功 從之十一月奏東塘尖汛韓家池柴埽前請改建條塊石塘業經完竣惟地近尖山潮入海門西爲巨沙阻遏回溜東趨勢如排山倒海直撲塘身恐非一

線隄防所能捍禦必須添築坦水乃能屹立不動應築塊石坦水  
三百三十七丈以資外衛疏入如所請行十二月奏東塘鎮念兩  
汛上年新築埽內石塘間段沈陷散裂計一百二十三丈請趕緊  
修復得旨乘時趕辦限於來年春汛前完竣以免貽患十六年  
三月海塘工竣奏言浙江海塘捍禦潮汐爲下游七郡田廬保障  
近聞南沙中互偪潮北趨險工迭出經撫臣富呢揚阿確勘具奏  
皇上軫念民艱節次派員勘辦計自道光十四年八月以後將  
鎮念二汛改築柴埽添建盤頭及韓家池接建石塘並鎮戴二汛  
修復條石坦水各工俱次第完竣此外應修各工陸續趨辦臣等  
隨時查看如石工稍不如式卽令拆建土工未能加厚卽飭填培

茲查有東塘庶幾字號盤頭一座鉅字等號條石坦水一千二百四十餘丈猷字等號塊石坦水六百四十餘丈范公塘條塊石塘四百六十餘丈均於十五年完工韓家池添築塊石坦水三百三十餘丈鉅字等號加幫土堰土戩八百餘丈及培高土堰一千八百八十餘丈並修補內塘加高隄砌各處零星土段均於十六年二月次第報竣所有在工出力各員應請鼓勵得 旨嘉獎五月授禮部尚書十月兼署戶部尚書十一月 賞紫禁城內騎馬充經筵講官十七年兼署兵部尚書充 玉牒館副總裁官十八年調戶部尚書十九年三月因病陳請開缺 許之是月七十生辰御書宣勤篤祐額福壽字及銅佛如意諸珍物賜之二十五年

卒年七十六 諭曰前任戶部尙書吳椿由翰林科道洊陟正卿  
疊膺委任持躬端謹辦事慎勤前因病開缺在京調理猶冀漸次  
就痊更資倚畀遽聞溘逝軫惜殊深著照尙書例賜卹應得卹典  
著該衙門察例具奏尋 賜祭葬如例子昌照候選太常寺典簿  
昇照舉人候補內閣中書

右 國史館本傳

王楚堂

王楚堂浙江仁和人嘉慶七年進士以知縣用籤分甘肅十二年補平羅縣知縣十六年甘省清查倉庫總督那彥成以楚堂任無虧款循聲素著奏請鼓勵得旨以應升之缺儘先升用十八年豫省教匪不靖踞滑城上命那彥成爲欽差大臣統師進剿楚堂隨赴軍營襄辦軍務事平敘功命以同知直隸州升用先換頂帶十九年遷甯夏府水利同知尋捐升知府分發福建試用二十四年補邵武府知府二十五年調泉州府知府道光元年九月升延建邵道十二月調鹽法道三年擢湖南按察使五年升雲南布政使十年召來京十一年補大理寺卿十二年署都察院左



副都御史旋授兵部右侍郎十三年六月轉左侍郎是月以失察書吏金維豐等假發隨營武舉驗票誑騙財物下部議處尋議鑄一級畱任九月充武會試監射大臣以覆試武舉弓力不符下部議處十四年五月署戶部左侍郎十一月補倉場侍郎十五年閏六月奏太平等倉積貯米石甚多新糧抵通難以撥派請將八旗文武三四品以下官員俸米先於城外四倉支放俾得疏通舊貯而速轉運七月以南漕抵壩較遲恐誤回空例限請在通州各倉截卸寄囤均從之十一月以南新倉監督戶部員外郎增齡刑部員外郎羅禮蘭收貯黑豆如法奏請獎勵得旨允行十六年奏以坐糧廳經紀腳價長支分扣未完茲復續有支項請令歷任

應員分賠四成經紀賠交六成並將經紀應賠銀兩於應領腳價  
內勻扣清款如所議行十七年奏言本年江淮四幫大倉後幫米  
色灰暗久貯非官請咨照戶部先行撥放並請將收貯不慎之江  
淮四幫押運守備劉芳桂大倉後幫押運守備任大垣及不能隨  
時稽查之總運通判孫宗渭下部議處 上從之十八年二月以  
富新倉搭放稜米灰暗楚堂未能先事督率設法挑晾部議降一  
級爾任七月因病陳請開缺十九年卒

右 國史館本傳



邱樹棠

邱樹棠湖北漢陽人祖籍福建嘉慶七年進士以刑部主事用十四年補官旋升員外郎十六年正月署兩江總督勒保奏請帶往江南差委 上特允所請並 諭如果實心任事三四年後以知府補用五月勒保請鼓勵催漕出力人員得 旨邱樹棠遇缺卽補旋署徐州府知府適徐屬邳蕭廳境縣揚山李家樓河水漫溢樹棠賑災得宜民賴以安十七年正月補揚州府知府二月調江甯府先是江都縣民冷鶴鳴謀殺縣民陳時序時序妻王氏絕食死鶴鳴狡供漏網幾二十年樹棠訊明抵罪十二月總督百齡奏入 命旌王氏誅鶴鳴樹棠加一級二十年擒獲安徽巢縣邪教

首逆方榮升 特擢江南道二十一年調蘇松糧道二十二年七月升江西按察使尋調山西按察使十月以前任蘇松糧道時失察宜興荆溪二邑漕糧米質甚劣降二級畱任二十三年遷布政使二十五年調江西布政使道光元年四月護理江西巡撫廉得嘉慶十八年清江縣民婦謝周氏因姦毒斃親姑謝尹氏及本夫謝奉遠工人謝高遠三命又清江縣民周近彩名彩謀殺其父周富祥暨前撫臣瑞弼所鞠聶載彥因其弟聶禹彥犯竊偪母自縊圖賴事清江一邑逆倫凡三案奏請整飭吏治得 旨嘉勉九月奏鄉試同考官實缺人員考取不敷請候補中文理優者一并與選又奏高安縣知縣王敦史詳稱民人張州蘊等以古樓岡山內

有金礦呈請開採納謀江西爲東南腹地四省通衢該山附近省城一經開挖必致聚集多人奸良莫辨 國課之所增有限地方之爲害無窮應不准開採 上俱從之十月奏淮南安贛州甯都三府州秋審及軍流人犯改歸巡道就近審轉十二月升山西巡撫二年六月興縣被水請撫恤八月歸化城薩拉齊二廳所屬被水請撫恤九月奏鹽池東西各堰被秋水衝缺請築隄保護三年請借耗羨銀兩修築汾河隄堰並挑挖引河工程又請借項濬渠以衛鹽池又請修理興縣城垣挑挖河道四年二月奏請將歸綏雁平兩道所屬州縣之遺軍流徒及秋審人犯俱歸兩道審轉四月請將河東鹽經歷兼管批驗大使移駐會興鎮以資彈壓均得

旨允行時榆次縣民趙添中京控閻思虎強姦幼女釀命有司  
不爲伸雪 敕下巡撫親鞠樹棠仍以和姦定讞御史梁中靖劾  
之 命解交刑部訊實 諭曰邱樹棠以特旨交審之案不卽親  
提審訊任聽屬員草率遷就顛預入奏實屬辜恩溺職卽將該撫  
革職亦係罪所應得姑著加恩降爲按察使以觀後效尋授福建  
按察使以迴避祖籍調江西按察使六年 命以三品頂帶署刑  
部右侍郎八年正月實授七月以世襲男爵侍衛恩緒毆斃家人  
刑部審訊遲延不奏降二級畱任九年調倉場侍郎十年御史范  
承祖劾倉場衙門舉措不公 上命侍郎祁墳副都統福泰往按  
之尋查明本裕倉監督高學治前經樹棠等以辦事罷輒兩次咨

部嗣於保畱學治摺內並未據實聲敘又富新倉監督恆齡病不  
任事亦不甄汰請將樹棠等交部議處部議降三級調用上以  
其有意徇庇降三品京堂候補十一年卒子端二品廕生江西龍  
泉縣知縣

右 國史館本傳



日本書紀卷之八

八

## 趙盛奎

趙盛奎直隸深州人嘉慶七年由拔貢朝考一等以七品小京官用  
籤掣吏部十三年授主事十六年充軍機章京十八年八月因議  
處河南光山縣知縣傅士奎規避處分倒填年月一案議以降三  
級調用經署吏部右侍郎初彭齡檢查舊案查出江西贛縣知縣  
邱安校一案情事相同議以罰俸九箇月均係盛奎主稟前後兩  
歧請交都察院議處尋議盛奎辦理傅士奎邱安校兩案互有重  
輕各降二級調用十二月捐復原官十九年丁父憂二十一年服  
闋復充軍機章京旋補主事二十二年升員外郎二十三年扈  
蹕木蘭校射中三矢 賞戴花翎二十四年升郎中道光二年正

國朝通志卷一百一十二

月俸滿截取引 見記名以繁缺知府用九月丁母憂五年服闋  
六年三月仍補郎中七月得 旨吏部郎中截取知府趙盛奎著  
以四品京堂用停其銓選七年因西陲不靖辦理軍務奮勉出力  
經軍機大臣曹振鏞等保奏 諭曰候補四品京堂趙盛奎著加  
恩遇有四品京堂缺出卽予補用八年正月逆酋張格爾俘擒得  
旨滿漢軍機章京等著軍機大臣編列一二等候朕施恩盛奎  
列一等照軍功例從優議敘二月補內閣侍讀學士九年升光祿  
寺卿時以纂輯平定回疆方略得 旨趙盛奎暫留軍機章京上  
行走俟纂輯方略書成再回本衙門辦事十年七月書成下部議  
敘八月授山東按察使十一月升江甯布政使十三年擢刑部右

侍郎十四年四月 命赴浙江會同巡撫富呢揚阿查勘海塘應  
行修建各工七月疏言另建新工緩不濟事請卽潮勢之重輕分  
工程之緩急酌議添築盤頭改修柴埽以護塘根又以海塘歲修  
本無定額請於浙江捐監項下每年提銀五萬兩存儲藩庫以備  
歲修 從之尋以福建已革縣丞秦師韓砌詞捏控總督程祖洛  
提督馬濟勝徇飾蒙混等款 上命盛奎會同福建學政張麟按  
治之鞠實秦師韓坐誣告律遣戍新疆十五年閏六月山西趙城  
逆匪滋事御史蔡子璧劾奏文武官弁畏葸逃匿 命偕刑部侍  
郎廉敬往讞旋查明該將弁等或疏於防範或進發遲緩分別奏  
請褫職遣戍巡撫鄂順安未卽查參請交部議處七月得 旨趙

盛奎著在軍機大臣上學習行走八月 命馳往貴州會同總督  
伊里布查訊已革同知王應模訐控署知府黎靖交代含混署知  
縣劉椿侵那倉庫各款讞定照例問擬有差是月調戶部左侍郎  
十二月湖南巡撫吳榮光湖廣總督訥爾經額先後奏參安鄉縣  
知縣李慶孫辦理賑務不能妥協委員陳同治未能覈實散放  
上命禮部尙書恩銘前往查辦 詔令盛奎會同鞠審訊明得實  
議罪如律十六年二月御史鄭世任劾奏湖南學政龔維琳信用  
家丁隨棚索詐並勒繳自刻詩賦價銀各款 命盛奎查訊嗣查  
明維琳並無加索棚規惟失察家人需索並刊刻詩賦售賣有干  
例禁請交部嚴加議處又查訊澧州民人李萬忠呈控知州積弊

擾累各情廉得其實奏請褫職 諭曰澧州知州王元鳳訊無浮  
收勒折那用倉穀等情惟於家人藉案索詐又私設班館濫責無  
辜僅予斥革不足蔽辜王元鳳著發往軍臺效力贖罪四月給事  
中朱達吉奏參廣西省闢穴營私各員 命盛奎等前赴廣西會  
同鞠審尋查出廣西南甯府同知慶吉因採辦官鹽輒於附近地  
方收買私鹽一萬餘斤裝運售賣請奪職遣戍潯州府知府孫世  
昌於稅厰失火燒斃人命不卽詳報自行撫恤賠修完結辦事顛  
預請勒令休致 從之先是廣東在籍刑部司員盧應翔挾嫌咬  
訟 上命盛奎往鞠之會廷臣奏參前次昇寅隨帶司員白讓卿  
陽金城得受苞苴卽交盛奎等密查嚴訊盛奎等未能認真審辦

得旨前因有人奏參上年廣東隨帶司員白讓卿陽金城等有  
得受苞苴之處當降旨交恩銘趙盛奎查訊恩銘等既提訊石綸  
亭有託寄箱隻情事自應俟白讓卿到案質訊乃據奏稱自粵起  
程迎至前途提訊已有不肖認真訊問之意本日恩銘等奏查審  
情形輒據白讓卿陽金城一面之詞遂謂無收受苞苴情事審理  
案件於案情無據之處當逐細研求究出端倪方成信讞此案既  
有託寄箱隻之石綸亭代寄通州之知州趙桐無難三面質對至  
陽金城所帶衣箱如許之多已出情理之外又有家丁可究即使  
見在未盡隨至廣東查傳提訊不過稍淹時日何得顛預將就豫  
存和事之見據其所具親供以爲實乎恩銘趙盛奎俱著交部議

處議上 諭曰吏部奏恩銘趙盛奎處分議以革職係屬照例辦理趙盛奎前經派往廣東查辦事件並諭令將白讓卿陽金城等前在廣東有無得受苞苴直據實查明自應在廣東省城守候白讓卿等伴送到粵提同人證確質方成信讞乃迎至中途錄供具奏顯係豫存和事之見顛預結案是以降旨交部議處非謂白讓卿等必有賊私亦非謂恩銘等未審賊款予以處分惟始則奏稱自粵起程中途提訊已有不肖認真查辦之意繼則僅據白讓卿等一面之詞遂謂並無收受苞苴直情事尙屬可信是其有意草率支吾跡近欺罔殊失朕以誠委用之意趙盛奎著革去侍郎並軍機大臣上學習行走降爲四品頂帶以三品京堂候補仍帶革職畱



任十二月補太常寺卿十七年三月以承審盧應翔干預訟事一案辦理失實下部嚴議部議降三級畱任 上以盛奎等未能審出實情遽請開復原官以致盧應翔瀆控不休實屬錯誤改爲革職畱任十八年擢倉場侍郎十九年三月調刑部右侍郎四月兼署戶部左侍郎七月以疾陳請開缺尋卒子家廉河南候補知縣

右 國史館本傳

國朝耆獻類徵初編卷百十三目錄

卿貳七十三

何凌漢

史諧

何彤然

那清安

寶善

斌良

英瑞

恩銘

隆文

臧宗沅

宗室成剛

國朝耆獻類徵初編卷百十三目錄 十一

--	--	--	--	--	--	--	--	--	--

147-850

國朝書牘類徵初編卷百十三

通奉大夫前署江西巡撫江西布政使司布政使湘陰李桓輯

卿貳七十三

何浚漢

公諱浚漢字雲門亦字仙槎先世青州益都宋南渡至道州爲東門何氏十二世泰來明萬厯拔貢生授南京蒙城縣知縣升貴州普安州知州繼兒子其諤爲嗣廩生充國子監生鴻臚寺主簿子鳴鳳廩生鼎革之際臨貢堅辭有馱齋詩集子之瀄增生公之高祖也曾祖盛生員娶趙氏祖志儀廩生娶周氏子三長文統季文繡次文給字章五廩生爲公之父三代皆以公貴 贈光祿大夫

工部尚書一品夫人章五公娶鄭太夫人生子二公其仲也公幼  
慧能虛孝敬章五公以學行伏一時公稟庭訓恆跪而受讀九歲  
應童子試若成人年十六州府試皆第一補附學生家極貧連丁  
內外艱困苦思自振拔益勤於學夜不能具燈燭恆然松枝自照  
讀經書必兼傳注食餼後文譽日起從學者自遠至嚴立課程至  
其鄉學者謂吾州經師人師自公後無能繼者嘉慶六年充辛  
酉科選拔貢生明年朝考一等爲吏部七品小京官文選司行  
走有雜職官被議鐫級聲明乾隆某年有恩賜加級或以無冊  
可稽駁之公曰冊雖毀恩詔同在也家宰疑其言許之九年應  
京兆試中式舉人十年成進士殿試卷進呈名列第四睿皇

帝謂筆墨飞舞拔置第三 賜及第授翰林院編修十二年充廣東鄉試副考官明年散館一等充順天鄉試同考官累充文穎館國史館纂修總纂文淵閣校理咸安宮總裁武英殿提調十九年升國子監司業轉左春坊左中允充日講起居注官升司經局洗馬轉翰林院侍講侍讀右春坊右庶子二十四年充福建鄉試正考官升國子監祭酒 今上登極 覃恩得蔭一子時已命次子紹業爲兄浚灝嗣令得四品蔭生以慰兄心 昌陵奉安 派扈從大臣隨入 地宮道光二年充山東鄉試正考官畱督學政轉翰林院侍講學士每試日靜坐堂皇閱卷胥役悉閉置一屋不少假嘗入奏云場中多一查弊之人卽多一作弊之人又云臣以爲

防弊之道苟挈其要領無事煩苛奉 硃諭襄許甚渥歲試時通諭各屬生員於來年科試年貌冊中自行填注誦習何經以便考校故所取乙酉科拔貢生多治樸學者試院中種竹數百竿忽產著六莖數日高七八尺因顏曰瑞著書屋並爲之記四年轉通政使司副使五年冬差滿入都 派稽察右翼宗學六年春授順天府府尹時前尹朱公爲弼無被議事而調任府丞公蒙 特擢召見時有人品學問朕所深知之 諭蓋在 帝簡中久矣甫莅任卽立內號簿飭屬訊案每月按簿催結得無畱獄八年元旦逆回張格爾就擒 上以公於協勦回疆之吉林黑龍江官兵由京進發彈壓靜謐支應安速兩次交部優敘順天所屬州縣擢至四

路同知更無升遷公以人材須鼓勵會大名府缺出與直督熟商  
何奏得旨以西路同知辛文祉補授遂開此例京畿獄訟繁多  
自府縣收理各案外由刑部都察院提督府奏交咨送無虛日公  
盡心研究大要以罪疑惟輕務歸仁厚如宛平縣民張文恭等曾  
習天主教改悔免罪海濱經卷蔓累多人涿州民果三毆死白兒  
兒乘屍大清河三載無獲等案一則援例減等一則奏請暫行監  
禁惟於兇盜案件謂宜懲一儆百如率獲奪犯傷差窩賊馬七等  
擊究兇惡棍匪王殿臣等皆從嚴訊辦府廨後有廢園就蒔花竹  
爲退思之地顏其亭曰佳晴喜雨快雪之亭志無忘民事也十年  
立春日循例進春上召問春牛顏色起於何時公奏月令稱出



土牛並無顏色宋時頒行經支幹各色略與今同始於仁宗景祐  
元年其博洽強記多類此七月有旨命大阿哥祭孝穆皇后  
陵寢公以大雨時行橋道難恃面奏請改注派親王大臣上深  
然之卽改派尹茲五年地方綏靜命盜各案甚稀聖心倚注  
久任不遷是年復調吉林黑龍江兵征臺灣彈壓予優敘如前  
八月授大理寺卿仍署府尹事十一年署兵部右侍郎授都察院  
左副都御史升工部右侍郎兼管錢法堂事務署禮部左侍郎充  
浙江鄉試正考官畱督學政重經解訪優行試事整肅士習益醇  
廡有桃李門元督學時所署也公補植桃李數百株蔚然成林長  
興學附生葉大成丁降服憂有增生缺出公咨禮部略曰例載爲

人後者爲其本生父母齊衰不杖期注云仕者解任士子輟考學政全書載廩增生遇降服喪不許應試無庸出缺至廩增缺出是百敘補例無明文致歷來辦理參差夫官員降服已無升補之班士子降服猶循敘補之舊於例本未盡一旦親喪固所自盡降服已屬抑情若復使之敘補一如無服之人於情亦有未安應請覈準通行是時又特命公偕督臣程祖洛審訊山陰會稽紳幕書役勾結舞弊一案研究月餘定讞擬在籍臬司李滂褫職餘犯軍流有差帝嘉明允十三年春調補吏部右侍郎兼管順天府府尹事務命卽來京供職時歲試未終也公益靖其爾位和而不同如吏部原議捐賑鼓勵章程有各衙門候補人員準捐銀儘先

補用一條已具稟矣公曰儘先可捐則正途之缺轉可爲捐班所有而正途亦非挾貨不得於官方吏治所傷實多同人以爲然原議乃寢時濬九門護城河以工代賑數萬人 上問工竣如何資送公奏附近京城之民無庸資送其隸外州縣及外省者應於散工日給盤川錢二百文再給印票一張注明制錢五百文回本籍衙門承領貧民歸有餘資散歸必速奉 旨允行調補戶部左侍郎兼署右侍郎管錢法堂事務再調吏部右侍郎仍署戶部右侍郎時湖廣總督訥爾經額等奏苗疆屯防變通章程 命戶部議奏同官因係湖南事情專屬公具稟乃援據舊章體察見在情形逐條籌覆準駁相半總歸於遴選廉能代謀生計同官折服不易

其一字十四年升都察院左都御史仍兼順天府尹事 賜紫禁  
城騎馬晉工部尚書仍兼署左都御史奉 命查勘明陵充經筵  
講官十五年充會試副總裁教習庶吉士十六年奏永杜回漕錮  
弊飭查順天各屬大小水路積囤籌緝始奏定水次鋪戶存貯糧  
米不得過十石之例疊署吏部尚書十七年吏部因京察一等人  
員有先由御史改官者已議駁矣公以不勝御史非不勝外任者  
比如此苛繩有妨言路援筆改議遂奉 俞旨十九年春調補戶  
部尚書仍署吏部尚書是年秋充順天鄉試副考官時公長子編  
修紹基亦典試福建距公使閩時恰二十年父子同科典京外試  
者前此惟乾隆丙子科劉文正公文清公父子庚寅科劉文定公

青垣侍郎父子而已後先濟美同朝羨之公於吏戶工三部皆久  
任遇公議事件多賴公爲主持從容正直熟思利弊鉅細一無所  
苟於政體人才特爲顧惜當戶部假照案發先後在捐納房司員  
皆獲咎當爲 上言其中人才甚有可惜者而準其捐復之 旨  
隨下吏部功司議處有近於文致者必往復剖論冀存寬大於工  
部司員拔其樸實任事者夤緣悉絕升轉之路遂通二十年春值  
孝全皇后喪齊集西淀十餘日歸寓偶病寒猶力疾趨公因精  
神短少陳請 賞假甫 命下遽不起口授遺摺而逝時是年二  
月五日也年六十有九 上嗟歎悼惜久之有品行端謹辦事勤  
慎等 諭 贈太子太保 賜祭葬諡文安據諡法勤學好問曰

文止於義理曰安我 朝二百年來得此證者自公始易名之典  
洵足與先儒陸文安公相媲美云公孝友純篤居恆莊  
敬刻厲家範嚴肅爲時所稱通籍四十年未嘗一干吏議在詞館  
攻苦如秀才時治官書自立程法 國史傳志手錄其子目以便  
檢校於蒙古地名滿洲人名尤詳總辦起居注所爲前後序掌院  
曹文正公稱爲傑作未嘗與本衙門撰文遇 誥冊文字重大者  
多屬公撰擬以公書法重海內屬敬書全唐文 御序付梓兩次  
以講官隨 園和 仁宗御製詩甚多壬申戊寅大考皆二等  
賜文綺辛未甲戌己卯三爲庶常小教習其殿廷文字之役自辛  
卯迄丁酉 派閱覆試 朝考散館試差大考漢教習卷絡繹無

開前後任京兆最久凡察吏安民弭盜備荒諸政不勝書勘估督  
修諸要工十餘次承辦 孝穆皇后梓宮由寶華峪奉移至龍泉  
峪奉 特旨改派公代養公尙阿往每有遷擢必兼他職九掌文  
銜五權冢宰四 派經筵直講以京尹而歲 賜濩貂以尙書而  
賜二等濩頭等貂六次 賜福字皆 特命入乾清宮侍書

寵光稠疊錫賚便蕃可謂人臣知遇之最榮矣著撰詩文爲雲腴  
山房集所書碑版學者珍習之配廖夫人子四紹基丙申進士翰  
林院編修紹業蔭生候選縣主簿出爲兄嗣先歿紹祺紹京皆舉  
人孫慶涵監生慶深鼎官聯官孫女八紹基等奉柩歸葬將至揚  
州先以狀來乞元爲神道碑元荒蕪家居因與公雅故又紹基爲

余教習庶吉士之翰林在京嘗以學術相善謹按狀敘而銘之曰  
自公幼學經師人師 帝擢魁鼎館職試詞冊誥鴻文屬鉅筆爲  
文章經史班韓是追書法晉唐寶若鼎彝奉使衡文品學兼資魯  
齊教行室生瑞著卿歷五部職效三司久任京兆三輔安治鋤奸  
弭盜儒雅便宜愛人節用慎於度支弼 聖敷化謨慮書思官四  
十年吏議弗羅循理度義易名典垂公子大器繼昌於時我衰頽  
突勉文此碑

右神道碑銘阮元撰





史譜

史譜山東樂陵人嘉慶十年進士改翰林院庶吉士十二年散館授編修十五年充廣東鄉試正考官尋丁祖母憂十八年服闋回京供職十九年授浙江道監察御史二十年六月奏言民人越訴定例禁嚴竊見近來京控日漸繁多固由州縣之因循亦由民情之刁健往往有州縣承審未久旋已控府到府未久旋已控司道督撫以至來京控訴者又有州縣傳審避匿不到從而控府該府傳審又復避匿從而控司道督撫以至來京控訴者多方取巧並冀掩其越訴之咎如此澆風實不可長請 敕酌定章程以昭限制疏入下刑部酌議具奏尋議嗣後民人京控未在本省控理者

卽有屈抑先治以越訴之罪虛誣者照誣告治罪外加枷號一月未告而捏稱已告審虛者照誣告加等律再加一等若赴府縣具控而逃匿者獲日照應得之罪加逃罪二等定爲例十月奏五城飯廠每年散給貧民棉衣千件人多衣少未得者或致向隅且官衣尺寸一律未能皆適民用請改支製衣工價按名勻給下戶部內務府會議尋議折錢散放易滋流弊惟五城僅領身長三尺餘之棉衣千件不可不量爲調劑嗣後除於例領棉衣千件外添製身長二尺餘者千件分城散給十二月轉掌浙江道監察御史二十一年六月充湖北鄉試副考官十月巡視北城二十二年六月督同指揮徐珍等緝獲斂錢惑眾之匪犯石祿奏請嚴辦 上以

其督率有方下部議敘十月遷禮科給事中二十三年稽察祿米倉二十四年四月轉戶科掌印給事中九月巡視中城二十五年八月巡視天津漕務十月俸滿截取記名以繁缺道員用十一月授福建臺灣道遺缺道光元年補浙江甯紹台道二年正月遷兩浙鹽運使旋擢江西按察使九月升雲南布政使五年丁母憂七年服闋八年授陝西布政使十年九月 命暫護巡撫事十月兼攝西安鎮篆十一年二月實授陝西巡撫先是御史邵正芻以奸民種買鴉片煙貽害民生奏請查禁下其議於直省督撫至是史譜奏言陝西向不出產鶯粟等花並無造作鴉片煙之事惟恐外來奸商偷運乘閒銷售應飭地方營汛實力巡查年終結報得

旨著該撫通飭所屬認真查拏明定賞罰章程兵役盤獲立予賞  
賜得規縱放嚴行究辦各州縣因公下鄉飭令畱心查訪每屆年  
終由該管道府出具並無種鴉片煙印結詳報該撫該撫奏報一  
次不得視爲具文六月奏告病告休人員請以初報到司之日卽  
由司詳請具題以杜弊延而昭畫一下部議行八月 上以五旬  
萬壽加惠臣工 諭曰巡撫史譜任內罰俸七案俱著開復九月  
以承辦鄉試試卷之布政司經歷劉長庚未能妥辦致未經投卷  
者百餘人譜據實劾參請將長庚等交部議處會御史陳焯以學  
政違例送考藩司不行駁回史譜奏參含混入告 命譜明白回  
奏譜奏言口外士子道里遙遠不能剋期到省學政錄送遲延係

照成案辦理藩司不行駁回亦因有案可憑惟前此奏參未將歷科辦理情形詳晰聲敘實屬疎漏應請察議得旨史譜著交部察議尋議奪俸六月是月以葭州綏德兩州所屬村莊夏秋被雹請緩其賦允之十月以譜任藩司時失察西安清軍同知衙門濫給效力把總委牌降四級畱任又以違例奏畱丁憂同知張坦承修嶽廟工程復降四級畱任十二年五月奏言陝省界連川楚向有匪徒自名刀客睚眦細故拔刀相向民莫敢較屢經懲創未盡根株請照江蘇懲辦刀匪例凡緝獲逞兇之刀客罪止枷杖者械繫之限一年改行積兩限如故卽治以棍徒滋擾律下部議行七月偕陝甘總督楊遇春奏裁鄜州州同一員蒲城縣巡檢一員

甯羌州褒城縣所屬之驛丞各一員延安府及沔縣府谷縣之訓導各一員得旨允行九月以興安府猝被水災請賑恤並請運糧平糶又以葭州被雹村莊請緩其賦十一月以南山一帶歉收請酌借倉糧接濟均從之尋奏劾修城草率浮冒之通判張濟寬請革職嚴究上是之十三年九月以興安府所屬廳縣秋雨過多榆林府所屬州縣被旱被雹俱請緩徵其賦均如所請行是月調貴州巡撫十一月入覲授光祿寺卿十二月授詹事府詹事充日講起居注官十四年二月擢內閣學士兼禮部侍郎銜十月署兵部右侍郎尋實授兵部右侍郎十五年八月署兼管順天府府尹事九月充武會試知武舉十六年三月署工部右侍郎兼

管錢法堂事四月充殿試讀卷官五月轉左侍郎九月以病奏請  
開缺 允之十月以前在巡撫任內於知縣謝長年謝長清調缺  
署缺未經查明率行批准自請從重議處得 旨史譜著交部議  
處尋議降二級畱任准其抵銷十七年二月卒

右 國史館本傳





何彤然

何彤然廣西平樂人嘉慶十年進士改庶吉士十三年散館授編修十六年充會試同考官十九年八月改江南道監察御史奏近日州縣中訛法營私將收糧串照內印寫如有重徵准其更正字樣於徵收正課外復借追比積欠爲名多方抑勒卽赴訴上司仍發交本官審辦莫爲申理橫加苛索罔上病民此事山東爲甚湖北江蘇等省亦間有之應請嚴禁得旨著該督撫嚴行查察指名參辦並將糧串內重徵更正字樣通行飭禁勿任影射以懲貪墨而安黎元又奏民人上控案件請敕下各督撫親提審訊諭曰直省設立藩臬二司綜理庶政又置督撫以統制之督撫之

職其初原爲察弊除奸與巡按無異今定爲實缺管理地方凡所部中有冤抑案情府縣不爲申理致小民跋涉來京控訴欽派大臣前往查辦試思在京部院衙門各有應辦政務豈能常令曠職使車四出各省又安用此督撫爲耶嗣後直省督撫遇有發交親提審訊案件務各親身鞠問違者卽治以違旨之罪發交兩司者亦如之其本省上控案件不得仍批交本府本縣任令掩護前非設法消弭遇案情重要關涉官吏者該督撫司道等當堂聽斷不可養尊處優槩委之首府首縣致令官官相護曲意彌縫務痛改因循疲玩積習九月奏請令民人自行捕盜並將斂錢與賊之愚民免其究治 上以其罔識政體不稱言官之職 命仍回編修

任二十一年充福建鄉試正考官二十四年充會試同考官道光  
四年大考二等五年充順天鄉試同考官六年二月擢詹事府右  
中允五月擢翰林院侍講七年三月轉侍讀十月授國子監祭酒  
八年七月充山東鄉試正考官八月調翰林院侍講學士提督山  
東學政十一年五月轉侍讀學士十二月差竣回京充日講起居  
注宮文淵閣直閣事十二年擢詹事府詹事十三年遷內閣學士  
兼禮部侍郎銜十四年二月丁父憂回籍十二月卒子元崇辛卯  
科舉人元景候選布政司理問元愷庚戌科進士內閣中書

右 國史館本傳

皇朝通志卷之八十一

三

那清安

那清安葉赫納喇氏滿洲正白旗人嘉慶十年進士以主事用分  
禮部十三年補官十八年升翰林院侍講尋充順天鄉試同考官  
十九年轉侍讀二十年擢侍讀學士二十一年遷少詹事二十二  
年授詹事二十三年遷內閣學士兼禮部侍郎銜二十四年正月  
兼正白旗漢軍副都統二月署翰林院掌院學士九月授禮部右  
侍郎二十五年三月充會試知貢舉六月轉左侍郎七月署鑲紅  
旗漢軍副都統兼管健銳營事九月調刑部左侍郎十一月調工  
部右侍郎兼管錢法堂事十二月充經筵講官道光元年正月  
命赴直隸按大名府知府王履泰河南開封府同知押運官陸有

恆挾妓飲酒獄科其罪又天津縣書吏謝大年等因修水利訛詐  
得贓鞠實官吏視職遺戍有差四月擢左都御史兼管光祿寺事  
六月稽察左翼宗學八月署正黃旗漢軍都統二年正月署兵部  
尚書二月署正紅旗漢軍都統閏三月充武英殿總裁五月管成  
安宮官學事兼鑲黃旗漢軍都統六月署刑部尚書尋授兵部尚  
書八月上祭社稷壇禮成以那清安禮儀嫻熟賞戴花翎  
三年調刑部尚書充殿試讀卷官朝考閱卷官四年改授熱河都  
統五年偕欽差大臣左都御史松筠太僕寺少卿斌良赴土默特  
按塔布囊拉巴珠爾聽從色楞旺楚克主使誣誣貝勒濟克默特  
扎布招民開地傾畧肥己等案蔽事旋任奏言竊見土默特案內

有假捏人命訛詐錢財一節竇東土默特蒙古近來第一惡習口  
外地方遼闊冬日嚴寒時多倒斃刁徒設計背置股竇人家門首  
冒認屍親捏砌案情任意訛詐鄉愚無知恐到官拖累撥錢和息  
一家被詐擾及闔村骸骨屢移遂遭殘毀爲害滋甚伏查移屍詐  
財刑律原有專條而蒙古定例凡軍流徒犯罪止折枷情重法輕  
未足以懲刁惡請嗣後遇有假捏人命訛詐錢財之案所擬軍流  
徒罪卽行實發不准折枷庶刁徒知所畏懼而地方可期安靜疏  
入下刑部理藩院議行六年復授左都御史兼鑲白旗漢軍都統  
七年三月署工部尙書七月又授熱河都統 召見時 上詢知  
那清安有嫡母年八十生母年七十七 命回左都御史任尋兼



鑲藍旗漢軍都統八月署禮部尙書九月復署掌院學士兼署鑲  
白旗滿洲都統八年正月復署禮部尙書八月署正紅旗漢軍都  
統十一月署正黃旗漢軍都統九年三月署禮部尙書六月充武  
英殿總裁署兵部尙書十年因揀選御史稽查崇文門稅務疏言  
稅務分立各口遠近不一專派稽察之員勢難兼顧請仍責成巡  
城各御史稽查易於周徧 上如其請十一年二月署正黃旗蒙  
古都統七月署工部尙書兼正藍旗滿洲都統充八旗鄉試錄科  
監射大臣十一月 賞紫禁城騎馬復授兵部尙書十二年八月  
充順天鄉試正考官十二月復署左都御史及掌院學士十三年  
充會試副考官十四年二月署鑲黃旗蒙古都統三月署刑部尙

書十月卒遺疏入 諭曰那清安自通籍以來游升卿貳朕御極後擢任尚書兼轄旗務克盡職守昨因請假准其開缺俾安心調理方冀速痊益資委任遽聞溘逝殊深軫惜著加恩贈太子太保銜照尚書例賜卹任內處分悉予開復應得卹典察例具奏尋賜祭葬如例 予諡恭勤十六年兵部司員辦理考試以殘廢之慶廉送考經御史陳功參劾 命尚書耆英左都御史武忠額查奏尋查明慶廉前於道光十一年送考時曾經監射大臣那清安等以殘廢扣除 上念其辦理認真 諭曰十一年監射大臣那清安秉公持正自應酌量加恩那清安見已身故伊子全慶著賞加二級子全志前官禮部員外郎全慶戶部左侍郎正藍旗滿洲

國史館本傳

三

副都統

右 國史館本傳

寶善

寶善覺爾察氏滿洲鑲藍旗人嘉慶十年由刑部筆帖式捐升員外郎十三年授 秦陵員外郎十五年捐升郎中十六年補工部郎中道光元年丁母憂是年 仁宗睿皇帝奉安禮成 命以應升之缺升用三年服闋授大理寺少卿十年遷太僕寺卿十二年調光祿寺卿十三年五月擢通政使司通政使八月以孟秋時享太廟陪祀誤班奪俸一年十四年五月升都察院左副都御史七月授兵部右侍郎十一月補鑲紅旗滿洲副都統十二年轉左侍郎十五年七月因安徽徽州營參將富通阿緣事降調送部引 見諭令降一級畱任寶善等將富通阿降調述 旨下部察議九

國朝通志卷之百一十三  
月以揀補宣化鎮標守備之驍騎校海靈阿箭射無準寶善以保  
舉不實下部議處尋議降一級調用 上改爲降二級畱任十六  
年正月杭州將軍桓格奏言乍浦駐防原設蒙古營員向例協領  
佐領缺出由佐領防禦內揀選如遇患病及弓馬輭弱一時恐不  
得人請嗣後於滿洲官員內一體揀選 上命兵部議奏尋偕大  
學士阮元覆奏言該將軍爲慎選人才起見應如所請惟所稱應  
選人員如遇患病等語查官員暫病告假病愈仍當入選若久病  
不痊卽應隨時甄別至弓馬輭弱更當認真考察俾衰庸不得戀  
棧庶幾營務得人疏入如所議行五月御史易鏡清陳奏各省兵  
餉摺放錢文請酌量市價之低昂以爲增減 上命兵部會議尋

覆奏各省兵餉搭放錢文或因錢價平賤減成搭放或由奏停鼓鑄全行放給銀兩向皆酌盈劑虛相機辦理至定例每銀一兩抵放制錢一串奏行已久今若憑市價之低昂以爲搭放之增減於錢法殊有關繫該御史所奏應毋庸議 允之先是閩浙總督程祖洛以疏防海洋盜劫各案請酌量更定處分 上命兵部議奏九月偕尙書薦恩等覆奏言嘉慶三年經兩廣總督吉慶奏定水師承緝處分定爲四參予以寬限後因積案過多難於開參屢請寬免今閩浙總督程祖洛奏請無論已參未參各案均照離任官議以降俸任意積壓不成政體嗣後請照舊例仍以二參完結量爲變通該員弁等有急功圖效之心自不至遷延規避以滋弊端

庶於洋政有所裨益疏入 上嘉納之又議駁密雲副都統布勒  
亨請添設虛銜翎長五員奏言兵丁祇在勤於訓練不在多設官  
員密雲營額兵二千一百名原設協領佐領防禦前鋒翼長前鋒  
章京驍騎校委署護軍校藍翎長各缺已有九十餘員足資操演  
若紛紛奏請添設未免漫無限制殊非整飭營伍之道奏入 從  
之十六年卒

右 國史館本傳

斌良

公以父光祿公 恩廕二品廕生引 見授主事嘉慶乙丑二十  
二歲補太常寺主事捐員外郎丁卯選戶部員外郎辛未補郎中  
癸酉滑縣教匪爲亂公隨大學士托公津軍營辦理文案滑匪平  
賞戴花翎京察一等乙亥投山東兗沂曹濟道丁丑改投蘇松  
常鎮太督糧道庚辰升陝西按察使調補河南按察使辛巳公爲  
撫部所劾奉 旨來京以四品京堂候補壬午補授太僕寺少卿  
甲申奉 命赴察哈爾查驗馬匹六月還京復 命七月奉 命  
往青海致祭湛巴拉多羅貝勒十一月還京復 命丙戌七月奉  
命往喀什噶爾軍營辦事十月以陳奏遲延被議奉 旨以六



品郎中降補丁亥補刑部郎中庚寅松湘浦尙書赴綏遠城讞案  
隨赴山西讞案丙申補授內閣侍讀學士丁酉奉命至土爾扈  
特部賜奠多羅郡王戊戌升太僕寺卿癸卯授都察院左副都御  
史遷盛京刑部侍郎甲辰調任京刑部侍郎丙午授駐藏大臣丁  
未七月抵前藏十一月卒遺摺到京上嘉悼久之加恩照都  
統例賜卹

右抱冲齋詩集年譜張維屏錄

公詩八千餘首公弟可庵觀察法良爲刪存五千餘首刻抱冲齋  
詩集七十卷桂星垣觀察文燿返粵出以見示因輯其佳句刻之

右聽松廬詩話張維屏錄

英瑞

英瑞那拉氏滿洲正白旗人由舉人於嘉慶十二年補國子監助教十五年升刑部主事二十二年五月升員外郎六月上闕射布靶英瑞射中的 賞戴花翎二十三年調補步軍統領衙門員外郎二十四年升郎中道光二年以刑部司員任內疏防候審人犯在押自盡部議鑄級畱任四年造辦處玻璃庫失火撲救出力 賞緞匹尋超擢鑲黃旗蒙古副都統五年授刑部左侍郎六年署鑲黃旗護軍統領七年八月調鑲白旗漢軍副都統九月歷署左翼前鋒統領工部左侍郎兼管錢法堂事務十二月充右翼監督尋以署工部侍郎任內屯田司遺失冊籍下部議鑄級畱任八

年四月黑龍江將軍祿成有派兵不公及私馬交站餒養各款命英瑞偕吏部尙書文孚馳往查辦鞠實奏請褫職嚴訊復訊出家人徐添桂詐誦銀兩情事祿成於取供後自戕英瑞以未能豫防下部察議尋將徐添桂等治罪如律時奉天府蓋平縣人民鄒士杰呈控知縣潘彭年等浮收蠶稅並科派兵差復州人民許潤堂亦呈控知州李武曾徵收科派有旨交英瑞等回京路過時查訊五月訊知蓋平縣以商稅無著責成蠶戶至協濟兵差車輛將無力貧民一律勻攤復州亦以協濟兵差按畝攤派均屬不合按律定擬並奏言蓋平縣蠶稅廠因各蠶戶圖賣樵薪並開墾奇零地畝佈種蔬豆致出繭既少商稅有虧但以商人應納之稅費

之蠶戶而每年仍以商稅全完具報辦理既未平允名實亦不相符並恐復州金州岫巖廳等處應收繭稅復有似此情形者應令將軍府尹派員履勘蠶樹應補植者飭令補植田畝應升科者查報升科庶有以裕國課而均民力如所請行六月補鑲白旗護軍統領七月以頭等待衛恩緒毆斃家人遷延不奏議降二級畱任十月因病懇請開缺 允之二十年卒子承恩山東候補知縣

右 國史館本傳

國朝文獻通考卷之三十三

三

--	--	--	--	--	--	--	--	--	--

147-892

恩銘

恩銘棟鄂氏滿洲正紅旗人嘉慶十三年進士改翰林院庶吉士十四年四月散館授編修五月擢詹事府右贊善十一月遷翰林院侍講十五年充日講起居注官十七年二月轉侍讀尋遷詹事府左庶子三月升翰林院侍講學士四月轉侍讀學士十八年升詹事府少詹事十九年二月升正詹事閏二月擢內閣學士兼禮部侍郎銜三月補鑲紅旗漢軍副都統九月授兵部右侍郎二十年五月兼署刑部左侍郎十月上以刑部具題立決本章積壓至二十二件之多命將堂司各官均交部議尋議奪職得旨恩銘年力方壯派令兼署刑部召見時囑其畱心學習乃不思奮

勉於部務全不究心甚屬可惡著降爲三品京堂再觀後效見有  
大理寺卿一缺卽著恩銘補授二十一年七月授盛京工部侍郎  
十月調盛京刑部侍郎二十三年九月 上詣陪都恭謁 祖陵  
禮成 賞加一級十一月調禮部左侍郎授正黃旗蒙古副都統  
十二月以審擬宗室全勝等開設花會一案犯事在 恩旨以前  
率行援請寬免 飭之二十四年正月兼管國子監事務五月調  
鑲白旗滿洲副都統六月調吏部左侍郎八月充順天鄉試副考  
官十二月署刑部左侍郎二十五年正月充經筵講官四月以承  
審兵部遺失行印日久未得確供降三品頂帶旋訊明失於上年  
秋圍遼次論典守不慎各官罪如律復二品頂帶九月署右翼總

兵官充武會試副考官道光元年授直隸馬蘭鎮總兵官兼管內務府大臣二年三月以裕陵隆恩殿工程有尠朽情形恩銘有查工之責未能據實具奏下部議處部議降三級調用上加恩改爲降四級畱任閏三月命來京另候簡用是月以失察賊犯王九孔等偷伐青椿內外樹株下部議處部議降三級調用諭曰恩銘失察之咎固無可辭惟究因伊獲犯破案著降爲三品頂帶署吏部左侍郎仍帶降二級畱任六月授刑部右侍郎賞還二品頂帶七月補正黃旗蒙古副都統八月充崇文門副監督旋充順天鄉試副考官十月轉刑部左侍郎三年正月調鑲白旗滿洲副都統授總管內務府大臣尋調兵部左侍郎四月吉林將



軍富俊奏部駁揀選驛站官員辦理兩歧請仍交原議大臣會議  
上命恩銘偕大學士戴均元等議奏尋奏言查吏部則例吉林  
驛站官向無漢軍應否揀選明文以致承辦各員舍案從例據咨  
議駁請嗣後吉林驛站官改照黑龍江之例准其以漢軍人員補  
用任滿後亦照黑龍江之例以驍騎校升補不准升用文職以示  
限制至吉林助教不准漢軍揀選亦未平允請 敕部改歸畫一  
並請纂入則例 從之是月調戶部右侍郎十月充武殿試讀卷  
大臣四年三月調正藍旗滿洲副都統七月己革通判董椿代擬  
流官犯侯際清賄求贖罪事覺詞連恩銘 諭曰恩銘以二品大  
員不知自愛乃與市井匪人往來交結以致董椿向其囑託公事

又不卽時舉發有玷官箴著交部嚴加議處部議奪職五年 賞  
給四等侍衛作爲古城領隊大臣七年二月 賞給頭等侍衛作  
爲哈密辦事大臣七月劾哈密巡檢謝薪陽違例用刑復將唆訟  
之家人吳誠於提傳後縱令潛逃應請革職以爲藐法濫刑者戒  
如所請行九年八月丁母憂回旗十二月授通政使司參議十年  
賞給二等待衛作爲烏里雅蘇臺參贊大臣旋 賞給頭等侍  
衛十一年授理藩院右侍郎十二年二月授正紅旗蒙古副都統  
九月調工部左侍郎授右翼總兵官 命教習庶吉士十三年三  
月充會試副考官四月調倉場侍郎九月署漕運總督十月調鑲  
黃旗滿洲副都統先是御史炳輝等以漕糧折色糧數必虧奏請

剔除積弊 上命漕運總督及有漕各督撫安議具奏十二月恩  
銘奏言旗丁水次折色本干例禁緣州縣因米色不純一經折色  
卽免挑剔旗丁等又以折價易以侵漁抵通之後非請緩交曬廳  
卽請緩交餘米甚至捏報遭風收買回漕種種弊竇在所不免當  
於飭禁示內剴切曉諭如有詳請緩交曬廳餘米及捏報遭風收  
買回漕各弊必徹底根究據實嚴辦並行知各糧道幫弁將州縣  
例給各丁行月等米一併足數領兌分析造冊另儲一倉俟到淮  
時按款盤驗以免侵蝕至沿途陋規及有漕衙門各項積弊畱心  
察訪一經得實立即嚴參以期整頓奏入 從之十四年六月擢  
漕運總督十一月授都察院左都御史補鑲紅旗漢軍都統十五

年正月充經筵講官尋署兵部尙書三月察哈爾總管倭什洪額  
瑪哈迪瓦瑪哈吉爾迪以都統凱音布揀選不公右司員外郎瑞  
麟擅用官封驛遞私信等情遣官以印文赴京呈控 上命恩銘  
偕侍郎賽尙阿前往查辦尋奏言凱音布於鑲紅旗總管缺出因  
本處一時乏人奏請由京揀選爲慎重職守起見尙無不合惟與  
副都統蘇蘇勒通阿奏請揀選摺內聲稱該蒙古漸染鑽營習氣  
並未指實奏參以致該蒙古等心懷不平且於瑞麟擅用印封遞  
信料斂毫無覺察亦難辭咎凱音布蘇蘇勒通阿均請交部議處  
瑞麟應請依律加等遣戍倭什洪額等以印文遞呈均請照例革  
職疏入下部議行閏六月授禮部尙書仍兼署都察院左都御史

九月奉移 孝穆皇后梓宮恩銘恭理事務下部議敘十一月  
賞紫禁城內騎馬十二月 孝穆皇后 孝慎皇后奉安禮成  
賞加二級是月湖南巡撫吳榮光湖廣總督訥爾經額先後奏參  
安鄉縣知縣李慶孫辦理賑務不能妥協委員陳同治未能覈實  
散放 上命恩銘前往湖南會同戶部侍郎趙盛奎研訊鞠實論  
罪如律十六年四月給事中朱遠吉奏參廣西省關允營私各員  
命恩銘等前赴廣西會同鞠審尋查出南甯府同知吉慶因採  
辦官鹽輒於附近地方收買私鹽一萬餘斤裝運售賣請奪職遣  
戍潯州府知府孫世昌於稅廠失火燒斃人命不卽詳報自行撫  
恤賠修完結辦事顛預請勒令休致奏入如所請行先是有廣東

在籍刑部司員盧應翔挾嫌唆訟一案 上命恩銘等往鞫之會  
廷臣奏參前次昇寅隨帶司員白讓卿陽金城得受苞苴 命恩  
銘等嚴密查訊七月恩銘等以查審情形入奏得 旨前因有人  
奏參上年廣東隨帶司員白讓卿陽金城等有收受苞苴之處當  
降旨交恩銘趙盛奎查訊恩銘等既提訊石綸亭有託寄箱隻情  
事自應俟白讓卿到案質訊乃據奏稱自粵起程迎至前途提訊  
已有不肖認真問訊之意本日恩銘等奏查審情形輒據白讓卿  
陽金城一面之詞遂謂無收受苞苴情事審理案件於案情無據  
之處當逐細研求究出端倪方成信讞此案既有託寄箱隻之石  
綸亭代寄通州之知州趙桐無難三面質對又有家丁可究即使

見在未盡隨至廣東查傳提訊不過稍淹時日何得顛預將就豫存和事之見據其所具親供以爲實乎恩銘趙盛奎俱著交部議處議上 諭曰吏部奏恩銘趙盛奎處分議以革職係屬照例辦理恩銘趙盛奎前經派往廣東查辦事件自應確切質究方成信讞乃迎至中途顛預結案是以降旨將恩銘趙盛奎交部議處朕非謂白讓卿等必有贓私亦非謂恩銘等未審贓款予以處分惟始則奏稱自粵起程中途提訊已有不肖認真查辦之意繼則僅據白讓卿等一面之詞遂謂並無收受苞苴情事尙屬可信是其有意草率支吾跡近欺罔殊失朕以誠委任之意恩銘著革去尙書都統降爲三品頂帶仍帶革職畱任補授刑部左侍郎十七年

三月以承審盧應翔一案辦理失實下部嚴議部議降三級畱任  
奏入得 旨恩銘於盧應翔干預訟事未能審出實情請開復原  
官以致該革員瀆控不休實屬錯誤該部加等議以降三級畱任  
尙覺過輕著改爲革職畱任六年無過方准開復以示懲儆十八  
年正月補正白旗漢軍副都統閏四月調鑲黃旗滿洲副都統八  
月復授都察院左都御史兼正黃旗漢軍都統十一月授刑部尙  
書十九年授熱河都統二十年因病陳請開缺旋卒遺疏入 諭  
曰前任熱河都統恩銘由翰林洊升卿貳簡任尙書都統勤慎辦  
公克盡厥職昨因患病陳請開缺卽經降旨允准方冀就痊長資  
倚畀茲聞溘逝殊堪軫惜著加恩照尙書例賜卹任內一切處分



國朝文獻通考卷一百一十三

三

悉予開復應得卹典該衙門察例具奏尋 賜祭葬予舒文吏部

員外郎

右 國史館本傳

隆文

隆文伊爾根覺羅氏滿洲正紅旗人嘉慶十三年進士改翰林院庶吉士十四年散館改主事籤分刑部二十年以具題本章一日呈進立決本二十二件 上以該部堂司各官平時積壓實屬疲玩交部議處隆文議革職二十二年捐復二十三年四月補刑部主事六月遷翰林院侍講充日講起居注官二十四年轉侍讀二十五年升詹事府右庶子道光四年 命在批本處行走五年升翰林院侍講學士七年轉侍讀學士八年八月充順天鄉試同考官十二月升詹事府詹事九年擢內閣學士兼禮部侍郎銜十年授駐藏幫辦大臣十一年補鑲紅旗漢軍副都統十三年正月授

駐藏大臣時唐古忒界外博窩生番小頭人汪魯札布構衅侵掠其屬下頑夷藉勢殺斃番目出巢擾害 上命隆文會同前駐藏大臣興科將該夷每年夏間出巢市易章程妥議具奏九月偕興科等奏言滋事夷犯經派往查辦之遊擊孫如藻飭令札布導引拏獲然丹等五犯立即誅戮該頭人等均輸誠畏法繳出所掠賊物邊界肅清至博窩延袤千里均與唐古忒連界其地少鹽茶尤少牧廠每年夏間必來邊界牧放就便市易應請每年於五月朔許其出巢在南路駐劄十月杪回牧屆期令汪魯札布各遣頭人在牧處專司市易並令察木多遊擊偕碩板多千總帶兵巡查毋許私踰界址在番人既有頭人管束而大道又有官兵彈壓可期

永遠安靜得 旨所議尙妥著卽照辦十四年六月奏請將達賴喇嘛正副師傅分別鼓勵下理藩院議行八月擢理藩院右侍郎十五年二月轉左侍郎三月奏博窩逸犯自行投首並酌議管束章程略言夷目汪魯札布帶領全部夷人投歸應設立營官管束請於曲木多寺宿回宗昂沃有若南三處各設六品番目一員宿木宗等普龍古湯堆批三處各設六七品番目一員於前藏番目中素能辦事三人升補並准於汪魯等親信之人揀充俾永遠相安 允之七月御史黃爵滋奏參四川布政使李羲文挾制總督鄂山裝點情節冒濫軍功文武遷調高下其手知府金齊賢阿年力衰頹官聲狼籍 上命隆文嚴密確查具奏尋查明各款均無

寶證惟順慶府知府金齊賢阿性耽安逸年力就衰請勒令休致  
從之十六年五月授鑲紅旗滿洲副都統六月以保委步軍校  
高明魁箭射無準交部議處尋議降一級調用 恩予降畱九月  
調刑部右侍郎十七年四月調吏部右侍郎六月授右翼總兵官  
八月充順天鄉試監臨官九月授左翼監督十八年六月偕步軍  
統領奕經覆奏銀價日昂由各錢鋪奸商所出錢票注寫外兌字  
樣輾轉磨兌並無見錢開發請嗣後不准注寫外兌等字據凡開  
設錢店者應由大宛兩縣查明是否殷實取具五家保結若一家  
關閉錢鋪先將管事鋪夥人等枷責勒限兩月開竣票存逾限卽  
送刑部治罪不得再行輾轉討限仍行文原籍追產賠交並飭所

保之四家代爲開發 從之九月署左翼前鋒統領十一月疏言  
准內務府大臣奏稱慎重銀庫嚴密巡查章程查太和殿兩旁東  
西大庫外皆係庫房理宜晝夜嚴查其舊設看守官兵人數較少  
請由鑲黃正黃正白三旗添撥官一員兵十名於二庫階級下另  
設瓊棚各一座夜設更鐙在彼輪流住宿再查中左中右兩門東  
西大庫等四處原設更籌三支由內自行巡邏恐有疏懈積壓等  
情無從稽查擬請於景運門另添更籌三支俟閉門後由後左門  
隙傳進中左昭德貞度中右以次遞傳由後右門隙傳出如此接  
續巡查庶有稽覈每逢開庫之期俟該庫收發完竣卽責成中左  
中右進班章京及該處官兵眼同封鎖小心看守所有應需庫使

庫丁匠役人等應由內務府派委司員帶進事畢卽行帶出將人役名冊先期咨送景運門以便查覈放入差竣由司員章京等帶出其各門鎖鑰啟閉應令是日該班司鑰長親身看視庶足以昭慎重而免疏虞 上以舊設官兵已足巡查無庸添設餘如所請行旋調戶部右侍郎兼管錢法堂事務兼署倉場侍郎尋遷都察院左都御史授鑲紅旗蒙古都統十九年二月遵 旨議奏改期散放五城棉衣錢文三月擢刑部尚書 命馳往甘肅會同特依順等審訊甯夏前鋒伊克唐阿控告將軍和世泰副都統存華扣剋兵餉等款九月有西安防禦靈住稟訐本管上司一案 詔隆文馳赴陝西偕巡撫富呢揚阿審擬具奏尋訊明將軍富僧德收

受壽禮失察轎夫聚賭迨經靈住刁稟不行參辦輒聽求派令買馬殊屬錯謬副都統王蘭收受賀禮又派親隨買馬副都統布彥圖於同官收受餽送及屬員刁稟挾制並不據實奏參亦有不合均請交部嚴加議處靈住因求派差使不得列款刁稟挾制上司迨經傳訊又復至該將軍公堂誼鬧情節較重應發往新疆效力贖罪疏入照所議行十一月 賜紫禁城騎馬十二月管理健銳營事務尋 命在軍機大臣上行走二十年正月調戶部尙書管理圓明園八旗內務府三旗事務二月充稽查四譯館大臣管理上駟院事務三月充會試副考官五月 命教習庶吉士六月吏部奏參鄭履和蒙混截取知縣有 旨著派隆文何汝霖秉公查



辦尋查明鄭履和原名存訓廣西舉人道光六年在吏部呈請就教嗣於十五年大挑二等選全州學正改名履和該員二等冊內未注就教其就教冊內亦未注更名挑選至十九年吏部截取各省見任教職並聲明從前就教不准截取一條旋據廣西巡撫給咨送部該員因原咨履歷未將各情節聲敘當時並未查明本年二月將全州學正開缺該員卽於三月投供四月揀選至六月搜查全卷始查出更名就教各案並查揀選呈內亦無就教之語因以該員有心蒙混奏參斥革鄭履和於奉文截取時造報履歷清冊並不將就教呈明率卽領咨赴選已屬含混迨在部補行揀選又將呈詞舛錯尤爲蠱率應請 旨將鄭履和卽行革職吏部堂

司亦屬疏忽應交都察院議處 允之七月署管理戶部三庫事務九月偕大學士會奏兩廣督臣林則徐議覆御史駱秉章條陳整飭洋務五條一慎選洋商以專責成一嚴禁孖種以杜句串一嚴禁夷人久住省館以絕弊源一禁止夷船灣泊省河以防偷漏一內地洋銀與紋銀一律嚴禁出洋又議覆兩廣督臣林則徐請將窩販煙土人犯船貨產業分賞拏獲之人無論在洋在岸一體照行伏思在岸地方遼闊稽查難周儻比照在洋之例竟將房屋賞給恐奸民乘勢誣害富民不可不防其流弊請嗣後開設窯口與販之本犯及知情租賃之業主仍照新例將房屋一律入官餘毋庸議均 從之十月署理行營鑲黃旗領侍衛內大臣十一月

命赴易州偕直隸總督訥爾經額查訊泰甯鎮總兵鄂爾端那移西陵白椿情形尋訊明本年三月鄂爾端飭易州營遊擊喜順往查紅白椿界限喜順意圖簡便自紅椿起用繩直拉將白椿向外那移致占民田四頃有餘墳二百餘冢並有廟宇在內卽開具清單稟鄂爾端交易州知州阿達順按單傳訊地戶以時值青苗稟俟秋後再查嗣署遊擊倭什琿將那移情節回稟鄂爾端又親赴各汛查勘令千總郭其昌將白椿仍復那回因未能均按舊址以致界內尙有民田九十餘畝墳十三冢復加詳細履勘情形相符奏入 諭曰已革總兵鄂爾端於西陵寢重地無端任性那移白椿並未奏明請旨致將墳冢民田圈占迨查知後迴護處分

並不據實參辦又令私行那進種種狂謬著發往黑龍江充當苦  
差已革遊擊喜順奉委查勘白椿並不按照原定章程擅自那移  
侵占民田墳冢實屬藐法著發往烏魯木齊充當苦差易州知州  
阿達順有守土之責該武弁等違例那椿並不據實稟明直隸總  
督輒任該弁等將白椿那移亦屬昏愆著革職發往軍臺效力贖  
罪所有椿內田地墳冢著交見任總兵松峻確切查明諭令各該  
民人照舊管業十二月充經筵講官 命總理工程處二十一年  
正月英吉利因停止貿易滋擾粵洋 上命隆文偕楊芳爲參贊  
大臣預給關防隨將軍奕山馳驛前往廣東勦辦五月卒遺疏入  
諭曰戶部尙書隆文由庶吉士改授部曹洊升卿貳擢任尙書

在軍機大臣上行走老成端謹辦事質心前因英夷滋事經朕特簡爲參贊大臣馳往粵東辦理軍務方資倚畀遽聞溘逝軫惜殊深著加恩贈太子太保銜照尙書例賜卹賞給廣儲司銀二千兩經理喪事任內一切處分悉予開復應得卹典該衙門察例具奏靈柩回京時著沿途各督撫派員妥爲照料並准其入城治喪伊長子刑部筆帖式桂清次子懷清著俟百日孝滿後交該旗帶領引見以示朕篤念盡臣至意 子謚端毅尋 命惠親王往賜奠 醮十一月奉 旨本日據正紅旗將原任尙書隆文之子帶領引見朕追念盡臣深爲憫惻隆文著加恩入祀賢良祠其長子桂清著於服闋後以刑部主事遇缺卽補次子懷清著於服闋後以六

品筆帖式遇缺即選

右 國史館本傳

國朝聖訓卷之二十三 禮部七十三

三

匡章傳

卷之三

三

戴宗沅

戴宗沅安徽來安人嘉慶十三年進士改庶吉士十四年散館改主事分刑部二十一年補官二十三年充河南鄉試副考官二十四年升員外郎旋丁母憂二十五年丁父憂道光三年服闋補原官旋升郎中四年京察一等記名以道府用五年投江南河庫道六年擢直隸按察使十年擢刑部右侍郎十一年六月江南道監察御史徐培深奏參前任山東壽光縣知縣恩福勒買布匹及藉詞開渠科派錢文又見在陽信縣任內攜取民間贏頭減價勒買草料及拆毀官廄作爲馬廄等情 上命宗沅偕吏部左侍郎寶興往訊究出贏馬俱係自置餵養草料均按市價平買馬廄九間



係隨時添蓋亦無拆毀官廳之事至開渠一事未能通籌全局妄議章程實屬辦理不善定擬如律八月旋京署工部右侍郎兼管錢法堂事務尋兼順天府府尹事務十月充武鄉試副考官十一月直隸已革深州知州蔣兆璠致書列款詆毀已革清河道徐寅第經直隸總督琦善奏參上命宗沅偕刑部右侍郎特登額謝明徐寅第收受蔣兆璠餽送節壽二千四百兩從重發往軍臺效力贖罪蔣兆璠以屬員致書詆毀上司意存挾制性情險詐治罪如律十二月內務府大臣禧恩等審出太監張進幅買運鴉片煙與回子貝勒柯克色布庫夥同吸食前任刑部堂司各官未能究出實情罰俸六箇月旋奉諭戴宗沅毋庸兼署工部右侍郎錢

法堂事務十二年因前署直隸布政使任內失察清河縣尹老須  
倡立邪教一案降二級畱任十三年卒

右 國史館本傳

國家經濟委員會  
第一一七二

五

147-922

宗室成剛

宗室成剛鑲藍旗人由四品宗室於嘉慶十三年補宗人府筆帖式二十一年委署主事旋補經歷二十二年遷副理事官二十四年四月充宗室公中佐領六月升理事官二十五年授殺虎口稅務監督道光元年差竣回京十一年京察一等奉旨成剛著交軍機處記名遇有應升缺出題奏是年擢內閣侍讀學士十二年七月上以京畿入夏以來雨澤稀少糧價增昂飭順天府分設七處平糶以濟民食命成剛偕隆勳前往孫河督同地方官妥爲經理諭曰此係加惠羣黎之事如有奸胥市僧冒領囤積立即嚴拏懲辦其有辦理不善之處卽據實具奏十五年升太常寺

少卿十二月遷通政司副使十六年升光祿寺卿十七年轉大理寺卿十八年九月升都察院左副都御史十一月升盛京兵部侍郎十九年九月奏言查明石山驛站被水請緩徵以紓民力許之十二月調盛京戶部侍郎二十年十月奏擬添金州兵額兼添設鳥槍以資捍衛下部議行尋偕盛京將軍耆英奏白旗堡小黑山等處偏隅成災分別應蠲應緩並請賑恤上如所請是月署盛京副都統十二月調盛京刑部侍郎兼署奉天府府尹二十一年二月奏內倉米石不敷關領請撥附近旗倉粟米以資支放而節帑項允之十一月奏奉天天橋廠巡檢李燮應賠米石照數全完請開復畱於奉天差遣委用得旨允行尋吏部奏以李燮

革職開復後例應給咨回籍候選該府尹違例奏請畱於奉天差遣委用議降一級調用上加恩改爲降二級畱任二十二年正月調刑部右侍郎八月授鑲白旗漢軍副都統二十三年正月命偕李德馳赴南河工次督率挑工旋奏南北兩岸由上而下直至尾段挨分詳查認真督辦子河長河一律告蒧諭曰處處畱心不可稍涉大意四月轉刑部左侍郎調正黃旗滿洲副都統七月仍命偕李德馳赴南河將見辦及應辦各工分別緩急覈實勘估嗣奏續勘江境培隄挑河等工連前次勘估各工除剔歸緩辦外籌撥銀款六十萬兩下部議行閏七月調吏部右侍郎十一月賞紫禁城騎馬二十四年正月署戶部右侍郎兼管錢法堂

事務二月調戶部右侍郎三月充管理幼官學大臣二十五年擢都察院左都御史尋授鑲紅旗漢軍都統二十六年署正白旗蒙古都統二十八年正月元旦淑氣清明和風翔洽上以諸務靜謐民物阜安惠逮耆臣以昭優待而迓祥和成剛與焉恩賞太子太保銜十二月升禮部尚書管理太常寺鴻臚寺事務二十九年六月因病請假尋卒年七十有六諭曰禮部尚書成剛由司員洊躋卿貳擢至正卿勤慎辦公克盡厥職昨因患病迭經給假調理方冀漸次就痊藉資倚任遽聞溘逝軫惜殊深著加恩賞給陀羅經被照尚書例賜卹任內一切處分悉予開復應得卹典該衙門查例具奏尋賜祭葬予諡簡敬長子慶廉見官宗人府

經歷次子慶智宗人府候補主事

右 國史館本傳



